


Aatasara Ioni + Maaki



John and Mark in the Aatasara dialect of the South Tairora
language of Papua New Guinea

Aatasara Ioni + Maaki
John and Mark in the Aatasara dialect of the South Tairora
language of Papua New Guinea
Buk Jon na Buk Mak long tokples Omwunra Toqura
(Aatasara) long Niugini

copyright © 2012 Wycliffe Bible Translators, Inc.

Language: Omwunra Toqura (South Tairora)

Dialect: Aatasara

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-02-27

PDF generated using Haiola and XeLaTeX on 11 Nov 2022 from source files dated 22 Nov 2019
 21406cdc-0a59-5163-a454-960414f5aa39

Contents

MAAKI	1
IONI	48

MAAKI Maakiva Iesusiva nruorara tura

*Ioniva nramari ni varu vaitiva nraase qora tiva nu quara
(Matiu 3:1-12; Ruku 3:1-18; Ioni 1:19-28)*

¹ Iesusiva Kotira mwaaquvano varura. Mwira qua suqe qua mwira osara vahireraro mwataamama vahiho. ² Haaru mwo enta Asaiaava Kotira qua qovarama sero qara ntuva tero tiqaro,

Taqaane, ni qua nraase qora tiva niani vaitira ne titaariro mwiva i vuni viqaro i aara tequama mwataanarove. (Mal 3:1)

³ Mwi vaitiva qumina mwataqaa variqaro aasara ntero tiqaro, Nroravano viani aarara tequama mwateta mwira aara avugavuma mwataivaro mwiva mwi aararaqaama so vuarive tianarove, tura. (Ais 40:3)

⁴ Kotiva mwira saahaga huvaro Asaiaava hogare varu entara mwi quara qara ntuva tovaro airi ihi vi vuvaro mwo enta Ioniva qumina mwataqaa qovarama vura. Qumina mwataqaa qovarama viro Ioniva nraase qora nramari niqaro mwisa tiva niro tiqaro, Néta qora saiqā vare varira qaqira seta nramari varaivaro Kotiva né qora saiqā vare vari quara nruka nataarive, tiro. ⁵ Ioniva mwitaa ti varuvata Iutiataitave, Ierusaremitaitave, esaa mwi mwatanaasa itai itai mwiva qua tunani vita uto variqata mwisa niari qora saiqā vare varura tiva qovarama sovaro Ioniva nramari mwisa nura.

⁶ Ioniva tuavaaga vahireraro mwo quara kameri saahi vara sero ututo tuavaaqava vahuvaro mwiva mwiraqai ututero reti tavaarana rupatero varura. Ioniva sia sara vara tu sero nraaitiro, mwiva kaikori nrero voravano kuruto nramarira nreqaro mwi sararaqai nre varura.

⁷ Ioniva nraase qora tiva niro tiqaro, Ni naatiara nriari vaitiva kepusavano ni naatara sero nrora vaitivanoma varianarove. Mwiva nrora vaitivano varisana ne qumina vaiti variqanara tina, sia né so kakataama vina nai suqu nraamwuma tai saantara avantu mwataanirave. ⁸ Ne qaqi nramari ini ni varuqo. Mwiva Kotira mwaraqura ini nianarove, tiro. Ioniva mwitaa turama.

*Ioniva Iesusira nramari mwura
(Matiu 3:13-17; Ruku 3:21-22)*

⁹ Mwi entara Iesusiva Nasareti mwatusa Kariritairo nri ntero Ioniva varunani utontero vuvaro Ioniva Sotaani nramariqi variqaro Iesusira nramari mwura. ¹⁰ Nramari mwira mwuvaro Iesusiva nramariqitairo qaqinani mwaari ntero taqovaro naavuvano qatua vuvaro mwiqitairo Kotira mwaraquravano kuri mwuku voti huva uto ntero Iesusiraqaa varura. ¹¹ Uto ntero Iesusiraqaa varuvaro quavano naavutairo mwitaama tiro:

E ni maaquvano variararo ni mwutusavano iara mwoqavata vahiso. Ne iara gamwateqanama varuqo, tiro.

*Saataaniva Iesusira mwataara hura
(Matiu 4:1-11; Ruku 4:1-13)*

¹² Quavano naavutairo mwitaa tuvaro gamwanrama sero Kotira mwaraquravano Iesusira vita varero qumina mwataqaa sia vaitivata varu mwataraqaa uro sovaro varura. ¹³ Mwini uro sovaro Iesusiva 40

entara variqiro vuvaro Saataaniva Iesusirara qora saiqqa varaarive tiro, mwira mwataara hiqaro taqovaro Iesusiva sia mwira qua riaraitiro, sia qora saiqqa utura. Iesusiva mwitaamaqiro vqaro qaasau vahikurivano nrue varunani varuvata naavuniasa vaitinravu uto mwiraqaa sugema seta ntaqaihi varura.

Iesusiva Karirini uro nai saiqqa hoqarama tora
(Matiu 4:12-17; Ruku 4:14-15)

¹⁴ Mwi entara mwo husa Ionira ntavaaqavu seta viteta karavuqi uro sovaro Iesusiva Karirini uro variqaro Kotira mwasaasa suqe mwasaasa nraase qora tiva niro tiqaro, ¹⁵ Mwi entava nri ntaiso. Kotiva iniqaa ntaqaihiari entava qaumaqa iso. Né qora saiqqa uti varira qaqira seta ne suqe mwasaasa tiva nianira né mwi quarara quqaave tiva seta riemwaqi vuata, tura.

Iesusiva Saimonisa Enturusa naarora
(Matiu 4:18-20)

¹⁶ Iesusiva mwitaa tiva sero vuva Kariri nruka tosa sataa vqaro taqovaro Saimoniva nai qata Enturusantiri variqaro vahe ne varura. Mwifanasa tavusa saiqqa vare varutanasa vahe nte varuvaro ¹⁷ Iesusiva mwitanasara tiqaro, Nétana ni naatiara nriate. Nétana vahe ntava seqata tavusa varaantema seta ni naatiara nriqata nraase qora vitevarave, tiro.

¹⁸ Iesusiva mwitaa tuvata mwitanasa mate mwiqiara niari vahe mwini seta Iesusira vatavare vurama.

Iesusiva Semisisa Ionisa nraarora
(Matiu 4:21-22)

¹⁹ Mwitanasa mwira vatama seta vuvaro Iesusiva pataqa vqaro taqovata Sepetira mwaagutana Semisivavata, mwira qata Ionivavata, votuqi variqata vahe ntuke hi vura haqire varura.

²⁰ Mwitanasa vahe haqire varuvaro qamwanrama sero Iesusiva mwitanasa nraarovata mwitanasa rieta niari qora Sepetiravata, mwira saiqqa varo vaitisavata, votuqi seta Iesusira vatama seta vurama.

Iesusiva vaana titovaro nritarero vura
(Ruku 4:31-37)

²¹ Mwitanasa Iesusira vatama seta vuvaro Iesusiva vuva Kapeniaani uro variqaro mwaara tu entaraqaa mwaara nraavuqi vera ntero variqaro mwiqi varusa mwasaasa tiva niro. ²² Iesusiva nraase qora tiva ni varuvata mwisa mwira qua rieta tiqata, Qike, mwiva nara quave tiri tiva timwiso? Mwiva sia mwaara osara ti varia vaitinravusa tiantema sero ti variso. Mwiva nrora vaitivano tiantema sero ti variso, tura.

²³ Mwitaa tuvaro Iesusiva mwaara nraavu mwiqi varuvaro vaanavano mwira vutaqi varu vaitiva nraavuqi vera ntero qua aasara ntero tiqaro, ²⁴ Iesusio, e Nasaretiniaavave. E tiri nataa hirerarave nriaro? E tiri ntuqutu taiga sarerarave nriaro? Ne i osara ntapihi sauva e nriaro. Kotiva i titaaisara e Kotira saiqaqai vare variarava variaro, tiro.

²⁵ Mwitaa tuvaro Iesusiva vaana mwira irora hiro tiqaro, Tirema variiane. Mwi vaitiraqitaira nritarera vuane, tiro. ²⁶ Iesusiva mwitaa tuvaro vaana mwiva mwoqama sero mwi vaitira tu varero qasaa qasaama sero qua aasara ntava mwatero qaqinani nritarero viro. ²⁷ Vaanavano nritarero vuvata mwitai uairama vita varusa sauqu ntukikiraqata seqata nai tiva mwi nai tiva mwi hita tiqata, Nara inraisavanove qovarama viso? Mwaa quara qaraaha quave. Mwi vaitiva kepusa qua tisatama vaanavanovata

mwira qua riaavo, tura. ²⁸ Mwisa mwitaa tivaqi vita nrita huvata esaa Karirini varusavata mwi quara riora.

Iesusiva Saimonira nriraatarara saahaqama sovaro qaqi tivura
(*Matiu 8:14-15; Ruku 4:38-39*)

²⁹ Iesusiva mwaara nraavuqitairo veva ntero Semisisa Ionisa vita varero vuva uro Saimonisa Enturusa nraavuqi vera ntero varura. ³⁰ Saimonira nriraatarara mwavanta tutoqa huvaro taintaqaa vaite varuvata mwisa mwirara Iesusira tiva mwita. ³¹ Tiva mwuvaro Iesusiva mwira uro taqero mwira sauquqa tu varero mwira mwaaviarama sero. Mwitaama sovaro mwira mwavantavano sugema viro naitarama vahuvaro mwi nraaseva tiviro sara uta nireraro tegua hura.

Iesusiva nriqa vusa saahaqama sovata qaqi varura
(*Matiu 8:16-17; Ruku 4:40-41*)

³² Iesusiva mwi mwatusaraqi varuvaro huarivano visovaro entama vuvata nraase qora nriqa vusavata, vaanavano vutaqi varusavata, vita varetta Iesusiva varunani uro sora. ³³ Mwitaa huvata esaa mwi mwatusaraqinaasavata Iesusiva varu nraavura geti mwira nrima varita huvai sora. ³⁴ Huvai seta varuvaro Iesusiva nraase qora airinti mwo qara mwo qarama sero nriqa vusa sugema natovaro mwisa nriqa vuva taiqa vuvata so varura. So varuvaro vaanavanovata airi vaitiqi varusa titamwa sovata nritareta vura. Nritaregata vi varuvaro Iesusiva vaana mwisara qao tiro tiqaro, Siavata qua tiate, tiro. Vaanavano Iesusira ntapihi sovarora tiro, Iesusiva mwitaa tura.

Iesusiva Karirini nrueqaro qua mwasaasa tiva nura
(*Ruku 4:42-44*)

³⁵ Mwira qararaara sia qaata huvaro Iesusiva tiviro veva ntero uro sia vaitivanovata varunani Kotiravata qua tireraro vura. ³⁶ Mwini vuvaro Saimoniva nai henasavatama sero mwira huua hirero viro. ³⁷ Vusa uro Iesusira huaama seta mwiravusa mwirara tiqata, Quqaara e mwaini variarata esaa mwaa mwatusaraqinaasa iara huua hi variavo, tita.

³⁸ Mwiravusa mwitaa tuvaro Iesusiva qaqao tiro, Varaivaqenravu mwo mwatusa mwo mwatusavata nrueqata qua mwasaasa nraase qora tiva niare. Ne mwasaasa mwisa tiva nirera nruvave, tiro.

³⁹ Mwitaa tiva sero mwiravusavata vita varero Karirini nrue variqaro mwaara nraavu mwoqi mwoqi vera ntero variqaro mwasaasa nraase qora tiva niqiro viqaro vaiti vutaqitairo vaanavata titamwa sovata nritare vurama.

Uhumakara utu vaitira saahaqama sora
(*Matiu 8:1-4; Ruku 5:12-16*)

⁴⁰ Iesusiva mwasaasa tiva niqiro vi varuvaro vaiti mwovano uhumakara utu vaitiva Iesusiva varunani nrintero tori sauru raviro Iesusirara po se tiqaro, E ni saahaqa hiataa hirera, e soma ni uhumakara nruka matenarave, tiro.

⁴¹ Mwitaa tuvaro Iesusiva mwi vaitirara po se tiva mwatero, nai sauqu miavi mwira mwavantaqaa vatero tiqaro, Ne mwitaa hiataa isana i mwitaama mwatarerave. I mwavantara sugema vuarive tuqo, tuvaro ⁴² mwira uhumakara qamwanrama tavanta vuvaro mwiva so varura. ⁴³ Mwiva so varuvaro Iesusiva mwi vaitirara kepusaqama sero tiqaro, ⁴⁴ Sia mwosavata tiva niraitira, viraro Kotira saiga vara mwate vari vaitiva i mwavanta taqaarive. Mwiraqaataira e Mosesiva mwaara qua tiva

tora rieqarama Kotira mwo inraisa mwirata nraase qoravano iara tiqata, Quqaama mwira mwavanta sugema viso tiate, tiro.

⁴⁵ Iesusiva mwitaa tuvaro mwi vaitiva sia Iesusiva tunte hiraitiro, mwi quara viti tiva ni viri tiva ni huvata esaa vaiti riovaro mwira saara Iesusiva mwo mwatusa mwo mwatusa qoqaa vuariva sia vahuvaro mwiva qaqira sero sia mwatusani viraitiro, qumina sata variqiro vuvata nraase qora itai itaita mwira taqarerata nrurama.

2

Iesusiva hini mwavanta qutu vu vaitira sugema mwatora

(Matiu 9:1-8; Ruku 5:17-26)

¹ Iesusiva Karirini nruantero nrima ntantero Kapeniaani uro varuvata mwi mwatanaasa Iesusiva nrima variso tu quara rieta ² mwisa airivano uro Iesusiva varu nraavuraqi uairama vita nraavu mwiavata kuraama seta qetianavata huvaigu sovaro mwovano mwiqi vera ntaariva sia soqa hura. Mwitaa huvaro Iesusiva nraavu mwiqi variqaro mwasaasa tiva ni varura.

³ Iesusiva tiva ni varuvata vaiti mwonravuvano niari hena vaiti mwo mwira mwavanta hini qutu vura taintama vare nrura. Erahiamuaan-tema vaitinravu mwira taintama vareta nrura. ⁴ Mwiravusa nri nteta Iesusira nraaqani vuanarave tita, taqovata nraase qora airivano varuvata mwiravusa nraavu vutaqi vera nteva sia soqa hura. Sia soqa huvata mwiravusa qaqira seta nraavu qiata tahiporaqaa mwaari nteta mwi vaitira vara mwaari vateta, Iesusiva nraavu vutaqi varuvata mwiravusa Iesusiva varura mwira miavi ntukuraa seta. So ntukuraa seta nriqa vu vaitira taintaqaa vatora qasomase saqi vuvaro mwi taintava nraase qora vutaqaa uto vahura. ⁵ Vahuvaro Iesusiva riovata mwi vaitinravusa niariaqai tiqata, Quqaama mwaa vaitira Iesusiva so sugema saanarove, tu vaitinravusa varuvaro Iesusiva hini mwavanta qutu vu vaitirara tiqaro, Ni maaquo, e Kotira qua raaquta saanara ne mwi quara nrukama mwataugo, tiro.

⁶ Iesusiva mwitaa tuvata mwaaara osara ti varu vaitinravusa mwiqi varusa riemwaqi vita tiqata, ⁷ Qaqao, mwi vaitiva naraqamave mwitaa tiso? Mwiva mwitaa tigaroma Kotira uaqama mwate variso. Siana qumina vaitivano variqaro nai hena vaitiara, E Kotira qua raaquta saanara nruka mwataugo, tianarove. Kotiva mwivaqai so mwitaa tianarove, tita.

⁸ Mwisa mwitaama nraato riovaro Iesusivavata mwisa vu nraato tura ntapipi sero tiqaro, Né nataamaqive mwitaama riaavo? ⁹ Ne mwaa vaitira hini mwavanta qutu virara tiqanama, E Kotira qua nteqa saanara ne nrukama mwataugo, tuqatama né niara tiqata, Qaqao, i quavano unra quave. Sia quqaa qovara hianarove, tiarave. So mwaini riaate. Ne mwi vaitirara tiqana, Tivira ena tainta tu varera vuane, tiariro sove ni quara mwiva mwitaa hianarove? Né tiva mivaqena riaase, tiro.

¹⁰ Iesusiva mwitaama sero mwisa saparama natero mwiva mwisara qaiqaa tiqaro, Ne mwtatani mwtatai nraaqiarava varuqaro ni nroraqama saisanara tina, ne soma mwtatani variqana vaitivano Kotira qua nteqa saani quara nruka saanirave. Né ni quara quqaa quave tiate tina, ne mwate mwaa vaitirara mwitaa tirerave, tiro.

Mwitaa tiva sero Iesusiva hini mwavanta qutu vu vaitirara tiqaro,

¹¹ Tivira ena tainta tu varera ena mwaatani vuanema tuqo, tiro.

¹² Mwitaa tuvata esaa nraase qora mwira tage varuvaro mwi vaitiva tiviro miavi nai tainta tu varero vuvata mwisa nriharama vita sauqu ntukikiraagate varita Kotira nrutu tuaahereta tiqata, Mwaa saiqara mwo gara hi saiqara sia taqauna saiqarave, tura.

Iesusiva Rivaira nraarora

(Matiu 9:9-13; Ruku 5:27-32)

(Mwi entara taakisi vare varu vaitisa mwonravuvano taakisi vareqata hini munima niari tuteta hini munimaqai niari nrora vaiti nura. Mwitaa huvata gumina nraase qoravano taakisi varo vaitisa esaa mwisara muara vaitiqaima variavo tura.)

¹³ Iesusiva Kapeniaani vari sero mwiragaatairo nrima ntantero Kariri nramari tosasataa vuvata nraase qora airivano mwiva varunani uairama vita varuvaro Iesusiva qua mwasaasa mwisa tiva niro. ¹⁴ Mwiragaatairo mwiva vuva uro variqaro taqovaro Rivaiva, Arapiaasira mwaaquvano, opisi nraavuqi taakisi vare varuvaro Iesusiva mwirara tiqaro, Ni naatiara nriane, tiro. Mwitaa tuvaro Rivaiva tiviro Iesusira vataqiro vurama.

¹⁵ Iesusiva Rivaira nraavuqi uro variqaro nai nraaqiaranravuvata sara nre varuvata airi vaiti taakisi vare varusavata, vaiti mwonravu mwisara uaqaaqi saiqara uti variasave tusa mwisavata, nraavu mwiqi variqata sara nre varura.

¹⁶ Iesusiva vaiti mwiravusa sapata sara nre varuvata Parisi vaiti mwaara osara ti varusa taqovaro Iesusiva taakisi vare varusavata, uaqaaqi saiqara uti variasave tusa mwisavata, sara nre varuvata mwisa Iesusira nraaqiaranravu sapara hita tiqata, Naraqamave Iesusiva uaqaa hia vaitisa sapata sara nre variso? tita.

¹⁷ Parisi vaitinravuvano mwitaa tuvaro Iesusiva mwisa qua riero tiqaro, Qaqi vari vaitiva sia totaava hinani vi varirave. Nriqa vi vaitivaqai totaava hinani vi varirave. Ta vaitisave tiqata, Te avuqavuma seta nrue varurasave tiasa, ne sia mwisa nraarererana tuvuvave. Ne uaqaa hia nraase qorasa nraarererana tuvuvave, tiro.

Sara auramaterara tura

(Matiu 9:14-17; Ruku 5:33-39)

¹⁸ Mwi entara Ionira nraaqiaranravuvanovata, Parisi vaitinravuvanovata, sara auramate varuvata vaiti mwonravuvano Iesusira sapara hita tiqata, Ionira nraaqiaranravuvanovata, Parisi vaitinravuvanovata, sara auramate variavo. So naraqamave i nraaqiaranravuvano sia sara aurama taraitita, qaqi sara nre variavo? tita.

¹⁹ Mwisa mwitaa tuvaro Iesusiva tiqaro, Nraase vararera tiari vaitiva nai vataasavata qaqi varirera, sove mwovano mwira vataasara sara aurama taate tianaro? Qaqao, siama so mwovano mwitaa tianarove. Nraase vararera tiari vaitiva qaqi varirata mwira vataasa sia sara aurama taraitita, qaqima sara nrevarave. ²⁰ Mwo enta nri ntairata mwisagitai nraase vararera tiani vaitira tu vareta qaqinani vara saivata mwi entaraqaataita mwira vataasa ti atura ntiqata sara aurama tevarave, tiro.

²¹ Mwitaa tiva sero Iesusiva mwo quaqaa ntuvu sero tiva niro tiqaro, Mwovano tuavaaqa nrihi nrahitu vuanira haqirareraro siama mpuruqa qaraaha toqa sero mwiragaqa ntaaqautero haqiraanarove. Mpuuqa qaraaha mwira toqa saariro qaara vahiraro tuavaaqa nrihi mwivavata nroraqama sero nrahituanso tiro, sia mwitaa hirave.

²² Qaiqaa tirerave. Uaini qaraaha tati sero sia mwovano memeraa pahiqo ututaira haaruaa taqu vara sero qaraaha uaini mwira mwiqi raurirave. Memeraa pahi mwiva nraahagama viraqa mwiva mwitaa hiraro uainivano kepusa uaini utu viqaro memeraa pahi nrahitu saanarove. Mwitaa hiraro uainivanovata memeraa pahivanovata uaqama vuanarove. Memeraa pahiqotai ututaa taqura qaraaha taqu vara seta mwiqiqai qaraaha uaini raurarave, tiro.

(Iesusiva mwi quaraqaa ntuva sero tu quara osaravano mwataamama vahiro. Mwira votima seta siana nraarunia osaravata garaaha osaravata kuaaqi uairama seta tutaate, tura).

*Mwaara tu entarara tura
(Matiu 12:1-8; Ruku 6:1-5)*

²³ Mwo enta mwaara tu entaraqaa Iesusiva nai nraaqiaranravu sapata nraaso vutaqi qakuma votihura uiti vara tutoraqi vi varuvata mwira nraaqiaranravuvano vigatama uiti tava nteqa seqa nravaqita vi varuvata ²⁴ Parisi vaitivano mwisa taqeta Iesusirara tiqatama, Mwataqi mwisa taqaane. Mwaaraqaa qao tiva tai inraisarama mwisa vareta hiavo, tita.

²⁵ Parisi vaitinravuvano mwitaa tuvaro Iesusiva niari tiva niro tiqaro, Haaru ini haivagava Devitivavata, mwiaavata nrua mwisavata, sara nraataa huvata varuvaro Devitiva kuaa gara hura mwira né sia vukuqi saara ntuva seta riarave? ²⁶ Apaiaataava Kotira saiga vara mwate varuva vuniaa vaitivano varu entaraqaa Devitiva Kotira nraavuqi vera ntero mpereti Kotirani vatora vara sero nrero nteqa sero nai mwira vatama seta nrusavata hini nuvata nrorave. Kotira saiga vara mwate varu vaitisaqai mwi sarara nraataara vahuvaro qumina vaitivano mwi sarara nrero mwi quara nteqa sorave, tiro.

²⁷ Iesusiva mwitaa tiva sero tiqaro, Kotiva vaitiara riegaro mwaara enta vahianarove turave. Kotiva sia mwaara entara riegaro vaiti utu tairave.

²⁸ Ni mwatani mwatatai nraaqiarara nroraqama saisana varigana ne mwaara entaqaa ntaqaihqanama nena sasa hiani saigara soma varaanirave, tiro. Iesusiva turama.

3

*Mwaara tu entaraqaa Iesusiva vaiti sauqu suqema sora
(Matiu 12:9-14; Ruku 6:6-11)*

¹ Mwo enta Iesusiva mwaara nraamwuqi vera ntero taqovaro vaiti mwovano sauqu hini kukokaqama vuva varuvata ² mwiqi varusa mwonravuvano tiqata, Sai variqata taqaararo Iesusiva vaiti sauqu kukoka mwira mate mwaara tuna entaraqaa suqema sairera, mwira saara mwiraqaa qua vataare, tita.

³ Mwisa mwitaa tiva seta Iesusira taqe varuvaro Iesusiva sauqu hini kukokaqama vu vaitirara tiqaro, E nrira vaiti variara vutaqaa tivira variane, tuvaro mwiva tiviro varuvaro ⁴ Iesusiva mwisa sapara hiro tiqaro, Tirenravu teta mwaara qua riegatama mwaara tiana entaraqaa nataa hiani saiqarave so varaanarave? Te mwi entaraqaa vaiti mwo saahagamave mwataanarave? Mwira uaqamave mwataanarave? Mwaara tiana entaraqaa te vaiti mwo saahaga hiararo mwiva qative varianarove? Te qaqira seta mwi vaitira ruve saanarave? tiro.

Iesusiva mwitaa tuvata mwisa sia quavata tisa tirema varuvaro ⁵ Iesusiva tagovata mwisa sia mwi vaitirara po se tiraitita, kepusa viri rate varuvaro mwira saara Iesusira mwutusavano uaga huvaro mwira raraqa tovaro mwi vaitirara tiqaro, Ena sauqu ntatutaane, tuvaro mwiva nai sauqu ntatuta sovaro sugema vura.

⁶ Mwira sauquvano sugema vuvata Parisi vaiti mwiravusa mwaara nraavuqitai veva nteta uro Herotira vataqita nruosa sapata uairama vita variqata Iesusira nataama setave ru saanarave tiva seta nai tiva mwi nai tiva mwi hi varura.

Nraase qoravano itai itaita uro Iesusira taqora

⁷ Iesusiva nai nraaqiaranravu vita varero nruka tosasata uro varuvata nraase qora airivano Kaririniaasave, Iutianiaasave, ⁸ Ierusalemiginaasave, Itumianiaasave, Taiaaqinaasave, Saitoniqinaasave, Sotaani nramari vuturu qarahi hini varusave, mwisa Iesusiva mwo saiga mwo saiga vare varurara rieta, mwisa Iesusiva varura nramari tosan uairama vita varura.

⁹ Nraase qora airivano uairama vita varuvarora tiro, Iesusiva nai nraaqiaranravuara tiqaro, Nraase qoravano ni ntaqutivorave. Votu terama seta vataivagena mwiqi mwaarintena variase, tiro. ¹⁰ Iesusiva nraase qora airi sugema sovataru tita, nriqa vusa mwira tu vararerata uti variqata nai ntaquti nai ntaquti hi varura.

¹¹ Mwisa mwitaa hi varuvata nraase qora mwonravu vaanavano mwisa vutaqi varusa, mwisa Iesusira taqeta mwira vuni uto ntita variqata aasara nteta tiqata, E Kotira mwaquvanove, tita. Vaanavano mwisa vutaqi varu vaitisa mwitaa tuvaro ¹² Iesusiva mwisara kepusaqama sero tiqaro, Sia ni osarara tiate. Tirema variate, turama.

Iesusiva vaiti 12 nrau vita vatora
(Matiu 10:1-4; Ruku 6:12-16)

¹³ Iesusiva mwini vari sero uro taaqi mworuqaa variqaro nai mwutusa vahu vaitisaqai nraanrovata mwisa uro varuvaro ¹⁴ Iesusiva vaiti 12 nrau saara ntuva sero mwisara ne mwisa vitaarita ni qua varetu tiva niqi vuatu tiva sero, mwisa nroraqama sero mwisara tiqaro, Nénravu ni airiqama mateta ni qua tiva niate tinama, ne ini vita vataugo. ¹⁵ Nénravu vaana titaivaro nritarero vuarive tina, ne ini kepusa nirerave, tiro.

¹⁶ Iesusiva mwaa vaitinravusa vitora:

Saimonira — Iesusiva mwira mwo nrutu ntavatero Pitaavave tiro.

¹⁷ Semisira Ionisa — Mwitana Sepetira mwaagutana varura. Iesusiva mwitanasa mwo nrutu Poanesisi-satanave tura. (Poanesisi mwaa quaraqitai tirerata, Naaruvu Nruqa Ti Varirave, tita.)

¹⁸ Enturura

Piripira

Pataromiura

Matiura

Tomaasira

Semisira — mwiva Arapiaasira mwaagu

Tatiaasira

Saimonira — mwira nrutu mwo Serotira

¹⁹ Iutaasira — mwi vaitiva Iesusira ntavaaqavu saate tiro, mwira qovarama so vaitiva.

Iesusiva 12 vaiti mwi vaitinravusa vitora.

Mwo husa Iesusirara ueraqama vi vaitivama variso tura
(Matiu 12:24-32; Ruku 11:14-23)

²⁰ Iesusiva nai nraaqiaranravu vita varero nraavuniara niari mwaatani vuvata qaiqaa nraase qora airivano mwira taqarerata uairama vita varuvaro Iesusiva nai nraaqiaranravu sapata sara nraariva sia soqa huvaro varuvata ²¹ Iesusira vataasa mwi quara rieta Iesusirara tiqata, Qike, mwiva ueraqamama viso. Sai uro mwira vitaare, tiva seta vurama.

²² Mwaara osara ti varu vaitisa mwonravuvano Ierusalemaita utonte mwitaama tita, Vaana vuniaava Belsepurivama Iesusira vutaqi variso. Belsepuriva mwira vutaqi variqaro mwira saahaqa hi varisaroma Iesusiva vaitiqitairo vaana tite variso, tita.

²³ Mwisa mwitaa tuvaro Iesusiva mwisa nraanrovata vaini nruvaro mwo quaqaa ntuva sero mwisara tiqaro, Saataaniva nataama serove nai henara

titairaro nritaraanarove. ²⁴ Kuaa mwatanaavano ntuaqamavi variqata niaritana nai ntaqi nai ntaqi hisa sia so varivarave. ²⁵ Kuaa nraavunaavano ntuaqamavi variqata niaritana nai ntaqi nai ntaqi hisa, mwisavata sia so varivarave. ²⁶ Saataaniva ntaqaihi vari vaanasa ntuaqama vita nai ntaqi nai ntaqihi varivaro Saataaniva sia mwisaqaa ntaqaihiqiro viraro mwisa kepusavano taiqaanarove. ²⁷ Muara varaiva sia kepusa vaiti mwo nraavuqi qumina vera ntero mwo inraisa varairave. Muara varaiva vuni kepusa vaiti mwira nraante rupa sero vatero mwiraqaatairo vera ntero mwo inraisa mwiani muara varairave.

²⁸ Ne quqaa qua tianira riaate. Nraase qoravano uaqaa hiani saiqara mwo gara mwo gara hiani saiqara uti vari quarave, uaqaa hi quara mwosara ti vari quarave, Kotiva soma esaa mwi quara mwi quara nraase qora qaqi nruka sero tauru nataanarove.

²⁹ Vaitivano Kotira mwaragurara uaqaa hi quara ti vari quara Kotiva mwaa entaravata nraatiravata mwi quara sia nruka sero tauru nataanarove, tiro. ³⁰ Iesusirara vaanavano mwira vutaqi variso tuvarora tiro, mwiva mwitaa tura.

*Iesusira vataasa mwira taqarerata nrura
(Matiu 12:46-50; Ruku 8:19-21)*

³¹ Iesusiva mwitaa tuvata mwira nrovavata, mwira qatanravuvata, nri nteta mwaata qetiqaqaa tivi varita tiqata, Iesusira tivaro tuvuarive, tuvata ³² nraase qora airivano Iesusira tataaqa mwatasaa vita varusa Iesusira tiva mwita tiqata, I nrovavata, i qatanravuvata, mwaataqa variqata iara tuvuaane tiavo, tita.

³³ Mwisu mwitaa tuvaro Iesusiva mwisa sapara hiro, Tavave ni ntova variso? Tasave ni qata vasaa variavo? tiro.

³⁴ Mwitaa tiva sero mwira tataaqa vara ututu mwatasaa vita varusa taqero tiqaro, Mwaasama ni ntosa ni qata vasaa variavo. ³⁵ Ni qova naavuni varira mwira qua rieqata nrue variasa, mwisama ni qata vasaa variavata, ni nura nasaa variavata, ni ntosavara varita hiavo, tura.

4

*Uiti humwu iso quaraqaa ntuva sero tura
(Matiu 13:1-9; Ruku 8:4-8)*

¹ Iesusiva nruka tosani uro variqaro nraase qora qua mwasaasa tiva niase tuvata nraase qora airivano uairama vita mwira ututuma sovarora tiro, Iesusiva qaqira sero votu mwoqi mwaari ntero mwiqi mwatasaa viro nramariqaa varuvata nraase qoravano nramari tosa sata varura. ² Mwisu mwataqaa nramari tosa sata varuvaro Iesusiva mwo qua mwo quaqaa ntuva segaro tiva nura.

³ Iesusiva tiqaro, Ne tianira riaate. Vaiti mwovano sara vara tireraro humwu itatamaqiro vurave. ⁴ Mwiva sara humwu itatamaqiro vuvaro mwohuva aara tosani uto ntuvato kurivano nrima nraava sorave.

⁵ Mwitaa huvaro humwu mwonravuvano ori mwataqaa uto ntuvato mwatavano sia vevatoqama vahuraqaara tiro, qamwanrama qupiqa vuvaro ⁶ mwira tuqavano sia mwataqi vevato vuraqaara tiro, huarivano nri ntero itovaro aaharama vurave.

⁷ Mwitaa huvaro humwu mwonravuvano uakusa qupiqoraqi uto ntiro uakusa vatama sero qupiqa vuvaro uakusavano ntuvatu sovaro sia tava riorave.

⁸ Mwitaa huvaro humwu mwonravuvano suqe hu mwataqaa uto ntiro sugema sero qupiqeqaro suqe tava riorave. Mwo huva airi tava

riemwa tovaro mwo huva uro mwoqavata riemwa tovaro mwo huva uro mwiravata nraatarero mwoqavata riemwa torave, tiro.

⁹ Iesusiva mwi quaraqaa ntuva sero tiva ni taiqa sero tiqaro, Ini nraato vahirera, mwi quara osara ntapihi seta riaate, tiro.

Iesusiva sia vutu sero tiraitiro, mwo quaqaa ntuva seqaro nraase qora tiva nu osarara tura

(Matiu 13:10-17; Ruku 8:9-10)

¹⁰ Iesusiva qua tiva ni taiqa sovata nraase qoravano niari mwaatani vita nrita huvaro Iesusiva nariaraa varuvata mwira nraaqiara 12 nnavu-vanovata, mwo husavata, mwiva varunani nri nteta Iesusiva mwi quaraqaa ntuva sero tu osarara sia ntapihiraitita, Iesusira sapara huvaro

¹¹ Iesusiva mwisa tiva niro tiqaro, Kotiva nraase qaraqaa ntaqaihiani quara uqetatai quara, mwi quara Kotiva iniara qaqi sairata mwi quara osara riaate tirave. Mwitaa tiva sero mwo nraase qora qaqinani variasa mwi quara osara sia ntapihi sera tiva niane tisanara tina, ne mwi quaraqaa ntuva seqana mwisa tiva ninerave.

¹² Ne mwo quaqaa ntuva sena tiarita nraase qoravano tageqatavata siama ntapihi seta tagevarave.

Mwisa ni qua rietavata siama ntapihi seta rieverave.

Mwisa ni qua rieqata niari uqaahi saiqara qaqira saivarovauma Kotiva mwisa uqaahi saiqara vare quara nruka nataanarove, tiro. (Ais 6:9-10)

Uiti uru itatamaqiro vura mwira osara ntapihi sero Iesusiva nai nraaqiaranravu tiva nura

(Matiu 13:18-23; Ruku 8:11-15)

¹³ Iesusiva mwitaa tiva sero mwinnravusara tiqaro, Né mwo? Ne mwi quaraqaa ntuva sena tu osarara hiave né ntapihi riaavo? Né sia mwi quara osara ntapihise riaivera, ne nraakiara mwo quaqavata ntuva sena tiani quara, né nataama setave so mwivavata ntapihi seta rieverave? ¹⁴ Ne vaasa mwi quaraqaa ntuva sena tu osarara tirerave.

Vaitivano humwu itatama tora mwi quara osara vahireraro Kotira quama valso.

¹⁵ Humwu aaraqaa utontu quara mwira osara vahireraro nraase qora mwonnravuvano mwi humwura votima seta variarave. Mwi nraase qorasa Kotira qua riaavaro Saataniva nri ntero mwisa vu nraato mwutusaqitairo mwi quara ntavihi sero vairave.

¹⁶ Mwohia nraase qorasa ori mwataqaa uto nti humwura votima seta variarave. Mwiravusa Kotira mwasaasa rieta mwi quarara qamwata seta variavaro ¹⁷ quavano sia mwisa mwutusaqi visata mwi nraase qorasa sia mwi quara mwo enta mwo enta riaraitita variavata mwi quara saara mwo hiasa mwisa uaqama natarerata uti variavata mwisa tiri rivorave tiqata Kotira qua qamwanrama qaqira seta varia nraase qorasa variarave.

¹⁸ Mwohia nraase qorasa uakusa quapiqairaqi itatamato humwura votima seta variarave. Mwi nraase qorasa Kotira qua rieta ¹⁹ mwiraqaataita mwisa mwataniaa inraisara nroraqama seta riemwaqi vigata munimarave, mwo inraisarave, qamwata seqata mwo inraisa mwo inraisa vararerata riemwaqi vita Kotira qua qaqira saavaro Kotira quavano sia mwi nraase qorasaqi vaisata variarave.

²⁰ Mwisa mwitaa hiavata mwohia nraase qorasa suqe mwataqaa itatamato humwura votimase variarave. Mwi nraase qorasa Kotira qua rieta mwi quarara quqaave tiva seta, mwi quara riemwaqi vita suqe saiqqa Kotirani varaqita vuarave. Mwohia nraase qorasa mwi quara rieqata suqe saiqqa

Kotirani varaqi vi variavata, qaiqaa mwohia nraase qorasa mwisa nraatara seta uro mwoqavata suqe saiqā Kotirani varaqi vi variavata, qaiqaa mwohia nraase qorasa mwisa saiqavata nraatara seta uro nai mwoqavata suqe saiqā Kotirani varaqita vi variarave, tiro. Iesusiva turama.

Iesusiva ovara mwo quaqaa ntuva sero tura
(Ruku 8:16-18)

²¹ Iesusiva mwitaa tiva sero mwo quaqaa ntuva sero tiqaro, Ova qupi sero taini uro vatairave? Kina vara sero ntuvaqu tairave iso? Tainta mwevaqi veta vatairave iso? Qaqao, sia mwitaa hiraitiro, ova qupi sero tuaahera sero qoqaa mwaari vatairave. ²² Naatiara esaa uqeta taani inraisara qoqaama qovarama saanarove. Ntuvaqutaani inraisara esaa qoqaama qovarama saanarove. ²³ Ini nraato vahirera, mwi quara osara ntapihī seta riaate, tiro.

²⁴ Iesusiva mwitaa tiva sero mwiva tiqaro, Né qua riaara mwira ntapihī seqata riaate. Né nara tusaqaave mwosa nítave mwosa vara natera mwi tusaraqaama Kotiva nítavata niqaro mwiraqaa mwoqavatama nianarove.

²⁵ Kotira qua riaariva variqiro viraro Kotiva mwira saahaqa hiraro mwiva mwira qua mwoqavatama riaanarove. Kotira qua sia riaariva variqiro viraro mwiva nara inraisave tutaanira mwira vara sairaro mwiva qaqima varianarove, tiro.

Sara humwusanaa qupiqaanirara mwo quaqaa ntuva sero tura

²⁶ Mwitaa tiva sero Iesusiva mwo quaqaa ntuva sero tiva niro tiqaro, Kotiva ntaqaihiariva mwaa quara votima seroma vaiso. Vaitivano sara humwu isatama tero ²⁷ mwiraqaatairo mwiva uro vaitero tiviro qaiqaa vaitero tiviro mwitaamaqiro vi varisaro sara humwuvano nai ntukohiro qupiqe varirave. Vaitivano sara humwu mwiva qupiqaa ni osarara sia ntapihisar ²⁸ nai mwataqi vahiro naiqama sero qupiqairave. Tauraaqama sero uru mwiva ntukohiro turu vera sero uro tava riemwa taisaro tava mwiva kepusaqa hirave. ²⁹ Kepusaqa visaro vaitivano paipa varero uro tava mwira teqa seqaro varairave, tiro.

Maasiteti uruqaa ntuva sero tura
(Matiu 13:31-32; Ruku 13:18-19)

³⁰ Iesusiva mwitaa tiva sero qua tiva niqiro viro mwitaama tiro: Kotiva ntaqaihiva nara inraisa votima serove vaiso? Mwirara riegana nara quaqaaave ntuva sena tianirave?

³¹ So mwi maasiteti satari mwira tava votima seroma vaiso. Uru mwiva nai pataqani vahirarama tuqo. Vaitivano uru mwira vara sero mwataqi tutaasaro ³² qupiqero satari nroraqama viro hini sara tutaaravata nraatara sero nritarero satari nrora vaisaro mwira sauquvanovata nrora vaisaro kurivanovata mwira sauquqaa nraavu hoqatero mwira aamanaqi varirave, tiro.

³³ Mwitaa tiva sero Iesusiva mwi quara voti hira mwo qua mwo quaqaaavata ntuva seqaro tiva niqiro viro nraase qoravano ntapihī seta rie quaraqai mwisa tiva nura.

³⁴ Mwiva nraase qora qua tiva nineraro sia vutu sero tiraitiro, mwo quaqaa ntuva seqaro tiva niqiro vuvata nraase qoravano niari mwaatani vita nrita huvaro Iesusiva nariaraa nai nraaqiaranravu sapata variqaro mwi quara osara ntapihī sero mwiravusa tiva nura.

Toqa vaururu utura Iesusiva irora huvaro taiqora
(Matiu 8:23-27; Ruku 8:22-25)

³⁵ Mwi entara entama vuvaro Iesusiva nai nraaqiaranravuara tiqaro, Nrivagenravu nramari nrora mwaa qara vare vutura hini tosani vuare, tiro. ³⁶ Mwitaa tuvata mwira nraaqiaranravuvano nraase qora uairama vusa mwini seta Iesusiva varu voturaqi mwaarinteta mwira vita varetu vuvata votu mwonravuvano mwisa vatama seta vurama.

³⁷ Mwisa nramari mwiraqaa vi varuvaro qamwanrama sero toqa vauruvano nroraqama sero tiqaro nramari raqutaqi nri vi varuvaro nramarivano votuqi mwaarintero kuraama sareraro uti varuvaro ³⁸ Iesusiva votu vitiqi quruma ntuva sero vaite varuvata mwira nraaqiaranravuvano mwira uro huruma seta tiqata, Mwaara ti variara vaitio, tirinravu nramarivano ntaqutu saanirara e siave nroraqama sera riaaro? tita.

³⁹ Mwisa mwitaa tuvaro Iesusiva vaitoraqitairo tiviro toqa vaururu mwira irora hiro nruka mwirara tiqaro, Qaqi tirema vahiane, tuvaro toqavano taiqa vuvaro nramarivano utovi tirema vahura.

⁴⁰ Tirema vahuvoro Iesusiva nai nraaqiara mwisara tiqaro, Nara inraisa nraatuve aatu hi variavo? Né siave niara kepusaqama seta rieta hiavo? tiro. ⁴¹ Iesusiva mwitaa tuvata mwira nraaqiaranravuvano aatu hita sauqu ntukikiraaqateta tiqata, Qike, mwaa nai nataahi vaitivave? Toqa vaururuvanovata, nramarivanovata, mwira qua riaiso, tita tura.

5

Iesusiva vaiti mwoqitairo vaana titamwa sora

(Matiu 8:28-34; Ruku 8:26-39)

¹ Mwira nraaqiaranravu mwitaa tiva seta votuqi vusa nrukaqa qara varetu hini tosa Kekesaani uro ntovaro ² Iesusiva votuqitairo mwaavi ntovaro vaiti mwovano ori ontavuqitairo veva ntero uto Iesusira hunta sora.

³⁻⁴ Mwi vaitiva vaiti qunte varura ori ontavuqi variqiro vi varuvaro vaanavano mwira vutaqi varuvaro varuvata mwo husa seni vara seta mwira rupa taare tita, rupa tovaro mwi vaitiva airi saanta suqu sauqu rupa tora ntapihiqaro ntuakeaama sora. Qaiqaavata mwitaama segata mwira rupa taare tuvaro mwiva seni ntuakeaamaqai sorara tiro, mwovano mwira rupaariva sia varura. Mwira nraataraariva sia varuvaro ⁵ mwi vaitiva entaqivata, ataahiraqaavata, vaiti qunte varura ori ontavuqi viro nriri higarua qua aasara tivaqiro viro taaqigaavata nrueqaro qua aasara tiqaro oriqotairo nai mwavanta toqaaqamaqiro vi varura.

⁶ Mwi vaitiva variqaro niaratairo Iesusira taqero santero uro mwira suqutarani uto ntiro variqaro ⁷ mwoqama sero aasara ntero tiqaro, Iesusio, Kotiva nai virini variva varisara e mwira mwaaquvano variaro. Ni nataa hirere nriraro? Kotirara rieqara sia ni ruanema tuqo, tiro. ⁸ Iesusiva vuni mwi vaitirara tiqaro, Uaga hiara vaanavao, mwi vaitiraqitaira nritarera vuane, tuvarora tiro, mwi vaanava mwitaa tura.

⁹ Mwitaa tuvaro Iesusiva mwi vaanarara ena nrutu tiane tuvaro vaana mwiva nai nrutu ntero tiqaro, Ni nrutu Airivave. Te airivanoma mwaa vaitiraqi varuro, tiro. ¹⁰ Mwitaa tiva sero mwi vaanava qaiqaavata airi nani Iesusirara po se tiro tiqaro, Sia mwaa mwataragaataira tiri titaane, tiro.

¹¹ Mwitaa tiva seta vuru taqovaro mwi entara quara airintivano uhiqa nre varuvata ¹² vaananravuvano Iesusirara po se tita tiqata, Qaqi tiri titairaqa quara mwisaiqi viqetaare, tuvaro ¹³ Iesusiva mwisa qaqi sovata vaana airivano mwi vaitiraqitai nritareta uro quara mwisaiqi viqeteta varuvata mwiraqaataita quara 2000 nravuvano santeta okai veva vahuraqi uto nteta nramariqi avuhu vuvaro nramarivano esaa mwisa ntaquti sora. ¹⁴ Quaravano nramariqi ntuva vita qutu vuvata quaraqaa ntaqaihu

vaitinravusa taqeta mwiraqaatai santama teta mwatusa nroraqi uro mwi quara tiva nita aaranivata viqata viti viri tiva niqi vuvata mwi mwatanaasa mwi inraisara taqarerata nrima ¹⁵ Iesusiva varunani taqovaro vaasa vaana airivano mwira vutaqi varu vaitiva qaqi mwatasaa viro tuavaaqa utu tero mwira vu nraato ntapihi vuvaro varuvata mwisa mwira taqeta aatuma seta varura.

¹⁶ Mwisa mwi vaitira taqeta aatu hiqata varuvata vaiti mwonravu vaasa mwi inraisara taqosa tiva nita tiqata, Iesusiva mwitaama saisaroma mwi vaitiva sugema viso, tiva seta quararavata tiva nuвата ¹⁷ mwi mwatanaasa mwoqama seta aatu hita Iesusirara tiqata, E tiri mwataqaataira vuane, ti varura.

¹⁸ Mwi mwatanaasa mwitaa tuvaro Iesusiva votuqi qaiqaa mwaari nte varuvaro vaasa vaanavano vutaqi varu vaitiva Iesusirara po se tiro tiqaro, Sai nevata ivata vuase, tiro.

¹⁹ Mwitaa tuvaro Iesusiva qaqao tiro, Sia mate nivatama sera vinarave. E ena mwaatani uro variqarama Kotiva i sugema sero saahaqama mwatairara ena nravunaasavata tiva niane. Kotiva iara po se tiva mwatai quara uro ena nravunaasavata tiva niane, tiro.

²⁰ Iesusiva mwitaa tuvaro mwi vaitiva Iesusiva tunte hiro mwi mwatara sero uro saugurutana mwatusa vahunani nrueqaro Iesusiva nai sugema mwatorara nraase qora tiva nigiro vuvata esaa mwira qua riosa mwi quara rieqata mwisa niari sauqu ntukikiraaga tegata varura.

Sairaasiva Iesusira uro hunta sora

(Matiu 9:18-26; Ruku 8:40-56)

²¹ Mwi mwatanaasa Iesusirara sia tiri mwaatani variiane tuvaro Iesusiva votuqi qaiqaa mwaari ntero nrima ntantero nrukaqa gara varero hini tosanì vuvata mwini nraase qora airivano uairama vita mwiva varunani ututuma vita varura.

²² Varuvaro vaiti mwovano mwi mwatusaraqi mwaara nraavuqaa ntaqaihi varuva, Sairaasiva nri ntero Iesusira taqero mwira suqutarani uto ntiro Iesusirara ²³ po se tiro tiqaro, Ni naavuravano qaumama gutu vuanarove. E nrira ena sauqu mwiraqaa vatairaro mwira nriqa vuariva taiga viraro qaqi variarive, tiro. ²⁴ Mwi vaitiva mwitaa tuvaro Iesusiva mwisantiri vurama.

Nraase mwovano Iesusira vaaqa vitiqa tu varora

Iesusiva Sairaasisantiri vi varuvata nraase qora airivano mwira vataqita viqata itai itaita mwira raaqutaqi vi varuvaro ²⁵ nraase mwovano esaa enta tora taqamwaqiro vuvavata mwisaqi varura. Mwi nraaseva 12 ihiaara tora taqamwaqiro viqaro nroraqama sero nriqa vuvaro variqaro ²⁶ mwo totaa mwo totaasara ni saahaqa hiate tiva sero, munima nuвата mwisa sia mwira saahaqa hiraitita, mwira munimaqai nravase varuvaro mwira mwavanta mwoqavata uaqama vuvaro varura.

²⁷⁻²⁸ Mwi nraaseva nraase qora vutaqi variqaro Iesusiva saiga varorara rieqaro Iesusira naatiara nriqaro nai riero tiqaro, Ne mwira tuavaaqaqa tu varaariro ni nriqa viva qamwanrama taiga vuarive, tiro. Nraase mwiva mwitaa tiva sero Iesusira vaaqaaqa tu varovaro ²⁹ qamwanrama sero mwira nraare ntova aaharama vuvaro mwiva taqovaro mwira mwavan-tavano so vahura.

³⁰ Mwira mwavantavano sugema vuvaro varuvaro Iesusiva qamwanrama sero taqovaro mwira kepusa hinivano vivuvaro mwiva tuqataa viro nraase qora mwira vataqita nrusa sapara hiro, Tavave niqaa tu varaiso? tiro.

³¹ Iesusiva mwitaa tuvata mwira nraaqiaranravu tiqatama, Nai tavave iqaa tu varaiso? Ena taqaane, nraase qora airivano i tataaqani viqata i raagutaqi vi variavo, tita.

³² Mwitaa tuvaro Iesusiva qaqiqai vaiti viri mwira huaama sareraro aytutu hi varuvaro ³³ nraase mwiva nai mwavanta sugema vurara riero mwira nraatu hiqaro suqu sauqu nti varuvaro uro Iesusira suqutarani uto ntiro mwi quara esaa qoqaa tiva mwuvaro ³⁴ Iesusiva nraase mwirara tiqaro, Ni naavurao, e niara mwiva ni saahaqa hianarove tiararoma i mwavantavano sugema viso. Soma i mwutusavano qihaasa hirara vuane, tiro.

Sairaasira nraavura tivuma sora

³⁵ Iesusiva mwi quara qaqi ti varuvata Sairaasira nraavugitaita vaiti mwonravu nri ntefa Sairaasira hunta seta mwirara tiqata, I nraavuravano qutuma viso. Hauri mwaara ti vari vaitira ntavaaqavu tero, tuvaro

³⁶ Iesusivavata mwiravusa qua riero mwaara nraavugaa ntaqaihi varu vaitirara tiqaro, Sia aatu hiane. Niara kepusaqama sera riegara variane, tiro.

³⁷ Iesusiva mwitaa tiva sero mwiva Pitaaravata, Semisiravata, Semisira qata Ioniravata, mwiravusaqai vita varero ³⁸ Sairaasira nraavuqi nrintero taqovata nraase qora nroraqama seta ti atura ntiqata ntate varuvaro ³⁹ Iesusiva nraavuqi vera ntero tiqaro, Narare né ntate variavo? Mwi qiaatarava sia qutu viso. Mwiva qaqi vaitema variso, tiro.

⁴⁰ Iesusiva mwitaa tuvata mwisa Iesusira quara raima mwateta varuvaro Iesusiva esaa nraase qora vara veva mwaatani sero qiaatara mwira nrosa qosavata, taaramwonravu nai vita tosavata, mwiravusaqai vita varero qiaatara mwiva qutuvata vatoraqi uro ⁴¹ mwira sauquqaa tu varero nai quaqitairo tiqaro, *Tarita kumi* — mwaa qiaataravao, ne iara tivuanema tuqo, tiro.

⁴² Iesusiva mwitaa tuvaro mwi qiaatarava gamwanrama tiviro nrue varura. Mwiva 12 ihi vara so qiaatarava tiviro nrue varuvata mwinravusa mwira taqeta nriharama vita mwoqama seta sauqu ntukikiraagate varuvaro ⁴³ Iesusiva mwinravusara kepusaqama sero tiqaro, So mwaa taqaarara sia mwosa tiva niate. Mwaa qiaatarara saraqai mwiate, turama.

6

Nasaretiqinaasa Iesusira qoririma mwatora

(Matiu 13:53-58; Ruku 4:16-30)

¹ Iesusiva mwi mwatara sero nai mwaatani vuvata mwira nraaqiaranravu-vano mwira vatama seta vurama.

² Iesusiva nai mwaatani uro variqaro mwaara entaqaa uro mwaara nraavuqi qua mwasaasa tiva ni varuvata nraavu mwilqi nraase qora airivano varusa mwira qua rieta sauqu ntukikiraagaqeteta tiqata, Qike, mwi vaitiva taitairove mwi quara mwi quara riaiso? Mwiva suqe osara mwo vu nraato mwo vu nraato taitairo vara qirove tiso? Tava mwi saiqara osara mwira tiva mwisarove mwiva nrora saiga vare variso.

³ Mwiva taintave mwitaa inraisa uti varivama variso. Mwiva Mari-aara mwaaqueve. Semisivave Iosisivave Iutaavave Saimonivave mwisama mwira qatanravu variarave. Mwira nruranravuvata mwaini variarave, tita. Mwitaa tivaqi viqata Iesusira nravunaasa mwirara qumina vaitive tiva seta, mwira qoririma mwatora.

⁴ Mwisa mwitaa huvaro Iesusiva mwisara tiqaro, Poropeti vaiti Kotira qua tiva ni variariva mwo mwatani uro variraro mwi mwatanaavama

mwirara qamwateqaroma mwira nrutu tuaaheraanarove. Mwi vaitiva nai mwaafani variqaro nai nrura qata sapata variraro mwira nravunaava mwirara qumina mwaa mwatanaavaqaima variso tiva sero siana mwira nrutu tuaaheraanarove, tiro.

⁵ Mwitaata tiva sero nraase qoravano Iesusirara qumina vaitive tura saara Iesusiva sia so nai mwatusaqi nrora saiga varaariva vahuvaro mwiva nriqa vusa pataqaatanagaqai nai sauqu vatovata sugema vura. ⁶ Mwira nravunaasa mwirara sia so tiri saahaqa hiarivave turara Iesusiva airi nraato tiqaro varura.

Iesusiva nai nraaqiara 12 nravu mwo mwatusa mwo mwatusa titovata vurara tura

(Matiu 10:5-15; Ruku 9:1-6)

Mwi mwatusaraqitairo Iesusiva tiviro vintante nrintante mwo mwatusa mwo mwatusa variqi vqaro nraase qora mwasaasa tiva niqiro vura.

⁷ Iesusiva nai nraaqiara nraarama sero taaratana taaratana titovata 12 mwiravusa mwona mwona vura. Mwiva mwisa titeqaro vaitiqitaita vaana titaivata qaqinani nritareta vuata tiro, mwiva mwisa kepusa niqaro qua mwitaama tiro: ⁸ Nénravu virera hiqatama siana mwo inraisa mwo inraisa vareta viraitita, aaraqaa sauru guru vare viraqaima vareta vuata. ⁹ Siana sarave tuave munimave vareta vuata. Suqu nraavu mwiraqaima vara ututaate. Sia sioti taaratana ututaate. Kuaigaqai utu vareta vuata, tiro.

¹⁰ Iesusiva mwi quara tiva sero mwaa quaravata tiqaro, Nénravu vivaro ta mwatanaavave iniara qamwateqaro ini vitairera, né nraavu kuaikuqigai variqita vitama mwi mwatusara seta vuata. ¹¹ Né vivaro ta mwatanaasave sia ini qamwata nateta ini qua sia riarera utivera, nétaqaatai ntuverauma seta qaqira setama mwisa tiva nita tiqata, Naatiara nétama tagevarave, tiata, tiro.

¹² Iesusiva mwitaata tiva sero titovata mwira nraaqiaranravuvano uro viti viri tiva nita tiqata, Uaqa hi aarara qaqira seta suqe hi aararaqaa vuata, tita.

¹³ Mwitaata tivaqi vqata vaiti vutaqi vaana varusa titovata qaqinani nritare vuvata airi vaiti nriqa vusa, mwisa qiatagaa vahavera qu nateqata sugema natovata so varura.

Nramari ni varu vaitira Ionira rusora

(Matiu 14:1-12; Ruku 9:7-9)

¹⁴ Mwitaata huvaro esaa mwi mwatanaava Iesusirara nai tiva mwi nai tiva mwi hi varuvorara tiro, Herotiva vuniaa vaitivano mwi mwatara Kariri mwataqaa ntaqaihi varuva, mwivavata Iesusira nrutu riora. Nraase qora hini husa Iesusirara mwitaama tita, Mwi vaitiva Ionivave. Ioniva nramari ni varu vaitiva qutu vuva qaiqaa tiviro nrue variso. Mwiva qaqi tiviro nrue variqarora tiroma nrora saiga so vare variso, tita.

¹⁵ Hini husa mwitaata tuvata hini husa qaqao tita, Mwi vaitiva tiri haivaqava Iraisaava qovarama viso, tita. Mwitaata tuvata mwo husa Iesusirara tiqata, Haaru poropeti vaiti Kotira qua qovaramase varusa, Iesusiva mwisa votima seroma variso, tita.

¹⁶ Nraase qora Iesusirara mwitaata ti varuvoro Herotiva mwi quara riero tiqaro, Qike, mwi vaitiva nramari ni varu vaitivama variso. Né tiavaro mwira nrunta tega sova Ioniva, mwivama qutu viraqitairo qaqi tiviro nrue variso. Mwiva qutu viraqitairo qaqi tiviro nrue variqarora tiroma, mwiva nrora saiga so vare variso, tiro.

¹⁷⁻¹⁸ Tauraa Herotiva nai qata Pipira nraata Herotinramarira varatero varuvoro Ioniva nri ntero airi nani Herotirara tiqaro, E ena qata nraata sia varaataarama varera hiaro, tuvaro mwira saara Herotiva nai nraata

Herotinramarirara tu quara riegaro mwiva naivano vaiti mwo titovaro Ionira ntavaagavu sero rupaqiro uro karavuqi sora.

¹⁹ Sovaro Ioniva karavuqi varuvaro Herotira nraatavano Herotinramariva varuvaro Ioniva mwirara tu quava mwira raraqaa tovaro Ionira rusarera utuvaro sia mwira rusaari aarava vahura. ²⁰ Ioniva vaiti sugeva avuqavuma sero nrue varurara tiro, Herotiva mwirara riegaro mwira nraatu aatu hiqaro sia mwira rusaate tiro. Mwitaa tiva sero Herotiva Ioniva ti varu quarara qamwateqarovata mwiva mwira quara taara nraato tura.

²¹ Mwitaamaqi vuvaro mwo enta Herotinramariva Ionira rusaari aarava so vahura. Mwi quara osaravano mwataamama vahiho. Herotiva nai mwato entava qovara huvaro mwi entaraqaa nrora vaiti sara nineraro mwisa nraarora. Mwiva ntaqu vaitisaqaa ntaqaihi varu vaitisave, airi inraisa vato vaitisave, mwiva mwisa nraarama sero sara niro.

²² Sara nuvata mwisa nre varuvaro Herotinramariva nraavuravano nrima mwisa ihi ntava natero. Mwiva ihi nte varuvata Herotivavata mwiva sara nrusavata mwi mwaraatara qamwata mwateta. Herotiva nai nraata nraavurara qamwato mwirara tiqaro, Nara inraisarave i mwutusa vaiso? Ni tiva miraqe i mwiase, tiro.

²³ Mwitaa tiva sero mwiva sauqu nriqigaa vatero tiqaro, Ne quqaama tuqo. E nara inraisarave tiragena ne i mwianirave. Mwata hini ne ntaqaihanirara tiragena ne tusama sena i mwianirave, tiro.

²⁴ Herotiva mwitaa tuvaro mwaraata mwiva veva ntero uro nai nrora sapara hiro tiqaro Nto, ne nara inraisarave tiariro ni mianarove? tiro. Mwitaa tuvaro mwira nrova tiqaro, Ioniva nramari ni vari vaitira mwira qiata miane tiane, tiro. ²⁵ Mwira nrova mwitaa tuvaro mwira nraavuravano santero uro vuniaa vaiti Herotirara tiqaro, Qamwanrama sera Ioniva nramari ni vari vaitira nrunta teqa sera tanaaqaa varaqira nrima miane, tiro.

²⁶ Mwaraata mwiva mwitaa tuvaro Herotira mwutusavano uaga huvarovata mwiva vaasa sauqu nriqigaa vatorara riegaro, sara nrarerata nru vaitisaravata riegaro tiqaro, Ne mwaraata mwirara tu quara nteqa saasorave, tiva sero ²⁷ mwiva karavu vaitiqaa ntaqaihi varu vaitira mwo titero tiqaro, Ionira qiata qamwanrama sera varaqira nrima miane, tuvaro mwiva uro karavugitairo mwira nrunta teqa sero ²⁸ mwiraqaatairo mwira qiata tanaaqaa vatero varaqiro nrima mwaraata mwira mwuvuvaro mwiva varero uro nai nrora mwura.

²⁹ Mwitaama sovata Ionira nraaqiaranravuvano mwi quara rieta mwisa nrima Ionira mwavanta varaqita uro quntama sora.

Iesusiva pata sara airiqama sero 5,000 vaiti nura

(Matiu 14:13-21; Ruku 9:10-17; Ioni 6:1-13)

³⁰ Iesusiva nroraqama sero titovata vu vaitisa nrueta uro ntante nrima uairama vita Iesusira nraaqiani variqata mwisa niari saiga varoravata, niari nraase qora tiva nu quaravata, Iesusira tiva mwura.

³¹ Mwi entara nraase qora airivano Iesusira taqarerata vita nrita hi varuvarora tiro, Iesusivavata mwira nraaqiaranravuvata sia sugemase sara nreva vahuvata varura. Mwitaa huvaro Iesusiva tiqaro, Vivaqenravu uro qumina sata tetaraa variarata nénravu tesa hiata, tiro.

³² Iesusiva mwitaa tiva sero mwinravusa vita varero votuqi mwaari ntero saareragaama tero qumina sata varirerata vurama. ³³ Mwiravusa vuvata airi nraase qoravano mwisa taqeta tiqata, Mwisa mate mwinima vivarave, tiva seta mwo mwatusa mwo mwatusaqitaita mwisa santeta

nruka tosasataa mwataqaa vusa uro Iesusiva votuqima tero virera hunani mwisa nraante uro ntora.

³⁴ Mwisa nraante uro ntovaro Iesusiva naatiara nrintero votuqitairo mwatani mwaavi ntero nraase qora airivano uairama vusa taqero mwisara po se tiva sero tiqaro, Qike, vaitivano sia mwisaqaa ntaqaihi varisata sipisipivano niariaraa nrue varia sipisipisa votima seta mwaa nraase qorasa api nrue variavo, tiro. Mwitaa tiva sero mwini variqaro Iesusiva qua mwasaasa mwisa tiva ni varura.

³⁵ Iesusiva tivagiro vuvaro huari muani otuntuvata Iesusira nraaqiaranravuvano mwiva varunani uro nteta tiqata, Huarivano muani tuvi visaro mwaini qumina satave. ³⁶ E nraase qora mwaasa titairata mwisa uro sara vahiani mwatusaraqi nrueqata sara soqaamase nraate. Mwisa sia sara ntuva vareta nriasave, tita.

³⁷ Mwira nraaqiaranravu mwitaa tuvaro Iesusiva qaqaqo tiro, nétama mwisa sara niate, tiro. Tuvata mwisa Iesusira sapara hita tiqata, Te nrora munima 200 kinaa mwira setave sara vara seta mwisa nianarave? tita.

³⁸ Mwitaa tuvaro Iesusiva mwinravusa sapara hiro tiqaro, Mpereti nataamave ntuva taavo? Né uro taqaate, tuvata mwisa uro taqeta nrima tiva mwita tiqata, Mpereti kyauquruvata tavusa taaratanavataqai ntuva taavo, tita.

³⁹ Mwira nraaqiaranravu mwitaa tuvaro Iesusiva nraase qora tiva niro tiqaro, Né mwusau mwaa mwo sata mwo sata esaama mwatasaa vita variate, tiro.

⁴⁰ Mwitaa tuvata mwisa mwo sata 100 nraavu mwatasaa vita varuvata mwo sata 50 nraavu mwatasaa vita varuvata mwitaamaqi vita esaa nraase qoravano mwatasaa vita varura.

⁴¹ Mwatasa vita varuvaro Iesusiva mpereti hini saugu mwiravuravata, tavusa taara mwitanavata, vara sero naavuni tageqaro Kotirara sugemave tiva sero, mpereti nteqa sero nai nraaqiaranravu niro tiqaro, So né varaqita uro nivata mwisa nraate, tiva sero tavusa taara mwitanavata tusama sero nraase qora mwisa esaa nuvata ⁴² esaa mwisa visosama nrora.

⁴³ Visosama nrovata Iesusira nraaqiaranravu mwiraqaataita nraase qoravano mperetivata tavusavata nreqata viti vaati sora utu tuntu seta tua nrora ntufantutoraqi 12 nraavu kuraama sora.

⁴⁴ Mwi entara 5,000 vaiti airivano mwi sarara nrora.

*Iesusiva nruka turuqaa suqu ntavaqiro vura
(Matiu 14:22-33; Ioni 6:15-21)*

⁴⁵ Iesusiva mwisa sara niro mwiraqaatairo gamwanrama sero nai nraaqiaranravu titero tiqaro, Né nraante votuqi mwaarinte nrukaqaamate vutura qarahi hini Vetasaitaani vi varivagenama ne nraase qora titaarita niari mwaatani vuate, tiro. ⁴⁶ Mwitaa tuvata mwisa vuvaro Iesusiva verara taqiqaa Kotirara aasara ntareraro viro.

⁴⁷ Iesusiva Kotirara aasara ntareraro vuvaro entama vuvata votuqi vusa nruka tavaara sata vi varuvaro Iesusiva nariaraa qaquinani variro.

⁴⁸ Iesusiva mwini variqaro taqovaro toqavano mwisa virera tunatairo nriqaro votu raaqutaqiro vuvata votuqi varusa mwusaari tiqata nramari huvagitaqi vura. Mwitaamaqita vuvaro gauma qataa hirera huvaro Iesusiva mwisa hunta sareraro nruka turuqaa nrira.

⁴⁹⁻⁵⁰ Mwiva nriqaro mwisa nraatarase vuase tiro, utuvata mwisa taqovaro Iesusiva nruka turuqaa nri varuvata mwisa mwogama sero nraatuqa tovata vaanave tiva seta, aatu hiqata oi aai ti varura.

Mwisa oi aai ti varuvaro Iesusiva gamwanrama sero mwisara tiqaro, Kepusaqama seta variate. Nema nruqo. Sia aatu hiate, tiro. ⁵¹ Mwitaa tiva sero Iesusiva votuqi mwaari ntero mwisa sapata varuvaro toqavano taiga viro tirema vahuvata mwisa qike tita, sauqu ntukikiraagate variqata ⁵² Iesusiva mpereti taaraqaa airiqama sero nraase qora nunrara sia mwisa vu nraato ntapihuvata sia Iesusira osarara ntapihi seta riora.

Iesusiva Kenesaretini uro variqaro nriqa vusa suqema sora
(Matiu 14:34-36)

⁵³ Mwisa vutura hini vantara Kenesaretini uro nte mwaavi nteta votu rupate ⁵⁴ mwataqaa virera huvata mwi mwatanaasa Iesusira ntapihi seta taqeta, So mwaa mwivave, tita. ⁵⁵ Mwitaa tiva seta mwisa santeta uro vututai vurutaita nriqa vu nraase qorasa vitaqita uto Iesusiva variso tunani sora.

⁵⁶ Iesusiva mwi mwataraqaa variqaro mwo mwatusa mwo mwatusa pata mwatusave, nrora mwatusave, vuta nraasogi vahu mwatusarave, Iesusiva mwini nrue varuvata mwi mwatanaasa nriqa vusa vitaqita mwatusaqaa seta Iesusirara po se tita tiqata, Sove nriqa vi nraase qorasa i tuavaaqa vitiqaa sauqu tivarave? tuvaro Iesusiva sove tuvata esaa mwiraqaa sauqu tu so nraase qorasa suqemaqai vura.

7

Kotiva tiva tai quava vaitivano tiva tai quaravata nraatara sero vahira
(Matiu 15:1-9)

¹ Parisi vaitinravuvata mwaara osara ti varu vaitisavata Iesusira taqarerata Ierusaremitaita nrma Iesusiva varunani uairama vita variqata ² taqovata Iesusira nraaqiara mwonravuvano variqata Parisi vaiti mwisa qua mwaara osara qaqira seta sia sauqu hiqaraitita, sara nre varura.

³ Mwi entara Parisi vaitinravuvata esaa Iutia mwatanaasavata niari haivaqasa tiva to quara riegata mwitaa mwitaama segata mwisa niari sauqu hiqe varura. Mwisa sia sauqu hiqosa sia sara nrora. ⁴ Mwisa uro maaketiqi nrueta uro ntanteta nrma varita sia niari sauqu hiqama saraitita, sia sara nrora. Mwisa haivaqasa kaapu hiqe osararave, tanaa hiqe osararave, mwo osara mwo osara tiva nuvata mwisa riemwaqi vigata nrue varura.

⁵ Mwisa mwi quara riemwaqita nrue varusara tita, Parisi vaitinravuvata, mwaara osara ti varu vaitisavata, Iesusira sapara hita tiqata, Tiri haivaqasa qua tiva tora i nraaqiaranravuvano nteqa seta sia sauqu hiqaraitita, sara nre variavo. Naraqamave mwisa mwitaa hi variavo? tita.

⁶ Mwitaa tuvaro Iesusiva mwisa niari tiva niro tiqaro, Né unraqama segata suqe saiqqa vare variasave. Asaiaava haaru variqaro iniara avuqavuma sero qara ntuva torave. Kotiva mwira saahaqa huvaro Asaiaava Kotiva mwitaama tiso tiro:

Mwaa mwatanaasa nroqitaigai ni nrtu tuaahere variavaro mwisa mwu-tusavano sia niara vaiso.

⁷ Mwisa mwaara tiqatama mwisa niari haivaqasa quaqai tiva niqata mwisa guminama ni nrtu tuaahere variavo, tura. (Ais 29:13)

Asaiaava mwitaama sero qara ntuva torave. ⁸ Kotiva iniara mwitaa mwitaa hiate tu quara né mwi quara qaqira setama vaitivano tiva taa quaraqaima riemwaqita nrue variavave, tiro.

⁹ Mwitaa tiva sero Iesusiva mwisara qaiqaa tiqaro, So sugema hiavo. Kotiva mwitaa mwitaa hiate tu quara né mwi quara qoririma seta ini haivaqasa tiva to quaraqai riemwaqita vi variasave. ¹⁰ Mosesiva Kotiva

tiva to quara riero iniara tiqaro, Ena nrosa qosa nrutu tuaahera nataane. Nai nrosa qosara uaga hiani quara ti variani vaitira rusaate, turave.

¹¹ Kotiva mwitaa tiva to quava vaisata né mwi quara sia riaraitita, néta riemwase né tiqata, vaitivano nai nrosa qosara tiqaro, Ne nítana saahaqa hirera tu munimara sia nítana niraitina, Kotirani vatarerave, tirera, ¹² mwi vaitiva soma nai nrosa qosa qaqira sero sia mwitanasaqaa ntaqaihiqiro vuanarove, tiarave. ¹³ Né unra qua mwitaa tiqatama Kotira qua nteqa setama níta haivaqasa tiva nu quara mwiraqaima nraase qora tiva ni variavo, tiro.

Nara inraisavano vaiti uaqama mwataisaro Kotiva mwirara uaga hi vaitirave tura

(Matiu 15:10-20)

¹⁴ Iesusiva nraase qora uairama vusa nraarama sero mwisa tiva niro tiqaro, Né esaa ne tirera hiani quara sugema seta rieqatama variate.

¹⁵ Saravano qaqitairo vaiti vutaqi vi inraisava sia vaiti uaqama mwataisaro Kotiva mwirara mwiva uaga hi vaitirave tianarove. Vaiti vutaqitairo govora hi inraisava vaiti vara sero uaqama sairave. ¹⁶ Ini vu nraato suqe vu nraato vahirera, mwi quara osara ntapihi seta riaate, tiro.

¹⁷ Iesusiva mwitaa tiva sero nraase qora uairama vusa mwini sero nraavuqi uro varuvata mwira nraaqiaranravuvano Iesusiva vaasa tu quara osarara mwira sapara huvaro ¹⁸ Iesusiva tiqaro, Qike, ini vu nraatovata mwo? Ini vu nraatovano siave ntapihi riaiso? Saravano qaqitairo vaiti vutaqi vi inraisava sia so vaiti uaqama mwataisaro Kotiva mwirara mwiva uaga hi vaitivave, tianaro. ¹⁹ Vaitivano sara nraisaro sia mwi sarava mwira vu nraatoqive mwutusaqive viraitiro, qaqi vaiti raraqi uto vahiho so mwiqitairo qaqinani tuvitarairave, tiro. Iesusiva mwi quara tiva niqaro mwi quaragotairo nraase qoravano esaa sara so nraivaro Kotiva siama iniara uaqaa hia vaitisave tianarove, tura.

²⁰ Iesusiva mwitaa tiva sero qua mwo tiqaro, Vu nraatoqinaa inraisavano, mwutusaqinaa inraisavano, mwi inraisava mwi inraisava vaiti uaqama saisaro Kotiva mwi vaitirara uaga hi vaitirave tirave. ²¹ Vaiti vu nraato mwutusaqitairo uaga hi saigara utuariva nriso. Vaitivano nraasevata api nruaariva vu nraatoqitairo nriso. Muara varaarivavata mwiqitairo nriso. Vaiti ru saarivavata mwiqitairo nriso. Mwora nraata vaatiara nruaarivavata mwiqitairo nriso.

²² Mwova hi inraisarara mwutusa ntiraro varaariva vu nraatoqitairo nriso. Airi munimave mwo inraisave vaterovata qaiqaa saatavataqai vararerave ti variariva vu nraato tuaraqitairo nriso. Unra qua tiarivave, sia nai mwavantaqaa sugema ntuva quarivave, mwova hi inraisarara vairiqa hiarivave, mwora nrutu vara mwataniqa hiqaro tiarivave, né nrora vaitive tiarivave, api nruaaniraraqai riemwaqi quarivave, ²³ esaa mwi inraisava vaiti vu nraato mwutusaqitairo nri ntero vaiti uaqama saisaro Kotiva mwira saara mwirara uaga hi vaitirave tianarove, tiro.

Mwo mwatanaa nraasevano Iesusira kepusara riovaro Iesusiva mwira saahaqama sora

(Matiu 15:21-28)

²⁴ Iesusiva mwitaa tiva sero mwi mwatara sero uro mwo mwatani Taiaavata Saitonivata vahu mwataragaqaa varurama. Mwiva uro variro sia mwovano ni taqarive tiva sero, nraavu mwoqi varuvoro nraase mwovano mwiva varura vaasa ntapihi sora. ²⁵ Ntapihi sero nraase mwira nraavuraqi vaanavano varu nraaseva Iesusiva varuraqi nrintero Iesusira nraaqani

mwira suqusata uto ntiro varura. ²⁶ Mwi nraaseva nai mwo mwatanaava sia Iutaa mwatanaava, mwiva Siria mwata Ponisiaqi mwatatova varura. Mwi nraaseva Iesusirara po se tiro tiqaro, Ni naavuraqitaira vaana titairaro qaqinani nritaraarive, tiro.

²⁷ Nraase mwiva mwitaa tuvaro Iesusiva nai tiva mwiro mwo quaqaa ntuva sero tiqaro, Qaqao, ne nraaqiara nraante sara mwirerave. Ne nraaqiara sara vara sena vairi niasorave, tiro. (Mwi quara osara mwataa-mama vahiro: Iesusiva tiqaro, Sai ne Iutaa mwatanaasa nraante saahaqa hiase. Ne mwo mwatanaasa nraante saahaqa hiasorave, tiro.)

²⁸ Tuvaro nraase mwiva tiqaro, Nrora, e quqaa tiararovata, vairivano tainta mwevaqi variqaro nraaqiaravano sara viti vaati nreqata saara nrairave, tiro.

²⁹ Nraase mwiva mwitaa tuvaro Iesusiva tiqaro, Suqema tira hiaro. E mwitaa tiaranara tina, ne vaana mwira titauqaro qaqinani nritaraiso. I nraavuravano so variso. So ena mwaatani vuane, tiro.

³⁰ Iesusiva mwitaa tuvaro nraase mwiva nai mwaatani vuva nrintero taqovaro vaanavano mwira nraavuraqitairo nritarero vuvaro mwi qiaatar-ava taintaqaa suqema vaite varurama.

Nraato tita vuvaro quavata sia ntapihi sero tu vaitira Iesusiva saahaqama sora

³¹ Iesusiva Taiaani variro mwiraqaatairo Saitonivata uro variro mwitairo vintantero saugurutana mwatasa vahunanivata vintantero mwitairo nruka nramari Karirini uto ntora.

³² Mwini uto varuvata mwo husa vaiti mwo vitaqita uro Iesusiva varunani sora. Mwira nraato tita vuvaro quavata sia ntapihi sero tu vaitira vitaqita uro Iesusiva varunani seta Iesusirara po se tita tiqata, Ena sauqu mwiraqaa vatairaro sugema vuarive, tita.

³³ Mwisu mwitaa tuvaro Iesusiva nraase qoraqitairo vaiti mwira vitero uro niariaraatana variqata Iesusiva nai sauqu vukahigo vaiti mwira nraa-toqi veta vatero quuantu vihi sero mwira mwaaqirigaa vatero ³⁴ naavuni taqeqaro mwira ua huvaro po tiva sero nai quaqitairo tiqaro, *Epatave*—Qatua vuane, tiro.

³⁵ Mwitaa tuvaro mwira nraato tita vuva qamwanrama qatua vuvaro so riero varuvaro mwira mwaaqirivanovata so vahuvaro qua ntapihi sero ti varura.

³⁶ Mwitaa huvaro Iesusiva mwira nravunaasara kepusaqama sero tiqaro, Mwaa inraisara taqaara sia mwosa tiva niate, tiro. Iesusiva mwitaa tuvata mwisa Iesusira qua sia riaraitita, mwi quara viti viri tiva niqita vura. ³⁷ Mwisu viti viri mwi quara tiva niqi vuvata mwi quara riosa qike tita, sauqu ntukikiraagateta tiqata, Mwiva esaa saiga suqema sero vare varivave. Mwiva nraato tita vuasa sugema saisata so riarave. Mwiva sia qua tiasa sugema saisata so qua ti variarave, tura.

8

Iesusiva qaiqaa pata sara airiqama sero nura
(*Matu 15:32-39*)

¹ Mwi entara nraase qora airi saatavano Iesusira taqarerata nrima uairama vita varura. Mwisu sia sara mwoqanivata ntuva faraitita, qaqi varuvaro Iesusiva nai nraaqiaranravu nraarama sero tiqaro, ² Ne nraase qora mwaa variasara po tuqo. Mwisu taaramwo enta ni vatama seta variqi viqata niari sara nrava taiqa saavo. ³ Ne mwisa niari mwaatani titaarita mwisa

nraataa hiro vuqitairo nrivu nrivuhirata aaraqaa uto ntivorave. Mwo hiasa niarataitavata nriasave, tiro.

⁴ Iesusiva mwitaa tuvata mwira nraaqiara mwisa qaqao tita, Mwaa gumina mwusaugaa. Taitaitave sara varaananarave, tita. ⁵ Tuvato Iesusiva mwisa sapara hiro, Nénravu nataama mperetive ntuva taavo? tuvata mwisa tiqata, Mpereti 7 nraavu ntuva tauro, tita.

⁶ Mwisa mwitaa tuvato Iesusiva nraase qora uairama usara tiqaro, Mwatasata mwatasaa vuata, tiva sero mpereti 7 nraavu vara sero Kotirara suqeve tiva sero, mwi sarara nteqa sero nai nraaqiaranravu niro nraase qora niate, tiro. Tuvata mwisa nraase qora uairama vusa nura. ⁷ Nuvato Iesusiva tavusavata vatora vara sero Kotirara suqeve tiva sero tiqaro, Tavusavata tusama seta niate, tiro.

⁸ Mwitaa tuvata mwisa nuvata nraase qoravano soqama seta nrora. So nreta viti vaati sora mwira nraaqiaranravuvano tuntu seta ntutantuturaqi 7 nraavu kuraama sora. ⁹ Mwi entara 4,000 nraase qora airivano mwi sarara so nrora. ¹⁰ So mwiraqaatairo Iesusiva nraase qora titero mwiva nai nraaqiaranravu sapata votuqi mwaari ntero nruka nramari qara varero Damanutaa mwatani viro.

*Parisivano Iesusirara nrora saiqi tirivata tiva timwiane tura
(Matiu 16:1-4; Ruku 12:54-56)*

¹¹ Iesusiva Damanutaa mwatani vuva uro ntovata Parisi vaitinravu Iesusiva hunani nri nteta Iesusira iorrama mwatarerata mwira mwataara hiqata taqaare tiva seta tiqata, E nrora saiqi tiri vuqaa varairaqeta te taqe iara quqaama Kotiva i tita iso tiare, tita.

¹² Mwisa mwitaa tuvato Iesusira ua huvaro po tiro tiqaro, Mate mwaa varia nraase qorasa naraqamave tiqata nrora saiqi tiri tiva timwiraqe te i osarara quqaave tiare ti variavo? Ne quqaa tianira riaate. Mate mwaa entara variasa varivaqena ne sia nena osara mwisa tiva niqana nrora saiqi vararerave, tiro. ¹³ Iesusiva mwitaa tiva sero qaqira mwisa mwini sero votuqi mwaarinteru nrukaqama tero vutura hini tosaniana viro.

*Parisi vaiti saiqi nraatu rauriqata variate tura
(Matiu 16:5-12)*

¹⁴ Nrukaqaa vi varuvata Iesusira nraaqiaranravuvano mpereti tauru seta sia vararaitita, kuaiaqai votuqi vatovaro ¹⁵ Iesusiva mwo quaqaa ntuva sero tiqaro, (Taupatai inraisava mperetiqi visaro mperetivano sotairave.) Parisivanovata Herotivavata taupataira votima seta variavo. Né mwisa nraatu aatu hiqata variate.

¹⁶ Mwitaa huvata mwira nraaqiaranravuvano Iesusiva mwo quaqaa ntuva sero tu quara sia ntapihiraitita, nai tiva mwi nai tiva mwi hita tiqata, Nara quave tiso? Mpereti sia varaunara mwirara rieqarove mwitaa tiso? tita.

¹⁷ Mwitaa ti varuvato Iesusiva mwisa ti varu quara riero tiqaro, Né naraqamave mpereti sia varaara saara airi qua ti variavo? Siave ini vu nraatovano ntapihi visata ntapihi seta riaavo? Ini nraato tita visatave né sia ntapihi seta riaavo? ¹⁸ Né vu nraato vataasa né siave ntapihi seta rieta taqaavo? Né ne saiqi varaurara tauruve saavo? ¹⁹ Ne 5,000 nraase qora mpereti sauguru nteqa sena niavata nreta viti vaati sora nataama tua né mwi entara kuraama sorave? tiro.

Iesusiva mwitaa tuvata mwisa tiqata, So te mwi entara tua 12 nraavu kuraama saavanarave, tita.

²⁰ Mwisa mwitaa tuvaro Iesusiva qaiqaa tiqaro, So ne 4,000 nraase qora mpereti 7 nrvu niavata nreta viti vaati sora nataama tua né mwi entara kuraama sorave? tiro.

Tuvata mwisa tiqata, So te tua 7 nrvu mwi entara kuraama saavanarave, tita.

²¹ Mwisa mwitaa tuvaro Iesusiva tiqaro, (Né ne mwi saiqara varaurara ntapihi seta riaataara vaisata né tauru seta mpereti kuaiqa vare nrirara airi qua ti variavo.) Ini vu nraato ntapihi virata ni osarara riaataara vaisata né nataamaqitave ni osarara sia ntapihi riaavo? tiro.

Iesusiva vaiti mwo vu qipa vura ntapairi mwatora

²² Iesusiva nai nraaqiaranravu sapata vusa Vetasaaitaani uro nteta mwini varuvata mwo husa vu qipavu vaitira vita varetu Iesusiva varunani uro seta Iesusirara po tita tiqata, vaiti mwaaqaa ena sauqu vatairaro so tagaarive, tita.

²³ Mwitaa tuvaro Iesusiva vu qipavu vaitira sauqu tu varero vitaqiro uro mwatusa mwaaqani sero mwini variqaro mwira vuqaa taara vihi sero nai sauqu mwiraqaa vatero mwira sapara hiro tiqaro, Mwo inraisa sove taqera hiaro? tiro.

²⁴ Iesusiva mwitaa tuvaro vaiti mwira vu qauma ntapairi virera huvaro mwiva vutu tagero tiqaro, Ne vaiti taqe varuqata mwisa satari nraantan-tama setama nrue variavo, tiro.

²⁵ Mwitaa tuvaro Iesusiva qaiqaa nai sauqu mwira vuqaa vatovaro mwira vuvano ntapairi vuvaro mwiva sugema sero esaa inraisa tagero.

²⁶ vaiti mwiva ntapihi sero taqovaro Iesusiva mwira titero tiqaro, Sia mwi mwatusaraqi nrima ntantera viraitira, ena mwaatani vuane, tiro. Turama.

Pitaava Iesusira osarara tura

(Matiu 16:13-20; Ruku 9:18-21)

²⁷ Mwiraqaatairo Iesusiva nai nraaqiaranravuvata uro Sisariaa Piripai qaumato vahu mwatusaraqiara viro. Aaraqaa viqaro nai nraaqiaranravu sapara hiro tiqaro, Nraase qoravano niara tavave tiva segatave ti variavo? tiro.

²⁸ Mwitaa tuvata mwisa tiqata, Mwo hiasa iara Ioniva nramari ni varivave tiavata, mwo hiasa iara mwiva tiri haivaqava Iraisavave ti variavata, mwo hiasa iara mwiva tiri haivaqava poropeti vaiti mwovano qaiqaa qovarama viro nrue variso ti variavo, tita.

²⁹ Mwisa mwitaa tuvaro Iesusiva mwisa sapara hiro tiqaro, So nénravu mwo? Né niara ta vaitiva varisove tiavo? tiro. Mwitaa tuvaro Pitaava tiqaro, E Karaisiva, mesaiaa vaitivanove. E Kotiva titai vaitiva variaro, tiva segatama te varuro, tiro. ³⁰ Mwitaa tuvaro Iesusiva mwinravusara kepusaqama sero tiqaro, Siavatama mwi quara mwosa tiva niate, tiro.

Iesusiva naatiara nai qutuanirara tiva nura

(Matiu 16:21-28; Ruku 9:22-27)

³¹ Mwitaa tiva sero Iesusiva qua hoqarama tero vutu sero nai nraaqiaranravu mwiva naatiara nai qutuanirara tiva niro tiqaro, Ne mwatani mwatatai nraaqiarava variqana nriqa vuani inraisara airi vararerave. Nrora vaitivanovata, Kotira saiqara vara mwate varia vaitisa vuniaa vaitivanovata, niara qumina vaitive tiva seta, ni qoririma matevarave. Mwisa mwitaa hiqatama ni ru saivaqena ne qutu vina taaramwo enta varina qaiqaa qaqi tivuanirave, tiro.

³² Iesusiva mwi quara vutu sero qoqaa tiva nuvaro Pitaava Iesusira vita uhini sero qaqao tiro, Qora quama tira hiaro, tuvaro ³³ Iesusiva tuqataa viro

nai nraaqiaranravu taqero Pitaara irora hiro tiqaro, Saataanio, niarasata vuane. Sia ni vuqaa variane. E sia Kotiva riaintema sera riaaro. E qumina vaitivano riaintema sera rie variaro, tiro.

³⁴ Iesusiva mwitaa tiva sero nraase qora uairama vusavata nai nraaqiaranravuvata nraarama sero tiva niro tiqaro, Ni vataqiro nriari vaitiva mwiva nai mwutusa vahianira qaqira sero vaiti ruseta hirite satarira vara qu varero ni naatiara nrianarove.

³⁵ Nai mwatani qaqi varianiraraqai nroraqama sero riaariva, mwi vaitiva esaarama qutu vuanarove. Vaitivano niara riemwaqiro vqaro ni saiga varareraro ni qua riemwaqiro vqaro uro qutu vuariva, mwi vaitiva esaa enta qaqi variqiro vuanarove.

³⁶ Vaitivano mwatani variqiro vqaro esaa inraisa uairama sero mwiragaatairo qutu viraro mwiva uairama taani inraisava nataama serove mwira saahaqa hianarove? Sia mwi inraisava mwira so saahaqa hianarove.

³⁷ Vaitivano qutu viro nara soqaave mwinro qaiqaa qaqi variqiro vuanarove? Sia mwiva mwi entara so soqaa utu sero qaiqaa qaqi variqiro vuanarove.

³⁸ Mwaa entara mwatani varia nraase qorasa uaga hi saigara utiqatama Kotira qaqira saavo. Vaiti mwovano niaravata ni quaravata mwoqama sero sauruariva, mwi vaitiva variraqe ne mwatani mwatatai nraaqiarava varigana naatiara ne tuvuan entaraqaa naivata saurira inraisa vara mwianirave. Mwi entara ni qora kepusa osaravano niqaatairo itero ntuvaahe variraqena naavuniaasa vatama sena tuvuanirave. Mwi entara ne mwi vaitira naivata saurira inraisa vara mwianirave, tiro. Iesusiva turama.

9

¹ Iesusiva mwitaa tiva sero tiqaro, Ne quqaa tianira riaate. Vaiti mwonravu mwaini mate mwaa tivita variasa sia qumina qutu vivarave. Kotiva nraase qoraqaa kepusaqama sero ntaqaihiari entava nrianira mwisa taqeta qutu vivarave, tiro.

Iesusira mwavantavano nai mwo qarama mwo mwavanta suqe mwavanta suqu vura

(Matiu 17:1-13; Ruku 9:28-36)

² Iesusiva mwitaa tuvaro 6 enta nritarovalo mwiva Pitaaravata, Semisiravata, Ioniravata, mwiravusaqai vita varero taqi nroraqaa niariaraa varirerata vita. Mwini uro varuvaro mwisa vuqaa Iesusira mwavantavano suqu viro vahuvaro ³mwira tuavaaqavanovata mwoqama sero itero tahuqi varura. Siana so vaiti mwovano hiqama tairaro mwitaama sero tahuqi vuanaro.

⁴ Mwitaama sero mwira mwavantavano suqu viro vahuvata mwira nraaqiara taaramwonravuvano variqata taqovata Iraisasa Mosesisa mwisa haivaqasatana qovarama vita variqata Iesusira vatama seta qua ti varura.

⁵ Mwitanasa Iesusira vatama seta qua ti varuvaro Pitaava Iesusirara tiqaro, Mwaa ti variara vaitio, sugemama tirenrau i vatama seta mwaini nrurasa varuro. E sove tirera, te haraara nraavu taaramwonravu iara mwo, Mosesirara mwo, Iraisarara mwoma seta hoqa nataare, tiro. ⁶ Mwisa mwoqama sero nraatuqa tovata varuvoraro tiro, Pitaava nara quave tianirave tiro, mwi quara turama.

⁷ Mwitaa tuvaro tonavuvano qovara hiro mwisaqaa ntuvagu sovaro quavano tonamwuqitairo tiqaro, Mwaa ni maaqu mwirara ni mwutusa

nti variva variso. Nénravu mwira qua riaate, tiro. ⁸ Mwitaa tuvata mwira nraaqiaranravuvano qamwanramase tuqataaqata hiqata taqovaro sia mwovanovata Iesusira nraaqani varuvaro Iesusivaqai nariaraa varura.

⁹ Mwitaa huvata mwisa taqi mwiraqaataita tuvi varuvaro Iesusiva mwiravusara kepusaqama sero tiqaro, Mateqaa taqaa inraisarara sia mwosa qamwanrama seta tiva niate. Ne mwatani mwatatai nraaqiarava ne naatiara qutu vina qaiqaa qaqi tivina varianiraqaataita né soma tiva niqita vivarave, tiro.

¹⁰ Mwitaa tuvata Iesusiva tuntema seta sia mwosavata tiva ninraitita, niariaqai nai tiva mwi nai tiva mwi hita tiqata, Iesusiva nai qaiqaa tivuanirara tira nataa hi quarave tiso? tita. ¹¹ Mwitaa tiva seta mwisa Iesusira sapara hita tiqata, Mwaara osara tiva ni varia vaitisa tiri tiva timwita tiarave. Iraisaava tiri haivaqava mwiva nraante qovarama viro nri ntaanarove, ti variarave. Naraqamave mwisa mwitaa ti variavo? tita.

¹² Mwisa mwitaa tuvaro Iesusiva tiva niro tiqaro, So mwisa quqaa ti variarave. Iraisaava nraante esaa inraisa ntapihí sero tequama faréraro nrriarivama variso. Ni mwatani mwatatai nraaqiarara mwo? Nara qua niara qara ntuva tova vahirave? Niara mwiva airi nriqa vuani inraisara varaqiro virata mwiraqaataita mwisa mwira qoririma mwatetama mwirara qumina vaitive tivarave tiro, qara ntuva torave.

¹³ So ne iniara tiqana Iraisaava vaasa nrima varurarama tuqo. Mwiva nrima varuvata vaiti mwonravuvano mwira niari sasa huntema seta mwira uaqama mwatorave. Kotira vukuqi qara ntuva tova tiqaro, Naatiara mwira mwitaa hirave tura mwivau mwira mwitaa hurave, tiro.

*Iesusiva nraaqiaraqaitairo vaana titovaro nritarero vura
(Matiu 17:14-21; Ruku 9:37-43)*

¹⁴ Mwitaa tiva sero Iesusiva nai nraaqiara hininravu sonani uto taqovata nraase qora airivano uairama vita varuvata mwaara osara ti varu vaitisa mwini variqata Iesusira nraaqiaranravu sapata irora hi varura.

¹⁵ Mwisa uto ntovata mwini uairama vita varusa qamwanrama seta Iesusira taqeta nrriharama vita santeta uro mwira qua mwantovaro

¹⁶ Iesusiva nai nraaqiara hini mwiravusa sapara hiro tiqaro, Nara inraisa saarave né mwisa sapata irora hi variavo? tiro.

¹⁷ Mwitaa tuvaro nraase qora vutaqaitairo vaiti mwovano mwira tiva mwiro tiqaro, Mwaara ti variara vaitio, vaanavano ni maaqu vutaqi varisaro mwiva sia so qua tisanara tina, ne e hianarani vitená nruqo.

¹⁸ Vaanavano ni maaqu ntavaaqavu sero mwira mwataqaa tuta saisaro mwira nroqitairo taaraparavano nrisaro nai vai kutisaro esaa mwira mwavantavano ntapihí viro kepusaqama vivihirave. Ne i nraaqiarara vaana titaivaro nritarero vuarive tuqata mwisa mwitaa hiare tiavaro vaanavano sia nritare virave, tiro.

¹⁹ Vaiti mwiva mwitaa tuvaro Iesusiva mwi quara riero tiqaro, Né mwaa entara varia nraase qorasa Kotirara qumimaqama seta sia mwirara riaavo. Qike, né ni pupohaira uti variavana ne nataama nanive nkyi sapata varianirave? Ne nataama entave variqana ini saahaqa hianirave? So nraaqiara mwira vita vareta mwaini nriate, ²⁰ tuvata vite nruvaro vaanavano Iesusira taqero nraaqiara mwira vara mwataqaa tuta sovaro tuqataaqata hi varuvaro mwira mwavanta ntirintiri hi varuvaro taaraparavano mwira nroqitairo mwo uti varura.

²¹ Mwitaa hi varuvaro Iesusiva mwira qora sapara hiro tiqaro, Taire hoqarama serove mwitaa iso? tiro. Mwitaa tuvaro mwiva tiqaro, Nraaqiara pataru varisaro mwitaamaqiro virave. ²² Vaanavano mwira rusaase tiro,

mwira vara tiaqive nramariqive tuta sairave. E tiri so saahaqa hirava varirera, tiriara po tiqara tiri saahaqa hiane, tiro.

²³ Mwitaa tuvaro Iesusiva qaqaqo tiro, E tiqara, E so tiri saahaqa hiravave variaro tianarave. E siave ntapihira hiaro? Kotirara kepusaqama sero riaariva esaa saiga so varaanarove, tiro. ²⁴ Tuvaro nraaqiara mwira qova gamwanrama sero tiqaro, So ne Kotirara riemwaqina vuva siama soqa iso. Evata ni saahaqa hiraqena ne Kotirara kepusaqamase riemwaqina vuase, tiro.

²⁵ Mwitaa tuvaro Iesusiva taqovata nraase qora uairama vusa itai itai vaini nruvaro Iesusiva vaana irora hiro tiqaro, E sia qua tiara vaanavave. E nraatora hiara vaanavave. E nraaqiara mwiqitaira nritarera vuane. Sia qaiqaavata nraaqiara mwiraqi viqetera variane, tiro.

²⁶ Mwitaa tuvaro vaana mwiva nroraqama sero aasara ntero nraaqiara mwira vara ntuqutuvuro ntirintirima sero mwiva qutu vusa nraantan-tamwa sero ntuva viro vahuvata nraase qoravano tiqatama, Mwiva qu-tuma viso, tita. ²⁷ Tuvaro Iesusiva mwira sauquqaa tu varero mwira vara mwaaviarama sovaro so qaqi tiviro varura.

²⁸ Nraaqiara mwiva so qaqi tiviro varuvuro Iesusiva mwiraqaatairo uro nraavuqi varuvata mwira nraaqiaranravuvano uro mwira tiremase nariaraa sapara hita tiqata, Te vaana mwira titauro sia nritarero virave. Naraqamave te sia so mwitaa huro? tita.

²⁹ Mwisaa mwitaa tuvaro Iesusiva tiqaro, Mwitaa hiani vaanara sia so qaqi titaivaro nritarero vuanarove. Kotirara aasara nteqatama titaivaro so nritarero vuanarove, tiro. Iesusiva turama.

*Iesusiva qaiqaa nai qutu viro qaqi tivuanirara vutu sero tiva nura
(Matiu 17:22-23; Ruku 9:43-45)*

³⁰⁻³¹ Mwiraqaatairo Iesusiva nai nraaqiaranravu sapata mwi mwatara seta Karirini vura. Mwini viqaro qua ntapihi sero nai nraaqiaranravu tiva niariva vahubarora tiro, mwovano te vuanara huaama sero tagaaso tiro uqetase titero vura. Iesusiva nai nraaqiaranravu tiva niro tiqaro, Mwovano ni mwatani mwatatai nraaqiarara qovarama sairata ni ntavaqavuqita uro vaiti sauquqi saivata ni ru saivagena qutu vina taaramwo enta vari senama qaiqaa qaqi tivuanirave, tiro.

³² Iesusiva mwitaa tuvata mwira nraaqiaranravuvano mwi quara osara sia ntapihi riaraitita, mwiva qua tura nraatu aatu hiqata sia mwi quara osarara sapara hura.

Tavave tirinravuqitairo nroraqama viro vuniaa vaitivano varianarove tura

(Matiu 18:1-5; Ruku 9:46-48)

³³ Mwiravusa vusa Kapeniaani uro ntovaro Iesusiva nraavuqi uro variqaro nai nraaqiara mwisa sapara hiro tiqaro, Nenravu aarana nriqata nara qua tiva setave irora hiavo? tiro. ³⁴ Mwitaa tuvata mwisa sia qua tiraitita, tirema varura. Mwiravusa aarana nriqata mwitaama tita, Tavave tirinravuqitairo nroraqama viro vuniaa vaitivano varianarove? tura. Mwitaa turara tita, mwisa saurigaqata sia Iesusira tiva mwita.

³⁵ Mwiravusa sia qua tuvaro Iesusiva mwatasaa viro mwisa nraarama sero tiva niro tiqaro, Sai ne nroraqama vuani vaitira osara ini tiva niase. Vaiti mwovano nroraqama vuataa hiariva siama vuni uro variqaro nroraqama vuanarove. Mwiva nroraqama vuataa hirora naatiarani variqaro esaa nraase qora saiga vaiti variarivama nroraqama vuanarove, tiro.

³⁶ Iesusiva mwitaa tiva sero nraaqiara pataru vita sero mwisa vuqaa vatero mwira avuhu sero tutero tiqaro, ³⁷ vaiti mwovano niara rieqaro

nraaqiara mwataa hianirara qamwateqaro sugema mwataariva mwiva nivatama mwitaama mataanarove. Mwiva mwitaa hiqaroma Kotiva ni titairavatama qamwata mwataanarove, tiro. Iesusiva turama.

*vaiti mwovano Iesusira nrutu nteqaro saiqa varora
(Ruku 9:49-50)*

³⁸ Iesusiva mwi quara tuvaro Ioniva tiqaro, Mwaara ti variara vaitio, te taqauraro vaiti mwovano i nrutu nteqaro vaana tite varirave. Mwi vaitiva sia tirivata i vataqiro nrue variva mwitaa ihatara tita, te mwirara eqaane tiva seta, mwira antua tauro, tiro.

³⁹ Mwitaa tuvaro Iesusiva qaqaqo tiro, Sia mwi vaitira antuaate. Mwovano ni nrutu nteqaro nrora saiqa varero mwiraqaatairo mwiva sia qamwan-rama sero niara uaga hi quara tianarove. ⁴⁰ Mwovano sia tiri nravutaaga hiariva varirera, mwi vaitiva tiri nravunaavama varianarove, tiro. ⁴¹ Ne tianira riaate. Ini nramari nraataa hirata varivaro mwovano iniara Iesusira nraaqiarave tiva sero, nramari ini niani vaitiva variraro Kotiva sia mwira tauru saraitiro, mwira soqaa sugema sero mwianarove, tiro.

*Mwora uaga hi aarara nraamwuterorave tura
(Matiu 18:6-9; Ruku 17:1-2)*

⁴² Iesusiva mwitaa tiva sero nraaqiara pataru vaasa avuhu sero tu-torara tiqaro, Nraaqiara mwaa voti hiariva ni qua riaariva variraro vaiti mwovano nri ntero uaga hi aarara mwira nraamwutairera, mwira saara mwi vaitiraqaa qua nroraqama sero vahianarove. Vaiti mwira nruntaqi ori nrora saantaru sero nrukaqi tuto saivaro mwi vaitiva sia nraaqiara pata mwira uaga hi aarara nraamwutaataarave.

⁴³ Mwi quara rieqarama i sauqu hinivano uaga hi saiqa uti varirera, mwira teqa sera saane. Mwiraqaataira sauqu kuaiaqai vahiariva soma naavuni vira qaqi varinarave. E sauqu taaratana vahiariva uaga hi saiqa uti variraro i tia iteqaro sia qipaaniaqi tuta saasorave.

⁴⁴ [Mwi mwataraqi imwivano qutu vuani mwavantara qaqiqai nraavaqiro vi varianarove.

Tiavano iteqaro siama qipa vuanarove.]

⁴⁵ I suqu hinivano uaga hi saiqa uti varirera, mwira teqa sera saane. Mwiraqaataira suqu kuaiaqai vahiariva soma naavuni vira qaqi varinarave. E suqu taaratana vahiariva variraro i tia nroraqama sero itaaniraqi tuta saasorave.

⁴⁶ [Mwi mwataraqi imwivano qutu vuani mwavantara qaqiqai nraavaqiro vi varianarove.

Tiavano iteqaro siama qipa vuanarove.]

⁴⁷ I vu hinivano uaga hi saiqa utirera, vauru saane. E vu kuaiaqai vahiariva soma Kotiva ntaqaihi mwatusaraqi vira qaqi variqira vinarave. I vu taaratana vahiariva uaga hi saiqa utuqira viraro i tia nroraqi tuto saasorave.

⁴⁸ Mwi mwataraqi imwivano qutu vuani mwavantara qaqiqai nraavaqiro vi varianarove.

Tiavano iteqaro siama qipa vuanarove. (Ais 66:24)

⁴⁹ Hore aatai ntema sero tiaqotairo esaa nraase qora aataanarove. ⁵⁰ Hore suqe inraisave. Horevano uaqama viro sia qiasaa hirera, siama so qaiqaa utu sairaro qiasaa hianarove. So ne hore sugera votima seta varivaro ini mwutusa qihaasa hirata nariara nariara suqe hiqata variate, tiro. Iesusiva turama.

10

Nraase qaqirase osarara Iesusiva tiva nura (Matiu 19:1-12; Ruku 16:18)

¹ So Iesusiva mwi mwatara sero Iutiaani vuva uro Sotaani nramari qarero vutura hini tosani vura. Iesusiva uro varuvata qaiqaa nraase qora airivano mwiva varunani uairama vita varuvaro Iesusiva nauqaa hunte qaiqaa mwasaasa mwisa tiva ni varura.

² Iesusiva mwini varuvata Parisi vaitinravu mwiva varunani uro nteta Iesusiva api qua tiarive tita, mwisa mwo qua Iesusira sapara hita tiqata, Sove vaitivano nai nraata qaqira saanarove? tita. ³ Tuvaro Iesusiva niari sapara hiro tiqaro, Haaru ini haivaqava Mosesiva nara quave iniara mwitaa mwitaa hiate tiqaro tiva torave? tiro.

⁴ Iesusiva mwitaa tuvata mwinravusa tiqata, Mosesiva mwataa tiva torave: vaiti mwovano nai nraata qaqira sareraro hiqaro qara mwo ntuva sero nai nraata mwinro tiqaro, So i qaqira sauqo, tiva seroma titaananrove, turave. Mosesiva qua mwitaama sero tiva torave, tita.

⁵ Mwitaa tuvaro Iesusiva tiqaro, Mosesiva variqaro taqovaro ini haivaqasavara mwutusavano kepusaqa huvata sia mwisa Kotirara riorave. Mwitaa hi varuvarora tiro, Mosesiva mwi quara tiva torave.

⁶⁻⁷ Tauraaqama sero sia mwitaama vahurave. Tauraa Kotiva naavuvata mwatavata utu sero vatero tiqaro, Ne vaitivata nraasevata utu sena vataurara tiro, vaitivano nai nrosa qosa sero nai nraatantiri ntaaqau vita mwitana kuaa mwavanta votima seta varivarave. ⁸ Mwitana sia mwo mwavanta mwo mwavanta variraitita, mwitana kuaa mwavantaqaima varivarave, turave. ⁹ Kotiva naivano vaativata nraatavata vara kuaaqaa ntaaqau tairara tiro, sia mwovano mwitanasa tusama saarive, tiro.

¹⁰ Iesusiva mwitaa tiva sero nraavuqi uro varuvata mwira nraaqiaranravu Iesusira mwi quara osarara sapara huvaro ¹¹ Iesusiva mwinravusa tiva niro tiqaro, vaiti mwovano nai nraata qaqira sero mwo nraase varaariva, mwi vaitiva qaraaha nraasentiri nrueqaroma muaraqama seroma mwisantiri nruaananrove. ¹² Mwira votima sero nraasevano nai vaati qaqira sero qaraaha vaiti varaariva, mwi nraasevavata qaraaha qoraisi mwisantiri nrueqaroma muaraqama sero nruaananrove, tiro.

Iesusiva nraaqiaranravuqaa nai sauqu vateqaro suqema mwatora (Matiu 19:12:13-15; Ruku 18:15-17)

¹³ Iesusiva varuvata nraase qora mwisa niari nraaqiara vita vareta Iesusiva nai sauqu mwisagaa vataarive tita, Iesusiva varunani uro saare tuvata Iesusira nraaqiaranravuvano mwisa irora hi varura.

¹⁴ Mwitaa huvaro Iesusiva taqero nai nraaqiaranravu niari irora hiro tiqaro, Qaqao, né nraaqiara mwisa qaqi saivata ne hunani nriate. Sia mwisa aara antuaate. Kotiva ntaqaihiari mwatusava mwi nraaqiarasa voti hiasa mwisa mwatusama vahianarove. ¹⁵ Mwaa quara riaate. Vaitivano sia nraaqiara votima sero Kotira qua riaariva, mwi vaitiva siama Kotiva ntaqaihiari mwatusaraqi vuanarove, tiro.

¹⁶ Iesusiva mwitaa tiva sero nraaqiara mwisa avuhu sero tutero nai sauqu mwisagaa vateqaro mwisa suqema mwatora.

Airi inraisa vato vaitirara tura (Matiu 19:12:16-30; Ruku 18:18-30)

¹⁷ Iesusiva aarana virera huvaro vaiti mwovano santero nrima Iesusira sapara hiro tiqaro, E mwaara ti variara vaitiva suqevave. Ne nataa

hi saigara mwo saiga mwo saiga suqe saiga Kotirani vara mwataani-
raqaatainave naatiara ne esaa enta qaqi variqina vuanirave? tiro.

¹⁸ Mwitaa tuvaro Iesusiva tiqaro, E naraqamave niara vaiti suqevave
tiao? Kotivaqaima suqeva variso. ¹⁹ E Kotiva tiva to quarara riaane. Mwira
quavano mwataama sero vahirave:

Sia mwora rusaane.

Sia mwora nraasera nruaane.

Sia muara varaane.

Sia unra qua tiane.

Sia unra utu seqara mwova hiani inraisara varaane.

Ena nrosa qosa nrutu tuaahera nataane, turave. (Kis 20:12-16)

Kotira quavano mwitaama sero vahirave, tiro.

²⁰ Iesusiva mwitaa tuvaro mwi vaitiva tiqaro, Mwaara ti variara vaitio,
ne nraaqiarasaa variqana ne mwi quara rieqana mwitaa mwitaamaqina
nrurave, tiro.

²¹ Mwitaa tuvaro Iesusira mwutusavano mwi vaitirara vahuvaro mwira
tageqaro mwira tiva mwiro tiqaro, E kuaa inraisaraqai aara ntaaro.
Uro ena vatena inraisara mwosa nira munima vara sera vehi nraase
qora tusama sera niraro naavuni i soqaa vahiarive. Mwitaama sera
mwiragaataira ni vataqira nrane, tiro.

²² Iesusiva mwitaa tuvaro mwi vaitiva mwi quara riero inraara viri ratero
varura. Mwiva airi inraisa vatovara tiro, sia Iesusira qua riaraitiro, qaqira
sero mwira mwutusavano uqa huvaro vurama.

²³ Vuvaro Iesusiva nai nraaqiaranravu vara ututuma sero tagero tiqaro,
Airi inraisa vatesa Kotiva ntaqaihi mwatusaraqi mwusaari tu seta vivarave,
tiro.

²⁴ Mwitaa tuvata mwira nraaqiaranravuvano mwi quara rieta, Qike
tita, Iesusiva nataihi quarave tišo, tuvaro Iesusiva qaiqaavataqai mwi
quara tiqaro, Ni nraaqiaranravu tuaavo, nraase qoravano Kotiva ntaqaihi
mwatusaraqi viretata mwusaari tuseqatama vivarave. ²⁵ (Kameri quara
nroravano nataama serove vuqa uvintaqi ntuqiaraanarove? Sia so mwitaa
hianarove.) So kamerivano vuqa uvintaqi ntuqiaraariva so vahirarove, airi
inraisa vataarivavata Kotiva ntaqaihi mwatusaraqi so vuanarove, tiro.

²⁶ Iesusiva mwitaa tuvata mwira nraaqiaranravuvano mwira quara airi
nraato tigata qike tita, Airi inraisa vataariva Kotiva ntaqaihinani sia so
virera, nai tarave Kotiva vitaanarove? tita.

²⁷ Mwitaa tuvaro Iesusiva mwisa itutuma sero tagero tiqaro, Mwatani
variasa niari kepusara siama so vivarave. Kotiva saahaqa hirata so
vivarave. Kotiva esaa saiga vare varivave, tiro.

²⁸ Mwitaa tuvaro Pitaava tiqaro, Tagaane. Tirenravu i vataqita virera
hiqata esaa inraisa mwini seta qaqima nruru, tiro.

²⁹ Pitaava mwitaa tuvaro Iesusiva mwisara tiqaro, Ne quqaa qua tianira
riaate. Sia ne né saiga varerara tauru saanirave. Vaiti mwovano nai
nraavu maatave, nai qata vasaave, nai nrura nrasaave, nrora qorave, nai
nraaqiarave, nai mwatave, mwini sero niara riero ni saigara riero vuariva,
³⁰ mwi vaitiva mwira qiata soqaa vareqaro sia kuaa nani varaanarove.
Mwiva mate mwaa mwataraqaa soqaa vareqaro airi nani varaanarove.
Mwiva nraavuve, qata vasaave, nrura nrasaave, nrosave, nraaqiarave,
mwatave, mwi inraisara mwi inraisara airi inraisa varaanarove. Ni
qua varaari vaitiva varirata mwira saara mwira uaqama mwataivaro
varianarove. So ni qua varaariva qutu viraro Kotiva mwirara esaa enta
qaqi variqira vuane tianarove.

³¹ Mate nraase qora airivano vuni variasa qaso tuvitareta naatiaranima varivarave. Mate naatiarani variasa qaso nritareta vunima varivarave, tiro.

Iesusiva taara mwo nani nai qutu viro qaiqaa tivuanirara nai nraaqiaran-ravu vutu sero tiva nura

(Matiu 20:17-19; Ruku 18:31-34)

³² Mwisa Ierusareminiara aaraqaa vi varuvaro Iesusiva nraante nariaraa vuni vi varura. Mwiva vuni vi varuvata mwira nraaqiaranravuvano naatiara nriqata airi vu nraato tuqita vi varuvata nraase qora mwonravuvano Iesusira vataqita nrusavata aatu higata nri varura.

Mwitaamaqi vi varuvaro mwiraqaatairo Iesusiva nai nraaqiara 12 nraavu nraarama sero niariaraa vita varero viqaro naatiara naigaa qovara hiani inraaisara qaiqaa tiva niro tiqaro, ³³ Riaate. Te Ierusaremini uro variarata vaiti mwonravuvano ni mwatani mwatatai nraaqiarara ntavaagavugita uro saivata Kotira saiga vara mwate vari vaitisa mwisa vuniaa vaitinravuvanovata, mwaara osara ti varia vaitisavata, mwisa niara mwira ru saate tiva seta, ni vitaqita uro Romeni mwatanaasa sauquqi tuta saivata ni ru sevarave. ³⁴ Mwi mwatanaasa niara raima mateta, niqaa quaanu vihiteta, saantaango ni ntugutuse vateta, ni rusaivagena qutu vuanirave. Ne qutu vina taaramwo enta varina qaiqaa qaqi tivuanirave, tiro. Iesusiva turama.

Semisisa Ionisa niaritana nroraqaa hirara Iesusira sapara hura

(Matiu 20:20-28)

³⁵ Sepetira mwaaqutana Semisisa Ionisa Iesusiva varunani uro nteta Iesusira sapara hita tiqata, Mwaara ti variara vaitio, e mwo inraisa tiritana quara eo tiva sera mwitaama tiva taanterama nruro, tita. ³⁶ Tuvoro Iesusiva tiqaro, Ne nitana nataave hianirave? tiro.

³⁷ Tuvata mwitanasa tiqata, Naatiara e kepusavano nraase qoraqaa ntaqaihiqara nrora vaiti taintaga mwatasaa vira varigara e tiraro tiritanaqatairo mwovano nroraqama viro i sauqu tanarani mwatasaa viro variraro mwovano nroraqama viro i sauqu saanaaqani mwatasaa viro variarive. Tiritana mwirara rieqatama i sapara huro, tita.

³⁸ Mwitaa tuvoro Iesusiva qagao tiro, Nétana sia ntapihhi seta vu nraato tiraitita, apiqama seta ni sapara hivo. Kaapuqitai nramari nraantema sena ne nriqa vuani nramarira nraanira, sove nétanavata nrevarave? Ne nriqa vuani inraaisara nramari varaantemase varaanira, sove nétanavata varevarave? tiro.

³⁹ Tuvata mwitanasa tiqata, Tiritana soma mwitaa hianarave, tuvoro Iesusiva mwitanasa tiva niro tiqaro, Quqaama ne nramari nraanira nétanavata nrevarave. Quqaama ne nramari varaanira nétanavata varevarave. ⁴⁰ Ni sauqu tanaranivata saanaaqanivata mwatasaa vita vari vaititanasara siana ni saiga vaiso. Ni qova vaiti taaratana tequamataisa, mwitanasama mwiraqaa mwatasaa vita varivarave, tiro.

⁴¹ Mwitaa tuvata Iesusira nraaqiara hini 10 nrauvuvano mwi quara rieta mwira saara Semisisa Ionisa irora hura.

⁴² Mwiravusa mwitanasa irora hi varuvaro Iesusiva mwiravusavata mwitanasavata nraarama sero eqaate tiro, Mwo mwatanaasa ntaqaihiqi vi varia osarara né ntapihharave. Mwisa qiata vaitivano nritareta virito variqata mwi saigara mwaa saigara vara timwataate ti variarave. Mwisa nrora vaitivano tiqata, Te nroravano varuro. Tiri quaqai riemwaqita vuete, ti variarave.

⁴³ Nénravu sia mwisa nraantantaate. Iniqitairo mwovano nrora varireraro mwiva ini saiga vaiti nraante variro naatiara nroraqama vuanarove.

⁴⁴ Iniqitairo mwovano nritarero vuni varireraro tiariva, mwiva rupa tai waitira votima sero ini saiqa vara nataanarove. ⁴⁵ Ne mwatani mwatatai nraaqiaravama varuqo. Nevata sia nraase qoravano nini saiqa vara mataatera tuvuvave. Ne nraase qorani saiqa varaqina vigana airi nraase qora saahaqama natena mwisara qutu virerave tiva sena tuvuvave, tiro. Iesusiva turama.

Iesusiva Vatimiaasira vu ntapairi sora

(Matiu 20:29-34; Ruku 18:35-43)

⁴⁶ Iesusiva nai nraaqiaranravuvata vuva Ierikoni nrintero mwi mwatusara nraatarero virera huvata nraase qora airivano mwira vataqita vi varuvaro vu qipa vu waitiva Vatamiaasira, Timiaasira mwaaquvano variqaro mwo inraisa miate tiva seqaro naaru ti varu waitiva aara tosani mwatasaa viro varura.

⁴⁷ Mwiva mwini variqaro riovata mwo husa tiqata, Iesusiva Nasareti-naava nritare vi variso, tuvaro riero mwiraqaatairo mwiva paatiro Iesusir-ara aasara ntero tiqaro, Iesusio, Devitira mwaaquo, qaqi niara po se tiva mataane, tiro.

⁴⁸ Vu qipa vu waitiva mwitaa tuvata airi nraase qoravano mwira irora hita tiqata, Tirema variane, tuvaro mwiva sia mwisa qua riaraitiro, qaiqaa paatiro aasara ntero tiqaro, Devitira mwaaquo, qaqi niara po se tiva mataane, tiro.

⁴⁹ Mwitaa tivaqi vuvaro Iesusiva nrima mwiraqaa tiviro variro tiqaro, Nraaraivaro nrriarive, tuvata mwisa vu qipa vura nraarama seta tiqata, So qamwa tegara variane. Tivuanne. Mwiva ima nraaraiho, tita.

⁵⁰ Mwisa mwitaa tuvoro vaiti mwiva nai vaaqa qutora vara qaqinani sero tiviro Iesusiva tivi varunani vuvaro ⁵¹ Iesusiva mwira sapara hiro tiqaro, Nivano i nataa hiarive tirave nrriaro? tiro. Mwitaa tuvoro vu qipa vu waitiva tiqaro, Mwaaara ti variara vaitio, e ni vu ntapairi saanterama nruqo, tiro.

⁵² Mwitaa tuvoro Iesusiva mwira tiva mwiro tiqaro, So vuane. E niara mwiva so ni saahaqa hianarove tiararoma i vu ntapairi viso, tiro. Mwitaa tuvoro mwira vuvano qamwanrama sero ntapairi vuvaro mwiva so taqero. Mwiva so tageqaro Iesusira vataqiro aaraqaa vurama.

11

Nraase qoravano Iesusira qamwata mwate varuvoro mwiva Ierusaremiqi vura

(Matiu 21:1-11; Ruku 191-12:28-40; Ioni 12:12-19)

¹ Iesusiva nai nraaqiaranravu sapata vuvaro Ierusaremi qaumato vahuvata mwisa Betapaasivata Betaani mwatusanivata uro ntorā. Mwatusa mwitanava Oripī taaqi mwevaqi vahura.

² Uro ntero Iesusiva nai nraaqiara taaratana titero tiqaro, Nétana viti mwatusaraqi vivaro ini vuvano vaasama ntonki mwo saantaru tera taqaanarove. Mwira qaraaha ntonki sia vaiti mwovano mwira mwogaqaa mwatasaa viro varirave. Nétana uro mwira huaama seta mwira ntatu seta vitaqita nrima ni miate. ³ Mwovano initanara narave uti variavo tirera, nétana mwitaama mwira tiva mwiate. Tiri nroravano ntonki mwirara tisatama nruro. Pataqa vari sero qaiqaa vara sairaro nrrianarove, tiate, tiro.

⁴ Iesusiva mwitaa tuvata mwitanasa mwatusa mwiqi uro ne taqovaro ntonkivano aaraqaa qetiana saantarutova varuvata mwitana mwira avanti varuvata ⁵ vaiti mwonravu mwini tivita varusa tiqata, Nétana naraqamave mwira avanti variavo? ⁶ tuvata mwitanasa vaasa Iesusiva tu quara tiva nuvata so vitaate tita.

⁷ Tuvata mwitanasa qaraaha ntonki mwira vitaqita uro Iesusira mwura. Uro mwita mwira nraaqiaranravuvano niari vaaqa ntonki mwoqaaqaa vuti mwatovaro Iesusiva mwiraqaa mwaarintero mwatasaa viro variro aaraqaa vura.

⁸ Aaraqaa vi varuvata nraase qoravano Iesusirara gamwateqata niari tuavaaqa aaravau vuti mwatovata hini husa vutaqitaita satari mware teaqita uro aaravau vuti mwatora.

⁹ Mwitaamaqi viqata Iesusira vuni vi varu nraase qorasavata, mwira mwoqani nri varu nraase qorasavata, aasara nteta tiqata, Sai mwira nrutu tuaaheraare.

Nroravano nai nrutuqa nri vari vaitira sugema mwataiso. (Sng 118:26)

¹⁰ Tiri haivaqava Devitiva kepusaqama sero ntaqaihintema sero mwivavata ntaqahiqiro vuanirara tiro, Kotiva mwira sugema mwataiso.

Esaa naavuniaasa mwira nrutu tuaaheraate, tita.

¹¹ Mwitaa tivaqita vuvaro Iesusiva Ierusalemmini uro ntoro. Uro ntero Kotira nraavu nroraqi verantero esaa inraisa mwiqi vahura taqamwa sero, veva ntero entama virera huvaro nai nraaqiara 12 nravu sapata nrima ntantero Betaanini vura.

Fiki sia tava riora

(Matiu 21:18-19)

¹² Mwira qararaara mwinravusa Betaanitaita uto ntanteta nri varuvaro Iesusira nraataa huvaro ¹³ mwiva taqovaro vutura mwosata fiki, mwira tava nre varu satariva vahuvoro mwira mware airi vahura. Mwira tava vahirera, hiqi sena nraase tiva sero, Iesusiva taqovaro sia mwira tava rio entava vahuvorora tiro, mwareqai ntora.

¹⁴ Mwareqai ntovaro Iesusiva fiki mwira irora hiro tiqaro, So, naatiara sia mwovanovata iqaatairo hiqi sero nraarive, tiro. Mwitaa tuvata mwira nraaqiaranravuvata mwi quara riora.

Iesusiva Kotira nraavuqi vura

(Matiu 21:12-17; Ruku 191-12:45-48; Ioni 2:13-22)

¹⁵ Iesusiva nai nraaqiaranravuvata vuva Ierusalemmini nrintero Iesusiva qaiqaa Kotira nraavuqi vera ntero taqovata soqaa saiga varo vaitisa mwiqi variqata soqaa saiga vare varura. Mwitaa hi varuvaro Iesusiva mwisa vara veva mwaatani sero, munima mwusaari tugataaqi varu vaitisa taintavata vara rauru sero, kuri niqata munima vare varu vaitisa taintavata vara rauru sero.

¹⁶ Mwitaama sero mwiva mwi nraavura aatareqaniara tiqaro, Mwaini sia aaravano vaiso. Né soqaa mwitaa inraisa vareqata sia mwaini vitare nritare hiate, tiro.

¹⁷ Iesusiva mwitaa tiva sero mwiva qua tiva niro tiqaro, Kotira vukuqi mwitaama qua qara ntuva tova vahirave.

Nraase qora mwo mwatanaa mwo mwatanaasa ni nraavuara Kotirara aasara nte varia nraavurave tivarave, turave. (Ais 56:7)

Né variavaro mwaa nraavuva muara vaitivano quqetase uairama hia nraavura votima seroma vaiso, tiro.

¹⁸ Iesusiva mwitaa tuvata Kotira nraavuqi variqata Kotira saiga varo vaitisavata, mwisa Iesusira qua rieta mwira saara Iesusira ruse aarara huua hi varura. Mwisa taqovata qaqi nraase qoravano Iesusiva tu quarara gamwateqata sauqu ntukikiraagate varuvata mwinravusa mwirara rieqata Iesusirara aatu hiqata varura.

¹⁹ Iesusiva Ierusalemmini varuvaro enta hirera huvaro mwiva nai nraaqiaranravuvata Ierusalemmini sero vurama.

Fiki aaharama vura

(Matiu 21:20-22)

²⁰ Mwira qararaara toqaqi mwinravusa uto ntanteta nriqatama mwira nraaqiaranravuvano taqovaro fiki mwira sauqu sauquvanovata tuqavanovata aaharama viro vahuvaro ²¹ Pitaava Iesusiva mwi satarirara tu quara riemwa tero Iesusirara tiqaro, Qike, mwaaara ti variara vaitio, tagaane. Fiki e irorama taarava tamusama viso, tiro.

²² Mwitaa tuvaro Iesusiva mwinravusa tiva niro tiqaro, Ne tianira riaate. Nénravu Kotirara kepusaqama seta riemwaqita nruaate. ²³ Nénravu mwitaamaqi vigata mwaa taaqirara tiqata, Tuvitarera nrukaqi ntuva vuane, tivarave. Mwitaa tiqata sia taara nraato tiraitita, quqaqama mwitaa hianarove tivera, Kotiva ininravu saahaqa hiraro taaqivano tuitarero nrukaqi ntuva vuanarove.

²⁴ Ne mwirara rieganama iniara mwitaa tirerave. Né mwo inraisa vararerata Kotirara aasara ntegata quqaama mwi inraisara ni mianarove tiqatama né mwi inraisara mwo inraisa mwo inraisa so varevarave.

²⁵ Né tiva variqata Kotirara aasara nteqatama mwovano ini uaqama nataani quava vahirera, né mwi quara sia riemwaqi viraitita, mwi vaitira qua tauruse qaqira seta Kotirara aasara tiate. Né mwitaa hivaro ini qova naavuni variva né uaqha hi saiqara uti quaravata qaqira sero tauru nataanarove. ²⁶ [Né sia mwosaqaa qua vahira qaqirase tauru saivera, ini qova naavuni variva siama nitaqaavata qua vahianira qaqira sero tauru saanarove,] tiro.

Iesusirara tava i nroraqama saisarave e mwi saiqara varaqira vi variaro tura

(Matiu 21:23-27; Ruku 20:1-8)

²⁷ Iesusiva mwitaa tiva sero nai nraaqiaranravuvata uto ntero Ierusalemmini uro varura. Iesusiva qaiqaa Kotira nraavu nroraqi vera ntero nrue varuvata Kotira nraavuqi variqata Kotira saiqara vara mwate varu vaitisa mwisa nrora vaitinravuvata, mwaaara osara ti varu vaitisavata, Iutaa nrora vaitivata, mwisa Iesusiva hunani uro nteta ²⁸ Iesusira mwira irora hita tiqata, E ta vaitiva variqarave mwaa saiqara vare variaro? Tava i nroraqama saisarave e mwaa saiqara vare variaro? tita.

²⁹ Mwisa mwitaa tuvaro Iesusiva niari tiva niro tiqaro, Sai ne nraante ini saparama nataarita né ne tiani quara so tiva mivera ne nena nroraqama vina variqana mwaa saiqara varaanirara ini tiva niase. ³⁰ Tava Ionira nroraqama sovarove mwiva nraase qora nramari nurave? Kotivave iso, qaqi vaitivanove iso? Né ni tiva mivagena riaase, tiro.

³¹ Iesusiva mwitaa tuvata mwisa niari sapara hita tiqata, Te nara quave tianarave? Mate te tiqata, Kotiva Ionira nroraqama sorave, tiarera, Iesusiva tiriara, Né naraqamave Ionira quara sia quqaave tiavo? tianarove.

³² Qaiqaa mate te tiqata, vaitivanogai Ionira nroraqama sorave, tiarera, mwi quavavata sia soqa hianarove, tura. Qaqi nraase qoravano Ionirara Kotira qua qovarama so vaitivave turara tita, mwisa qaqi nraase qora nraatu aatu hiqata sia mwitaa tita.

³³ Mwisa mwitaa tiva seta mwiraqaatai Iesusirara tiqata, Nai tava Ionira nroraqama sorave? Sia te ntapihunarave, tita.

Mwisa mwitaa tuvaro Iesusiva mwisara tiqaro, Né mwitaa tiavana ne nina nroraqama saisana mwaa saiqara vare varurara sia nitavata tiva nianirave, tiro. Iesusiva turama.

12

*Uaini vara tutoraqi sia sugema seta ntaqaihu vaitisara tura
(Matiu 21:33-46; Ruku 20:9-19)*

¹ Iesusiva mwitaa tiva sero mwo quaqaa ntuva sero mwisa tiva niro tiqaro, vaiti mwovano uaini vara tutero mwira vara ututu qurisa ratero mwata quvu sero uaini tatianira ututero haraara nraavu mwonta vaiyaraara nraavu hoga sero vatorave. Mwiraqaatairo niara mwo mwatani virera hiqaro mwo husa tiva niro tiqaro, Né ni uaini vutaqi ntaqaihiqata varivaqe ne vuase, tiva sero mwiva niara mwo mwatani vurave.

² Mwini uro varuvaro uaini hiqi entava nri ntovaro mwiva nai saiga vaiti mwo titero tiqaro, E uro ni vutaqaa ntaqaihi mate variasa tiratama uaini ninanivata hiqise mataate, turave. ³ Mwitaa tuvaro mwini vuvata mwira vutaqaa ntaqaihi mwate varu vaitisa mwira saiga vaiti mwira ntavaagavu seta saavuqotaita ntugutu seta vateta, sia uaini hiqise mwira mwiraitita, qaqi titovaro nrima ntantero vurave.

⁴ Qaqi nrima ntantero vuvaro nraaso gova nai saiga vaiti mwo titovaro vuvata mwira vutaqaa ntaqaihi mwate varusa mwira qiata ntukavu seta saurira inraisa mwurave. ⁵ Mwitaa huvaro nraaso gova nai saiga vaiti mwo qaiqaa titovaro vuvata mwira rusorave. So mwitaamaqi vita, hini nai saiga vaiti titosa saavuqotaita ntugutu seta, hini rusorara tuqo. ⁶ Mwira saiga vaiti taiga sovaro vaiti kuaigaqai varura. Mwi vaitiva nraaso qora mwaaquvano varuvaro mwira qora mwutusavano mwirara mwoqavata vahu vaitiva varuvaro mwira gova mwiravata naatiara esaara titero tiqaro, Mwisa ni maaqu taqeta niara mwira mwaaquve tiqatama mwira sugema mwatevarave, tiro.

⁷ Mwitaa tiva sero mwira titovaro mwini vuvata mwira vutaqaa ntaqaihi varu vaitisa mwira mwaaqu taqeta, nai tiva mwi nai tiva mwi hita tiqata, Mwira gova gutu viraro mwaa vaitiva nai qora mwatavata, mwitaa inraisavata, varaarivama variso. Nri vaqe te mwira rusaararo mwiva varareraro hiani inraisava tiriniqai vahiarive, turave. ⁸ Mwisa mwitaa tiva seta mwira mwaaqu ntavaagavuse ruseta mwaaqani mwaati qaqira sorave, tiro.

⁹ Iesusiva mwitaa tiva sero mwisa saparama natero tiqaro, Mwisa mwitaa hurara tiro, nraaso gova nai mwaaqu rusera saara nataave hianarove? Aaso gova nri ntero nai vutaqaa ntaqaihi vaitisa ru taiga sero saata vaiti mwonravuara tiqaro, Néma ni vutaqaa ntaqaihi mataate, tianarove, tiro. ¹⁰ Iesusiva mwitaa tiva sero mwiva mwisara tiqaro, Né siave Kotira vukuqi mwaa quara saara ntuva seta riaavo? Mwi quava mwataama tiro:

Ori nraavu hogaqata ori mwo sia sugerave tivase qaqira saava, mwi oriva puhaqama viso.

¹¹ Kotiva mwi orira vara sero nroraqama saisata te mwira saiga taqeta sugerave tunarave, turave. (Sng 118:22-23)

Kotira vukuqi mwitaamase qara ntuva torave. Né siave mwi quara saara ntuva seta riaavo? tiro.

¹² Iesusiva mwitaa tuvata Iutaa nrora vaitinravuvano ntapihi riovaro Iesusiva uaini vutaqaa ntaqaihi mwato vaitisara tiqaroma mwisagaa ntuva sero tuvata mwisa Iesusira ntavaagavu seta ko tiare tura. Mwitaa tiva seta nraase qoravano mwiqi uairama vusa tiri irora hivorave tita, mwisa nraatu hiqata Iesusira seta vurama.

*Taakisiqua hirara Iesusira sapara hura
(Matiu 22:15-22; Ruku 20:20-26)*

¹³ Iutaa vaiti nroranravuvanto vari seta mwiraqaatai mwisa Parisi vaiti mwonravuvata, Herotira nravunaasa mwonravuvata, viteta tiqata, Né Iesusira sapara hivaró mwiva api qua tirage mwiraqaa qua vataare, tita.

¹⁴ Tuvata mwisa Iesusiva hunani uro nteta mwira sapara hita tiqata, Mwaara ti variara vaitio, te taqaurara e suqe quaqai ti variaravave. É sia vaiti nraatu aatu hiraitira, nrora vaitiaravata, qumina vaitiaravata, kuua quaqai ti variaravave. E vaitivano Kotira vataqita vi aarara ntapihi sera tiva ni variaro. So mwaa quara tiva timwirage riaare. Te Kotira qua riegata sove te Romeni mwatanaasa vuniaa vaiti Sisaara taakisi mwianarave? (Mwi mwatanaasa sia Kotira qua riaasave.) Mwira taakisi mwianarave siave mwianarave? tita.

¹⁵ Mwisa mwitaa tuvaro Iesusiva taqovata mwisa nroqaaita suqe suqe ti variqata mwisa vu nraatoqitaita Iesusira uaqama mwatarerata uti varuvaro Iesusiva tiqaro, Naraqamave nénravu nivanto api qua tiarive tita mwitaa tiavo? So munima mwóku vara saivage ne taqaase, tiro.

¹⁶ Mwitaa tuvata munima mwira kuauru mwuvaro mwiva mwisa sapara hiro tiqaro, Munima mwiraqaa tara virivata tara nrutuvatave vahiso? tiro.

¹⁷ Mwitaa tuvata mwisa Sisaarave tuvaro Iesusiva mwisara tiqaro, Mwirara riegatama né Sisaava hianira nai mwita, Kotiva hianira nai mwiate, tiro. Iesusiva mwitaa tuvata mwisa mwi quara rieta tiqata, Qike, mwiva tiri qua nraataa sero suqe qua tiso, tiva seta sauqu ntukikiraagate varura.

Saitiusi vaitinravuvano qutu vita qaiqaa qaqi tivirara Iesusira sapara hura

(Matiu 22:23-33; Ruku 20:27-40)

¹⁸ Saitiusi vaitivano Iesusiva varunani uro ntorá. Saitiusi mwisa niari mwaara qua riegatama mwisa tiqata, vaitivano qutu viro so mwiva esaarama qutu viro siama qaiqaavata tivuanarove, ti varu vaitisa uro nteta ¹⁹ Iesusira sapara hita tiqata, Mwaara ti variara vaitio, tiri haivaqava Mosesiva mwaara qua tiva timwiqaro mwitaa turave. Vaitivano sia nraaqiara mwataraitiro, qutu viraro mwira qatavanove vasaavave mwira nraata varatero nraaqiara mwata humwuarama mwataanarove, turave.

²⁰ Te tiarara e riaane. Haaru gate vase 7 nravu varurave. Mwisa vasaava tauraanaava nraase varatero sia nraaqiara mwataraitiro, qutu vuvaro ²¹ mwira qata mwira naatiaraava mwira nraata varatero mwivavata sia nraaqiara mwataraitiro, qaqi variqiro viro qutu vurave. Mwiva qutu vuvaro mwira qata mwira naatiaraava nraase mwira varatero sia nraaqiaravata mwataraitiro, qutu vuvarave. ²² So mwitaamaqi vita esaa mwinravusa nraase mwira varateta sia nraaqiaravata mwataraitita, esaa qaiqai qutu vurave. Qutu vuvaro naatiara nraase mwivavata variro qutu vurave. ²³ Naatiara nraase qora qaiqaa qaqi tivita vari entaraqaa mwi nraaseva tara nraatave varianarove? Mwiva qaqi varu entara qoraisi 7 nravu vara torave, tita.

²⁴ Saitiusi vaitinravuvano mwitaa tuvaro Iesusiva niari tiva niro tiqaro, Né Kotira qua gara ntuva tora sia ntapihi saasave. Né Kotira kepusavata sia ntapihi saasave. Quqaara sia ntapihi saasara tita, né api qua ti variavo.

²⁵ Naatiara nraase qora qutu visa qutu viraqitaita qaiqaa tivita qaqi variqita vi entara siama nraata vaati vare osarava vahianarove. Mwisa naavuniaasa nraantantama setama varivarave, tiro.

²⁶ Iesusiva mwitaa tiva sero mwiva tiqaro, Nraase qora qutu visa qaqi tivirara ne ini sapara hirerave. Né siave Kotira vukuqi Mosesiva mwaa

quara gara ntuva tora saara ntuva seta ntapihhi riaavo? Kotiva mwitaa turave. Ne mwariqa Kotivave. Ne i haivaqara Evarahaamuraqaa ntaqaihina, Aisaakiraqaa ntaqaihina, Sekopuraqaa ntaqihuvave, turave. ²⁷ So riaate, Kotiva mwariqavano sia qutu viro taiqavi inraisaraqaa ntaqaihi varivama variso. Nraase qoravano qaiqaa qaqi tivi osarara ini vu nraatovano sia ntapihhi visata api rieqata ti variarave, tiro.

Nara quave Kotiva vuni vatai quava vaiso tura

(Matiu 22:34-40)

²⁸ Iesusiva Saitiusi vaiti sapata qua ti varuvaro mwaara osara ti varu vaitiva uro variqaro riovato Iesusiva Saitiusi vaiti qua nraatara seqaro suqe quaqi ti varuvaro mwi vaitiva Iesusira sapara hiro tiqaro, Kotiva qua tiva taiva nara quavanove vuni vahi quava vahiso? tiro.

²⁹ Tuvato Iesusiva mwira tiva mwiro tiqaro, Mwaa quava vuni vahi quavama vahiso. Mwataama qara ntuva torave:

Né Isareri mwatanaasa riaate.

Tiriqaa ntaqaihi variva Kotiva mwariqa kuaigavano variso.

³⁰ Esaa ena mwutusaqitairave, esaa ena mwanraquraqitairave, esaa ena vu nraatoqitairave, esaa ena kepusaqotairave, Kotiraraqai mwutusa vahirara variiane, turave. (Lo 6:5)

³¹ Mwi quava vaisaro mwira naatiara osara qua mwo vahiso. Mwitaama tiro:

Enara mwutusa vataarantema sera ena henararavata mwutusa vahirara variiane. (Wkp 191-12:18)

So mwi quatanava vuni vahi quatanavama vahiso. Sia mwo quavano mwi quatan nraatara sairave, tiro.

³² Iesusiva mwitaa tuvato mwaara osara ti varu vaitiva tiqaro, Mwaa ti variara vaitio, e sugema sera ntapihima tiaro. E quqaama tiqara, mwariqa Kotiva kuaigavanoqaima variso tiaro. Sia mwariqa mwovanovata variso, tiaro.

³³ E quqaama tiqara, Vaitivano mwutusaqitairove, kepusaqotairove, Kotirara mwoqama sero mwutusa ntiraro varianarove. Vaitivano nai henarara nariara mwutusa vahintema sero mwiaravata mwutusa vahiarive, tianarave. Mwi quatanava vuni vahiqaro hini qua nraatara sairave. Mwo qua Kotira saiga vara mwateqata quara ruseta tia quara mwate varia quaravata, mwi quatanava nraatara sairave, tiro.

³⁴ Mwitaa tuvato Iesusiva tagovato vaiti mwiva sugema sero tuvato Iesusiva mwira tiva mwiro tiqaro, Kotiva iqaa ntaqaihiariva i qaumatoma variso, tiro. Iesusiva mwitaa tuvato vaiti saatavanovata Iesusiva tiri qua nraatara saaso tita, sia Iesusira qaiqaavata nrima mwo qua mwo qua sapara hura.

Iesusiva Mesaiaa vaitiara sapara hura

(Matiu 22:41-46; Ruku 20:41-44)

³⁵ Iesusiva Kotira nraavuqi variqaro qua tiva nigiro viro tiqaro, Mwaa osara ti varia vaitisa tiqatama, Mesaiaa vaiti Kotiva titaaariva Devitira osara kuua osara mwiginaa vaitivanoma varianarove, tiarave. Mwisataa ntuva seta mwi quara ntapihhi setave mwitaa tivarave? ³⁶ Haaru Kotira mwaraguravano saahaqa huvato Devitiva nai mwitaa turave:

Kotiva ni nrora vaitiara tiqaro,

E nritarera ni sauqu tanarani mwatasaa vira variraqena ne i nravutaasa ru taiqa mwataarira mwisagaa suqu ntava tera variiane, turave. (Sng 110:1)

Devitiva mwitaa turave.

³⁷ Devitiva mesaiiaa vaitivano qovara hianirara tiqaro, Mwiva ni nrora vaitive, turave. Devitiva mwitaa turara tiro, nataama serove mesaiiaa vaitivano Devitira nraisi so varianarove? tiro. Iesusiva mwitaa tuvata qumina nraase qora aivirano uairama vita varusa mwira qua riegatama qamwateqata varura.

Mwaara osara ti varu vaitisara tura
(Matiu 23:1-36; Ruku 11:37-54; 20:45-47)

³⁸ Iesusiva qua tiva nigiro viro tiqaro, vaiti mwonravu mwaara osara ti variasa, né mwisara rauriqata variate. Nraase qoravano mwisa tiri taqeta qua mwanteqata qamwata timwataate tita, mwisa muahaa tuavaaqa sugera utu varetu nraase qora vuqaa maaketiqi nrue variarave. ³⁹ Mwisa mwaara nraavuqi vera nteta uaqaa hi taintara qaqiira seta, suqe taintaqaagai mwatasaa vita variarave. Mwisa omwata nraaraqaa variqata mwisara nrora vaitive tiate tita, uro vaiti nroravano mwatasaa vita variaaraqaa mwisavata mwatasaa vita variarave.

⁴⁰ Mwisa tetoqa varia nraasesa nraavuqe mwo inraisave vataara muara varetu tiqata, Mwosa te qora inraisa utunara taqeta tirira uaqaa hia vaitisave tivorave, tita mwisa nraase qora vuqaa variqata Kotirara muahaama seta aasara ti variarave. Qike, mwira saara mwisaaqaa qua nroraqama sero vahianarove, tiro.

Vehi nraasevano munima pataqa Kotira mwura
(Ruku 21:1-4)

⁴¹ Kotira nraavuqi taqu mwo vahuvata mwiqi nraase qoravano Kotira saiqara rieqata munima se varura.

So Iesusiva qua taiga sero uro taqu mwira tataaqa mwatasaa viro variqaro nraase qoravano munima taqu mwiqi segata vi varuvaro Iesusiva tage varura. Mwiva taqovata airi inraisa vatosa munima airi mwiqi sora. ⁴² Se varuvaro vehi tetoqa nraasevanovata nri ntero munima patarutanaqai taquqi sora.

⁴³ Munima pataqarutana mwiqi sovaro Iesusiva nai nraaqiaranravu nraarama sero tiva niro tiqaro, Taqaate, vehi nraase tetoqavano sai munimava airi inraisa vataasa airi munima saaravata nraatara saiso. ⁴⁴ Airi inraisa vataasa niari munima hiniqaima taquqi saavo. Nraase mwiva vehi variqaro nai vatai munimara esaama saiso, tiro. Iesusiva turama.

13

Kotira nraavu akusaaraqama seta ntapairi serara tura
(Matiu 24:1-2; Ruku 21:5-6)

¹ Iesusiva Kotira nraavuqitairo veva ntovaro mwira nraaqiara mwovano tiqaro, Qike, mwaara ti variara vaitio, taqaane. Mwaa nraavuva suqe hi nraavurave. Mwo ori mwo ori nroraqotalta vara seta hoqataa nraavuva suqe nraavuma vaiso, tiro.

² Mwitaa tuvaro Iesusiva mwira tiva mwiro tiqaro, Mate e nrora nraavu tage variaro. Naatiara ori naiqaa naiqaa ntaaqautaava sia mwitaama sero vahianarove. Mwaa nraavura ntapairiqata mwira raaqu saivaro uto ntiraro orivano ntuvuraa vura hiro api mwona mwona vahianarove, tiro.

Iesusiva naatiara airi muaara qovara hianarove tura
(Matiu 24:3-14; Ruku 21:7-19)

³ Mwitaa tiva sero Iesusiva uro Oripa taaqaaqaa mwatasaa viro varura. Oripa taaqivano mwaa hini vahuvaro Kotira nraavuvano vutura qarahi hini vahura. Mwitaama vahuvata Pitaavavata, Semisivavata, Ionivavata,

Enturuvavatama seta mwiravusaqai vusa Iesusiva varunani uro nteta mwira sapara hita tiqata, ⁴E vaasa Kotira nraavuara tianara taireve qovara hianarove? Nara nara inraisa qovara hiraqeve tirenravu mwi inraisaragaa apegama seta tageqata mwi entava nriariva qaumatoga iso tianarave? E tiri tiva timwiraqe riaare, tita.

⁵Mwisa mwitaa tuvaro Iesusiva tiqaro, Mwovano mwi quara ini api tiva niaso tita, rauriqatama variate.

⁶Naatiara airi vaitivano nri nteta ni nrutu nteta tiqata, Kotiva ni titaiana nruvave. Ne mwaa mwivave, tivata airi nraase qoravano mwisa unra quara quqaa quave tivarave. ⁷Né varivaro nroraqamase ntaqi quava vainiqatairove niaratairove nrirata sia aatu hiате. Ntaqi inraisava qovara hianarove. Mwitaa hirata né mwirara rieqata mwi entava esaara enta nri ntaiso tivorave.

⁸Mwo mwatanaavano mwo mwatanaaravata ntaquanarove. Qiata vaiti mwovano nai hena qiata vaiti mwovata ntaquanarove. Mwo mwata mwo mwata mwaturavano tuanarove. Mwo mwata mwo mwata sarara aarantevarave. Mwi inraisava mwi inraisava qovarama virata sia esaara enta nri ntaiso tiate. Nraasevano nraaqiara mwatareraro hogarero nriqa vintema sero, muaara ntaani entava qaqi hoqarama taiso, tiate.

⁹Mwi entara aitutumaqi vita rauriqata variate. Mwo hi vaitisa ini ntavaaqavuqita uro niari kaanasoriquaa seta, iniquaa qua vatevarave. Né mwaaara nraavuqi varivata ini saavuqo ntuqutu seta vatevarave. Né ni saiga vare varivata mwira saara ini ntavaaqavuqita uro kamanira nrora vaiti vuqaave, vuniaa vaitinravu vuqaave, saivata mwi entara né ni qua ntapihise tiva qovarama sevarave. ¹⁰Ni qua suqe qua esaa mwo mwatanaa mwo mwatanaasa tiva niqi vivata esaama riemwa ntevarave. ¹¹Naatiara mwisa ini ntavaaqavuqita uro ko tirera hivaro, sia ini suqu sauqu ntirata nara quave tianarave tiate. Mwi entara sia néta vu nraatoqitaita riemwa seta tiraitita varivaro Kotira mwarapuravano ini saahaqa hiqaro mwi quara tiate tirata mwi quaraqai tiate.

¹²Naatiara vaitivano nai qatave nai vasaarave qovarama sairata ru sevarave. Mwira qova nai nraaqiara qovarama sairata ru sevarave. Nraaqiaravano niari nrosa qosa nravutaaga hiqata ru saate tivata mwisa ru sevarave.

¹³Mwi entara né ni nraase qoravano varivatara tita, mwira saara esaa qaqi nraase qoravano sia iniara mwutusa vahirata varivarave. Mwitaama mwataivarovata sia qoriri hiraitiro, kepusaqama sero variqi viro uro taiqa saani vaitira, mwirama Kotiva vitaanarove.

Anoma sero qora inraisavano naatiara qovara hianirara tura

(Matiu 24:15-28; Ruku 21:20-24)

¹⁴Naatiara né taqaivaro anoma sero qora inraisavano qovarama viro sia mwirara variante tianira mwinima mwiva tiviro varianarove.—Mwaa quara saara ntirava ntapihi sera nraato tuane. Naatiara mwi entara mwi inraisava qovarama virata nraase qora Iutiaani variasa tivita santeta verara taqiqaa vuate.

¹⁵Mwi entara nraavu qetiana variariva siama nraavuqi vera ntero mwo inraisavata vararaitiro, mwiva mwo inraisa mwo inraisa qaqira sero qaqima santero vuarive. ¹⁶Mwovano vutaqi saiga vare variariva sia nai vaaga varareraro nrima ntantero viraitiro, mwiva mwira qaqira sero qaqima sante vuarive.

¹⁷Mwi entara nraaqiara tuaqahi nraasesavata, nraava ni vari nraasesavata, sia sugema varivarave. Ne mwi nraasesara po tuqo. ¹⁸Sia huari itaani

entaraqaa aatu vuaro tita né Kotirara aasara tivaro huari itaani entara niarive. ¹⁹ Po, naatiara mwi entara muaara vahiariva nroraqama sero vitarero vahirata nraase qora sia suqema seta varivarave. Haaru Kotiva mwaa mwatara utu toraqaatairo mwitaa hi muaarava sia qovara hurave. Naatiaravata sia mwitaa hiani muaarava qaiqaavata qovara hianarove.

²⁰ Mwi entara muahaa enta vahiratavauma esaa nraase qoravano taiqa vivaro sia kuaigavantovata qaqi varianarove. So Kotiva nai saama tai nraase qorasara riegqaroma mwi entara vara qiquqama saanarove.

²¹ Mwi entaraqaa iniara mesaiaa vaiti Kotiva titai vaitiva mwainima variso, mwinima variso, tivera, sia mwisa quara quqaave tiate. Mwi entaraqaa vaiti mwovano qovarama viro unra tiqaro, Ne mesaiaa vaitivanove, tiraro mwo vaitivano tiqaro, Ne Kotira qua qoqamase varu vaitivave, tianarove. Mwisa mwitaa tivaqi viqata airi unra vaitivano qovarama vivarave. ²² Mwisa qovarama vita unra saiga varaqi viqata Kotiva nai saama tai nraase qorasa mwisa tirinravu quara quqaave tiqata api aara vuata tita, nrora saiga varaqi vivarave.

²³ Mwi quara riegatama mwi entaraqaa né raurigata variate. Né sia mwi vaitisa quara quqaave tiate tina, ne mwaa entaraqaa variqana naatiara qovarama vuani inraisarara ini tiva ni varuqo, tiro.

Iesusiva nai qaiqaa mwata mwaini tuvuanirara tura

(Matiu 24:29-31; Ruku 21:25-28)

²⁴ Iesusiva mwitaa tiva sero tiqaro,

Naatiara muaara vahiani entava taiqa viraro mwi entaraqaatairo huari-vano qipa viraro toravanovata sia itairaro ²⁵ aahoquravanove, qovoravanove, uto nti uto nti hiraro naavuni kepusa inraisa vahiariva esaa qasaa qasaa hianarove. (Ais 13:10; 34:4)

²⁶ Mwi inraisava mwitaa hirata esaa mwata maata variasa tage varivaqe ne mwatani mwatatai nraagiarava naavusaina tonavuqi tuvuarita ni tagevarave. Ne vuruqama taari inraisava mwoqama sero itero tahuqiro ante anta hi varivaqe ne kepusavano tuvuanirave. ²⁷ Ne tuviqana naavuniaasa vitaarita mwisa mwatani uto itai itaita Kotiva nai saama tai nraase qorasa esaa uairama seta vitevarave, tiro.

Iesusiva qaamuasa voti hurara tura

(Matiu 24:32-35; Ruku 21:29-33)

²⁸ Iesusiva mwitaa tiva sero tiqaro, Né qaamuarara riegatama mwaa quara osara ntapihi seta riaate. Mwi satariva tava riemwa taiqa sero vahiromo mwiraqaatairo qaraaha turu ntareraro utisata né mwiraqaa apeqamase taqeta tiqata, Huari nrora itaani entava qaumaqa iso, tiarave.

²⁹ Mwira votima seta, naatiara qovara hiani inraisarara tura, né mwiraqaa apeqamase taqeta niara tiqata, Mwiva tuvuanini entava qaumatoqa iso, tivarave. ³⁰ Ne quqaama tuqo. Mwaa mwataragaqa vari nraase qorasa sia taiqa vivaro mwi inraisara mwi inraisarara tuva qovara hianarove.

³¹ Naavuvanovata mwatavanovata taiqa viraro ni quavano qaqiqai vahiqiro vuanarove, tiro.

Sia mwovano ne tuvuanini entara ntapihirave tura

(Matiu 24:36-44)

³² Iesusiva mwitaa tiva sero tiqaro, Ne taireve, nara huari vuqaave, tuvuanira? Sia vaiti mwovano mwi entara ntapihirave. Sia naavuniaasavata mwirara ntapihirave. Nenavata mwatani mwatatai nraaqiarava variqana mwi entarara sia ntapihi saurave. Kotiva ni qova mwivaqai mwi entara

ntapihirave. ³³ Mwi entava nrianira né sia ntapihiasara tita, né taqe varita rauru sega tequama variate.

³⁴ Mwi entava nrianirara tirera nara quaqaa ntuva senave tianirave? Mwaa quaraqaa ntuva sena tirerave. Vaiti nroravano niarani virera hiro nai saiga vaitinravuara tigaro, Ne vuarita né mwi saigara mwi saigara vare varivaqe ne uro ntantena nriase, tiva sero mwo saiga mwo saiga mwisa niro vaiti mwora tigaro, E getiana variqara vaivaraara ntaqaihi variane, tiva sero so vurave, tiro.

³⁵ (Iesusiva mwitaa tiva sero nai nraaqiaranravu tiva niro tigaro), Mwi quara rieqatama nevata taqeqata variate. Taireve mwisa nroa vaitivano niaratairo uro ntantero nrianarove? Enta hirera hianiranive? Enta mwutusaqive? Kokoraaravano nruqua tianiranive? Qataa hireraro toqaqive nrianarove? ³⁶ Mwiva qamwanrama nri ntero taqairata né vaite varivorave. ³⁷ Né mwirara rieqatama ne ininravuaravata esaasaravata mwitaama tina, Né taqe variqata variate tuqo, tiro.

14

Nrora vaitinravuvano Iesusira ruse quara qaiqaa turama
(Matiu 26:1-5; Ruku 22:1-2; Ioni 11:45-53)

¹ Mwo ihi mwo ihi mwi mwatanaasa naavuniaava vesahu natoraravata, sia soto mperetiraravata, rieqata mwi entaraqaa mwi sarara nrora. Mwi entara mwi sarara nreva taara enta qaqi vahuvata Kotira nraavuqi Kotira saiga vara mwate varu vaitisa mwisa vuniasavata, mwaaara osara ti varu vaitisavata, mwisa uairama vita Iesusira ntavaaqavuqita uro ruserana uqetase qua tiqata ² mwitaama tita, Tirenravu vesahu nato sarara nraana entaraqaa Iesusira ntavaaqavu saararo nraase qoraqitairo ntaqi inraisava qovara hiasorave, tura.

Nraase mwovano vahavera Iesusira qiataqaa qumwatora
(Matiu 26:6-13; Ioni 12:1-8)

³ Mwi entara Iesusiva Betaanini Saimonira nraavuqi uro varura. Tau-raa mwi vaitira uhumakara utuvaro varu vaitira. Iesusiva mwi vaitira nraavuqi uro sara nre varuvaro nraase mwovano vera ntero Iesusira sugema mwatareraro vahavera suqe mwunta vura, nrora munima sora, ori taquqi varero uro taqu hiara kinta sero Iesusira qiataqaa rauru sero qumwatora.

⁴ Mwira qiataqaa rauru sero qumwatovata hini husa nraavu mwiqi varusa mwi nraasera nunurama mwateta nai tiva mwi nai tiva mwi hita tiqata, Qaqao, naraqamave mwitaama sero vahavera mwira qumina taiqa saiso? ⁵ Mwiva vahavera mwira niro nrora munima 300 kinaa vara sero vehi nraase qora niataarave, tita. Mwitaa tiva seta mwira saara mwi nraasera irora hi varura.

⁶ Mwisa mwira irora hi varuvaro Iesusiva tigaro, Qaqi saivaro mwi nraaseva variarive. Naraqamave né mwira irora hiavo? Mwiva mwitaa hiqaro ni sugema mataiso. ⁷ Vehi nraase qora mwisa mwo enta mwo enta ini sapata variqi vivarave. Né mwo enta mwisa saahaqa hiataa hirata soma saahaqa hivarave. Neqaima sia ini sapata airi enta varianirave.

⁸ Mwi nraaseva taqaisaro mwi saigava mwirara soqa hirama varaiso. Ne qaqi variari entaraqaa mwiva nraante vahavera qumateqaroma ni quntama terara tequama hi variso. ⁹ Ne quqaa qua tianira riaate. Naatiara ni qua mwasaasa esaa mwo mwatanaa mwo mwatanaasa tiva niqi viqata

mwaa nraaseva mate vahavera mwaa ni qu matai quaravatama tiva nivata rievareve, tiro.

Iutaasiva Iesusira qovarama sareraro veva ntero vura

(Matiu 26:14-16; Ruku 22:3-6)

¹⁰ Iesusiva mwitaa tuvaro mwira nraaqiara 12 nravuqitairo mwovano Iutaasi Isikeriotiva mwiqitairo veva ntero Iesusira qovarama saani quara tiva nineraro vuva Kotira nraavuqi Kotira saiga vara mwate varusa mwisa nrora vaitinravu tiva nuvata ¹¹ mwisa mwira quara gamwata seta tiqata, E mwitaa tiarata te quqaqama seta munima i mwirerave, tuvaro mwiraqaatairo Iutaasiva Iesusira mwisa sauquqi saani aarara huua hi varura.

Iesusiva nai nraaqiaranravuvata vesahu nato sarara nrora

(Matiu 26:17-25; Ruku 22:7-14, 21-23; Ioni 13:21-30)

¹² Mpereti sia sotorara nro entanravuva nruvata toharo entaraqaa sipisipi nraati ruso entaraqaa mwira nraaqiaranravuvano Iesusira sapara hita tiqata, Taraqive te uro tequama mwataarara e vesahu nato entarara rieqarama mwi sarara nrenarave? tita.

¹³ Tuvaro Iesusiva nai nraaqiara taaratana titero tiqaro, Nétana Ierusaremi mwatusa nroraqi vivaro vaiti mwovano nramari taqu saqa varero nriariva nitana qintorama sairata mwira vataqita vivaro ¹⁴ mwiva nraavuqi vera ntairata nétanavata mwiqi vera nteta nraavu qorara mwitaama tiate, Mwaara ti vari vaitiva iara tiqaro, Ta rumuraqive ne nena nraaqiaranravu sapata vesahu nato sarara nraanirave tiso, tiate. ¹⁵ Nétana mwitaa tivaro mwiva nitana rumu nrora verato vahi rumura taintavata mwiqi tequama taisaro vahiraqi tiva nirata so rumu mwiqi sara tequama taate, tiro.

¹⁶ Iesusiva mwitaa tuvata mwitanasa uro mwatusa nroraqi taqovaro esaa inraisara tu quava avugavuma sero mwivau vahuvata mwitanasa vesahu nato sarara tequama seta mwatora.

¹⁷ Tequama seta mwatovaro entama vuvaro Iesusiva nai nraaqiara sapata nruva nraavu ¹⁸ mwiqi sara nre variro tiqaro, Ne tianira riaate. Iniqitairo mwovano nraavutaasa vuqaa ni qovarama saanarove, tiro. ¹⁹ Mwitaa tuvaro mwira nraaqiaranravu mwutusakano uqa huvata mwisa kuaiga kuaigavano Iesusira sapara hita tiqata, Niarave tira hiaro? Ne sia mwivave. Ne sia mwivave, tivaqita vita.

²⁰ Mwitaa tuvaro Iesusiva tiva niro tiqaro, Ini 12 nravuqitairo mwovano nai mpereti vara sero ni vatama sero tanaaqi mwaati ntava sero nre variariva mwi vaitivama ni qovarama saanarove. ²¹ Ni mwatani mwatatai nraaqiarara mwitaama seta ruserara haaru qara ntuva torave. Mwi quava quqaa mwivauma vahianarove. Ni mwatani mwatatai nraaqiarara qovarama saani vaitirara ne po tuqo. Mwira nrova sia mwira mwata saataara mwira mwata sairave, tiro.

Mperetiaravata uainiaravata tiva tora

(Matiu 26:26-30; Ruku 22:15-20; 1 Korinti 11:23-25)

²² Mwitaa tuvata sara nre varuvoro Iesusiva mpereti vara sero Kotirara sugeve tiva sero, nteqa sero nai nraaqiaranravu niro tiqaro, Mwaa sarara varaate. Mpereti mwaa ni mwavantama iso, tiro.

²³ Mwitaa tiva sero mwiva uaini kaapu vara sero Kotirara sugeve tiva sero, viti nuvata esaasa kaapu mwiqitaita nrora. ²⁴ Nreta varuvoro Iesusiva tiqaro, Nramari mwaa ni nraarema iso. Kotiva nraase qora sapata kuaaqi uairama viro varireraro qaraaha qua vatarerarove. Mwi

quava kepusaqama vuarive tiro, ni nraarevano mwi quara kepusaqama saanarove. Ni ru saivaro ni nraarevano tuviro airi nraase qora saahaqa hianarove. ²⁵ Ne tianira riaate. Ne mate mwaa entaraqaataina hogarama sena sia uaini nraaitina, qaqi variqi vina naatiara Kotiva ntaqaihianiraqi variqana mwi entaraqaa qaraaha uaini nraanirave, tiro.

²⁶ Iesusiva mwitaa tiva sero nai nraaqiaranravu sapata Kotirara ihi tiva seta veva nteta Oripa taqiqaa vurama.

Pitaava naatiara tiani quara Iesusiva nai tiva mwura

(Matiu 26:31-35; Ruku 22:31-34; Ioni 13:36-38)

²⁷ Mwiravusa mwini varuvaro Iesusiva tiva niro tiqaro, Nénravu ni seta ntugeqaa hita vivarave. Kotira vukuqi qara ntuva to quava quqaa mwivauma vahianarove. Mwitaama tiro:

Sipisipiqaa ntaqaihi waitira Kotiva rusairata sipisipi mwisa niariara niariara mwona mwona vivarave, turave. (Sek 13:7)

²⁸ So naatiara ni qaqi vara tivuma sairage variqana ini vuni ne nraante Karirini virerave, tiro.

²⁹ Mwitaa tuvaro Pitaava qaqao tiro, Esaa mwinravusa i seta aatu ntugema seta vivaqevata neqai ivatama sena mwaini varianirave, tiro.

³⁰ Pitaava mwitaa tuvaro Iesusiva tiqaro, Ne tianira riaane. Mate entaqi kokoraavano sia taara nani nruqua tirara e taaramwo nani niara tiqara, Sia mwira ntapihurave, tinarave, tiro.

³¹ Iesusiva mwitaa tuvaro Pitaava kepusaqama sero qaqao tiro, Sia iara tiqana, Ne sia ntapihurave, tianirave. Ivatamase ni rusaivaqenavata ne sia mwitaa tianirave, tiro. Pitaava mwitaa tuvata Iesusira nraaqiara hini mwisavata kuua qua mwiraqai tura.

Saqava ututura Kesemaniqi Iesusiva vurama

(Matiu 26:36-46; Ruku 22:39-46)

³² Mwiraqaatairo Iesusiva nai nraaqiaranravuvata vuva uro saqava ututura mwira nrutu Kesemaniqi nrintero nai nraaqiaranravuara tiqaro, Nénravu mwaana mwatasaa vita varivaqe ne vuturaqi uro Kotiravata qua tiase, tiva sero ³³ Pitaaravata, Ioniravata, Semisiravata, mwiravusaqai vita varero viro.

Mwiravusaqai vita varero vuvaro mwira sia suqe huvaro ³⁴ taaramwo mwinravusara tiqaro, Ni mwutusavano nroraqama sero muaara ntero nriqa vigo ni rusaa qara hisanama varuqo. Nénravu nivatama seta mwaaqaa variqatama vu ntapairi seta viti viri taqe variqata variate, tiro.

³⁵ Mwitaa tiva sero mwiva pataqa vututo viro uro mwataqaa uto ntiro Kotira sapara hiro tiqaro, Mwo aara vahirera, ne sia muaara vahi aararaqaa vuase, tiro. ³⁶ Mwitaa tiva sero mwiva tiqaro, Po siave, kaao, e esaa saiga so vare variaravave. Ne nriqa vuani nramarira nraani kaapura e mwi kaapura vara qaqinani saane. Ne mwitaa tiariravata sia ni mwutusa vahira vataqira vuane. Ena mwutusa vahira vataqira vuane, tiro.

³⁷ Iesusiva mwitaa tiva sero uro ntantero nai nraaqiara taaramwonravu sonani nrima taqovata mwinravusa vuvano tautovata vaite varuvaro mwiva Pitaarara tiqaro, Saimonio, e vaiteve variaro? Naraqamave nénravu nivata pataqa variqata sia vu ntapairi seta viti viri taqe variqata variavo?

³⁸ Iniara mwisa uaqaa hi saiqara utuate tiro, Saataaniva ini mwataara hiasora mwirara rieqata taqe varita Kotirara aasara nteqata variate. Ini mwaraquravano mwitaa hiataa hisaro ini mwavantavanoqai sia kepusaqa isata variavo, tiro.

³⁹ Mwitaa tiva sero Iesusiva qaiqaa mwisa mwini sero uro Kotiravata qua tireraro mwiva vaasa tu quara mwi quaraqai qaiqaa tiro tiva taiqa sero

⁴⁰ uro ntantero nrima taqovata mwira nraaqiaranravu vu tautovata qaiqaa vaite varura. Iesusiva nri ntovata mwisa tivita saurigata Iesusira tiva mwi quava sia vahuvata varuvaro ⁴¹ Iesusiva qaiqaavata uro Kotiravata qua tiva taiga sero uro ntantero nrima taqovata mwisa qaiqaa vaite varuvaro Iesusiva tiqaro, Qike, nénravu tesa hiqatave vaite variavo? So taqaate. Ni tu vare entava nrima ntaiso. Ni mwatani mwatatai nraaqiarara ni ntavaaqavuqita uro uaga hi saigara uti variasa sauquqi tuta sevarave. ⁴² Tivivagenravu vuare. Ni qovarama saari vaitiva nrima variso, tiro.

Iutaasiva Iesusira qovarama sora
(Matiu 26:47-56; Ruku 22:47-53; Ioni 18:3-12)

⁴³ Iesusiva mwi quara ti varuvaro mwira nraaqiara 12 nrauvuqitairo Iutaasiva nrintero. Iutaasiva uro ntovata mwiravata vaiti airivano paipavata, saavuvata, tu vareta vura. Kotira nraavuqi Kotira saiga vara mwate varu vaitisa mwisa nrora vaitinravuvata, mwaara osara ti varusavata, Iutaa nrora vaitinravuvanovata, mwisa mwi vaitisa titovata mwisa Iutaasira vatama seta nrura. ⁴⁴ Nruvaro Iutaasiva Iesusira qovarama saanirara mwisa tiva niro mwitaama tiro: Ne mwira qua mwantegana mota saani vaitira mwira mwivave. Né mwira ntavaaqavu seta mwiraqaa suqemase ntaqaihiqi vita uro saate, tiro.

⁴⁵ Iutaasiva mwitaa tiva sero mwisa sapata nrintero mwiva gamwan-rama sero Iesusiva varunani nrintero tiqaro, Mwaara ti variara vaitio, tiva sero mwira mota sero.

⁴⁶ Iutaasiva Iesusira uro mota sovata Iutaasiravata nrusa uro Iesusira ntavaaqavu sovaro ⁴⁷ Iesusira nraaqatairo mwira nraaqiara mwovano paipa nai tuagaitairo veva ntarau sero mwiraqotairo vaiti mwo nraato tega sovaro uto ntura. Kotira nraavuqi saiga vare varusa mwisa vuniaa vaiti mwira saiga vaiti nraato tega sora.

⁴⁸ Mwitaama sovaro Iesusiva Iutaasiravata nru vaitisara tiqaro, Qike, né kamaniravatama seta ntaqua vaitisa vitarerata nriantema seta ni vitarerata paipavata saavuvata varetave nriavo? ⁴⁹ Ne mwo enta mwo enta Kotira nraavuqi varigana nraase gora qua mwasaasa tiva ni varugata né mwi entara sia ni ntavaaqavuarave. Kotira vukuqi mwitaa hirara qara ntuva tova vaiso. Mate mwi quava mwivauma vahianarove, tiro.

⁵⁰ Iesusiva mwitaa tuvata mwisa mwira ntavaaqavu sovata esaa mwira nraaqiaranravuvano mwira seta aatu ntugeqaa hita vivura.

⁵¹ Qaraasa vaiti kuaikuvanoqai mpuruqa koritua rupatova Iesusira vataqiro virera utuvata mwisa mwira taqeta uro mwiravata ntavaaqavu saare tita, ⁵² mpuruqa mwi tuaraqai tu varovaro mwi vaitiva tosavano santero vura.

Iutaa nrora vaiti vuqaa Iesusira uro sora
(Matiu 26:57-68; Ruku 22:54-55, 63-71; Ioni 18:13-14, 19-24)

⁵³ Mwira nraaqiaranravuvano aatu vuvata mwisa Iesusira vita vareta Kotira nraavuqi saiga vare varusa mwisa vuniaa vaitivano varuraqi uro sovata Kotira nraavugaa ntaqaihi varusa esaa hininravu nroraqama vusavata, Iutaa nrora vaitinravuvata, mwaara osara ti varu vaitisavata, mwisa esaa nraavu mwiqi uairama vita varura.

⁵⁴ Iesusira vitaqita uro seta varuvaro Pitaava vutura niarasata viqaro mwisa vataqiro vuva vuniaa vaiti nraavu maata vahunani nrintero vutaqi mwaati ntero mwatasa mwiraqaa ntaqaihi varusa sapata mwatasaa viro variqaro tia taare varura.

⁵⁵ Pitaava mwaata mwini varuvata Kotira nraavuqi saiga varosa nron-ranravuvata, esaa nrora vaiti mwiqi uairama vita varusavata, Iesusiraqaa qua vateta mwira rusaare tita, mwo quara huua huvaro sia vahuvata qumina mwira ruse quarara huua hi varura. ⁵⁶ Sia qua vahuvata vaiti airivano apiqama seta Iesusiraqaa unra quaqai vateta ti varuvaro mwisa quavano mwo qua mwo qua vahi, sia kuua qua vahura.

⁵⁷ Mwita tivaqita vuvata mwo husa Iesusiraqaa unra qua vateta tiqata, ⁵⁸ Iesusiva mwitaa tisata te riaunarave. Mwiva tiqaro, Ne Kotira nraavu vaitivano niari sauquqo hogataara ntapairi sena ne taaramwo enta variqana sia sauquqo vareqana qaiqaa nraavu mwira hoqa saanirave, tirave, tita. ⁵⁹ Mwi vaitisa mwi quaravata tiqata sia ntapihi seta kuua qua turama.

⁶⁰ Mwita tuvaro Kotira saiga vara mwate varusa mwisa vuniaa vaitivano mwisa vugaa tiviro Iesusira sapara hiro tiqaro, Mwisa mwitaama seta iqaa qua vateta ti variavo. E mwo? Mwisa mwi quara iara tiara e nara quave niari tiva ninarave? tiro.

⁶¹ Tuvaro Iesusiva sia qua tiraitiro, tirema varuvaro qaiqaa mwiva mwira sapara hiro tiqaro, Quqaave Kotiva i titaisara e tiri saahaqa hirava mesaiiaa vaitivano variaro? Quqaave e Kotira mwaaquvano variaro? Tiri tiva timwiraqe riaare, tiro.

⁶² Mwiva mwitaa tuvaro Iesusiva tiqaro, Ne mwaa mwivave. Né naatiara taqaiyage ne mwatani mwatatai nraaqiarava nroraqama vina Kotiva kepusavano varianira mwira sauqu tanarani varina tonavuqi tuvuanirave, tiro.

⁶³ Iesusiva mwitaa tuvaro Kotira saiga vara mwate varusa vuniaa vaitivano nai tuavaaqa nrahitu sero tiqaro, Qike, qumina vaiti saatavano mwiraqaa qua vatesa nraarevorave. ⁶⁴ Riaate. Né airivano variavaro mwiva Kotira vugaa variqaro uqa hi quara tiso. Mwira saara né nareve Iesusirara tivarave? Tivaqe riaase, tiro. Mwitaa tuvata mwisa tiqata, Mwira qora saiqavano nrifaraiso. Mwira saara mwira rusaaravaqaima vaiso, tita.

⁶⁵ Mwita tiva seta hini husa uro Iesusiraqaa taara vihise mwiraqaataita Iesusiva sia so taqaarive tita, mwira vugaa mpuruqao rupateta vireraqama seta mwira ntuqutu seta tiqata, Tavave i ntuqutiso? Sia taqaraitira, i ruani vaitira nruutu tiraqe riaare, tita. Mwitaamaqi vita Iesusira uaqama mwatovata piriponravuvanovata mwira vita seta sauquqo ntuqutuqita vurama.

Pitaava Iesusirara sia taqau vaitirave tura

(Matiu 26:69-75; Ruku 22:56-62; Ioni 18:15-18, 25-27)

⁶⁶ Nraavuqi Iesusira uaqamaqi vi varuvaro Pitaava mwaatani mwatusaqaa mwatasaa viro varuvaro vuniaa vaiti mwira saiga nraase mwovano nritareqaro taqovaro ⁶⁷ Pitaava tia taare varuvaro mwira ntapihi sero taqero tiqaro, E Iesusira Nasaretiniaa vaitintiri variaravave, tiro.

⁶⁸ Tuvaro Pitaava qaqao tiro, E nara quave tiaro? E tiana quara ne siana ntapihuqo, tiro. Pitaava mwitaa tiva sero uro qetiana varuvaro kokoraavano nruqua tiro.

⁶⁹ Pitaava mwini varuvaro saiga nraase mwiva qaiqaa mwira taqero mwini tivita varusara tiqaro, vaiti mwiva mwira nravunaave, tuvaro

⁷⁰ Pitaava qaqao siaveqai, tiro.

Mwitaa tiva sero pataqa varuvata qaiqaa mwini tivita varusa Pitaarara tiqata, Iesusira nraaqiaranravu Karirinlaasa variavara quqaama evata mwiniavama variaro, tita.

⁷¹ Mwisa mwitaa tuvaro Pitaava sauqu nriqigaa vatero tiqaro, Ne unra tiasera Kotiva soma ni ruanarove. Ne quqaama tuqo. Né ti varia vaitira ne sia mwira taqaurave, tiro.

⁷² Mwitaa tuvaro qamwanrama sero kokoraavano qaiqaa nruqua tuvaro Pitaava mwirawaatairo Iesusiva tiva mwu quara mwirara riero. Iesusiva Pitaara tiva mwigaro mwitaama tiro: Mate entaqi kokoraavano sia taara nani nruqua tirara e taaramwo nanima niara tiqara, Ne sia mwira taqaurave tinarave, tu quara mwirara riovaro mwira mwutususavano uqa huvaro Pitaava ntatora.

15

Iesusira Pairaativa hunani vitaqita uro sora

(Matiu 27:1-2, 11-14; Ruku 23:1-5; Ioni 18:18-38)

¹ Mwira qararaara toqaqi Kotira saiga vara mwate varu vaitisa mwisa nrora vaitinravuvata, Iutaa nrora vaitinravuvata, mwaara osara ti varu vaitisavata, esaa kaanasorinravuvata, mwisa uairama vita variqata mwisa qua ti osarara tiva avugavuma seta Iesusira senigotaita mwira rupa vareta Pairaativa kamanira nrora vaitivano varuraqi uro sora.

² Uro sovaro Pairaativa Iesusira sapara hiro tiqaro, Quqaave e Iutaa vuniaa vaitivano variaro? tuvaro Iesusiva tiqaro, E tianara ne mwaa mwivama iso, tiro.

³ Mwitaa tuvata Kotira saiga vara mwate varu vaitisa mwisa nrora vaitinravuvano mwo qua mwo qua saara Iesusira irora hi varuvaro

⁴ Pairaativa mwisa qua riegaro qaiqaa Iesusira sapara hiro tiqaro, E siave mwira hiniqama niariara tinarave? Mwisa airi qua saara i irora hi variavo, tiro.

⁵ Mwitaa tuvaro Iesusiva qaiqaa sia qua tiraitiro, kepusaqama sero varuvaro Pairaativa airi nraato ti varura.

Iesusira satariqaa rutaate tura

(Matiu 27:15-26; Ruku 23:13-25; Ioni 18:39-19:16)

⁶ Mwo ihi mwo ihi vesahu nato sarara nro entaraqaa kamanira vuniaa vaitivano nraase qora qamwata natarerer karavu vaiti mwo avantu sero titovaro mwaatani vura. Nraase qoravano mwi vaitira avantu tiva taane tuvaro mwi vaitira avantu nate varura. ⁷ Mwi entara vaiti mwonravuvano kamaniravata ntaqura saara karavuqi varuvaro mwi vaitinravusagitairo mwovano mwira nrutu Varavaasiva mwiva vaiti rusora saara karavuqi varura.

⁸ So mwi entaraqaa nraase qoravano uairama vita variqata karavu vaiti avantu saanira mwirara riegata uairama vita varuvaro ⁹ Pairaativa mwisa sapara hiro tiqaro, Ne karavugitaina ta vaitirave avantu nataanirave? Iutaa mwatananaa vuniaa vaiti mwirave ne avantu nataanirave? Né tiva mivage riaase, tiro. ¹⁰ Pairaativa ntapihi sovata nrora vaitinravuvano Iesusiva nroraqama vuasorave tita, Iesusira irorama mwateta mwisa mwira vitaqita uro Pairaatira sauquqi tuta sora.

¹¹ Pairaativa karavu vaiti tarave avantu nataanirave tiva sero, nraase qora sapara huvata Kotira saiga vara mwate varu vaitisa mwisa nrora vaitinravuvano uro nraase qora vutaqaa variqata kepusa qua mwisa tiva nita tiqata, Sia Iesusira avantu tiva taane. Varavaasira avantu tiva taane tiate, tita. ¹² Mwi nraase qorasa vusu tuvata mwisa Varavaasira avantu tiva taane tuvaro Pairaativa qaiqaa nraase qora sapara hiro tiqaro, Né Iesusirara tiqatama, Iutaa vuniaa vaitivanove, tiarave. Ne mwi vaitira nataave hianirave? tiro.

¹³ Mwita tuvata mwisa aasara nteta tiqata, Mwira satariqaa rutaate, tita.

¹⁴ Mwita tuvaro Pairaativa qaiqaa mwisa sapara hiro tiqaro, Mwira nara uaga hi saiqara utu saisatave mwita tiavo? tuvata mwisa qaqiqai paatita aasara nteta tiqata, Mwira satariqaa rutaate, tita.

¹⁵ Mwisa mwita tuvaro Pairaativa nraase qora qamwata natareraro Varavaasira avantu natero mwiraqaatairo nai ntaqu vaitisara Iesusira saavuqo ntuqutuate tuvata mwisa mwira saavuqo ntuqutu sovaro mwiraqaatairo mwira satariqaa rutaate tiro, Pairaativa Iesusira nai ntaqu vaitisa sauquqi tuta sora.

Ntaqu vaitisa Iesusira raivuvuma mwateta mwira ntuqutura
(Matiu 27:27-31; Ioni 191-12:2-3)

¹⁶ Pairaativa nai ntaqu vaitisa sauquqi Iesusira tuta sovata mwisa mwira vitaqita uro kamanira nraavuqi seta mwisa niari hena ntaqu vaitisa esaa nraarama uairama seta ¹⁷ mwira vireraqa higaata vuniaa vaiti mpuruqa nraare mpuruqa rupa mwateta mwiraqaataita kauvera vara seta qiata vaiti tave voti hura ququrama seta Iesusira qiataqaa qumwa tora. ¹⁸ Mwitaama seta niari sauqu vuasaaraqaa vategata kumwaari mwita tiqata, Iutaa vuniaa vaitio, variqarave? tita. ¹⁹ Mwita tiva seta mwisa saavuqotaita mwira qiata ntukavu seta, mwiraqaa taara vihi seta, mwira vuqaa tori sauru ravi variqata qaqi vireraqama seta mwira qamwata mwategata varura.

²⁰ Mwitaamaqi vigaata vireraqamase raima mwateta mwiraqaataita mwisa nraare mpuruqa rupa mwatora avantu seta nai tuavaaqa utu mwateta mwira satariqaa niri ruseta hiritarerata Iesusira vita vareta vurama.

Iesusira satariqaa niri ru seta hiritora

(Matiu 27:32-44; Ruku 23:26-43; Ioni 191-12:17-27)

²¹ Ntaqu vaitinravusa Iesusira satariqaa niri ru seta hiritare tita, mwira vita vareta mwatasa mwaaqani aaraqaa vi varuvavo vaiti mwovano mwira nrutu Saimoniva mwatasa nroraqi virera huvata mwisa mwira antuase kepusaqama seta tiqata, Iesusira ru seta hirite satarira vara quqira uro vataane, tuvaro Saimoniva vara quqiro uro mwatora. Saimoniva mwata Sairininiaava mwira Arekisaantaasa Rupusa qova varura.

²² Mwisa Iesusira vitaqita uro qumina mwata Korokotaave tunani sora. *Korokotaa* mwaa quaraqitai tirera, *Qiata Mwusaariqaave*, tunani Iesusira uro sora. ²³ Uro seta uaini mwiqi ukavu inraisara tuqataase vato nramarira mwira mwirera huvaro Iesusira sia nrero.

²⁴ Sia nrovata mwisa mwira satariqaa niriqotai ruseta mwira tuavaaqa vara seta tasa tasave so varevarave tiva seta, kaati ruantema seta ori tuto seqata mwira tuavaaqa tusama seta varora.

²⁵ Toqaqi huarivano nrero virisataqaa huvata Iesusira satariqaa rutora.

²⁶ Mwira satariqaa ruteta Iesusira qiatani qua mwo, mwira ko tiva mwato quara qara ntuva teta satariqaa rutora. Mwi quava mwitaama tiro:

IUTAA VUNIAA VAITIVE, tiro.

Mwi qarava mwitaama sero vahura.

²⁷ Mwisa Iesusira satariqaa ruteta Iesusira vatama seta vaiti taaratana rutora. Mwitanasa muara vare varutanasa varuvata mwo Iesusira sauqu tanarani niri ruteta mwo Iesusira sauqu saanaaqani niri rutora. ²⁸ [Iesusira vatama seta mwitaama rutorara tiro, Kotira vukuqi qua mwo qara ntuva tova mwivau vahura. Mwitaama tiro: Mwira uaga hi vaitisa vatama sero varianarove, tura.]

²⁹ Mwitaamase rutovata nraase qoravano vitare nritare hiqata viri taqeta niari mwauro miqi seqata Iesusirara uqa hu quara tiva mwateta tiqata, Qike, e tiqarama, Kotira nraavu ntapairi senama taaramwo entaqaa saiqa vareqanama qaiqaa hoqa taiga saanirave, tiaravave? ³⁰ So ena saahaqa hiane. E satarigaataira miavi ntaane, tita.

³¹ Mwisa mwitaa ti varuvata mwisa tuntema seta Kotira saiqa vara mwate varusa mwisa nrora vaitinravuvata, mwaara osara ti varu vaitisavata, mwisa Iesusirara raima mwateta tiqata, Mwiva mwosagai saahaqa hi variva siama so nai saahaqa hirove. ³² Mwiva Kotiva titai vaitiva mesaiaa vaitivanove, Isareri vuniaa vaitivanove, tiavata riaunarave. Sai te varigata taqaararo mwiva satarigaatairo miavi ntero tuvirera, te mwirara quqaave tiare, tita.

Mwisa mwitaa tuvata mwisa nraantanteta muara vaititana Iesusira vatama seta rutotanasu, mwitanasavata mwira uqa hu quara tiva mwate varura.

Iesusiva qutu vura

(Matiu 27:45-56; Ruku 23:44-49; Ioni 191-12:28-30)

³³ Mwitaa huvaro ihara mwutusa tavaara esaa mwi mwataragaa entama tero vahiqi vuvaro huarivano vitira tavaarana tuvi vuvaro qaiqaa ntuvaahama vura. ³⁴ Qaiqaa ntuvaahama vuvaro Iesusiva nai quaqitairo aasara ntero tiqaro, *Eroi, Eroi, rama sapakitani*—Kotio, Kotio, naraqamave ni qaqira sera hiarao? tiro.

³⁵ Iesusiva mwitaa tuvata mwo husa mwini tivita varusa mwira qua rieta tiqata, Mwiva Iraisaara tiri haivaqara nraaraiso, tuvaro ³⁶ mwovano santero ukavu uainira saqa sero saavu kati sero mwiraqaa huairi sero viri Iesusira nrora vatero tiqaro, Sai varigata taqaararo Iraisaava mwira saahaqa hireraro tuvuanira taqaare, tiro.

³⁷ Mwitaa tuvaro Iesusiva nroraqama sero aasara ntava sero qutu vura.

³⁸ Iesusiva qutu vuvaro Ierusaremini Kotira nraavuqi taakusa voti hura mpuruqa nrora hiritova viritairo vutaqaa nrahituqiro tuviro miani uto sora. ³⁹ Ntaqu vaitisa vuniaava Iesusira ruto satarira nraaqani varuva taqovaro Iesusiva nroraqama sero aasara ntava sero qutu vuvaro mwiva tiqaro, Qike, quqaama vaiti mwaava Kotira mwaaqu variva qutu viso, tiro.

⁴⁰ Iesusiva qutu vuvata nraase mwonravuvano niarasata varigata taqe varura. Mwinravusaqitairo hininravu nrutu vahireraro. Mariaava Makataraniaava mwo, Mariaava Semisiva naatiaraa vaiti mwiravata Iosisiravata nrova mwo, Saromeva mwo, mwisa mwini varura. ⁴¹ Nraase mwinravusa Iesusiva Karirini nruo entara mwira vataqita nrueqata mwira saiqa saahaqama mwato nraasenravusa varuvata nraase mwonravuvata mwini varura. Mwisa Iesusiravatama seta nrusa Ierusaremini varura.

Iesusira quntama tora

(Matiu 27:57-61; Ruku 23:50-55; Ioni 191-12:38-42)

⁴²⁻⁴³ Entama virera huvaro Sosepiva Arimataniaava nri ntoro. Mwi vaitiva vaiti suqeva kaanasorivano variqaro Kotiva ntaqaihani entava nriranira tageqaro mwira vesa varuva nri ntero, hura Iutaa mwaara enta vahianirara riero sia aatu hiraitiro, uro Pairaatirara Iesusira mwavantara sapara hiro tiqaro, Mwira miraqe varaqina uro quntaase, tiro.

⁴⁴ Mwitaa tuvaro Pairaativa Iesusiva qamwanrama qutu vurara airi nraato tiro ntaqu vaitira mwo nraarama sero sapara huvaro mwi vaitiva tiqaro, ⁴⁵ So quqaama qutu viso, tuvaro Pairaativa Sosepirara tiqaro, Soma mwira mwavanta varaqira uro quntama tenarave, tiro. ⁴⁶ Mwitaa tuvaro

Sosepiva eqarori mpuruqa soqaama sero Iesusira mwavanta satariqaatairo itu sero eqarori mpuruqa mwiragotairo qapuqama sero uro vaiti quntarera ori vaurutoraqi vera vatero ori nrora mwo raaqutaqiro uro mwira nrora tita tora.

⁴⁷ Mariaava Makataraniaavavata, Mariaava Iosisira nrovavata, taqe varuvata Iesusira oriqi vera vatora.

16

Iesusiva qutu vuraqitairo tivura

(Matiu 28:1-8; Ruku 24:1-12; Ioni 20:1-10)

¹ Saarareqa lutaavano mwaara tu entava taigovata Mariaava Makataraniaa nraasevanovata, mwira qamwava Semisira nrovavata, Saromevavata, mwi nraasenravusa munima seta sugema sero mwunta vu inraisara vareta Iesusira mwavantaqaa qumwatarerata vura.

² Saante toqaqi huarivano mate nrintoraqi mwinravusa Iesusira quntama toraqiara vura. ³ Aarani viqata mwinravusa nai sapara hi nai sapara hi tiqata, Te mwini uro ntaararo tavave ori nrora qetiana titataara vara saanarove. Ori mwira nrora nrusi ntava taarave, tita.

⁴ Mwita tiva seta mwinravusa nri nteta tagovaro ori nrora mwira nrusi raaqu sovaro qaqinani vahura.

⁵ Orivano mwitaama vahuvata taqeta mwinravusa oriqi vera nteta tagovaro vaiti mwo qaraaha vaitivano eqarori tuavaaqa ututo vaitiva mwiqi hini saataaqi mwatasaa viro varura. Mwiva mwiqi varuvata mwira taqeta aatu huvaro ⁶ mwiva mwisara tiqaro, Sia aatu hiate. Iesusira Nasaretiniaara satariqaa rutaa vaitira, nénravu mwirarave huua hi variavo? Mwiva sia mwaaqi variso. Mwiva qaqima tiviso. Nénravu mwaini taqaate. Mwaaqi mwira vataaraqi siama variso.

⁷ So mwaa quara vareta uro mwira nraaqiaranravuvata, Pitaaravata, tiva niate. Mwitaama tiva niate: Mwiva nraante ini vuni Karirinima viso. Nénravuvata mwini vita uro mwira tagevarave. Tauraa qaqi variqaro mwirara ini tiva nura mate mwivauma vaiso. Mwi quara tiva niate, tiro.

⁸ Mwiva mwita tiva aatu hiqatara tita, mwinravusa Iesusira quntama toraqitaita veva nteta santama teta aarana viqata sia mwosavata tiva ninraitita, vura.

Iesusiva Mariaara Makataraniaara vuqaa qovarama vura

(Ioni 20:11-18)

⁹ [Iesusiva Saante toqaqi qutu vuraqitairo tiviro vuni mwiva Mariaara Makataraniaara vuqaa nraante qovarama vura. Haaru Iesusiva nraase mwira vutaqitairo vaana ⁷ nravu titovata nritare vu nraasera vuqaa qovarama vuvaro ¹⁰ Mariaava uro Iesusira nraaqiaranravu tiva nineraro vuva uro tagovata mwisa Iesusirara ntate varura. ¹¹ Ntate varuvaro mwiva mwisa tiva niro tiqaro, Iesusiva qaqima tiviro variso. Ne nena vuqotaina mwira taqauqo, tuvata mwisa sia mwira quara quqaave tura.

Iesusiva nai nraaqiara mwotana vuqaa qovarama vura

(Ruku 24:13-35)

¹² Mwi entara Iesusiva mwo qarama mwo qarama sero nai nraaqiara taaratana vuqaa qovarama vura. ¹³ Mwitanasa aaraqaa vi varuvaro Iesusiva qovarama vuvata mwisa mwira taqeta uro ntanteta nrina hini mwisa tiva nuvata mwisa sia mwitanasa quara quqaave tura.

Iesusiva nai nraaqiara 11 nravu vuqaa qovarama vura

(Matiu 28:16-20; Ruku 24:36-49; Ioni 20:19-23)

¹⁴ So naatiara esaara Iesusira nraaqiara 11 nravuvano sara nre varuvaro Iesusiva mwisa vuqaa qovarama vura. Iesusiva qaqi tiviro varuvata mwo husa mwira taqeta uro Iesusira nraaqiaranravu tiva nuvata mwisa mwi quarara unra quave tiva seta varuvafora tiro, Iesusiva niari vuqaa qovarama viro mwira saara mwisa irora hiro tiqaro, Né mwi quarara quqaave tiataara vaisatama né kepusaqama seta variqata sia quqaave tiavo, tiro.

¹⁵ Mwitaa tiva sero mwisa tiva niro tiqaro, Né esaa mwata maata nruegata esaa nraase qora suqe qua mwaa tiva niate. ¹⁶ Tiva nivaro ni quara quqaave tiva sero, nramari varaani vaitira, mwirama Kotiva so vitaanarove. Ni quara sia quqaave tiani vaitira Kotiva sia mwira vitaraitiro, mwiraqaa qua vataanarove.

¹⁷ Ni quara quqaave tisa, mwisama nrora saiqa mwataa hianira so varevarave. Mwisa ni nrutu nteqatama vaana titaivata vivarave. Mwisa mwo mwatanaa mwo mwatanaa quavata so tivarave.

¹⁸ Mwisa quaiha tu varaivaro mwi inraisava sia mwisa ruanarove. Mwisa tuhi nramari nraivaro tuhi nramarivano sia mwisa ruanarove. Mwisa nriqa visaqaa sauqu vataivata mwisa suqema vivarave, tiro. Turama.

Kotiva Iesusira vitovaro naavuni vura

(Ruku 24:50-53; Saiqa Varora 1:9-11)

¹⁹ Nroravano Iesusiva nai nraaqiaranravu sapata qua tiva ni taiqa sovaro Kotiva mwira naavuni vitero vuvaro mwiva mwini nroraqama viro Kotira sauqu tanarani mwatasaa virera vurama.

²⁰ Iesusiva naavuni vuvata mwira nraaqiaranravuvano mwata maata vahuntema nruegata Iesusirara tiva ni varuvaro nroravano Iesusiva mwisa saahaga hi varuvaro mwisa saiqavano kepusaqama viro nritarero vahuvata tifa, nraase qoravano taqovaro mwisa quavano quqaa quaqai vahura.]

IONI Ioniva Iesusiva nruorara tura

Iesusira osarara tura

¹ Haaru toharero quavano varura. Mwi quava Kotisantiriro varura. Mwi quava nai Kotiva varura. ² Tauraa toharero mwi quava Kotisantiriro varigiro vura. ³ Mwiva Kotisantiriro variqi viqaro mwo inraisa mwo inraisa esaa inraisa utu sero vatora. Mwovanovata mwo inraisa utuariva sia varuvaro qua mwivaqai esaa inraisa utu sero vatora.

⁴ Mwi quava qaqi variqi vi variara tuqavanoma variro. Mwi quava ova votima sero itamaqiro viqaroma nraase qora sugema sero ntuvahama natero. ⁵ Ovavano rupi hiraqi itamaqiro visaro siama enta hi inraisava mwira qipa saariva vahiro.

Nramari ni varuva, Ioniva Iesusirara tiva nura

⁶ Kotiva vaiti mwo titora mwira nrtutu Ioniva. ⁷ Nraase qoravano Iesusirara mwiva quqaa ovavanove tiate tiro, Ioniva mwirara tiva nireraro nri ntora.

⁸ Ioniva nai sia mwi ovava variraitiro, mwiva ova mwirara tiva nireraro nrura. ⁹ Mwiva nri ntovaro mwira naatiara quavano nri ntero ova votima sero itamaqiro viqaroma esaa mwaa mwataraqaa nraase qora ntuvahama natero.

Iesusira qoririma mwatora

¹⁰ Iesusiva nai mwaa mwatora utu sero vatova mwatani tuvuvata mwaa mwatanaasa sia mwira ntapihise taqaraitita, mwirara sia mwivave tita.

¹¹ Mwiva nai nravunaasa hunani nri ntovata mwira nravunaasa sia mwira sasama mwataraitita, mwira qoririma mwatora.

¹² Mwitaahuvatavata mwo husa mwira sasama mwateta mwirara quqaa mwivave tura. Mwitaa tusa mwisa mwiva nroraqama sovata mwisa Kotira nraaqiaraqama vita varura. ¹³ Sia nraasevano nraaqiara mwataintema sero mwisa mwata taisata Kotira nraaqiaraqama vita variara. Sia gumina vaiti sasa hiraqaa Kotira nraaqiaraqama vita variara. Nai Kotira sasa hiraqaa mwisa Kotira nraaqiaraqama vita variara.

Iesusiva vaiti tuora

¹⁴ Kotira quavano vaiti tuero tirivata varireraro tuviro. Mwiva tuviro mwaa mwataraqaa varuvata te mwira kepusa osara taqaavanara. Te taqaavararo mwi vaitiva suqe hiro vaitiara mwoqama sero po se tiva nategaro quqaa quaqai ti varuva varura.

¹⁵ Ioniva nraase qora tiva niro tiqaro, Ne haaru ini tiva nina tiqana, vaiti mwovano ni naatiara nriariva ni naataraanarove, tuva so mwaa mwi vaitivave. Ne sia qovara hiava entara mwiva haaru qaqi variqiro vurave. Mwitaama variqarora tiro, mwi vaitiva ni naatara sero mwiva nroravano variso, tiro. Ioniva mwitaa tura.

¹⁶ Iesusiva mwoqama sero tiriara nraamwunriqa taisaro mwiva tiriara po se tiva timwatero airi nani tiri sugema timwate varira. ¹⁷ Haaru Kotiva nai qua mwaaara nraase qoravano sia ntega saraitita, qaqiqai riemwaqita vuete tiro, Mosesira mwura. Mate mwaa entara Iesusi Karaisiva Kotiva hinatairo uto Kotiva po se tiva timwatai osarara, quqaa osara tiri timwira.

¹⁸ Sia gumina vaiti mwovano Kotira taqairave. Mwira mwaaquvano nai

qora tataaqani variva, mwivaqai nai qora osara qovarama saisata te taqeta ntapihunara.

Ioniva sia ne mesaiaa vaitive tura

(Matiu 3:1-12; Maaki 1:1-8; Ruku 3:1-18)

¹⁹ Ioniva Iesusirara tiva nu quava mwataamama vahiho. Ioniva nri ntovata Iutaa vaiti nroranravuvano Ierusaremini varusa vaiti mwonravu titovata Kotira nraavuqi Kotira saiga vara mwate varusavata, Rivaira kuua osara mwonravuvanovata, mwisa uro nteta Ionira sapara hita tiqata, E ta vaitivave? (E quqaa tiri mesaiaa vaitivanove variaro?) tita.

²⁰ Mwisa mwitaa tuvaro Ioniva sia qua quqetaraitiro, vutu sero tiva niro tiqaro, Qaqao, sia ne Kotiva titai vaitiva mesaiaavano varuqo, tiro.

²¹ Tuvata mwisa mwira qaiqaa sapara hita tiqata, E sia mwivave tiqara, e mwo tavave hiaro? E tiri haivaqava, Iraisaavave variaro? tita.

Tuvaro Ioniva qaqao, Ne sia mwivave, tiro. Tuvata mwisa qaiqaa mwira sapara hita tiqata, E ta vaitivave? Te poropeti vaiti mwo mwira vesama varuro. E mwivave hiaro? tuvaro Ioniva qaqaoqai tiro.

²² Mwitaa tuvata mwisa tiqata, E tavave hiaro? Tiva timwirage te nrima ntanteta tiri titaa vaitisa iara uro tiva niare. E enara tavaveve tira hiaro? tita.

²³ Mwisa mwitaa tuvaro Ioniva tiva niro tiqaro, Ne qumina sata variqana aasara ntegana tiqana, Aara avuqavugama taivaro nroravano nriarive, ti varuvama varuqo, tiro. (Ais 40:3) Haaru poropeti vaiti Asaiaava tu quara Ionivavata tura.

²⁴ Ioniva mwitaa tuvata Parisi vaitinravuvano titosa tiqata, ²⁵ E tiriara ne sia mesaiaa vaitivano varuqo tiaro. Sia ne Iraisaavave tiaro. Sia ne poropeti mwivave tiaro. So naraqamave qumina vaiti varuqo tiarava nramari ni variaro? tita.

²⁶ Tuvaro Ioniva mwinravusa tiva niro tiqaro, Ne qumina nramariqaima nraase qora ni varuqo. Mwovano ini vutaqaa varira né sia mwira taqaarave. ²⁷ Mwiva ni naatiara nriavave. Ne pata vaiti varuqaro mwiva nroa vaiti varisanara tina, ne siana so mwiva suqu nraavu rupa tai saantara avantu mwataanirave, tura.

²⁸ Ioniva Betaani mwaata Sotaani nramari qarahi hini variqaro nramari ni varu entara mwi quara tura.

Ioniva Iesusirara Kotira sipisipi nraative tura

²⁹ Mwira qararaara Ioniva variqaro tagovaro Iesusiva mwitairo nri varuvaro mwiva tiqaro, So taqaate. Mwiva Kotira sipisipi nraative. Mwiraqama Kotiva mwatani variasa uqa hi saigara utira taiga nataa-narove. ³⁰ Ne haaru tiqana, vaiti mwovano ni naatiara nriariva ni naataraanarove. Ne sia qovara hiava entara mwiva haaru qaqi variqiro vurave. Mwitaama variqarora tiro, mwiva ni naatara sero nroravano varianarove, tu vaitiva, mwaa mwivave. ³¹ Tauraa sia ne mwira ntapihi taqaurave. Né Isarerer nraase qoravano mwira ntapihise taqaate tina, ne mwaini nrima variqana nramari ini ni varurave, tiro.

³² Mwitaa tiva sero Ioniva Iesusirara mwisa vutusero tiva niro tiqaro, Ne taqauqaro Kotira Mwaraquravano mwuku voti hiva atantiro tuviro uto mwiraqaa varirave. ³³ Tauraa ne sia Iesusira ntapihi taqe varuqaro Kotiva ni titaiana ne nramari ini ni varuqaro Kotiva ni tiva miro tiqaro, E taqairaro ni mwaraquravano vuariva uto mwiraqaa variani vaitira so mwirara mwivave tiane. Mwiva sia qaqi nramari nianarove. Mwiva nraase qora ni mwaraqura niarivave, tirave. ³⁴ Kotiva ni mwi quara tiva

misana ne mwi inraisara suqema sena taqena ne mwirara mwaavama Kotira mwaacquve tuqo, tiro.

Iesusiva vuniqama sero erahiamuaantema vaiti vitora

³⁵ Mwira qararaara Ioniva nai nraaqiara taaratana mwira vataqita nruotanavata tiviro varuvaro ³⁶ Iesusiva nritarero vuvaro Ioniva mwira vutu taqero, mwitana tiva niro tiqaro, Taqaate. Mwiva Kotira sipisipi nraative, tiro. ³⁷ Mwitaa tuvata Ionira vataqita nruotana Ioniva tu quara rieta, mwiragaatai tuqataa vita Ionira mwini seta Iesusira vataqita vura.

³⁸ Vuvaro Iesusiva tuqataa viro taqovata mwitana mwira vataqita nruvaro mwiva tiqaro, Nétana naranave nriavo? tuvata mwitanasa tiqata, *Rapai* — Mwaanra ti variara vaitio, e taraqi variaravave? tuvaro ³⁹ Iesusiva tiqaro, So nrita taqaate, tiro.

Mwitaa tuvata mwitanasa mwira vatama seta uro mwiva varuraqi varita. Mwitanasas Iesusira vatama seta variqi vita erovata nrima ntanteta vura.

⁴⁰ Mwitanasas Ioniva Iesusirara tu quara rieta Iesusira vataqi vuraqitairo mwo Enturuva, Saimoni Pitaara qatavano varura.

⁴¹ Mwitana Iesusira mwini setatana Enturuva nai vasaara huaama sero mwira tiva mwiro tiqaro, Tetana mesaiaa, Kotiva titai vaitira huaama sauro, tiro. (*Mesaiaave, Karaisivave*, kuaa nrutuma vaiso.)

⁴² Mwi vaitira huaama seta taqauo, tiva sero Enturuva nai vasaara vita varero Iesusiva hunani uro sovaro Iesusiva mwira taqero tiqaro, E Ionira mwaacqu Saimonivave. Ne qaraaha nritu nteqana iara Sipaasirave tirerave, tiro. *Sipaasirave, Pitaarave*, kuaa nrutuma vahiro. (Mwaa quaraqitai mwi nritura tirerata *Orivave* tita.)

Iesusiva Piripisa Nataanierisa nraarora

⁴³ Mwira qararaara Iesusiva Karirini virerave tiva sero, uro Piripira huaama sero mwirara tiqaro, Ni naatiara nrane, tiro. ⁴⁴ Piripiva Vetasaitaniaavama variro. Enturusas Pitaasavata kuaa mwatasa mwiqinaasa varura.

⁴⁵ Iesusiva Piripirara ni vataqira nrane tuvaro Piripiva Nataanierira huaama sero mwira tiva mwiro tiqaro, Haaru tiri haivaqava Mosesiva mwaara qua gara ntiqaro mwi vaitirara tivatovata, poropeti vaitinravuvata, mwi vaitiva naatiara qovara hianarove tiva seta gara ntumwato vaitira, so mate mwi vaitirama taqauqo. Mwiva Iesusiva Iosepira mwaacquvano Nasaretiniaavave, tiro.

⁴⁶ Tuvaro Nataanieriva tiqaro, Qaqao, sove suqe vaitivano mwi mwatusaraqitairo qovara hianarove? tiro. Tuvaro Piripiva tiqaro, Enavano nrima taqaane, tiro. ⁴⁷ Mwitaa tiva sero vuvaro Iesusiva taqovata mwitanasa nri varuvaro tiqaro, Taqaane. Quqaama mwi vaitiva Isareriva vaitivano variso. Sia mwi vaitiraqi unra qua vahivave, tiro.

⁴⁸ Mwitaa tuvaro Nataanieriva Iesusira sapara hiro tiqaro, Nataama serave e ni osara ntipihira hiaro? tuvaro Iesusiva tiqaro, Piripiva sia i uro nraarai vasa e fiki osarani variarana ne i taqaurave, tiro.

⁴⁹ Mwitaa tuvaro Nataanieriva tiqaro, Mwaara ti variara vaitio, e Kotira mwaacquve. E Isareriqaa ntaqaihiaravave, tiro.

⁵⁰ Mwitaa tuvaro Iesusiva tiqaro, E fiki osarani variarana ne i taqaurave, turaqaatairave niara quqaa mwivave tiaro? Naatiara nrora inraisa, mwo inraisa mwo inraisa mwira nraataraanirama taqenarave. ⁵¹ E quqaama taqairaro naavuvano qatua viraqe ne mwatani mwatatai nraaqiarava variarita niqaara naavuniaasa vita tuvta hi varivaqe varianirave, tiro. Iesusiva mwitaa turama.

2

Mwatusa mwo Kenaqi nraase ntuvura

¹ Taara enta nritarovata mwatusa mwo Kenaq, Karirini mwi mwatanaasa nraase ntuvirera hura. ² Mwitaa huvaro Iesusira nrovavata mwini varuvata mwi mwatanaasa Iesusiravata, mwira nraaqiaranravuvata, nraanrovata mwiravusavata mwini vita.

³ Mwiravusa uro variqata sara nre varuvaro uainivano taiga vuvaro Iesusira nrova Iesusira tiva mwiro tiqaro, Uaini taigama viso, tiro.

⁴ Tuvaro Iesusiva qaqao tiro, Mwaa nraasevao, i saiga mwo saiga vaisaro ni saiga mwo saigama vahiso. Ne saiga varaani entava siana nri ntaiso, tiro.

⁵ Mwitaa tuvaro Iesusira nrova mwi mwatanaasa saiga vaitinravu tiva niro tiqaro, Mwiva nara quave iniara tirata mwiva tiarinte tiarinte hiate, tiro.

⁶ Iutaavano niari mwaara qua riegata mwitaa mwitaama segata niari mwavanta hiqama sora. So mwirara riegaro nramari taqu 6 nrau nrora tave voti hura mwi nraavuraqi vatovaro vahura. (Tave nrora kuaa mwiqi soma nramari taqu qataara 10 vano vuanaro.) ⁷ Vahuvaro Iesusiva saiga vaitinravu tiva niro tiqaro, Esaa mwi taqura qaqi nramariqotaita kuraama saate, tuvata qaqi nramari saqaqita uro tave nrora mwinravura kuraama sovaro vaiqaara hura. ⁸ Kuraama sovaro Iesusiva qaiqaa tiqaro, So mwiqitai saqaqita uro saraqaa ntaqaihiira mwivaro nreqaro taqaarive, tiro.

⁹ Mwitaa tuvata mwiqitai mwi nramarira saqaqita uro mwuvaro mwi vaitiva qaqi nramarivano uaini utu vura nreqaro taqovaro suqe huvaro mwiva sia qaqi nramari saqora mwirara ntapihuvata saiga vaiti mwiravusaqi mwirara ntapihura. Mwitaa huvaro saraqaa ntaqaihuva nreqaro taqovaro suqe uaini vahuvaro qamwata sero nraase varo vaitira nraarama sero ¹⁰ mwira tiva mwiro tiqaro, Qike, mwo hiasa suqe uaini nraante nraase qora niavata nraava taiga saavata naatiara uaga hi uainira ni variarave. E sia mwitaa hiaro. Ne taqauqara e mwo uaini vuni nira suqe uaini mwira naatiarama nira hiaro, tiro. Mwitaa turama.

¹¹ Iesusiva Kenaq mwatusa Karirini variqaro qaqi nramari vara sero uaini utu sero nura. Mwiva mwi saiqara nraante hoqarama tero mwiraqaatairo mwo saiga mwo saiga nrora saiga varaqiro vura. Iesusiva mwi saiqara varovata mwira nraaqiaranravuvano mwira saiga taqetama Iesusira kepusa osarara ntapihita mwirara so quqaa mwivave tura.

¹² Mwiraqaatai mwivavata, mwira nrovavata, mwira qatanravuvata, mwira qua riosavata, mwini seta vusa Kapeniaani uro mwo entanravu varura.

Iesusiva Kotira nraavu nroraqi vura

(Matiu 21:12-13; Maaki 11:15-17; Ruku 191:12:45-46)

¹³ Vesahu nato sarara nro entava qaumatoga huvaro Iesusiva Ierusalemni vuvu ¹⁴ uro Kotira nraavu nroraqi vera ntero taqovata mwo husa soqaa saiga vare variqata munima vareqata purimakauve sipisipive kurive ni varuvata mwo vaitinravu tainta tataaqani variqata kamanira munima vareqata Kotira nraavuqinaa munima ni varura.

¹⁵ Mwitaamaqita vigaata soqaa saiga vare varuvaro Iesusiva mwisa taqero sapipi vara sero mwiraqotairo purimakauvata, sipisipivata, vataqiro veva Kotira nraavuqitairo mwaatani sero munima tuqataaqi varu vaitisa tainta tu varero vara rauru sero mwi munimaravata rauru sero, ¹⁶ kuri niqata

munima vare varu vaitisara tiqaro, Né mwi inraisara mwi inraisara mwaagitaita vare vuata. Né sia ni qora nraavu maaketi nraavugama taate.

¹⁷ Iesusiva mwitaa tuvaro mwo qua Kotira vukuqi qara ntuvato quava mwira nraaqiaranravu nraatoqi ntuva vuvata riora. Mwi quava mwitaama tiro:

Ne i nraavuara nroraqama sena riemwaqi vuariva tia itaintema sero niqi ite variso, tura. (Sng 69:9)

Mwi quara mwitaama sero qara ntuva tora.

¹⁸ Iesusiva mwitaa huvata Iutaa vaiti nroranravuvano tiqata, Qaqao, tava iara tisarave e mwitaa hiaro? E nara nrora saiqi mwo tiri vuqaa utiraqe te mwira taqetave iara mwiva so mwitaa hianarove tianarave? tita.

¹⁹ Mwisa mwitaa tuvaro Iesusiva tiqaro, Né mwaa nraavura ntapaira saivaqe ne taaramwo entara qaiqaa hoqa saanirave, tiro.

²⁰ Mwitaa tuvata Iutaa vaiti nroranravuvano tiqata, Qaqao, mwaa nraavura hoqegata 46 ihi airi ihi hoqagi vita uro hoqa taiga saarave. Sove e taaramwo entaraqai mwi nraavura hoqa taiga senarave? tita.

²¹ Mwitaa tuvaro Iesusiva sia vutu sero qaqi nraavuara tiraitiro, mwiva nai mwavantaqaa ntuva sero tiro. (Né ni rusaivaqe ne taaramwo enta vari sena qaqi tivuanirave, tiro.) ²² Iesusiva mwi quaraqaa ntuva sero tuvata naatiara Iesusiva qaqi tivi varu entaraqaa mwira nraaqiaranravuvano variqata Iesusiva nraavuara tu quava mwisa nraatoqi ntuva vura. Kotira vukuqi qara ntuvato quaravata riegata, Iesusiva mwi entara tu quaravata riegata mwisa Iesusirara quqaave tura.

Iesusiva esaa vaiti ntapihi saira

²³ Vesahu nato sarara nro entaraqaa Iesusiva Ierusaremini varuvata nraase qora airivano mwira saiqi nrora saiqi taqegata Iesusirara so quqaa mwivave tita. ²⁴ Nraase qoravano mwirara gamwateqata mwitaa ti varuvoro Iesusiva nraase qora osarara ntapihi sero riegarora tiro, mwiva sia mwisa turara quqaave tura. ²⁵ Iesusiva nai vaasa nraase qora vu nraatoqi vahu inraisara ntapihi sorara tiro, sia qumina mwovano mwisa osarara mwira tiva mwiariva varura.

3

Nikotimaasiva Iesusira uro taqora

¹ Parisi vaiti mwovano mwira nrutu Nikotimaasiva varura. Mwiva Iutaa vuniaa vaiti mwovano varura. ² Mwo enta mwiva entaqi uro Iesusira tagero tiqaro, Mwaara ti variarao, te taqauraro Kotiva i titaisarara tira, e mwaara qua ti variaravama nrira hiaro. Sia Kotiva i saahaqa hiase titiri, e siana so nrora saiqi varaaratirio, tiro.

³ Mwiva mwitaa tuvaro Iesusiva mwira tiva mwiro tiqaro, Ne quqaa qua tianira riaane. Vaiti nrora tuemwa vuanira sia qaiqaa mwata tairaro mwiva siana so Kotiva ntaqaihi mwatusara taqaanarove, tiro.

⁴ Tuvaro Nikotimaasiva sapara hiro tiqaro, Nataama serove nrora tuemwa vuani vaitira qaiqaa mwata saanarove? Sove mwiva nai nrora visosaqi qaiqaa vige tairaro mwira nrova qaiqaa mwata saanarove? tiro.

⁵ Mwitaa tuvaro Iesusiva nai tiva mwiro tiqaro, Ne quqaama tuqo. Nra-marivata mwata taariva variraro sia Kotira Mwaraquravano mwira qaiqaa mwata sairaro mwiva siana so Kotiva ntaqaihi mwatusaraqi vuanarove.

⁶ Mwavanta vataava nai mwavanta vahiraqai mwatairave. Mwaraquravano nai mwaraquraqai mwatairave. ⁷ Ne ini qaiqaa qaraahagama sero mwata saarive tu qarara sia e mwi qarara nrilhama vuane. ⁸ Ne mwo

quaqaa ntuva sena i tiva mwirerave. Toqavano tiqaro nai vuataa hiraqaa virave. Toqavano nrisara e sia mwira taqaraitira, e mwira nruquaai riaanarave. E mwiva viro nriro hi osarara sia ntapihianarave. So Kotira Mwarapuravano mwatatai osarava kuua qarama seroma vahiso, tiro.

⁹ Iesusiva mwitaa tuvaro Nikotimaasiva mwira sapara hiro tiqaro, Nataama serove mwitaa hianarove? tuvaro ¹⁰ Iesusiva tiqaro, E Isareri nraase qora mwaara tiva ni variarava e siave ntapihiaro? ¹¹ Ne quqaama tuqo. Te ntapihi seta rie taqe hunara ini tiva ni varurata né sia tiri qua riarave. ¹² Ne mwataniaa inraisara ini tiva nuqata né mwirara sia ntapihita quqaave tiarave. Né mwitaa hiavana ne naavuniaa inraisara tiarita nataama setave né mwi quara so ntapihi rievare? ¹³ Sia vaiti mwovano Kotiva varira naavuni virave. Ne mwatani mwatatai nraaqiarava neqai naavuni variavava mwitaina tuvurave.

¹⁴ Haaru ini haivaqava Mosesiva qumina mwataqaa variqaro ori vara sero memaru utu sero mwira satariqaa rupa sero tuaahera sorave. (Nraase qoravano mwira taqeta sia qutu vuata tiro, Mosesiva mwitaa hurave. (Nam 21:6-9)) Qio ne mwatani mwatatai nraaqiarava variarita haaru Mosesiva memaru utu sero tuaahera sontema seta nivata satariqaa vateta tuaahera sevarave. ¹⁵ Mwitaa hirata nraase qora niara quqaa mwivave tisa sia qutu viraitita, esaa enta esaa enta qaqi variqi vivarave, tiro. Iesusiva turama.

¹⁶ Kotiva mwatani variasara mwoqama sero mwutusa ntisarora tiro, mwiva nai mwaaqu kuaiga vataira tiri timwira. Mwitaa hirara tita, nraase qoravano mwira mwaaquara quqaa mwivave tisa sia qutu viraitita, mwisa esaa enta esaa enta qaqi variqi vivara. ¹⁷ Kotiva sia nai mwaaqu ko riaa vaitisa votima sero variqaro nraase qora tusa hiarive tiro mwatani titaisaro tuvirave. Mwiva nraase qora sitaarive tiro, Kotiva mwira titaisaro tuvirave.

¹⁸ Mwovano mwira mwaaquara quqaa mwivave tiariva, mwiva siama qua varaanaro. Mwovano sia mwira mwaaquara quqaa mwivave tiariva, mwiva vaasama qua varero. Mwiva Kotira mwaaqu kuaigara sia quqaa mwivave tira saarama, Kotiva mwirara quqaa iqaa qua vaiso tiva sero, mwiraqaa qua vatero.

¹⁹ Mwaa inraisara saara qua vahianaro. Ovavano mwatani tuvisata nraase qoravano sia mwira qamwata mwataraitita, mwisa enta hiraraqai qamwateqata variara. Mwisa saiqavano qora saiga vaisatara tita, mwisa sia mwi ovata qamwata mwateta.

²⁰ Qora saiga uti variva nraavutaaga hiqaroma sia omwavano varinani viro. Ovavano iteqaro ni uaga hi saigara qovarama saaso tiro, sia ovavano varinani viro. ²¹ Mwiva mwitaama varisaro quqaa saiga vare vari vaitiva sia aatu hiraitiro, ovavano varinani viro. Mwiva visaro ovavano itero mwira saiga qovarama saisata nraase qora taqaavaro mwi vaitiva Kotira qua rieqaro Kotira saiga vare varira.

Nramari ni varuva Ioniva esaara qua Iesusirara tiva nura

²² Mwiraqaataita Iesusivavata mwira nraaqiaranravuvata (Ierusalem seta) Iutaa mwata mwo qumina mwatani vura. Iesusiva nai nraaqiaranravu sapata variqaro nraase qora nramari nura.

²³ Nuvaro Ionivavata mwutusa mwo Serimi tataaga Aionini variqaro nramari ni varura. Ioniva nramari nrora vahunani variqaro nraase qora mwini uairama vusa nramari nura. ²⁴ Mwi entara sia Ionira karavugu vitaqita uro so entara varura.

²⁵ Mwi entara Iutaa vaiti mwovano Ionira qua riosa sapata nramari vare osarara irora huvata mwisa Ioniva hunani uro nteta tiqata, ²⁶ Mwaara ti

variarao, tauraa e Sotaani qarahi vutura hini vaiti mwovata variqarama e mwirara mwivave tunarave. So taqaane. Mwi vaitiva mwivavata nramari ni varisata airivano mwiva hinani vi variavo, tita.

²⁷ Mwitaa tuvaro Ioniva tiqaro, So Kotiva naavuni variva vaiti mwo sia mwo inraisa mwirera, mwi vaitiva siama mwi inraisara varaanarove.

²⁸ Névata vuni ne tura riaarave. Ne tiqana, Siama ne ini saahaqa hiariva varuqo. Ni titaiana ne nraante mwira vuni nruvave, turave.

²⁹ Nraase vararera hi vaitiva nraase varairave. Mwi vaitira totivano qaqi tivi variqaro mwira qua rieqaro gamwata sero varirave. So mwira totivano gamwataintema sena ne Iesusirara gamwatauqo. ³⁰ Iesusira nrutu virini nriviraro ni nrutu mwatani tuvi vuarive. (Airivano mwira vataqita vivarave. Siama ni vataqita vivarave. Mwisira Iesusira vataqita virara siama ne Iesusira saru ntuta mwataanirave. Ne mwira gamwata mwataanirave,) tiro. Ioniva turama.

Iesusiva naavutairo tuvivara tura

³¹ Iesusiva viritairo tuvivara tiro, esaasa nraatara saivama variro. Mwataniaava mwatatairo nrivara tiro, mwiva mwataniaa inraisaraqai ti varira. Iesusiva naavutairo tuvivara tiro, esaasa nraatara saivama variro. ³² Mwiva nai taqero riero hi inraisara qoqaa tiva ni varisata nraase qoravano mwira quara sia quqaave tiraitita, mwira qua qoririma mwate variara.

³³ So vaiti mwovano sia Iesusira qua qoririma mwataraitiro, mwira quara quqaave ti vari vaitiva, mwiva mwitaa tiqaroma Kotira quaravata quqaa qua vaiso tiro.

³⁴ Kotiva Iesusira titaiaaro mwiva Kotira quaqai ti varira. Kotiva mwira titarera hiro sia nai mwaraqura pataqa pataqa mwiraitiro, mwira nroraqama sero mwisarora tiro, so Kotira quaqai ti varira. ³⁵ Mwira gova nai mwaaquara mwoqama sero mwutusa ntisaro esaa inraisa nai mwaaqu mwisaro mwiva mwi inraisaraqaa ntaqai hiqiro vi variro.

³⁶ Mwovano mwira mwaaquara quqaave tiariva sia esaara qutu viraitiro, mwiva qaqi variqiro vuanaro. Mwovano sia mwira quara quqaave tiariva variraro Kotira raraqaa tairaro mwira irora hiraro quavano mwiraqaa vahianaro.

4

Iesusiva Sameriaa nraasevata qua tura

¹ Mwi entara Parisi vaitinravuvano riovaro Iesusiva airi nraase qora nai hunani vita sero vateqaro mwisira nramari niqaroma Ionira nraatara sora.

² Iesusiva sia naivano mwisira nramari nura. Mwira nraaqiaranravuvano nraase qora nramari nura. ³ Parisi vaitinravuvano mwi quara riovarora tiro, Iesusiva mwiraqaatairo Iutia mwini sero Karirini viro.

⁴ Karirini virera mwiva Sameriaa mwata vutaqaama tero vuariva vahura. ⁵ Mwiva viqaroma mwatasa pata mwo mwira nrutu Saikaa mwini uro ntora. Mwata mwo haaru Sekopuva nai mwaaqu Sosepira mwo mwatara mwira tataaqa vahura. ⁶ Sekopuva haaru nramariara quvutova mwini vahuvaro Iesusiva niara aara nri sovaro pupohovaro mwiva nramariara quvutova tataaqa mwatasaa viro varura. Varuvaro huarivano nriru virira qiatagaqa vahuvaro ⁷ Sameriaa nraase mwovano nramari saqareraro nruvaro Iesusira nramari nraataa huvaro mwi nraaserara tiqaro, Nramari saqa sera ni miraqe nraase, tiro.

⁸ Iesusira nraaqiaranravu vaasa sara vararerata mwatusani vuvaro

⁹ Iesusiva mwiraqaa variqaro mwitaa tuvaro Sameriaa nraase mwiva

qaqao tiro, E Iutaavano variarana ne Sameriaavano varuqo. Nataamaqirave niara nramari saqa miraqe nraase tira hiaro? tiro. Iutaavanovata Sameriaavanovata nai nunurama mwate nai nunurama mwate hi varusara tiro, mwi nraaseva mwitaa tura.

¹⁰ Mwitaa tuvaro Iesusiva nai tiva mwiro tiqaro, E Kotiva qaqi niani inraisarara e riera ni osararavata ntapihiaratirio, e ni sapara hiarana ne qaqi variqi vi nramarira i mwutirio, tiro. (Mwi mwatanaasa nrumwuqinaa nramariara tiqata, Qaqi variqi vi nramarirave,) tura.

¹¹ Iesusiva ne qaqi variqi vi nramarira i mwirerave tuvaro mwi nraaseva sia ntapihi sero riaraitiro, mwiva rumwu nramariara tiso tiro. Mwiva tiqaro, Nrora, nramarivano vevato vaisara e siana nramari taqu vat- era hiaro. Taraqitairave qaqi variqi vi nramarira saqenarave? ¹² Tiri haivaqava Sekopuva nrora vaitivano varurave. E mo? E mwira nraatara saaravave iso? Mwiva nramari varaanira mwata quvu sero naivata nai nraaqiaravata nai quaravatama sero mwaa nramarira saqa sero nrora, tiro.

¹³ Mwitaa tuvaro Iesusiva tiqaro, Mwovano mwaa nramarira nrararo qaiqaqai nraataa hiraro nrima nreqaro varianarove. ¹⁴ Ne mwiani nramarira mwovano nrararo mwira siana qaiqaavata nraataa hianarove. Ne nramari mwiariro mwi nramariva vaiti vutaqitairo rumwuqitairo tuvi nramarira votima sero vi variraro mwi vaitiva sia qutu viraitiro, qaiqai variqiro vuanarove, tiro.

¹⁵ Mwitaa tuvaro mwi nraaseva tiqaro, Nrora, so mwi nramarira ni miraqe ne nraariro sia qaiqaa ni nraataa hiraqe qaiqaavata nrima mwaqitaina saqa seqana nraase, tiro.

¹⁶ Mwitaa tuvaro Iesusiva tiqaro, So, uro ena vaativata nraaramase vita varera uro ntantera mwaini nriane, tiro.

¹⁷ Tuvaro mwi nraaseva tiqaro, Qaqao, sia ni vaati varivave, tiro. Tuvaro Iesusiva tiqaro, E quqaama tiqara sia ni vaati variso tiaro. ¹⁸ E sauguru nani vaati varaaravave. Mate e vaiti mwovata variarava, mwiva sia quqaa i vaativano variso. E quqaama tira hiaro, tiro.

¹⁹ Mwitaa tuvaro nraase mwiva tiqaro, Nrora, ne taqauqara e poropeti vaitima varira hiaro. Kotiva i saahaqa isarama e mwitaa tira hiaro. ²⁰ So Sameriaa tiri haivaqasa Kotira nrutu tuaahererata mwaa taaqiraqaa variqata Kotirara aasara nte varurave. Mwitaa turata né Iutaavano tiriara tiqata, Qaqao né Ierusareminiqai variqata Kotira nrutu tuaaheraataarave, tiarave. Né tiriara mwitaa ti variarave, tiro.

²¹ Mwitaa tuvaro Iesusiva tiqaro, Ni quara e quqaave tiane. Mwo enta nri ntairata né mwi entaraqaa ni qora nrutu tuaahererata higaata, siana mwaa taaqiraqaa variqata aasara ntevarave. Siana Ierusaremini variqata Kotirara aasara ntevarave. ²² Né Sameriaavano sia Kotira osarara ntapihi-raitita, apiqama seqata aasara nte variarave. Tiri Iutaaqitairo nraase qora avanti nitaariva qovara hianirara tita, te ntapihise Kotira osarara rieqata mwira nrutu tuaahereqata mwirara aasara nte varunarave. ²³ Mwo enta nriariva qaumaqa iso. Mwi entava mate qovarama viso. Mwi entaraqaa Kotira Mwaraquravano nraase qora saahaqa hirata mwisa ntapihise Kotira osarara rieqatama mwisa quqaqama seta Kotira nrutu tuaaherevarave. Mwitaamase Kotira nrutu tuaaheresara Kotiva huua hi variso.

²⁴ Kotiva mwaraquravano varirave. Mwitaama varirara tita, mwira mwaraquravano saahaqa hi nraase qorasa mwisaqaima Kotira osara ntapihita quqaqama seta Kotira nrutu tuaaherevarave, tiro.

²⁵ Mwitaa tuvaro nraase mwiva tiqaro, Mesaiaa vaiti Kotiva titaanira, ne mwirara ntapihi saugo. Naatiara mwo enta mwi vaitiva nri ntero esaa inraisara tiri tiva timwianarove, tiro.

²⁶ Mwitaa tuvaro Iesusiva mwirara tiqaro, So ivata qua ti varuva ne mwaa mwivave, tiro.

²⁷ Iesusiva mwitaa ti varuqaraqi Iesusira nraaqiaranravuvano uro ntan-teta nrima taqovaro Iesusiva Sameriaa nraasevata qua ti varuvata mwisa nriharama vita. Mwisa nriharama vitavata sia mwi nraaserara tiqata, Nara inraisarave mwiravata qua ti variaro? tiraitita, sia Iesusiravata tiqata, Nara inraisarave nraase mwiravata qua ti variaro? tura. ²⁸ Tirema varuvaro nraase mwiva nai nramari taqu mwini sero tiviro nrima ntantero mwatusaqi nraase gora uro tiva nineraro vuva nrintero tiqaro, ²⁹ Né vaiti mwo nrita tagaate. Mwiva ne utu inraisara esaa ni tiva miso. Quqaa mwiva Kotiva titarera hiva, mwivave iso? tiro. ³⁰ Mwitaa tuvata mwisa mwatusa mwira seta Iesusiva varunaniara vura.

³¹ Mwi nraaseva vuvata Iesusira nraaqiaranravuvano Iesusirara tiqata, Mwaara ti variarao, qaqi sara mwaa vara sera nraane, tuvaro ³² mwiva mwisara tiqaro, Ne sara nraanira vatauqo. Né mwi sarara siama ntapihi saavo, tuvata ³³ mwira nraaqiaranravu nai tiva mwi nai tiva mwi hita tiqata, Vaasa mwovano sara mwisaro nrerove mwitaa tiso? tuvaro ³⁴ Iesusiva mwinravusa tiva niro tiqaro, Ni titaira mwutusa vahi saigara vareqana mwiva saiga mitairavata varaqina uro taiga saariva so mwi saigava ni sarama iso, tiro.

³⁵ Iesusiva mwitaa tiva sero tiqaro, Né mwo quaqaa ntuvase tiqata tiarave. Tora taaratana taaratana vara saariro sara keko tige antuanirave, tiarave. So sara vara tutaaraqi aitutu hiqata tagaate. Mate saravano naitarama viso. Né soma antivarave. ³⁶ Sara antiva nai saiga varairara soqaa varairave. Mwiva sara antu tairaro mwi sarava esaa enta esaa enta qaqiqai vahiqiro vuanarove. Mwitaa hirata sara vara tuarivavata, sara antuarivavata, mwitanasaqama qamwateqata varivarave.

³⁷ Mwo quavata tiava quqaa quama vaiso. Vaiti mwovano sara vara tutaira mwovano mwi sarara antirave. ³⁸ Ne ini titena tiqana, Mwovano saiga vareqaro vara tutai sarara uro antuate, tuqo. Mwo hiasa tutoqauha tuseti saiga vara seta sara vara tutaara, né mwisa sara antivarave, tiro.

Sameriaa airivano Iesusirara quqaave tura

³⁹ Iesusiva mwitaa ti varuvaro mwi nraaseva uro nai nraavunaasara tiqaro, Mwiva ne utu inraisara esaa tiva miso, tuvata Sameriaa nraase gora mwi mwatusaraqinaasa airivano Iesusirara so quqaa mwivave, tita. ⁴⁰ Mwitaa tiva seta Sameriaa qinaasa Iesusiva varunani nri nteta Iesusirara po tita tiqata, So sia qamwanrama vuane. E tirivata vari sera vuane, tuvaro Iesusiva mwisavata taara enta vaitero vurama.

⁴¹ Saatavanoqai Iesusira qua rieqata so quqaa mwivave tita. ⁴² Mwisa mwi nraaserara tiqata, Sia vaasa e tianaraqaataitavaua te mwirara quqaa mwivave, turo. Mate tetavano nai nroqitaita rietama mwirara quqaa mwivave turo. Te taqauraro Kotiva mwira titaaisaro mwiva tiri mwaa mwataragaa varurusa saahaqama tiva tero avantu tiva taarivama variso, tita. Mwitaa turama.

Iesusiva nrora vaiti mwo nraaqiara saahaqama sora

⁴³ Iesusiva mwini taara enta vaitero mwiraqaatairo nai mwaata Karirini viro. ⁴⁴ Iesusiva nai tiqaro, Poropeti vaitivano nai mwaatani varisaro mwira nrutuvano sia virito vahirave, tura.

⁴⁵ Iesusiva Karirini vuvata mwi mwatanaasa mwirara gamwateqata varura. Mwi mwatanaasavata vesahu nato sarara nro entara Ierusaremini uro varigata Iesusiva nrora saiga varovata taqorara tita, mwisa mwirara gamwatora. ⁴⁶ Mwira gamwata mwatovaro Iesusiva qaiqaa Kenaani tauraa mwini variqaro qaqi nramari vara sero uaini nramariqama sonani nrura.

Nruvaro kamanira saiga vaiti mwovano varuvaro mwira mwaaquvano nroraqama sero nriqa vuvaro Kapeniaani varura. ⁴⁷ Iesusiva Iutiatairo Karirini nriso tuvaro riero, mwi vaitiva Iesusiva varunani nrintero tiqaro, Sove e nrira ni maaqu nriqa vira saahaqama sairaro qaqi varianarove, tiro. Mwi vaitira nraaqiaravano qutu vuariva qaumaqa huvaro mwiva mwitaa tuvaro

⁴⁸ Iesusiva mwirara tiqaro, Né sia nrora saiga suqe hira taqaraitita, siama né quqaave tivarave, tiro.

⁴⁹ Tuvaro nrora vaiti mwiva tiqaro, Nrora, ni maaquvano qutu vuasorave. Qamwanrama nrane, tuvaro ⁵⁰ Iesusiva tiqaro, So ena mwaaatani vuane. I mwaaquvano qaqi varianarove, tiro. Mwitaa tuvaro mwi vaitiva Iesusiva qua tiva mwurara quqaa quave tiva sero, nai mwaaatani viro.

⁵¹ Mwi vaitiva aarana vi varuvata mwira saiga vaitinravuvano uro hunta seta mwira tiva mwita tiqata, I nraaqiaravano sugema viso, tita.

⁵² Tuvaro mwiva mwiravusa sapara hiro tiqaro, Nara huari vugaave mwira nriqa viva taiga visaro mwiva sugema viso? tuvata mwisa tiqata, Enta huari vu vitini tuvi viro 1 kirokuqa hisaro mwira nriqa viva taiga virave, tura. ⁵³ Mwitaa tuvaro mwira qova ntapihi sovaro huari vu mwiqaraqaa Iesusiva mwira tiva mwiro tiqaro, I mwaaquvano soma varianarove, tiro. Mwitaa turara tiro, mwi vaitivavata mwira nravunaasavata Iesusirara quqaa mwivave turama.

⁵⁴ Iesusiva Iutiatairo nrima Karirini variqaro mwi saiqara varova tauraa varova kuaiga vahuraqa mwiva viro taaraqaa hura.

5

Iesusiva mwaaaraqaa vaiti mwo saahaqama sora

¹ Mwiraqaatairo Iutaavano omwata nro entava mwo nri ntovaro Iesusiva Ierusaremini viro.

² Ierusaremini vasaavura geti mwo sipisipi geti vahura. Mwira tataaqa nramari nruka mwira nrutu Vetasaitaave tuva vahura. Nramari tosasataa haraara nraavu sauguru vahuvata ³ haraara mwiqi nriqa vusa airinti varura. Vu qipa vusave, suqu uaqama vusave, suqu saugu tapara vusave, mwisa varigata nramarivano qasaa hianira mwira vesa varura. ⁴ [Kuaa enta kuaa enta naavuniaava mwovano uto nramari qasaa huvaro mwisaqitairo mwovano nraane nramariqi vuvaro mwira nara mwavantave nriqa vuva sugema vura.]

⁵ So mwisa nramari qasaa hianira vesa varuvaro vaiti mwovano airi ihi 38 ihia nriqa vuvaro varuvavata mwiqi variro. ⁶ Varuvaro Iesusiva mwira taqero ntapihi sovaro mwi vaitiva airi ihi nriqa vuvaro varura mwira sapara hiro tiqaro, I nriqa vuariva taiga vuarive tira, e mwirara gamwaterave hiaro? tiro.

⁷ Mwitaa tuvaro nriqa vu vaitiva tiqaro, Nrora, nramarivano qasaa hisaro mwovano ni saahaqamaqiro uto nramariqi saariva sia varisana ne nraante virera huqata mwosa nraante vuavo. Mwitaamaqi vi variqana varuqo, tiro.

⁸ Nriqa vu vaitiva mwitaa tuvaro Iesusiva mwira tiva mwiro tiqaro, Tivira ena taarivata tu varera nruaane, tuvaro qamwanrama mwira mwavantavano sugema vuvaro ⁹ mwi vaitiva tiviro nai taarivata tu varero so nruora. Mwi entara mwaaraqaa mwitaama sora.

¹⁰ Mwaaraqaa mwitaama sorara tita, mwira saara Iutaa vaiti nroranravuvano vaiti sugema vura mwira irora hita tiqata, Mate mwaaraqaaave. Ena taari tu vare vinarara tiri mwaara quavano qao tirave, tita.

¹¹ Tuvoro mwi vaitiva tiqaro, Qaqao, vaiti mwovano ni sugema saiva niara ena taari tu varera nruaane tisanama ne mwitaa huqo, tiro.

¹² Tuvata Iutaa vaiti nroranravuvano tiqata, Ta vaitivave iara tivira ena taari tu varera nruaane tiso? ¹³ tuvaro mwira mwavantavano sugema vu vaitiva sia mwira nrutu ntapihura. Mwini nraase qora airivano varuvoro Iesusiva qamwanrama vi vuvaro mwi vaitiva sia Iesusira nrutu ntapihura.

¹⁴ Mwira nrutu sia ntapihiraitiro varuvoro Iesusiva naatiara variqaro taqovoro mwi vaitiva nraavu nrora Kotira nraavuqi varuvoro Iesusiva mwira tiva mwiro tiqaro, So taqaane, i mwavantavano sugema viso. Mwo inraisavano mwira nraataraariva i ru saaso tira, siana qaiqaa uaqi hi saigara utuqira vuane, tiro.

¹⁵ Mwitaa tuvaro mwi vaitiva mwigitairo veva ntero uro Iutaa vaiti nroranravu tiva niro tiqaro, Mwira nrutu Iesusiva mwivama ni mwavanta sugema saiso, tiro. ¹⁶ Tuvata mwisa riovaro Iesusiva mwaaraqaa mwira sugema sorara tita, mwisa mwira saara mwi entaraqaataita Iesusira qoragama mwate varura.

¹⁷ Mwitaa huvaro Iesusiva mwisa tiva niro tiqaro, Ni qova esaa enta saiqi vare varisanama nevata saiqi vare varuqo, tiro.

¹⁸ Tuvata mwi quara saara Iutaa vaiti nroranravuvano mwoqama seta Iesusira ru sarerata uti varita tiqata, Tauraa Iesusiva te mwaara entara tuna quara nteqa saiso. Mwira naatiara mwiva Kotirara ni qorave tiso. Mwiva qumina vaitivano variqaro mwiva Kotira votima sero Kotisantiriro kuaaqaa varireraro uti variso, tita.

Ni qova varai saiqarama nevata varauqo tura

¹⁹ Iutaa vaitinravuvano mwitaa tuvaro Iesusiva mwisa tiva niro tiqaro, Ne quqaa qua tianira riaate. Ne mwira mwaaguvano variqana siana nena nraato tusena mwi inraisara varaanirave. Ni qova saiqi varaisana ne taqaura mwi saiqaraqaima vare varuqo. Ni qova mwitaa mwitaa isana ne mwira mwaaguvanovata mwitaa mwitaa hi varuqo. ²⁰ Ni qora mwutususavano ni nai mwaaguara vaisarora tiro, mwiva nai vare vari saiqara esaa saiqi ni tiva miso. Naatiara ni qova ni tiva miraqe ne mwaa saiqara nraatara saani saiqarama varaanirave. Ne mwi saiqara mwi saiqara varaarita né mwira taqetama mwoqama seta nriharama vivarave.

²¹ Ni qova qutu vuasa qaiqaa vara tivumase varivave. Ni qova mwitaa hintema sena ne mwira mwaaguvanovata variqana ni mwutusa vahiani nraase qorasa qaqi vara tivuma saarita mwisa qaqi variqita vivarave. ²² Ni qova nai siana nraase qora ko tianarove. Mwiva mwi saiqara ni mitaisana ne mwira mwaaguvano variqana so ko tianirave. ²³ Mwiragaataita nraase qoravano ni qora nrutu tuaaheraantema seta mwisa ni mwira mwaagu nrutuvata tuaaherevarave. Mwovano sia ni mwira mwaagu nrutu tuaaheraariva siana ni qova ni titaira nrutuvata tuaaheraanarove.

²⁴ Ne quqaa qua tianira riaate. Mwovano ni qua riero quqama Kotiva mwira titaivave tiariva, mwivama esaa enta esaa enta qaqi variqiro vuanarove. Mwi vaitiva siana qua varaanarove. Mwiva mwaa entara sia esaara qutu viraitiro, mwiva esaa enta qaqi variqiro vuarivama variso.

²⁵ Ne quqaa qua tianira riaate. Mwo enta nriariva qaumaqa iso. Mwi entaraqaa qutu virera utisa, mwisa Kotira mwaaqu ni qua rievavave. Ni qua riesa soma qaqi variqita vivarave. ²⁶ Qaqi variqita qua osarava ni qoraqi vaisaro ni qova nai mwaaqu ni nroraqama saisarora mwiraqi vahintema sero qaqi variqita qua osarava niqivata vahiso. ²⁷ Ni mwatani mwatatai nraaqiarara tiro, ni qova ni nroraqama saisana ne mwatani vari nraase qorasa so ko tianirave. ²⁸ Né sia ne qua tianirara nriharama vuata. Mwo enta nri ntairave ne mwisa nraaraarita mwataqi quntama te nraase qorasa ni qua rieta, ²⁹ mwisa quntama teraqitaita tivivarave. Hini hisa suqe saiqva varesa tivita qaqi variqita vivarave. Hini hisa uaqva hi saiqara utisa tivita nrora quama varevarave.

Vaiti mwo husavata Iesusira osarara tura

³⁰ Ne variqana siama nena nraato tusena mwo inraisa varaanirave. Kotiva tiva mi varisana mwira qua rieganama ne nraase qora so ko tianirave. Siama ne nena mwutusa nti saiqara vare varuqo. Ne ni qora mwutusa nti saiqarama vare varuqo. Mwitaamaqi vi varuvava tina, ne nraase qora qua ntipihi sena ko tianirave.

³¹ Ne nenavano nena osarara tiarira mwovano ni quara sia quqaa quave tiasorave. ³² So mwovano variqaro ni osarara tiva ni variso. Ne ntipihi saugaro mwiva niara tiva ni quava quqaa quama vaiso. ³³ Né tauraa vaiti mwonravu titovata mwisa uto Ionira sapara huvoro Ioniva ni osarara ntipihi mwisa tiva nurave. ³⁴ Vaitivano ni osarara tianira sia ne mwirara nroraqama sena riauqo. Kotiva ini vitaarive tina, ne mwi quara tiva nuqo. ³⁵ Ioniva variqaro ova votima sero ite varuvata né variqata mwiva itorara sia muhaama seta qamwata mwatorave.

³⁶ So ni osarara tiariva Ionira nraataaravama variso. Ni saiqavano niara tiva ni variso. Ni qova saiqva ni mitaira ne mwi saiqara vare varuva, so mwi saiqava ni osarara tiva ni variso. Nraase qoravano ni saiqva taqeqatama soma ni qova ni titairave tivarave. ³⁷ Ni qova ni titaiva, mwivama ni osarara tiva ni variso. Né sia mwira qua rieta, sia mwira viri taqaarave. ³⁸ Mwiva ni titaiana tuvugata né sia niara quqaa mwivave tiavo. Né sia mwitaa tiavarora tiro, Kotira quavano sia ini vu nraatoqi vaisata variavo.

³⁹ Né tiqata, Saige Kotira vukuqi aitutuma seta taqeta esaa enta esaa enta qaqi variqita vuare, ti variarave. So mwi vukuraqi vahi quava ni osarara ti varisata ⁴⁰ né sia ne varunani nriavana ne qaqi variqi vi inraisara ini nurave. Ne hunani nriataara vaisata né sia nriarave.

⁴¹ Siama ne vaitiqaatana nrora nrtutu varaanirave. ⁴² Ne ini ntipihi saugo. Ini mwutusavano sia Kotirara vaisata variavo. ⁴³ Kotiva ni qova ni titaiana ne nena qora nrtutu varena nruqatavata né sia ni qamwata seta vitaarave. Mwovano nai riemwa sero nai nrtutu tuaaherareraro hirata né qamwanrama seta mwira qamwata mwatevarave. ⁴⁴ Né nai nrtutu nai nrtutu tuaaherarerara nroraqama seta riegata sia Kotiva ini nrtutu tuaaheraanirara nroraqama seta riaavo. Mwitaa hi variqata né nataama setave niara quqaa mwivave tivarave?

⁴⁵ Naatiara nena qora vuqaa variqana sia nevano iniqaa qua vataanirave. Mosesiva nita haivaqava, mwivama iniqaa qua vataanarove. Né Mosesira ara mwiva tiri saahaqa hianarove tiarave. So naatiara mwivama iniqaa qua vataanarove. Mosesiva qara ntuva to quava niara tisata né mwira quara sia quqaa quave tiarave.

⁴⁶ Né Mosesiva tu quarara quqaa quave tiatirio, né ni quaravata quqaa quavema tiatiri. ⁴⁷ Né mwira quara sia quqaa quave tiqata nataama setave

né ni quaravata quqaa quave tivarave? Né sia so mwitaa hivarave, tiro. (Iesusiva mwi quara Iutaa nrora vaitinravu tiva nura.)

6

Iesusiva sara airiqama sero tusama nura

(Matiu 14:13-21; Maaki 6:30-44; Ruku 9:10-17)

¹ Mwiraqaatairo Iesusiva uro Kariri nruka, mwira nrutu mwo Taipiriaasi nruka vara mwaini sero votuqi nruka mwiraqaa qarero hini tosani uro variro. ² Uro varuvata nraase qora airivano taqovaro Iesusiva nriqa vusa suqema sovata tita, mwisa Iesusira vataqita vita. ³ Mwira vataqita vuvaro Iesusiva nai nraaqiaranravu sapata uro taaqisataa mwatasaa viro varura. ⁴ Mwi entara Iutaavano vesahu nato sarara omwata nro entava qaumaqa hura.

⁵ Iesusiva nai nraaqiaranravu sapata mwatasaa viro varigaro taqovata nraase qora airivano mwira vataqita nrusa nrima uairama vita varuvaro Iesusiva Piripira sapara hiro tiqaro, Te taitaitave sara soqaama seta mwi nraase qorasa niarata nrevarave? tiro. ⁶ Iesusiva nai mwisa sara niani osarara vaasa ntapihiro mwiva Piripira qaqi mwataara hiqaro mwitaa tura.

⁷ Tuvaro Piripiva tiqaro, Qaqao, sarara 200 kinaa nrora munima seta vara ntuaqama niarata mwisa pataqa pataqagai varevarave. Airi nraase qoravano variavo, tiro.

⁸ Tuvaro Iesusira nraaqiara mwovano Enturuva Saimoni Pitaara qatavano tiqaro, ⁹ Naako mwovano mwaini variso. Mwiva mpereti hini sauquruvata tavusa taaratanavataqai vataiva vaiso. Nataama serove mwiqatanava airi nraase qoraqi so vahianarove? tiro.

¹⁰ Mwitaa tuvaro Iesusiva nai nraaqiaranravu tiva niro tiqaro, Nraase qorara tivata mwatasaa vita variate, tiro. Iesusiva mwitaa tuvaro mwini mwusauvano vahuvata vaiti 5,000 nravu airivano mwatasaa vita varuvata (nraasevata airivano mwatasaa vita varura.) ¹¹ Mwisa mwatasaa vita varuvaro Iesusiva mpereti mwira vara sero Kotirara suqeve tiva sero, nraase qora mwatasaa vita varusa tusama sero niro. Tusama niro tavusavata vara sero kuaa qarama sero mwatasaa vita varusa tusama sero nuvata mwisa vara seta so nrora. Mwisa niari nraataa huntema mwi sarara so nrora.

¹² Mwisa so nrovaro Iesusiva nai nraaqiaranravuara tiqaro, Mwisa nreqata viti vaatise sarara tuntu ntuaantua hiате. Saravano qumina viro raupiri hiasorave, tuvata ¹³ mwira nraaqiaranravuvano nraase qoravano sauquru mpereti nreta viti vaati sora tuntu seta ntutantutoraqi 12 nravu kuraama sora.

¹⁴ Kuraama sovata so nraase qora mwini varusa taqovaro Iesusiva nrora saiqaa vara sovata mwisa tiqata, Poropeti vaitivano mwatani tuvuariva so quqaa mwaa mwi vaitivave, tita. ¹⁵ Mwitaa ti varuvaro Iesusiva ntapihi sovata nraase qoravano sai mwira nroraqama saararo tiri vuniaa vaiti nroravano variarive tiqata Iesusira tu vararera uti varuvaro Iesusiva mwira ntapihi sero mwisa mwitaa hivorave tiva sero, qaqira sero uto ntantero taaqigaa nariaraa uro varireraro vura.

Iesusiva nruka turuqaa suqu ntavaqiro vura

(Matiu 14:22-33; Maaki 6:45-52)

¹⁶ Iesusiva taaqigaa uro varuvaro enta hireraro huvata mwira nraaqiaranravuvano nruka tosasata uto nteta ¹⁷ votuqi mwaari nteta nrima ntanteta Kapieniaaminiara vita. Mwisa mwiniara vuvaro anoma entama vuvaro

¹⁸ Iesusiva sia tuvuvata mwisa nrukaqaa vi varuvaro toqa vauruvu-
vano nroraqama sero tiqaroma nruka nramari raaqutaqiro nri varura.

¹⁹ Mwitaahuvata mwira nraaqiaranravuvano nrukaqaa satariqo votu
raaqutaqita vigata 5 kiromitave iso 6 kiromitave mwisa vara seta nruka
vutaqaa nrita taqovaro Iesusiva nramari turuqaa suqu ntavaqiro viqaroma
votu qaumato nruvata mwisa mwira nraatu mwoqama seta aatu hi varura.

²⁰ Aatu hi varuvaro Iesusiva mwisa tiva niro tiqaro, Sia aatu hi ate. Nema
nruqo, tiro. ²¹ Tuvata mwisa so votuqi mwaari ntaane tuvaro mwaari
ntovaro votuvano gamwanrama mwisa virera hunani uro ntora.

Nraase qoravano Iesusirara huua hi varura

²² Mwira qararaara nraase qora nruka tosa hini varusa taqovaro votu
kuaigavano vahuvata mwisa ntapihi sovaro Iesusiva sia mwitairo nai
nraaqiaranravu sapata mwaari ntero vuvata mwisa niariaraa votuqi
mwaari nteta vura.

²³ Mwisa mwitaama rieta varuvata Taipiriaasitaita votu mwonravuvano
nrima tauraa Iesusiva sarara sugeve tiva sero, tusama nuvata nraase
qoravano nro mwatara qaumato nruvata ²⁴ mwo nraase qora mwini varusa
taqovaro Iesusiva sia mwini varuvata mwira nraaqiaranravuvata sia
varuvata mwisa votuqi mwaari nteta Kapeniaani Iesusirara huua hirerata
vura.

Iesusiva naavuniaa mperetiara tura

²⁵ Mwisa Iesusira huua hirerata vusa uro nruka tosa hini Iesusira huaama
seta mwirara tiqata, Mwaari ti variara vaitio, taireve e mwaini nrira hiaro?
tuvaro ²⁶ Iesusiva tiqaro, Ne quqaa qua tianira riaate. Né mpereti airiqama
nraarara riegatama niara huua hi variavo. Né sia ni saiqqa osara ntapihi
paahimase riegatavauma niara huua hi variavo. ²⁷ So siama qaqi sara
tapitaani sarara vararerata saiqqa varaate. Né mwitaahira qaqira seta esaa
enta qaqi variqi vuani sarara vararerata saiqqa varaate. Mwi sarara ne
mwatani mwatatai nraaqiarava variqana soma ne ini nianirave. Kotiva
ni qova mwivama ni nroraqama saisana ne so mwitaahianirave, tiro.

²⁸ Iesusiva mwitaahuvata mwisa mwira sapara hita tiqata, Te Kotira saiqqa
vararerata hiqata, nataa nataave hianarave? tita. ²⁹ Tuvaro Iesusiva tiva niro
tiqaro, Kotiva iniara mwaa saiqqara varaate ti variso. Mwiva titai vaitirara
né quqaa mwivave tiate tiso, tiro.

³⁰ Mwitaahuvata mwisa tiqata, So nara saiqqave tiri tiva timwiraqe te
mwira taqeta i osarara quqaaave tianarave? ³¹ E nara saiqqa nrora saiqqave
varenarave? Tiri haivaqasa haaru qumina mwatani variqata naavuniaa
sara nrora. Mwisa *manaa* nrora. Mwirara Kotira vukuqi gara ntuva
tova mwitaama tiro: Mwiva naavuniaa sara nurave, turave, tita.

³² Mwisa mwitaahuvata Iesusiva tiqaro, Ne quqaa qua tianira riaate.
Haaru mwi entara Mosesiva ini haivaqasa sara niqaro sia quqaa naavuniaa
sara mwisa nurave. Ni qova, mwivama naavuniaa sara quqaa sara
niarivama variso. ³³ Mwatani variasa mwisa qaqi variqi vuata tiro,
naavutairo uto vari vaitiva, mwi vaitivama Kotira saravano variso, tiro.

³⁴ Mwitaahuvata mwisa tiqata, Nrora, so e mwi sarara tiri timwigira
vuane, tita. ³⁵ Tuvaro Iesusiva tiva niro tiqaro, So ne qaqi variqi vi
sarava mwaa mwivama varuqo. Ne hunani nriariva siama sara nraataa
hianarove. Niara quqaa mwivave tiariva siama mwira nramari nraata
hianarove.

³⁶ Ne vaasa iniara tiqana, Né ni taqetavata sia niara quqaa mwivave tiavo,
turave. ³⁷ Ni qova ni miari nraase qorasa, mwisa ne hiarinani nrivarave.

Mwisa ne hiarinani nrivagena ne siama mwisa qoririma nataanirave. ³⁸ Ne naavusaina sia nena vu nraato tusena saiga vararera tuvuvave. Ne ni titaira mwutusa vahi saigara vararera tuvuvave. Ni titaira Kotira mwutusa vahiva mwitaamama vahirove. ³⁹ Mwiva nraase gora ni misa ne mwoku raupirima saasorave. Ne mwisaqaa ntaqaihiqi vina esaara entaqaa vara tivuma saarita qaqi variqita vivarave. ⁴⁰ Qaiqaa ni titaira mwira mwutusa vahiva mwitaamama vahirove. Esaa nraase gora ni mwira mwaaqu taqeta quqaa mwivave tisa, mwisama qaqi variqita vivarave. Ne esaara entaqaa varigana mwisa tivuma saarita qaqi variqi vivarave. So ni qora mwutusa vahiva mwitaamama vahiso, tiro.

⁴¹ Iesusiva tiqaro, Ne naavutaina tuvu mperetivave, turara tita, Iutaa nroranravuvano nrutu nrauru tita tiqata, ⁴² Qaqao, mwi vaitiva Iesusiva Sosepira mwaaquvanove. Mwira nrosa qosa te taqaunarave. So naraqamave mwiva ne naavutaina tuvuvave tiso? tita.

⁴³ Mwisa mwitaa ti varuvaro Iesusiva tiqaro, Eqaate. Né sia nrutu nrauru tiate. ⁴⁴ Ni qova ni titaiva sia vaiti mwo vitairera, mwi vaitiva siama ne hunani so nrinarove. Ni qova vitaarisa mwisaqaima ne hunani nrivarave. So mwisa nrivage ne esaara entaqaa mwisa vara tivuma saarita mwisa qaqi variqi vivarave. ⁴⁵ Haaru poropeti vaiti mwovano mwitaama qara ntuva tero tiqaro,

Naatiara Kotiva esaa nraase gora tiva ni varirata mwira saiga ntapihivarave, turave. (Ais 54:13)

Ni qova saiga tiva nirata mwisa ni qora qua riesa mwisaqaima ne hunani nrivarave. ⁴⁶ So sia vaiti mwovano ni qora taqaiva varirave. Ne Kotiva hinataina tuvuva, neqai mwira taqaurave.

⁴⁷ Ne quqaama tuqo. Niara quqaa mwivave tiariva qaqi variqiro vuanarove. ⁴⁸ Nraase qoravano sara nreta qaqi variqi viva ne mwaa mwi saravama varuqo. ⁴⁹ Ini haivaqasa qumina mwatani varigata naavuniaa sara, mwira nrutu *manaa* mwi sarara nravaqi vigaatavata uro qutu vurave. ⁵⁰ So mwo saravano naavutairo tuvirave. Mwi sarara nraariva siama esaara qutu vuanarove. ⁵¹ So ne qaqi variqi vi sarava mwiva naavutaina tuvuvave. Mwovano mwi sarara nraariva, mwiva qaqi variqiro vuanarove. Ne sara mwirera nena mativata nena mwavantavata mwianirave. Mwatani variasa qaqi variqita vuata tina, ne mwira nianirave, tiro.

⁵² Tuvaro Iesusiva mwitaa tuvata Iutaa vaiti nroranravuvano niariqai irora hita tiqata, Mwiva nataama serove nai mwavanta tiri timwiraqe nraanarave? tita.

⁵³ Iesusiva mwisa tiva niro tiqaro, Quqaama ne tuqo. Ne mwatani mwatatai nraaqiarava ne variarita né sia ni mativata nraarevata nraivera, né siama qaqi variqita vivarave. ⁵⁴ Ni mativata ni nraarevata nraariva qaqi variqiro viraqe ne esaara entaqaa mwira qaqi vara tivuma saanirave. ⁵⁵ Ni mativano sara tanarama vaisaro ni nraarevanovata nramari tanarama vaiso. ⁵⁶ Ni mativata ni nraarevata nraariva niqi variraqena ne mwiraqima varianirave.

⁵⁷ Ni qova mwiva qaqi variqiro viva variqaro mwiva ni titaisanama ne mwiva qaqi variqiro viragaataina nevata mwaini uto qaqi variqina vuqo. So mwira votima sero vaiti mwovano ni nraavaqi vuariva niqaatairo qaqi variqiro vuanarove. ⁵⁸ So ne mwi sarava naavutaina tuvuvave. Ini haivaqasa haaru mwo sara manaa nraavaqita vita uro qutu vurave. So sia ne mwi sarara voti huvama varuqo. Ni sara mwaa nraariva esaa enta qaqi variqiro vuanarove, tiro.

⁵⁹ Iesusiva Kapeniaani mwaara nraavuqi variqaro mwi quara tura.

Iesusira vataqita vusa mwonravuvano mwira qaqira seta vura

⁶⁰ Iesusiva mwi quara tuvata mwira vataqita nruosa mwonravu variqata mwi quara rieta qaqao tita, Mwi quava muaara ntai quarama tiso, Tavave mwi quara so ntapihianarove? Sia te so ntapihianarave, tita.

⁶¹ Mwisa tirema seta mwitaa ti varuvaro Iesusiva ntapihuvata mwira vataqita nruo vaitisa mwirara nrutu nrauru tiqata mwira irora hi varuvaro Iesusiva tiqaro, Mwi quara saarave niara nrutu nrauru ti variavo? ⁶² So ne mwatani mwatatai nraaqiarava varuqo. Ne naatiara uto ntantena nena variavara qogaraanani uro variarita né mwira taqeta nataave hivarave? ⁶³ Vaitivano mwaraqura vataava varisaro mwira mwaraquravano mwiraqi varisarora tiro, mwi vaitiva qaqi varirave. Mwira mwaraquravano mwi vaitiraqi sia varirera, sia mwira mwavantavano mwira so saahaqa hiraro mwiva qaqi variqiro vuanarove. So ne vaasa turara sia ne qumina mwavantara turave. Ne qaqi variqi vi mwaraqura osarara ini tiva nurave. ⁶⁴ Ne qaqi variqi vi osarara ini tiva nurave. Ne mwitaa tuqata né hininravuvano sia ni quara quqaa quave tiavo, tiro.

Iesusiva haaru hogaro entaraqaatairo vaiti mwonravuvano naatiara mwirara sia quqaa mwivave tisa ntapihi sora. Vaiti mwovano mwira nrvutaasa uro tiva niro mwira qovarama saaniravata ntapihi sora.

⁶⁵ Mwisa mwitaa mwitaa hirara ntapihi sero Iesusiva mwisa tiva niro tiqaro, Mwirara rieganama ne vuni tiqana, Sia ni qova sove tirera, sia mwovano ne hianirani so nrianarove, turave, tiro.

⁶⁶ Mwitaa tuvata mwira saara Iesusira vataqita vusa airivano mwira esaara qaqira seta nrima ntanteta vura.

⁶⁷ Mwitaa huvaro Iesusiva nai nraaqiara 12 nrvu sapara hiro tiqaro, Névata mo? Né ni qaqira seta vineratave hiavo? tiro. ⁶⁸ Tuvaro Saimoni Pitaava mwira tiva mwiro tiqaro, Nrora, tirennavu ta vaitiva hinanive vuanarave? Ema qaqi variqi qua osarara tiaravama variaro. ⁶⁹ Tirennavu iara quqaa mwivave tiqatama ntapihise taqaurara eqaima Kotira sotata vaitivano Kotiva hinataira tuvuaravave, tiro.

⁷⁰ Mwitaa tuvaro Iesusiva mwisa tiva niro tiqaro, So ne ini 12 nrvu nraarama sena vitaurave. Ne 12 nrvu ini nraarama tauraqitairovata mwokuvano uqa hi vaanavama variso, tiro. ⁷¹ Iesusira nraaqiara 12 nrvuqitairo Iutaasiva Saimoni Isikeriotira mwaaquvano naatiara Iesusira qovarama saanirara riegaro Iesusiva mwitaa tura.

7

Iesusira qatanravuara tura

¹ Mwiraqaataita Iutaa vaiti nroranravuvano mwira ru sarerata uti varuvarora tiro, Iesusiva sia Iutiaani nruaraitiro, qaqira sero Kariri mwatani variqaro mwiniqai nrue varura.

² Mwi entara omwata nro entava mwo qaumatoga hura. Mwira nrutu Haraara Nraavu omwata. (Haaru mwisa haivaqasa qumina mwatani variqata haraara nraavuqi varu entarara riegatama omwata nrora.) Omwata nro entava qaumato vahuvata ³ Iesusira qatanravuvano tiqata, So mwaini sera vetara Iutiaani virata i vataqita visa i saiqqa taqaate. ⁴ Nai nrutu viriniqa hiarive tiro, mwovano sia nai saiqqa uqeta sasa hirave. E quqaa mwi saiqara mwi saiqara vare varirera, so uro ntera qoqaa variqara mwi saiqara mwi saiqara varairata esaa mwisa i taqaate, tita. ⁵ Mwira qatanravuvano Iesusirara sia quqaa mwivave tiqatara tita, mwisa mwitaa turama.

⁶ Mwita tuvaro Iesusiva tiva niro tiqaro, Ne mwini vuari entava siama nri ntaiso. Né soma api enta vivarave. ⁷ Mwatani variasa sia ini nravutaaga hivarave. Ne mwisa saiqara uaga hi saiqarave tiva segana ntapihi tiva nurave. Mwitaama vutu segana tiva nuqata mwisa ni nravutaaga hi variavo. ⁸ Nénravu omwata nrarera hianani vuare. Ne mwini vuari entava sia nri ntaisa ne mate sia vuanirave, tiro.

⁹⁻¹⁰ Iesusiva mwita tiva sero Karirini varuvata mwira qatanravuvano omwata nrarera hunani vuaro Iesusiva vari sero naatiara mwivavata mwini viro. Mwiva sia qoqaa viraitiro, uqeta sero mwini vura. ¹¹ Vuvata Ierusalemni omwata nroraqi Iutaa vaiti nroranravuvano mwirara aitutu hi varita tiqata, Mwiva tanave variso? ti varura. ¹² Mwita tiva varuvata qaqi nraase qoravano Iesusirara tirema seta mwo qua mwo qua tura. Hini husa mwirara tiqata, Mwiva suqe vaitivanove, tuvata hini husa mwirara tiqata, Qaqao, mwiva nraase qora api aaraqai tiva ni vari vaitivave, tita. ¹³ Iutaa nrora vaitinravu nraatu aatu hiqata mwisa sia Iesusirara vutu seta mwita tura. Mwisaitairo sia mwovano vutu serovata tura.

¹⁴ Mwitaamaqita vuvaro omwata nro entava hininravu taiqa vuvaro Iesusiva nrintero Kotira nraavu nroraqi variqaro Kotira qua nraase qora tiva ni varura. ¹⁵ Mwiva tiva ni varuvata Iutaa vaiti nroranravuvano mwira qua rieta nriharoma vita tiqata, Qike, mwiva sia tirivata sikuru tivave. Nataama serove mwiva mwo qua mwo qua osara so ti variso? tita.

¹⁶ Mwita tuvaro Iesusiva tiqaro, Siama ne nena qua mwasaasa ini tiva ni varugo. Kotiva ni titaiana ne mwira qua mwasaasama ini tiva ni varugo, tiro. ¹⁷ Iesusiva mwita tiva sero mwiva tiqaro, Kotira mwutusa vahirara rieqaro mwira saiqara varaataa hiariva, mwivama ni qua tusama sero tiqaro, Mwiva Kotira quama ti variso, mwiva nai quama ti variso, tianarove.

¹⁸ Mwovano nai vu nraato tusero qua ti vari vaitiva, mwi vaitiva nai nrutaraqai rieqaro virave. Mwovano nai titaira nrutaraqai riemwaqiro vi vari vaitiva, mwi vaitiva quqaa quaqaima tisaroma siama unra qua mwiraqi vahirove. ¹⁹ So quqaa ini haivaqava Mosesiva qua mwaara Kotiva mwita mwita hiate fu quara ini tiva nurave? So sia iniqitairo mwovano mwi quara vataqiro vi virave. Mwita hiqata né naraqamave ni ru sarerata uti variavo? tiro.

²⁰ Iesusiva mwita tuvata mwini uairama vita varusa tiqata, E ueraqama vuaro. Tavave i ru sarera uti variso? tita.

²¹ Tuvaro Iesusiva tiqaro, Ne (mwaara entaqaa) nrora saiqara kuaqia va-rauqata né mwirara nriharoma vuavaroma sia ini sasa iso. ²² Ini haivaqava Mosesiva mwaara qua tiqaroma qoraisi nraaqiarara mwira mwavanta toqa saate. (Qoraisi nraaqiara mwatataivata 8 enta nritarairata mwira mwavanta toqa saate,) turave. So sia Mosesiva tauraqama mwi quara turave. Mosesira haivaqasavara mwi quara vuniqamase turave. So né mwi quara rieqatama 8 enta nritarairata qaqi entaqave, mwaara entaqave, né qoraisi nraaqiara mwavanta toqa nate variarave. ²³ Mosesira qua nteqa saarorave tiqatama né mwaara entaqaa qoraisi nraaqiara mwavanta toqa nate variarave. Mwita hi variavana ne mwaara entaqaa nrira vi vaitira sugema sauqata né naraqamave mwira saara ni irora hi variavo? ²⁴ Né niqaa qua vatarera hiqatama, hauri gumina néta vu nraato tiraqa niqaa qua vatevorave. Né quqaa vahiani inraisaraqara niqaa qua vataate, tiro.

Iesusiva mwiva Kotiva titai vaitivave? tura

²⁵ Iesusiva mwita tiva varuvata Ierusalemniqinaasa mwonravuvano Iesusirara mwo vaitinravu sapara hita tiqata, Mwi vaitirave mwisa ru sarerata uti variavo? ²⁶ So tagaate. Mwiva qoqaa variqaro qua ti varisata mwisa

sia nrima mwiragaa mwirara mwo qua tiavo. Quqaave mwisa Iesusirara mwiva mesaiaa vaitive tiavo? ²⁷ So te Iesusiva mwitairo nri osarara ntapihuro. Mwiva mwi mwatusaragitairo nriwive. Mesaiaa vaitivano qovarama viraro siana tirigitairo mwokuvano mwiva mwitairo nriani osarara so ntapihianarove, tita.

²⁸ Mwitaa ti varuvaro Iesusiva Kotira nraavu nroraqi mwasaasa tiva ni variqaro aasara ntava sero mwisa saparama natero tiqaro, Quqaa né ni ntapihi saarave? Quqaa né ne mwitaina nru osarara ntapihi saarave? So sia ne nena vu nraato tusena nruvave. Ni titaiva mwiva quqaa saiqva vare varivave. Né sia mwira ntapihiarave. ²⁹ Ne mwira ntapihurave. Mwivama ni titaiana ne mwiva hinataina tuvuvave, tiro.

³⁰ Iesusiva mwitaa tuvata mwi quara saara mwira ntavaagavu saare tiqatavata sia so mwira tu varora. Iesusira ruse entava sia nri ntovatara tita, mwisa sia so mwira tu varora.

³¹ Mwitaa huvata nraase qora mwisaqitaita airivano Iesusirara quqaa mwivave tita. Mwisa mwataama tita, Iesusiva nrora saiqva vare variso. Mesaiaa vaitivano nriariva mwiva Iesusira saiqva sove nraatara saanarove? Sia so mwira nraatara saanarove. Iesusiva mwivama mesaiaa vaitivano variso, tita.

Parisi vaitinravuvano niari porisi vitora

³² Parisi vaitinravuvano variqata riovata nraase qoravano uairama vita Iesusirara tirema seta mwitaa ti varuvata Parisi vaitinravuvata, Kotira saiqva vara mwate varu vaitisa mwisa nronranravuvata, mwisa niari porisi titovata mwisa Iesusira ntavaagavu seta karavuqi sarerata vita.

³³ Mwisa vuvaro Iesusiva tiqaro, Ne ini sapata pataqa vari senama mwata mwaagaataina ni titaiva hinani virerave. ³⁴ Mwi entara né ni huaama saare tira, siana so ni huaama sevarave. Né sia soqamase virera hinani ne virerave, tiro.

³⁵ Mwitaa tuvata Iutaa vaiti nronranravuvano nai sapara hi nai sapara hita tigata, Mwiva taini virageve te sia so mwira huaama saanarave? Mwiva Kiriki mwatusa mwonravuqi Iutaa mwonravuvano variananive uro qua tiva nireraro virerarove? ³⁶ Mwiva nariara tiqaro, Né ni huaama saare tira siana so ni huaama sevarave, tiso. Né sia soqamase virera hinani ne virerave, tiso. Mwiva mwitaa tiqaro nara quave tiso? Siana te mwira qua ntapihita huro, tita.

Ini mwutusaqitairo qaqi variqi vuani nramariva ntavaqiro vuanarove tura

³⁷ Mwitaa tuvaro omwata nro entava esaara enta nri ntora. Mwi entarara nrora entave tura. Esaara enta nri ntovaro Iesusiva mwi entaraqaa tiviro paatiro tiqaro, Nramari nraataa hiariva ne hunatairo soma nrima nraanarove. ³⁸ Kotira vukuqi qara ntuva to quava niara mwitaama tiro: Niara quqaa mwivave tiariva variraro mwira mwutusaqitairo rumwu votima sero qaqi variqi vuani nramariva ntavaqiro vuanarove, turave, tiro. (Ais 44:3)

³⁹ Iesusiva tiviro variqaro mwi quaraqaa ntuva sero Kotira Mwaraqura nianirara tiro. Nraase qoravano Iesusirara quqaa mwivave tisa Kotira Mwaraqura varerara tura. Mwi entara Iesusiva sia qutu viro gaiqaa qaqi tiviro naavuni vurara tiro, sia Kotira Mwaraqura nu entava vahura.

Nraase qoravano niari tusama vura

⁴⁰ Iesusiva mwitaa tuvata nraase qora uairama vusa airivano tiqata, So quqaama Iesusiva poropetivano variso. Kotiva mwira saahaqa hi varisaro mwiva mwira qua ti variso, tita.

⁴¹ Tuvata mwonravuvano tiqata, Mwiva mesaiaavanove. Mwiva Kotiva titai vaitiva tiri saahaqa hiarivave, tita. Tuvata mwonravuvano qaqaao tita, Mesaiaavano siama Karirigitauro nrianarove. ⁴² Kotira vukuqi mesaiaa vaitiara gara ntuva tova mwitaama tiro:

Mesaiaavano Devitira kuaa osarama variraro Vetarahemi Devitiva varu mwatusaraqi mwira mwata taanarove, turave, tita. (Maika 5:2)

⁴³ Mwitaa tiqata nraase qora ntuvaaquama vita varusa hininravuvano Iesusirara qamwategata varuvata hininravuvano sia mwirara qamwategata varura. ⁴⁴ Hininravuvano Iesusira karavuqi sarerata uti varura. So mwi entara sia mwisaqitauro mwokuvano Iesusira tu varora.

Porisi vaitinravuvano qaqi uro ntanteta nrura

⁴⁵ Porisi vaitinravu vaasa titosa nrima ntanteta Kotira saiga vara mwate varusa mwisa nronranravuvata, Parisi vaitinravuvata, mwisa hunani uro ntovata mwisa tiqata, Qaqaao, né mwira vita varetata nriataara vaisata naraqamave qaqi nriavo? tuvata ⁴⁶ porisinravuvano tiqata, Te riauraro mwiva sia gumina vaitivano qua tintema sero qua ti variso, tita.

⁴⁷ Tuvata Parisi vaitinravuvano tiqata, So nevata mwira unra quara quqaa quave tita hiavo? ⁴⁸ Né ntapihitave hiavo? Tavave tiri nrora vaitinravuqitaurove, Parisi vaitinravuqitaurove, Iesusirara quqaa mwiva mesaiaa vaitivano variso tiso? Siama tirinravuqitauro mwovanovata mwitaa tiso.

⁴⁹ Qaqi gumina nraase qora uairama vita variata sia Mosesira qua mwaara so ntapihiri riaarara tiro, mwira saara Kotiva mwisa qoraqama nataanarove, tita.

⁵⁰ Parisi vaitinravuvano mwitaa tuvaro Parisi vaiti mwokuvano Nikotimaasiva mwiva entaqi Iesusira uro taqova, mwiva qaqaao tiro, ⁵¹ Te teta qua mwaara riegatama sia ko tiraitita, vaitiqaa gumina qua vataarorave. Te ko nraanteta tiataarave, tiro.

⁵² Mwitaa tuvata mwisa tiqata, E mo? E Kariritaira nriaravave? E Kotira vukuqi taqaane. E mwiqi taqairaro siama Kariritairo poropeti vaitivano govata hianarove, tita. ⁵³ [Mwitaa tiva seta niari nraavuni niari nraavuni vuvaro Iesusiva Oripa taqiqaa uro varura.

8

Api nruo nraaserara tura

¹⁻² Mwira qararaara toqa entaqi Iesusiva uro ntantero Kotira nraavu nroraqi vuvata nraase qora airivano uairama vita varuvaro Iesusiva mwatasaa viro variqaro qua tiva ni varura.

³ Tiva ni varuvata mwaara osara ti varu vaitisavata, Parisi vaitinravuvata, mwisa nraase mwo vita varetata nrura. Mwi nraaseva vaati vataava mwo qoraisivata nrue varuvata mwisa taqama seta mwira viteta Iesusiva hunani uro nraase qora vuqaa mwira sovaro tiviro varuvata mwisa Iesusirara tiqata, ⁴ Mwaara ti variarao, mwaara nraaseva vaati vataava mwo qoraisi vatama sero nrue varisata te mwira taqeta tu varetata nrura.

⁵ Mosesira mwaara qavano mwitaama tiro: Nraasevano mwitaa hirera, oriqotaita ntutuqu saivaro qutu vuarive, turave. So e mo? Nara quave mwirara tinarave? tita.

⁶ Iesusirara api qua tirage te mwiraqaa qua vataare tiqata mwisa mwitaa tuvaro Iesusiva sia qua tiraitiro, kakataama viro nai vukahiqo mwataqaa

qara nti varura. ⁷ Qara nti varuvata mwisa tivita variqata mwo qua mwo qua Iesusira sapara hi varuvaro Iesusiva mwaaviara viro mwisara tiqaro, Iniqitairo mwovano sia uaga hi saiqara utuariva, mwiva nraante ori vara sero mwira ntugutu saarive, tiro.

⁸ Iesusiva mwitaa tiva sero mwiva qaiqaa kakataama viro mwataqaa qara nti varuvata ⁹ mwisa mwi quara rieta kuaiga kuaigavano mwigitaita qaqira seta veva nteqata vura. Naapainravu nraante veva nteta vuni vuvata qaraaha vaitinravu mwisa naatiara veva nteta vita mwisa Iesusira mwini seta vuvaro Iesusiva nariaraa variro.

¹⁰ Iesusiva mwaaviara viro taqovaro mwi nraaseva vaasa tiviro varunani nariaraa varuvaro Iesusiva tiqaro, Mwisa tainive variavo? Siave mwovano iqaa qua vataariva variso? tuvaro nraase mwiva tiqaro, ¹¹ Nrora, sia mwovano mwitaa iso, tuvaro Iesusiva mwira tiva mwiro tiqaro, So nevata sia iqaa qua vatarerave. So ena vuane. Virava siana naatiara qaiqaavata uaga hi saiqara utuante, tiro. Turama.]

Iesusiva ne mwataniaa ovavanove tura

¹² Iesusiva qaiqaa nraase gora tiva niro tiqaro, Ne mwataniaa ovavano varuqo. Ni vataqiro nriariva siana rupi hiraqi nruaanarove. Mwiva ntuvaaahaniraga nrueqaro qaqi variqiro vuanarove, tiro. ¹³ Iesusiva mwita tuvata Parisi vaitinravuvano tiqata, So e enara variqara ena nrutu tuaahere varianarara tiro, i quavano qumina quama vaiso, tita.

¹⁴ Mwitaa tuvaro Iesusiva qaqao tiro, Ne variqana nena saiqara tiqana siana qumina qua tuqo. Ne nena mwitaina nru osarara ntapihi saurave. Ne nena vuani osarara ntapihi saurave. Mwitaa hurara tiro, ni qua quqaa quama vaiso. Ne mwitaina nru osararave, ne vuani osararave, né sia ntapihivarave. ¹⁵ Né ko tiqatama né vaiti vu nraato vahiraqa ko ti variarave. Mate ne sia vaiti mwo ko tiva sena mwiraqaa qua vatauqo. ¹⁶ Ne ko tiataa hiraqena soma ne ko avuqavuma sena tianirave. Ne ko tiqana siana nenaraa ko tianirave. Ne ko tiariro ni gova ni titaiva variqaro ni saahaqa hiraqe ne avuqavuma sena ko tianirave. ¹⁷ Ini mwaara qua qara ntuva tova mwitaama tiro: Vaiti taaratanavano qua tiqatama kuaa quaqai tivera, so mwitana quavano quqaa quama vahianarove, turave. ¹⁸ So ne nena quara quqaa quave tiariro ni titaiva ni gova, mwivavata ni quara quqaa quaqaima tianarove, tiro.

¹⁹ Iesusiva mwitaa tuvata mwisa tiqata, I gova tana varisarave ti variaro? tuvaro Iesusiva tiqaro, Né sia ni ntapihi saasara tita, né ni qoravata siana ntapihiaivo. Né ni ntapihi saatirio, né soma ni qoravata ntapihiatirio, tiro.

²⁰ Iesusiva Kotira nraavuqi munima se varuraqi variqaro mwi quara tiro. Tuvaro mwira ruse entava sia nri ntovarora tiro, sia mwovano mwira ntavaaqavuqi karavuqi sora.

Iesusiva nai qorara tura

²¹ Iesusiva qaiqaa tiva niro tiqaro, So ne vuarita né qumina niara huaamaqi vita uro néta qora saiga rirante qaqi qutu vivarave. Mwitaa hiqata ne vuanirani né siana so vivarave, tiro.

²² Mwitaa tuvata lutaa vaiti nrora nravuvano tiqata, Mwiva nara quave tiso? Mwiva nai tiqaro, Ne vuanirani né sia so vivarave, tiso. Mwiva naivano nai ru sareraro uti variqarove mwitaa ti variso? tita.

²³ Mwitaa tuvaro Iesusiva tiqaro, Ne viritaina tuvugata né miataita nriasave. Né mwaa mwataraqaataita nriasave. Ne sia mwaa mwataraqaataina nruvave. ²⁴ Ne vaasa iniara tiqana, Né néta qora saiga rirante variqi vita qutu vivarave, turave. Ne qaqiqai variqi vurave tuqo.

Né sia mwi quarara quqaa quave tivera, quqaa né néta qora saiqá mwira rirante gutu vivarave, tiro.

²⁵ Mwitaa tuvata mwisa mwira sapara hita tiqata, So e ta vaitivave hiaro? Tuvaro Iesusiva mwisa tiva niro tiqaro, Ne vuni ini tiva nuva ne mwivama hugo. ²⁶ Ne iniqaa qua vataari quava, mwo qua mwo qua vaisana mate sia ne mwi quara tirerave. Ni titaiva ni tiva mi quara, ne mwi quaragai mwatani varisavata tiva nirerave. Ni titaiva quqaa quaqai ti varivave, tiro.

²⁷ Iesusiva mwitaa tuvata mwisa sia ntapihi seta Iesusiva nai qorara tu quara riora. ²⁸ Mwisa sia ntapihuvaro Iesusiva qaiqaa tiqaro, Ne mwatani mwatatai nraaqiaravama varugo. Ne variarita né ni tuaahera saivaro mwiraqaatairo ini vu nraato ntapihirata né ni osarara ntapihi rietama niara so mwiva qaqiqai variqiro vivave tivarave. Né mwi entarama ne sia nenaqamase mwo saiqá varaura ntapihita ni gova tiva mi quara mwi quaragai tiva nuravata ntapihivarave. ²⁹ Ni titaiva ni vatama sero variqaro mwiva sia ni qaqira saanarove. Ni titaiva ni vatama sero varisana ne mwira mwutusa vahi saiqara vare varuqaro mwiva niara qamwateqaroma sia ni qaqira saiso, tiro.

³⁰ Iesusiva mwi quara ti varuvata airivano mwi quara riosa mwirara quqaave tita.

Quqaa quavano ini avantu saanarove tura

³¹ Iutaa mwonravuvano mwirara quqaa mwivave tuvaro Iesusiva mwisara tiqaro, So né ni qua riemwaqita vivera, né quqaama ni vataqita nrisa varivarave. ³² Né quqaa qua ntapihise riaivaro quqaa quavano ini avantu sairata né qaqi varivarave, tiro.

³³ Mwitaa tuvata mwisa qaqao tita, Te teta haivaqara Evarahaamura nraaqiarama varuro. Sia mwovano tiri rupa taisata te mwira saiqá vare varuro. So naraqamave e tiriara ini avantu sairata né qaqi varivarave tiaro? tita.

³⁴ Mwisa mwitaa tuvaro Iesusiva tiqaro, Ne quqaa quama tuqo, Né uaqá hi saiqara uti variavaro ini uaqá hi saiqava rupa taisatara tita, né mwira saiqaqai vare variavo. ³⁵ Nraavu gova variraro rupataari vaitiva siama esaa enta mwiravata variqiro vuanarove. Nai mwira mwaaquvanoma mwiravata mwaasota variqiro vuanarove. ³⁶ Ne mwira mwaaquvano ini avantu saarita né quqaaqama seta qaqi varivarave. ³⁷ Né Evarahaamura nraaqiara variara mwira ne ntapihi saurave. Mwitaama variqatavata né ni quara gumina quave tiva seta, ni ru sarerata uti variavo. ³⁸ Ne nena qosantiri variqana mwi inraisara taqaurara ini tiva ni varugo. Né néta qora vatama seta variqata taqaa saiqara né mwi saiqarama vare variavo, tiro.

³⁹ Iesusiva mwitaa tuvata mwisa tiqata, Tiri gova Evarahaamuvave, tita. Tuvaro Iesusiva tiqaro, Né quqaa Evarahaamura nraaqiara variatirio, né mwiva varo saiqarama névata varaatirio. ⁴⁰ Kotiva quqaa qua tisana ne mwi quara riaura ini tiva nuqata né ni ru sarerata uti variavo. Evarahaamura sia né hianté hurave. ⁴¹ Né néta gova varai saiqaraqaima vare variavo, tiro.

Mwitaa tuvata mwisa tiqata, Sia te sapa nraative. Tiri gova mwiva Kotivave, tita.

⁴² Tuvaro Iesusiva tiqaro, Kotiva ini gova varitirio, ne mwiva hinataina uto inivata mate mwaa varura niara ini mwutusa ntisata variatirio. Sia ne nena vu nraato tusena nena saiqá vararerana tuvuvave. Kotiva ni titaisana

tuvuvave. ⁴³ Ne mwitaa tuqata né naraqamave ni qua sia ntapihiavo? Saivage ne ini tiva niase. Né ne tu quara sia riaasama variavo. ⁴⁴ Saataaniva ini gova varisata né mwira mwutusa vahiragai utugita vi variarave. Haaru vunigama sero Saataaniva variqaro vaiti ruse varuvagai varurave. Qutaqama vahi inraisavave, quqaa saigavanove, sia mwiragai vaisarora tiro, mwiva sia quqaa qua ti varirave. Mwiva unra tiqaro unra tiara mwira gova variqarora tiro, unra qua mwira nai qua tanarama tirave.

⁴⁵ Mwira saiga mwitaama vaisana ne quqaa qua tuqata né ni quara sia quqaa quave ti variavo. ⁴⁶ Iniqitairo tavave niara uqaahi saigara varaiso tianaro? Né siana so niqaa qua vatevarave. Ne quqaa qua ti varugata naraqamave né ni quara sia quqaa quavave ti variavo? Sai ne ini tiva niase. ⁴⁷ Kotira nraaqiaravano Kotira qua rie varirave. Né sia mwira qua riaasara tita, né sia mwira nraaqiarama variavo, tiro.

Evarahaamuva sia varuvana ne variavarave tura

⁴⁸ Iesusiva mwitaa tuvata Iutaa nroranravuvano tiqata, Te iara Sameriaa-niaava ueraqama viso turava, mwi quava quqaa quama vaiso, tita.

⁴⁹ Tuvaro Iesusiva qaqao tiro, Siana ne ueraqama vugo. Ne nena qora nrutu tuaahere varugata né ni nrutu qoraqama mateta hiavo. ⁵⁰ So sia ne nena nrutuara nroraqama sena riaugo. Ni nrutu tuaaheraiva variso. Mwiva ntapihi sero ko ti varivave. ⁵¹ Ne quqaa qua tianira riaate. Ni qua riemwaqiro vuariva siana qutu vuanarove, tiro.

⁵² Iesusiva mwitaa tuvata Iutaa nroranravuvano tiqata, Mwitaa tiarata te i taqaurara e ueraqama vuaro. Tiri haivaqava Evarahaamuva variqiro viro uro qutu vurave. Poropeti vaiti mwosa mwosa variqita vita esaa qutu vurave. Mwisa esaa qutu vuavara e tiqara, Ni qua riemwaqiro nruaariva siana qutu vuanarove, tiaro. ⁵³ Tiri gova Evarahaamuva nrora vaitivano variqiro viro uro qutu vurave. E sia so Evarahaamurara tiqara, Ne mwira nraatara saarivave, tinarave. Poropeti vaitinravuvata nrora vaiti variqita vita uro qutu vurave. E nataa hira vaitiva varirera higarave mwitaa ti variaro? tita.

⁵⁴ Mwitaa tuvaro Iesusiva tiqaro, Ne nena nrutu tuaahere variarirovauma ni nrutuvano qumina vahianarove. Ni nrutu tuaaherese variva, mwiva ni qovave. Né mwiarama Kotiva tiri mwariqavano variso tiarave. ⁵⁵ Né sia mwira ntapihiarave. Ne mwira ntapihurave. Ne tiqana, Ne sia mwira ntapihi saurave, tiarirovauma ni quavano ini qua votima sero unra qua vahianarove. So ne Kotira ntapihina mwira qua riemwaqina vurave. ⁵⁶ Ne mwatani tuvira hiava entara ini haivaqava Evarahaamuva ni qamwata matorave. Ne mwatani tuvavaro mwiva ni taqovaro mwira mwutusavano suqe huvaro varurave, tiro.

⁵⁷ Iesusiva mwitaa tuvata Iutaa nroranravuvano tiqata, Qaqao, e sia 50 ihi vara saratira, qaraaha vaitivano variqarama ne ini haivaqara Evarahaamura taqaurave tira hiaro, tita.

⁵⁸ Tuvaro Iesusiva tiqaro, Haaru ini haivaqava Evarahaamuva sia varu entara ne qaqi variqina vuavavave, tiro. ⁵⁹ Iesusiva mwitaa tuvata mwisa ori vara seta mwira ntuqutirerata huvaro Iesusiva quqeta sero Kotira nraavuqitairo veva ntero vurama.

9

Vu qipa vu vaitira Iesusiva ntapairi mwatora

¹ Iesusiva viqaro taqovaro vaiti mwovano nai nrora visosaqitairo vu qipa vuva varura. ² Mwira taqeta Iesusira nraaqiaranravuvano Iesusira sapara

hita tiqata, Mwaara ti variarao, tava Kotira qua nteqa sairagaarave mwi waitira vu nai nrora visosaqitairo qipa viso? Naive iso, mwira nrosa qosave iso? tita.

³ Mwitaa tuvaro Iesusiva qaqao tiro, Siamai nai Kotira qua nteqa sairagaarave, mwira nrosa qosa Kotira qua nteqa saaraagaarave, mwira vu qipa viso. Né mwi waitiraqaataita Kotira kepusavano saiga varaanira taqaate tiro, mwira vu qipa virave. ⁴ Kotiva ni titaira saiga te qataa hianiraqaa varaqita virerave. Entama viraro sia mwovano so saiga varaanarove. ⁵ Ne mwatani varigana ne ovavano itaintema sena itamwaqina vuurita mwatani variasa so tafevarave, tiro.

⁶ Mwitaa tiva sero Iesusiva mwataqaa taara vihi sero horaqama sero viti vu qipa vu waitira vuqaa ntaaqau mwatero tiqaro, ⁷ Uto *Siromi* nrukaqi — *Titai* nramariraqi — ena viri hiqaane, tiro. Mwitaa tuvaro mwi waitiva Iesusiva tuntema sero uro nai viri hiqama sovaro mwira vu ntapairi vuvaro mwiva mwitairo uro ntantero so taqamwaqiro nrro.

⁸ Mwiva so taqamwaqiro nri varuvata mwira nraaqani varusa taqovaro aara tosani varigaro mwitaa inraisa miate ti varu waitiva qaqi nruvata mwisa mwira taqeta tiqata, Mwaa ta waitivave iso? Mwiva aara tosani mwatasaa viro varigaro mwitaa inraisa miate ti vari waitiva, mwaa mwivave iso? tita. ⁹ Tuvata mwo husa tiqata, So mwira mwivave, tita. Tuvata mwo husa qaqao nai mwo vaiti mwira viri voti hivama nrroso tita. Tuvaro mwi waitiva nri ntero nai tiqaro, Ne mwaa mwivama iso, tiro.

¹⁰ Mwitaa tuvata mwisa mwira sapara hita tiqata, Nataama saararo i vu ntapairi visarave e taqaaro? tita.

¹¹ Tuvaro mwiva mwisa tiva niro tiqaro, Vaiti mwo mwira nrutu Iesusiva taara vihi sero horaqama sero ni vuqaa ntaaqau matero niara tiqaro, Siromi nrukaqi uto ena viri hiqaane, tisana ne uto hiqama saugaro ni vu ntapairi visanama ne so taqamaqina nruqo, tiro.

¹² Mwitaa tuvata mwisa mwira sapara hita tiqata, Mwiva taini visarave nrro? tita. Tuvaro mwiva tiqaro, Nai tainive viso? Sia ne mwira taqauqo, tiro.

¹³ Tuvata mwisa haaru vu qipa vu waitira mwira vitaqita uro Parisi vaitinravuvano varunani sora. ¹⁴ Iesusiva mwaara entaqaa hora ntaaqau sero mwi waitira vu ntapairi sora. ¹⁵ Mwisa Parisi vaitinravu varunani mwira uro sovata Parisi vaitinravuvano mwi waitira sapara hita tiqata, Nataama saisarove i vuvano ntapairi viso? tuvaro mwiva tiqaro, Mwiva hora vara sero ni vuqaa ntaaqau taisana ne uto nena viri hiqama saugaro ni vu ntapairi visana ne so taqauqo, tiro.

¹⁶ Mwiva mwitaa tuvata Parisi vaiti hini husa tiqatama, Mwi saigara varaiva mwaaraqaa qua nteqegaro varaivara tiro, mwiva sia Kotiva hinatairo tuvivave, tita.

Tuvata hini husa tiqata, Qaqao, nataama serove uqa hi waitiva nrora saiga mwira so varaanarove? tita. Mwitaa tiva seta mwisa niari vutaqaa tusama vita taara qua ti varura.

¹⁷ Qaiqaa Parisi vaitinravuvano mwira sapara hita tiqata, E tiqara mwiva ni vu ntapairi saiso tianarave. Mwi waitirara e nareve tinarave? tuvaro mwi waitiva tiqaro, Kotiva mwira saahaqa hi varisaro mwiva mwi saigara vare variso, tiro.

¹⁸ Mwitaa tuvata Iutaa vaitinravuvano sia mwira quara quqaave tiraitita, mwi waitirara tiqata, E unra tiqarama ni vu ntapairi viso tira hiaro. Haaru sia i vuvano qipa vurave, tita. Mwitaa tiva seta mwi waitira nrosa qosa nraarora. ¹⁹ Nraarovata nruvata mwitanasa sapara hita tiqata, Mwaa

vaitiva initana mwaaquve iso? Quqaa mwira nai nrora visosaqitairo vu qipa vurave? Nataama saisarove mwira vuvano ntapairi visaro so taqaiso? tita.

²⁰ Tuvata mwira nrosa qosa tiqatama, Mwaa vaitiva tiritana mwaaquve. Mwira vuvano haaru visosaqitairo qipa vurave. ²¹ Nai nataama saisarove mwira vu ntapairi viso? Nai tavave mwira vu ntapairi saiso? Mwiva nrora tuaivama iso. Né neta mwira sapara higata taqaivaro mwiva soma nita tiva nianarove, tita. ²² Mwitanaasa Iutaa vaiti nroranravu nraatu aatu higata mwitaa tura. Iutaa vaiti nroranravuvano vaasa qua tiva teta tiqatama, Vaiti mwovano Iesusirara mesaiaa vaitivano tiri saahaqa hiariva nrivave tirera, mwira saara te mwira irora hiqatama mwaara nraavuqitaita titama saararo veva ntero esaara vuarive, tita. ²³ Mwitaa tiva seta qua tiva torara tita, mwira nrosa qosa Iutaa vaiti nroranravu nraatu aatu hita tiqata, Mwiva nrora tuairave. Néta mwira sapara higata taqaate, tura.

²⁴ Tuvata mwisa qaiqaa haaru vu qipa vu vaitira nraarama seta tiqata, E Kotira vuqaa variqara quqaa quaqai tiane. Te taqauraro Iesusiva Kotira qua nteqa sai vaitivave, tita.

²⁵ Tuvaro mwi vaitiva tiqaro, Iesusiva Kotira qua nteqa sai vaitivave iso suqe vaitive iso ne sia mwira osara ntapihi saugo. Ni vu qipa vura ntapairi saira mwiraqaima ntapihuqo, tiro. Tuvata mwisa mwira sapara hita tiqata,

²⁶ Mwiva i nataave iso? Mwiva nataama serove i vu ntapairi saiso? tita. Tuvaro mwisa tiqaro,

²⁷ Ne mwi quara vaasa ini tiva nuqata né siave ntapihiavo? Naraqamave né mwi quara qaiqaa sapara hiavo? Névata mo? Névata mwira nraaqiara varireratave qaiqaa mwi quara ni sapara hiavo? tiro.

²⁸ Tuvata mwisa mwira nroraqama seta irora hita tiqata, Enama mwira nraaqiara variqara mwira qua riaaravave. Te teta haivaqara Mosesira qua riemwaqita vurasave. ²⁹ Kotiva Mosesirara qua tiva tora te riemwaqita vunarave. Iesusiva mwi vaitiva qumina vaitivanove. Te siama mwiva mwitairo nri osarara ntapihuro, tita.

³⁰ Mwisa mwitaa tuvaro mwiva sauqu ntukikiraagata sero tiqaro, Qike, ni vu ntapairi matai vaitiva, mwiva mwitairo nri osarara né siave ntapihiavo?

³¹ Te ntapihi sauraro Kotiva sia uqa hi vaitira qua rie varirave. Kotiva nai qua rieqata nrue varia vaitisa mwisa quaqai rie varirave. Mwira nrutu tuaahere variasa mwisa quaqai Kotiva rie varirave. ³² Haaru mwaa mwatara hoqarato entaraqaatairo sia vaiti mwovano nai nrora visosaqitairo vu qipa vura ntapairi sorave. ³³ Iesusiva sia Kotiva hinatairo tuviva hitirio, mwiva siama so ni vu ntapairi mataitirio, tiro.

³⁴ Mwi vaitiva mwitaa tuvata mwisa tiqatama, I mwatatoraqaataira e uqa hiaara vaitivama variqara nriaro. E mo? E tirivata mwaara qua tiva timwirerave hiaro? tita. Mwitaa tiva seta mwisa vaiti mwira ntarauqita mwaara nraavuqitaita veva mwaatani sora.

Kotirara sia quqaave tiasa vu qipa visa nraantantama setama varita

³⁵ Mwira so quara riero Iesusiva mwi vaitira huaama sero mwirara tiqaro, Mwatani mwatatai nraaqiarara e quqaa mwivave tira hiaro? tiro.

³⁶ Tuvaro mwi vaitiva sapara hiro tiqaro, Nrora, mwiva ta vaitivave iso? E ni tiva miraqena ne mwirara quqaave tiasa, tiro.

³⁷ Tuvaro Iesusiva mwira tiva mwiro tiqaro, E taqe variara vaitiva, ne mwaa mwivama iara ti varuqo, tiro.

³⁸ Mwitaa tuvaro mwiva tiqaro, Nrora, quqaama e mwivave, tiro. Tiva sero mwiva Iesusira vuqaa fori sauru raviro mwira qamwata mwatero varura.

³⁹ Mwitaa huvaro Iesusiva tiqaro, Ne nraase qora tusa hirera mwatani tuvuvave. Vu qipa visa qaiqaa taqaate tina, tuvuvave. Qaqi taqe variasa vu qipa vuarive tina, tuvuvave, tiro.

⁴⁰ Mwitaa tuvata Parisi vaitinravuvano mwi quara rieta Iesusira sapara hita tiqata, Tiri vuvatave qipa viso? tita.

⁴¹ Tuvaro Iesusiva mwisa tiva niro tiqaro, Ini vu qipa visata variasa varivarovauma sia iniqaa quavano vahianarove. Né ni osara sia ntapihise taqaraitita, né tiqata, Te Kotira osara taqaunarave, ti variarave. Mwitaa ti variarara tiro, mwira saara iniqaa qua vahirove, tiro. Iesusiva mwitaa turama.

10

Iesusiva sipisipiqaa ntuva sero tura

¹ Iesusiva mwo quaqaa ntuva sero tiva niro tiqaro, Ne quqaa qua tianira riaate. Vaiti mwovano sipisipi vataa urisaraqi virera sia qetiana vera ntaraitiro, qurisa mwona mwaati ntero vi vari vaitiva mwi vaitiva muara uti vaitivave, mwosa riqaro mwisani muara vare vari vaitivama variso.

² Vaiti mwovano sipisipi qetiana vera nteqaro vi variva, mwi vaitiva quqaa sipisipi qovama variso. ³ Qetiqaa vaivaraara ntaqaihi vari vaitiva mwira taqero so qeti qatua mwataisaro mwiva nai sipisipiaara aasara nteqaro nai sipisipi nrutu ntavaqiro visata mwira sipisipinravuvano mwira nrunta ntapihi riaavaro mwisa vitero mwaagani virave. ⁴ Mwiva mwaagani nai sipisipi uro sero mwiva nraante vuni vi varisata mwira sipisipinravuvano niari qora nrunta ntapihi seta riegatara tita, mwira vataqita vi variarave. ⁵ Mwira sipisipinravuvano sia mwo vaiti vataqita vivarave. Mwisa mwo vaiti nrunta sia ntapihi seta riegatara tita, mwisa mwira nraatu aatu hiqata aatu vivarave, tiro.

⁶ Iesusiva mwitaa tiva sero sipisipiqaa ntuva sero tiva nuvata mwisa mwi quara osara sia ntapihiraitita varura.

Iesusiva ne suqema sena sipisipiqaa ntaqaihuve tura

⁷ Sia ntapiraitita varuvaro Iesusiva qaiqaa tiva niro tiqaro, Ne quqaama tuqo. Ne sipisipi mwisa qetivanoma varuqo. ⁸ Ni vuni nria vaitisa mwisa muara utuasave, mwosa riqata mwisani muara vare variasa variavata sipisipivano sia mwisa nrunta riaarave. ⁹ Vutaqi vua qetiva nema mwi qetiva varuqo. Niqaamatero nritaraani vaitira ni qova mwira vitaanarove. Niqaamatero tuvifare nritara hiariva soma sara huaama sero nraanarove. ¹⁰ Muara varai vaitiva muara vareqaro sipisipi ru taiqa sareraro nrirave. Ne sipisipiaara rieganama sipisipi mwisa qaqi variqita viqatama suqema seta variate tina, ne nruvave.

¹¹ Ne sipisipi qova suqevave. Sipisipi qova suqeva variqaro nai sipisipi rusevorave tiqaro antuqiro viro sai ne mwisara riegana qutu vuase tiva sero qutirave. ¹² Mwovano sia sipisipi qova, mwiva qaqi saiqqa vaitivano variqaro taqaisaro qaasau vairivano nrisaro mwiva aatu hiqaro qaqira sero santero visaro qaasau vairivano sipisipi rusero hini ru vata saisata mwisa niariara nariara mwona mwona vuavave. ¹³ Mwira saiqqa vaitivano qaqi saiqqa vaitivano variqarora tiro, mwiva sia sipisipiaara nroraqama sero riaraitiro, aatu virave.

¹⁴ Ne sipisipi gova sugeva variqana ne nena sipisipi ntapihi sauqata ni sipisipinravuvano nivata ntapihi seta taqaarave. ¹⁵ Mwira votima sero ni gova ni ntapihi saisana nevata mwira ntapihi saurave. So ni sipisipi rusevorave tina, ne mwisara riegana qutu virerave.

¹⁶ Sipisipi mwonravu mwisa sia mwaa vutaraqi variasa mwisavata ni sipisipive. Mwisa ni nrunta riaivage ne mwisa vitaqina uro saarita ni sipisipi hini mwisavata kuaaqi varivarave. Mwisa kuaaqi varivaqe ne mwisa gova kuaigavanoqaima varianirave.

¹⁷ Ne mwisara riegana qutu vina qaiqaa qaqi tivuanirave. Ne mwitaa hianirara tiro, ni qora mwutusavano niara vaiso. ¹⁸ Ne sia sove tiariro mwovano siama so ni rusaanarove. Ne nena qutu vuataa hiragena qutu vuanirave. Ne qutu vuani osararave, ne qaiqaa qaqi tivuani osararave, nina saiqaqaima vaiso. Ni gova niara mwitaa mwitaa hiane ti quara, ne mwi quara vararerave, tiro.

¹⁹ Mwitaa tuvata Iutaa vaiti nroranravuvano mwi quara rieta vutaqaa ntaira nruu hininravu mwo qua tuvata hininravuvano mwo qua tura. ²⁰ Airivano tiqata, Ueravano mwiraqi varisaro mwitaa tiso, Mwiva ueraqama viso. Naraqamave né mwira qua riaavo? Sia mwira qua riaate, tuvata ²¹ mwonravuvano tiqata, Qaqao, ueraqa hiari vaitiva siama so mwi quara tianarove. Ueravano siama so vu qipa vuani vaitira ntapairi saanarove, tita. Mwitaa tura.

Iutaa vaiti nroranravuvano qaiqaa Iesusira ru sarerata uti varura

²² Ierusalemni omwata mwo nro entava nri ntora. Kotira nraavu qamwata mwato omwatava vahuvaro huarivano sia nroraqama sero ite varu entaraqaa mwi omwatara nrora.

²³ Mwi entaraqaa Iesusiva Kotira nraavu nroraqi variqaro mwo rumuqi mwira nruu Soromonira rumuqi nrue varuvata ²⁴ Iutaa vaiti nroranravuvano mwiqi uairama vita Iesusirara tiqatama, E mwo qua vaasa tiri tiva timwiataarave. Taireve tiri tiva timwinarave? E mesaiaa vaitivano varirera, vutu sera tiva timwiraqe te riaare, tita.

²⁵ Tuvato Iesusiva tiqaro, Ne vaasa ini tiva nuqata né sia ni quara quqaa quave tiavo. Ni gova ni nroraqama saisana ne mwira saiqqa vare varurave. So ne varau saiqava ni osarara ntapihima ti variso. Né ni saiqqa taqaarara riegata ni osarara ntapihiataarave. ²⁶ Né sia ni sipisipi variqatara tita, né sia ni quara quqaave tivarave. ²⁷ Ne nena sipisipi ntapihi saurave. Mwisa ni nrunta riegatama ni vataqita nrue varivarave. ²⁸ Ne esaa enta qaqi variqi vira niarita mwisa sia qutu vivarave. Siama mwovano ni sauquqitairo ni sipisipi ntavihi sero varaanarove. ²⁹ Ni gova ni sipisipi mitaiva, mwiva kepusavano esaa inraisa nraataariva variqaro ni sipisipiqaa ntaqaihi varisarora tiro, sia mwovano mwira sauquqitairo so ntavihise varaanarove. ³⁰ Nevata ni qovavata kuaikuvanoma varuro, tiro.

³¹ Iesusiva mwitaa tuvata Iutaa vaiti nroranravuvano mwira ru saare tita, ori tu varovaro ³² Iesusiva tiqaro, Ne ni qora suqe saiqqa, mwo saiqqa mwo saiqqa ini tiva nuqata nara saiqqa varaura saarave né niqaa ori tuto sarerata uti variavo? tiro.

³³ Tuvata Iutaa vaiti nroranravuvano tiqata, Te sia i saiqqa suqera saara i ru sarerave. E Kotirara qora qua tiaro. E qaqi vaitivano variqarama Kotisantiriro kuaaqaa varirera uti variaro. Mwira saarama te ori vara seta i ru sarerave, tita.

³⁴ Mwisa mwitaa tuvato Iesusiva tiqaro, Né Kotira vuku vataaraqi qua mwo qara ntuva tova vaiso. Né siave mwi quara taqaavo? Kotiva vaiti mwo usara mwitaama tiro: Né mwariqavanove, turave. ³⁵ Te ntapihi sauraro Kotira qua sia unra qua vahirave. Kotiva nai qua tu vaitisa qaqi qumina vaitiara mwariqavanove turave. ³⁶ So Kotiva ni mwatama sero ni titaiana ne mwatani uto variganama iniara ne mwariqa Kotira mwaaquve tugata né tiqata, Kotirara qora qua tiaro, tiavo. ³⁷ Ne sia nena qora saiga varaaritavauma né sia niara quqaa mwivave tivarave. Ne nena qora saigama vare varuqo. ³⁸ Né sia niara nroraqama seta riaivera, né ne saiga vare varianirara nroraqama seta rieqatama niara quqaa mwivave tiate. Né mwitaa tivaro ini vu nraato ntapihirata né ni qova niqi varirara ntapihivarave. Ne mwiraqi varianirara né ntapihivarave, tiro.

³⁹ Mwitaa tuvata mwisa qaiqaa mwira karavu hirera uti varuvato Iesusiva veva ntero viro.

⁴⁰ Veva ntero vuva uro Sotaani nramari hini tosani Ioniva tauraa variqaro nramari nunani uro varura. ⁴¹ Varuvata airi nraase qoravano mwiva varunani nri nteta tiqata, Ioniva sia nrora saiga varova variqaro Iesusirara tiri tiva timwurave. So te taqauraro Ioniva quqaa qua mwaa vaitirara tiva timwurave, tita. ⁴² Mwitaa tiva seta mwini varusa airivano Iesusirara quqaa mwivave tura.

11

Rasarusiva qutu vura

¹ Vaiti mwovano mwira nrutu Rasarusiva Vetaaniniaava nroraqama sero nriqa vuvaro varuvata mwira nrutatana Mariaavavata Mataavavata mwini varura. ² Mariaava vahavera sugera Iesusiraqaa qu mwatero nai qiata saahiqotairo mwira suqu nruka mwataariva varura.

Mwi nrure nrasetana variqata taqovaro mwisa vasaava nriqa vuvaro varuvata ³ mwitanasa vaiti mwo titeta Iesusirara uro mwitaama tiane tita, Nrora, i mwutusa nti vaitiva nroraqama sero nriqa visaro variso tiane, tita.

⁴ Mwitanasa mwitaa tiva seta titovaro vevani uto tiva mwuvato Iesusiva mwi quara riero tiqaro, Rasarusiva nroraqama sero nriqa visaro variso. So mwiva siana qutu vuanarove. Né Kotira kepusa taqaate tiro, mwira nriqa visaro variso. Ni Kotira mwaaqu ni kepusa osara taqaate tiro, mwira nriqa viso, tiro.

⁵ Iesusiva Mataaaravata mwira nruraravata Rasarusiravata mwoqama sero mwutusa ntuva variqaro ⁶ mwi quara rierovata sia gamwanrama viraitiro, qaqira sero taara entavata mwini varura. ⁷ Vari sero mwiraqaatairo nai nraaqiaranravuara tiqaro, So varaivaqenravu uto ntante Iutiaani vuare, tiro.

⁸ Tuvata mwira nraaqiaranravuvano qaqao tita, Mwaara ti variarao, nanauma Iutaa vaiti nroranravuvano ori vara seta i ru sarerata uturave. E qaiqaa mwini uto ntantera virerarave hiaro? tita.

⁹ Tuvato Iesusiva tiqaro, Mwo enta mwo enta huarivano ihara so itairave. Vaitivano qataahiraaqu nruve variva huarivano itairaaqu nrueqaro aara so taqeqaro sia huntavaivamaqi saavu ntirave. ¹⁰ Huarivano sia itaisaro entaqi nruve variva huntavaivamaqi saavu nti varirave, tiro.

¹¹ Mwitaa tiva sero Iesusiva qaiqaa tiqaro, Tiri toti Rasarusiva vaitama viso. Ne uro mwira huruma sarerave, tiro.

¹² Mwita tuvata mwira nraaqiaranravu tiqata, Nrora, mwiva qaqi vaite varirera, mwiva soqa hianarove, tita.

¹³ Mwita tiva seta mwisa sia ntipihuvaro Iesusiva mwi quaraqaa ntuva sero Rasarusiva qutu vurara tura. Mwisa tiqata, Iesusiva Rasarusirara qaqi vaitairama tiso, tita.

¹⁴ Mwitaama riegata varuvaro Iesusiva vutu sero tiva niro tiqaro, Rasarusiva qutuma viso. ¹⁵ So ne iniara rieganama né niara quqaa mwivave tiate tina, ne Rasarusira sia qamwanrama uro taqaurara qamwateqama varuqo. So varaivaqenravu mwiva qutu vinani vuare, tiro.

¹⁶ Tuvaro mwira nraaqiara mwovano Tomaasiva, mwira mwo nrutu Kaapiva, mwiva nai hena vaitinravuara tiqaro, So varaivaqenravu mwaara ti vari vaitiravata vuare. Iutaa nroranravuvano mwira ru saivaqe tiren-ravuvata mwira vatama seta qutu vuare, tiro.

Nraase qora qutu vuasa qaqi vara tivumase varuva ne mwaa mwivave, tura

¹⁷ Tuvaro Iesusiva vuvu nrintero riovata Rasarusira quntama tovaro erahi-amuaantema enta nritarora. ¹⁸ Vetaani Ierusaremi qaumato 3 kiromitaa votima mwiraqaatairo vahuvaro ¹⁹ Ierusaremitaita mwi mwatanaasa airivano Mariaaravata Mataaravata mwutusa qihaasama nategata Rasarusirara ntatarerata nrura.

²⁰ Nri varuvaro Mataava riovaro Iesusivavata mwitairo aarana nri varuvaro mwiva Iesusira hunta sareraro viqaro Mariaara nraavuqi sero vuvu nrintero ²¹ Iesusirara tiqaro, Nrora, e mwaini variaratiri, ni vasaava siama qutu vitirio. ²² So mate e Kotirara mwo inraisa mwo inraisara naaru tiraro Kotiva mwi inraisara soma i mwianarove. Ne mwira ntipihi sauqo, tiro.

²³ Tuvaro Iesusiva mwira tiva mwiro tiqaro, I vasaava qaqima tivuanarove, tiro.

²⁴ Tuvaro Mataava tiqaro, So esaara entaqaa mwiva esaa nraase qora sapata tivuanarove. Ne mwira ntipihi sauqo, tiro.

²⁵ Tuvaro Iesusiva tiqaro, Nraase qora qutu vuasa qaqi vara tivumase varuva, ne mwaa mwivave. Nraase qora qaqi variqi vi varia inraisara ni varuva ne mwaa mwivave. Niara quqaa mwivave tiariva qutu viro mwiqitairo qaqi variqi vuanarove. ²⁶ Qaqi variqi viqaro niara quqaa mwivave tiariva siama qutu vuanarove. E mwirara quqaaveve tira hiaro? tiro.

²⁷ Tuvaro Mataava tiqaro, Quqaama tira hiaro. Mesaiaa Kotira maaquvano mwatani tuvirera hiarava, e quqaa mwivama hiaro, tiro.

Iesusiva Rasarusirara ntatora

²⁸ Mwita tiva sero Mataava nrima ntantero uro nai nrura tirema sero tiva mwiro tiqaro, Mwaara ti vari vaitiva nri ntaiiso. Mwiva iara sapara iso, tiro. ²⁹ Tuvaro Mariaava mwi quara riero tiviro santero uro Iesusira hunta sareraro viro. ³⁰ Iesusiva vaasa Mataava uro qua mwantonani variqaro sia mwatusani nri ntovaro ³¹ Mariaava mwira huntareraro vuvata Iutaa nraase qora mwira mwutusa qihaasama mwatarerata nrusa taqovaro Mariaava nraavuqitairo santero vuvata mwisa tiqata, So mwira quntama taanani ntatareraro virerarove, tiva seta mwisavata tivita Mariaara vata vareta vura.

³² Mwisa Mariaara vata vareta vuvaro Mariaava vuvu Iesusiva hunani nrintero Iesusira taqero uro mwira vuqaa uto ntiro variro tiqaro, Nrora, e variaratiri, siama ni vasaava qutu vitirio, tiro.

³³ Tuvaro Iesusiva taqovaro mwiva ntate varuvata Iutaa nraase qora Mariaaravata nrusa mwisavata ntate varuvaro Iesusira mwutusavano qoraqama sero nraamwunriga tovaro mwiva po se tiro tiqaro, ³⁴ Mwira taraqive quntama teta hiavo? tuvata mwisa tiqata, E nrira uro taqaane, tuvaro ³⁵ Iesusiva ntate varura.

³⁶ Ntate varuvata Iutaa nraase qoravano tiqata, So taqaate. Mwiva mwoqama sero Rasarusirara mwutusa ntisaro variso, tita.

³⁷ Tuvata mwonravuvano tiqata, Mwiva vu qipa vi vaitiravata so nta-pairise varivave. Iesusiva mwaini varitirio, Rasarusiva qutuve vitirio, siave qutu vitirio? tita.

Iesusiva Rasarusira tivuma sora

³⁸ Tuvaro Iesusira qaiqaa ua huvaro mwiva mwira mwira quntama tonani vura. Mwisira ori vaurutoraqi Rasarusira veta vateta ori mwo vara seta getiana tita torara tiro, Iesusiva tiqaro, ³⁹ Ori mwira qaqinani vara saate, tuvaro Mataava gutu vu vaitira nruravano qaqao tiro, Mwira quntama taavaro erahiamuaantema enta nritaraisaro ntera viva mwutama vuanarove, tiro.

⁴⁰ Tuvaro Iesusiva Mataarara tiqaro, Ne vaasa i tiva mwu quarara riaane. E niara quqaa mwivave tirera, e Kotira kepusa tagenarave turave. Siave ne vaasa iara mwitaa tina huqo? tiro.

⁴¹ Tuvata mwisa ori qaqinani raaqu sovaro Iesusiva virini taqero tiqaro, Kaao, e ne tu quara rie varianara ne mwirara suqeve tuqo. ⁴² E esaa enta ni qua rie varianara ne ntapihi saurave. E ni titaanarara nraase qoravano ntapihiate tina, ne mwisara rieqanama iara aasara ntaqo, tiro.

⁴³ Iesusiva mwitaa tiva sero mwiva aasara ntero tiqaro, Rasarusio, tivira veva ntaane, tuvaro ⁴⁴ Rasarusiva gutu vuva qaqi tiviro mwira suqu sauqu ququtama teta mwira qiatavata mpuruqago qapugamatova mwiqitairo veva ntero. Veva ntovaro Iesusiva mwisa tiva niro tiqaro, Mwira avantu saivaro qaqi vuarive, tura.

Iutaa nroranravuvano Iesusira ruse quara tura

(Matiu 26:1-5; Maaki 14:1-2; Ruku 22:1-2)

⁴⁵ Tuvata Iutaa nraase qora airivano Mariaara taqarerata nrusa mwi saiqara taqeta Iesusiva so quqaa mwivave, tita. ⁴⁶ Tuvata mwonravuvano qaqira seta Iesusiva mwi saiqara varorara uro Parisi vaitinravu tiva nuvata

⁴⁷ Parisi vaitinravuvata, Kotira saiqara vara mwate varu vaitisa mwisira nrora vaitinravuvata, mwisira niari kaanasori vaiti sapata uairama vita tiqata, Mwi vaitiva mwo saiqara mwo saiqara nrora saiqara vare variso. Qike, te mwira nataamave saanarave? ⁴⁸ Te mwira qaqi saarera, mwiva mwitaamagiro virata esaa nraase qora mwirara quqaa mwivave tivarave. Mwisira mwitaa tivata tirigaa ntaqaihi variasa Romenivano tiri ntaqiqata Kotira nraavu ntapairi seta tiri nraase qora esaa ru taiqa sevarave, tita.

⁴⁹ Tuvaro mwi vaitinravusaqitairo mwovano mwira nrutu Kaiapaasiva tiviro. Kaiapaasira mwira nroraqama sovaro mwi ihiraqi Kotira saiqara vara mwate varu vaitisaqaa ntaqaihiqaro vuniaa vaitivano varuva, mwiva tiviro tiqaro, Sia né vu nraatovata vahisave. ⁵⁰ Romeni mwatanaasa tiri esaa ru taiqa sevarave. Tiri saahaqa hireraro vaiti kuaiqavanoqaima qutu viraro suqe hianarove, tiro.

⁵¹ Kaiapaasiva mwi quara tiqaro ne nena nraato tusena tuqo, tiro. Mwiva sia ntapihi sovaro Kotiva mwira saahaqa huvaro mwiva Iesusiva Iutaa nraase qorara rieqaro gutu vuanirara tura. ⁵² Iesusiva sia Iutaa mwatanaasaraqai rieqaro qutu vuariva varura. Kotira nraaqiara esaa

mwoqi mwoqi apiqama variasa mwisavata vita sero uro kuaaqi uairama tareraro Iesusiva qutu vuariva varura.

⁵³ (Kaiapaasiva tiqaro, Vaiti kuaigavano tiri Iutaa saahaqa hireraro qutu viraro suqe hiarive, tuvata) mwi entaragaataita Iutaa nrora vaitinravuvano Iesusiva ruserara tivaqita vura. ⁵⁴ Mwitaa ti varuvorora tiro, Iesusiva Iutaa mwatani sia qoqaa nruraraitiro, qaqira sero uro Eparaimi mwatasa qumina mwata tosaní uro nai nraaqiaranravu sapata varura.

⁵⁵ Mwini varuvaro Iutaavano vesahu nato sarara omwata nro entava qaumaqa huvata itai itaita nraase qora verara nrora mwatasa Ierusaremini qai vura. Mwini uro variqata nrora enta mwira vesa variqata mwisa niari mwaara qua rieqata nramari ntuva seta tuavaaqa hiqama seta varura.

⁵⁶ Mwisá mwini variqata Iesusirara aitutumagita nrueqata uro Kotira nraavu nrora nraavuqi uairama vita nai sapara hi nai sapara hita tiqata, Iesusiva sove nrima omwata nraanarove? Mwiva aatu hiqaro slave nríanarove? tita. ⁵⁷ Mwitaa ti varuvata Parisi vaitinravuvanovata, Kotira saíqa vara mwate varu vaitisa mwisa nróranravuvanovata, mwisa nraase qora tiva nita tiqata, Né taqaivaro Iesusiva nrirera né nrima tiri tiva timwivaqe te mwira rupaqi karavuqi saare, tura.

12

Mariaava Iesusiraqaa mwunta vu vahaverara qu mwatora

(Matiu 26:6-13; Maaki 14:3-9)

¹ Vesahu nato sarara omwata nro entava qaumaqa huvaro 6 entanravu qaqi vahuvoro Iesusiva qaiqaa Vetaani mwini Rasarusiva varunani vura. Rasarusira mwira haaru qutu vura Iesusiva qaiqaa qaqi tivuma so vaitiva varura. ² Mwini vuvata mwi mwatanaasa Iesusirani sara uta mwatovaro Mataava mwi sarara varaigaro uro nuvaro Rasarusiva Iesusisantiriro sara tainta mwira tataaqa mwatasaa viro varura.

³ Varuvaro Mariaava taqu mwo varero nrura. Mwi taquraqi nrora munima so vahaverara mwira nrutu *naanti* vahuvoro Mariaava mwi taqura varero mwi vahaverara Iesusira suquqaa qu mwatero mwiraqaatairo nai qiata saahiqotairo Iesusira suqu nruka mwatovaro vahavera suqe hu mwuntava nraavu mwira kuraama sora.

⁴ Kuraama sovaro Iesusira nraaqiaranravuqitairo mwovano Iutaasi Isik-eriotiva Iesusira qovarama saariva, mwiva qaqao tiro, ⁵ Mwi vahaverara mwosa niro munima 300 kinaa vara sero mwi munimara vehi nraase qora niataara vaisaroma, qumina i suquqaa qu mwatero iso, tiro.

⁶ Iutaasiva sia vehi nraase qorara riaraitiro, mwiva muara vaitivano variqarora tiro, mwitaa tura. Mwiva Iesusira nraaqiaranravu munima tuaqaa ntaqaihiqaro mwi tuaraqitairo quqeta seqaro mwinravusa munima muara vare varura.

⁷ Iutaasiva tiqaro, Munima mwira vehi nraase qora niataara vaisaroma qumina i suquqaa qu mwataiso, tuvaro Iesusiva tiqaro, Sia mwi nraasera antua taane. Mwiva vahavera niqaa qu mateqaro ni quntama te entarara ni mwavanta tequama mate variso. ⁸ Vehi nraase qora mwisa esaa entama inivata variqita vivarave. Né qaqi entaqaa mwisa so saahaqa hivarave. Ne siana inivata esaa enta variqina vuanirave, tiro.

Nrora vaitinravuvano Rasarusiravata ru sarerata uti varura

⁹ Iesusiva mwitaa tiva sero varuvata Iutaa airivano riovaro Iesusiva Vetaani mwini varuvata mwisa Iesusiravata Iesusiva qaqi tivuma so vaitira Rasarusiravata taqarerata uto Vetaanini uaira hita varura. ¹⁰⁻¹¹ Iutaa

airivano Rasarusira gaqi tivuma sorara riegatama niari nrora vaitinravu qaqira seta uto Iesusirara quqaa mwivave ti varuvata mwira saara Kotira saiga vara mwate varu vaitisa mwisa nroranravuvano Rasarusiravata ruse quara ti varura.

*Iesusiva ntonki mwoqaaqaa mwaari ntero Ierusalemiqi vura
(Matiu 21:1-11; Maaki 11:1-11; Ruku 191-12:28-40)*

¹² Mwira qararaara nraase qora airivano vesahu nato sarara nrarerata nrusa riovaro Iesusiva Ierusalemianiara aarana nri varura. ¹³ Nri varuvata mwisa mwira gamwata mwatarerata qantosa mware voti hura teqa vareta Iesusira hunta sarerata viqatama mwisa aasara nteta tiqata, Sai mwira nrutu tuaaheraare.

Nroravano nai nrutuqa nri vari vaitira suqema mwataiso. (Sng 118:26)
Tiri Isareriqaa ntaqaihi vaitira Kotiva suqema mwataiso, tita.

¹⁴ Mwisa mwitaa tivaqita vuvaro Iesusiva qaraaha ntonki huaama sero Kotira vukuqi tuntema sero mwira mwoqaaqaa mwatasaa viro variro Ierusalemiqiara viro.

Haaru Kotira vukuqi mwirara mwitaama tiro:

¹⁵ Saioniqinaasa (Ierusalemiqinaasa) né sia aatu hiате.

Tagaate, iniqaa ntaqaihiariva nriqaroma mwiva qaraaha ntonki mwoqaaqaa nri variso, tura. (Sek 9:9)

¹⁶ Mwi quava vukuqi vahuvata mwi entara Iesusira nraaqiaranravuvano sia mwi quara osara ntapihura. Naatiara Iesusiva qutu viro qaiqaa tivu entaraqaa mwi quava mwisa nraatoqi ntuva vuvata mwisa tiqata, Mwi quava Iesusiva ntonki mwoqaaqaa Ierusalemi vurara turave, tura.

¹⁷ Iesusiva Rasarusira oriqi quntama toraqitairo nraarama sero mwira gaqi vara tivuma sovata nraase qora mwini Iesusiravata varusa mwi saigara taqeta mwosa mwosa tiva nuvata ¹⁸ mwiraqaataita nraase qora airivano Iesusiva nrora saiga mwira varorara riegata Iesusira uto hunta sora.

¹⁹ Mwisa Iesusira gamwata mwatarerata vuvata Parisi vaitinravu nai tiva mwi nai tiva mwi hita tiqata, So tagaate. Te siana so mwo qara hiara aarava vaiso. Esaasa mwiraqaima vataqita vi variavo, tura.

Kirikiqinaasa mwonravuvano Iesusira uro taqora

²⁰ Kiriki mwonravuvano (Mwisa Iutaa mwaara qua riosa) mwisavata mwi omwatara nreqatama Kotira nrutu tuaaherarerata Ierusalemi uro varura. ²¹ Uro variqata mwisa Iesusira nraaqiara mwo Piripira Vetasaitaa mwatusa Kaririniarara tiqata, Tiri vaitio, te Iesusira taqarerave, tuvaro ²² Piripiva uro Entururavata tiva mwiro mwiva vatama sero uro Iesusira tiva mwura.

²³ Tiva mwuvaro Iesusiva tiqaro, Ne mwatani mwatatai nraaqiaravave. Ni nrutu nroraqama vuari entava nri ntaiso. ²⁴ Ne qua tianira riaate. Uiti uru sia mwataqi vara tutairaro uiti uru mwiqava nariaraa vahianarove. Uiti uru mwataqi vara tutairaro ntuko hiro turu vera sairaro mwiraqaatairo uru mwiva taiqa vuanarove. Uru mwiva taiqa viraro uiti mwiva quipiqeqaro airi tava riaanarove.

²⁵ So vaiti mwovano mwaa mwataraqaa nai gaqi variqiro vuaniraraqai nroraqama sero riemwaqiro vuariava, mwiva esaarama qutu vuanarove. Vaiti mwovano sia nai mwaa mwataraqaa gaqi variqiro vuanirara nroraqama sero riemwaqiro vuariava, mwi vaitiva esaa enta qaqima variqiro vuanarove. ²⁶ Tasave ni saiga varaataa hiarisa, mwisa gaqi varivorave. Mwi vaitisa ni vataqita nriate. Mwisa mwitaa hiqata ne varianirani

mwisavata varivarave. Mwisu mwitaama seta ni saiga vara mate varivaro ni qova mwisa nrutu nroraqama saanarove.

Iesusiva nai qutu vuanirara tura

²⁷ So mwaa entara ni mutusa uaga isana varuqo. Nena qorara nara quave tianirave? Kaao, mwi entava nri ntaasora mwi entara qaqira saane. Mwitaa Kotirara tianirave? Qaqao, ne sia mwitaa tirerave. Ne mwi entarara rieqana tuvuvave. Mwi entaraqaa ne atura ntuvagina vuase tiva sena tuvuvave. ²⁸ Kaao, e ena nrutu nroraqama saane, tiro. Iesusiva mwitaa tuvoro naavutairo quavano tiqaro, Ne nena nrutu nroraqama saugo. Qaiqaavata nroraqama sarerave, tiro.

²⁹ Tuvata nraase qora uairama vita mwini tivita varusa mwi quara rieta tiqata, Naaruva nruqua tiso, tuvata hini husa tiqata, Qaqao, naavuniaa vaitivano mwiravata qua tiso, tita.

³⁰ Tuvoro Iesusiva tiqaro, Sia mwiva niara rieqarovauma qua tiso. Mwiva iniara rieqaroma qua tiso. ³¹ So mwaa entara mwatani variasa ko tiani entarave. Mwaa entara mwatani variasaqaa ntaqaihi varira Saataanira kepusa ntuvuraa saani entarave. ³² Mwatataita ni tuaahera saivage ne varigana esaa nraase qora ntarau saarita mwisa ne hianiranigai nrivarave, tiro. ³³ Iesusiva mwi quara tiqaro nai qutu vuanirara tiva nura.

³⁴ Mwitaa tuvata mwini uairama vusa qaqao tita, Kotira vukuqi qara ntuva tova tiqaro, Mesaiaa vaiti Kotira kepusavano esaa enta qaqi varigiro vuanarove, turave. Naraqamave e tiqara, Ni mwatani mwatatai nraaqiarara tuaahera sevarave, tiaro? (E ena qutu vinarara tiana quara sia ntapihuro.) E tiqara, Ni mwatani mwatatai nraaqiaravave, tianarave. E ta vaitivave hiaro? tita.

³⁵ Tuvoro Iesusiva tiqaro, Pataqa ovavano ini sapata varigaro itamaqiro vuanarove. Enta hiraqi nruesa sia nai vi aarara ntapihirara tita, né enta hiaso tita ovavano qaqi ite variiani entaraqaa nrueqata variate.

³⁶ Ovavano qaqi vahiani entaraqaa né mwi ovarara quqaa mwivave tiva seta, mwirara riemwaqi viqatama nruaate. Mwitaa tiqatama né ova nraaqiara variqatama névata ovavano itaintema seta itamwaqita vivarave, tiro.

Iesusiva mwi quara tiva sero mwiraqaatairo uro sia mwisa vuqaa variraitiro, uqeta varura.

Iutaavano Iesusirara sia quqaave tura

³⁷ Iesusiva mwisa vuqaa variqaro nrora saiga varovata mwisa taqetavata mwisa qaqira seta sia mwirara quqaa mwivave tuvarora tiro, ³⁸ mwi entara Asaiaava haaru tu quava quqaa vahura. Haaru Kotiva vaiti mwo Asaiaara saahaqa huvaro Asaiaava poropeti vaitivano variqaro qumina vasa mwaa quara vutu sero tiqaro,

Nroraao, tavave tiri quara quqaave tiso?

Sia mwovanovata quqaave tirave.

Nroraavo nrora saiga vara saisarao tavave mwira saiga ntapihitagaqiso? Sia mwovanovata ntapihitagaqiso sero taqaiso, tura. (Ais 53:1)

³⁹ Asaiaava mwitaa turara tita, mwisa sia Iesusirara quqaa mwivave tura. Asaiaava qaiqaa mesaiaa vaitiara tiqaro,

⁴⁰ Mwi vaitisa uaga hi aarara qaqira seta niara tiri saahaqa hiane tivorave tiva sero, Kotiva mwisa vu nraato tita saisata mwisa sia vuqotaita so taqeta, mwisa sia nraatoqotaita so riaavo, tura. (Ais 6:10)

⁴¹ Asaiaava haaru variqaro Iesusira kepusa osara taqeqarora tiro, mwiva mwirara qua tiva nura.

⁴² Mwi entara Iutaa nrora vaitinramwuqitaita mwonravuvano tiqata, Quqaama Iesusiva mwivave, tita. Mwisu mwitaa tiqata mwisa Parisi vaiti nraatu aatu hita qaqira seta sia qoqaa variqata mwi quara tita. Mwaara nraavuqitaita veva nteta vuate tivorave tita, sia mwisa qoqaa variqata mwi quara tura. ⁴³ Qaqi vaitivano qamwata nateraraqai mwisa nroraqama seta rieqatama sia Kotiva qamwata nataanirara nroraqama seta riora. Mwisu mwiraraqai riosara tita, mwisa sia qoqaa Iesusirara quqaa mwivave tura.

Iesusiva tu quava vaiti ko tianarove tura

⁴⁴ Iesusiva paatiro tiva niro tiqaro, Niara quqaa mwivave tiariva siama niraqai quqaave tianarove. Mwiva ni titairaravatama quqaave tianarove. ⁴⁵ Vaitivano ni tageqaro ni titairavatama taqaanarove. ⁴⁶ Niara quqaa mwivave tiariva rupi hiraqi nruaaso tina, ne ova votima sena itamwagina virera mwatani tuvuvave. ⁴⁷ Ne sia mwatani varisaqaa qua vatarerana tuvuvave. Mwatani variasa sugema variate tina, ne tuvuvave. Ni qua riero ntega saariva variraqaa sia nevauma mwiraqaa qua vataanirave. ⁴⁸ Ni qoririma mataani vaitiraqaave, ni qua ntega saani vaitiraqaave, siama ne qua vataanirave. Ne tiva taani quava, mwivama esaara entaqaa variqaro mwiraqaa qua vataanarove.

⁴⁹ Ne sia nena nraato tusenavauma qua ini tiva nuqo. Ni gova mwitaa mwitaa tiane tiva sero ni titaiana ne mwira qua ini tiva nuqo. ⁵⁰ Ne ntipihi saugaro ni qora qua riaariva esaa enta qaqi variqiro vuanarove. So ni gova mwitaa mwitaa tiane ti quara, ne mwi quara ini tiva nuqo, tiro. Iesusiva mwitaa tura.

13

Iesusiva nai nraaqiaranravu suqu hiqama mwatora

¹ Vesahu nato sarara omwata nro entava kuaa entaqai qaqi vahuvaro Iesusiva variqaro ntipihi sovaro nai mwata mwaini sero uto ntantero nai gova varinani vuari entava qaumato vahura. Mwitaa huvaro Iesusiva variqaro nai husa mwatani varusara mwoqama sero mwutusa vahuvaro mwisara rieqaro varura. Mwiva mwisara mwutusa vahuva qaqiqai vahiqiro vuvaro uro qutu vura.

² Entama vuvaro Iesusiva nai nraaqiaranravu sapata sara nre varuvaro mwira nraaqiara mwovano Iutaasi Isikeriotiva Saimonira mwaaquvano varuvaro Saataaniva Iesusira qovarama saane tiro, Iutaasira mwira nraatoqi qora qua vatovaro Iutaasiva Saataanira qua riora. ³ Riero varuvaro Kotiva esaa inraisa Iesusira sauguqi vatora Iesusira vu nraatoqi vahuvaro mwirara ntipihi sero. Iesusiva Kotiva hunatairo tuvuvu qaiqaa Kotiva hunani vuanira mwiaravata mwiva ntipihi sora.

⁴ Mwiraqaatairo mwiva sara nro taintaraqaatairo tiviro verato ututo tuavaaqara ntatu sero vatero tauri tavaarana rupatero uro ⁵ tanaaqi nramari rauru sero varero uro nai nraaqiaranravu suqu hiqama natero tauri tavaarana rupatoraqotai aahara tu natero.

⁶ Mwitaamaqiro viro Saimoni Pitaava hunani nri ntovaro Pitaava qaqao tiro, Nrora, e ni suquvatave hiqama matarera uti variaro? tuvoro ⁷ Iesusiva tiqaro, Mate ne mwaa saiqara varaura e sia ntipihiaro. Naatiara mwirara so ntipihinarave, tiro. ⁸ Tuvoro Pitaava tiqaro, Qaqao, e nrora vaitivano varigara hauri mwitaa hi saiqara ni vara materorave. E siama ni suqu so hiqenarave, tiro.

Tuvoro Iesusiva tiqaro, Sia ne i suqu hiqama mwataasera, e siama ni nraaqiara varinarave, tiro ⁹ Mwitaa tuvoro Saimoni Pitaava tiqaro, Nrora,

mwitaa hirara e sia ni suquqai hiqama mataane. Ni sauquvata ni qiatavata hiqama mataane, tiro.

¹⁰ Tuvaro Iesusiva tiqaro, Nramari ntuva taariva siana qumina qaiqaa ntuanarove. Mwiva nai suquqaima hiqaanarove, tiro. Né esaa nramari ntuvase sugema variavaro kuaikuvanoqai sia sugema variso, tiro.

¹¹ Iesusiva nai nraaqiara mwovano mwira qovarama saanira ntapihi serora tiro, mwiva tiqaro, Né esaa sugema variavaro kuaikuvanoqai sia sugema variso, tiro.

¹² Mwitaa tiva sero mwisa suqu hiqama natero Iesusiva qaiqaa uro nai tuavaaqa ntatuse vatora vara utu varero uro nai varura qoqaraaraqaa mwataasaa viro variro tiva niro tiqaro, Ne mwataa hi saiqara ini vara nataura né so mwirara ntapihitave hiavo? ¹³ Né niara nrora vaiti mwaara ti variaravave tiarave. Ne mwitaama varurara tita, né soma niara mwitaa tivarave. ¹⁴ So ne ini nrora vaiti mwaara ti varuva variqanama ne ini mwataa saiqara vara nateqanama ini suqu hiqama natauqo. Névata variqata ne huntama seta nai suqu nai suqu hiqama nateqata variate. ¹⁵ Né ne hunte hiate tina, ne ini mwi saiqara tiva nuqo. ¹⁶ Ne quqaa tianira né riaate. Saiqa vaitivano sia nai nrora vaiti nraafara sairave. Mwo inraisara titaaisaro vi vaitiva sia nai titaira mwira nraatara sairave. ¹⁷ Né mwi quara osara ntapihi seta rieta mwi saiqara mwitaamase varaqi vivera, né qamwateqatama variqi vivarave.

¹⁸ So sia ne ini esaasara tuqo. Ne nena mwatama tau nraaqiarasa so ntapihi taqaurave. Ne mwisa osara ntapihi saurave. Haaru Kotira vukuqi qua mwo qara ntuva tova mate quqaa mwivauma vahianarove. Mwi quava mwitaama tiro:

Vaiti mwovano nivatama sero variqaro ni sara nrero mwiraqaatairo tuqataa viro ni qoraqama mataanarove, turave. (Sng 41:9)

¹⁹ Iniqitairo vaiti mwovano ni qoraqama mataanirara ne mate ini tiva ni varuqo. Mwiva naatiara ni qoraqama matairata né variqata mate ne tiva nunrara rieqatama so niara mwiva quqaama qaqiqai variqi vivave tiarave. ²⁰ Ne quqaa tianira né riaate. Vaiti mwovano ne titaani vaitira qamwata mwateqaro mwiva nivata qamwata mataanarove. Mwiva ni qamwata mateqaro Kotiva ni titairavata qamwata mwataanarove, tiro.

Mwovano Iesusira nravutaara sauquqi saanirara tura

(Matiu 26:20-25; Maaki 14:17-21; Ruku 22:21-23)

²¹ Iesusiva mwitaa tiva sero varuvaro mwira mwutusavano uaqqa huvaro mwiva vutu sero mwisa tiva niro tiqaro, Ne quqaa tianira riaate. Iniqitairo mwovano ni rusaate tiro, uro tiva nianarove, tiro. ²² Mwitaa tuvata mwira nraaqiaranravuvano nai taqe nai taqe hita airi nraato tita tiqata, Iesusiva ta vaitirarave tiso? tita.

²³ Mwitaa ti varuvaro mwovano Iesusira mwutusavano mwirara mwoqavata vahu vaitiva Iesusira tataaqani varuvaro ²⁴ Saimoni Pitaava mwirara nru nraato sero tiqaro, E Iesusira ta vaitiva mwitaa hianira sapara hiqara taqaane, tuvaro ²⁵ mwi vaitiva Iesusiraqaa urovi vuntuvi variro Iesusira sapara hiro tiqaro, Nrora, mwiva ta vaitivave iso? tiro. ²⁶ Tuvaro Iesusiva mwira tiva mwiro tiqaro, Ne mpereti viti nramari tanaaqi vahiraqi mwaati ntava sena vaiti mwo mwiariva so mwira mwi vaitivave, tiro. Tiva sero mpereti viti vara sero nramariva viti mwo Iutaasira viti mwura.

²⁷ Mpereti viti mwira mwuvaro Iutaasiva mwira varovaro Saataaniva Iutaasira vutaqi viqetero varuvaro Iesusiva Iutaasirara tiqaro, So santera ena vararera tina saiqara varaane, tiro. ²⁸ Mwitaa tuvata mwira nraaqiara

sara taintaqaa varusaqaitairo sia mwovano mwi quara osara ntapihura. ²⁹ Mwisa tiqata, Iutaasiva munimaqaa ntaqaihi vari vaitiva varisaro Iesusiva hura omwata nraana sarara varaaneve tiso, mwiva vehi vaiti munima uro nianeve tiso? tita. ³⁰ Mwisa mwitaa ti varuvaro Iutaasiva Iesusiva mpereti viti mwura varero mwiraqaatairo veva ntero viro. Entaqi mwiva vurama.

Iesusiva qaraaha qua mwaara tiva nura

³¹ Iutaasiva veva ntero vuvaro Iesusiva tiqaro, Ne mwatani mwatatai nraaqiaravave. Mate ni kepusa osaravano qovarama viso. Ne Kotira kepusa osara mate qovarama saugo. ³² Ne Kotira kepusa osara qovarama saasera, Kotiva mwiva ni kepusa osaravata qovarama saanarove. Mwiva gamwanrama mwitaa hianarove.

³³ Qike, ni nraaqiaranravu tuaavo, ne inivata pataqa varisena vuarita né naatiara qumina niara huaa hivarave. Ne Iutaa vaiti nroranravu tiva nuntema sena inivata tiva nuqo. Ne virera hianirani né sia so vivarave, tuqo. ³⁴ Ne mate qaraaha qua mwaara ini tiva niarita né riaate. Né mwoqama seta nariara nariara mwutusa vahirata variate. Ni mwutusakano iniara vahintema seta névata nariara nariara mwutusa vahirata variate. ³⁵ Né nariara nariara mwutusa vahirata varivata nraase qora ini taqeta mwisa né Iesusira nraaqiarama variavo tivarave, tiro.

Pitaava ne sia Iesusira taqaurave tianirara Iesusiva tura (Matiu 26:31-35; Maaki 14:27-31; Ruku 22:31-34)

³⁶ Iesusiva mwitaa tuvaro Saimoni Pitaava mwira sapara hiro tiqaro, Nrorao, e taini virerarave tiaro? tuvaro Iesusiva tiqaro, Ne virera hianirani e siama so ni vataqira vinarave. E naatiarama ni vataqira vinarave, tuvaro Pitaava tiqaro, ³⁷ Nrorao, naraqamave ne sia so mate i vataqina vuanirave? Ne iara rieqana soma qutu vuanirave, tiro.

³⁸ Tuvaro Iesusiva tiqaro, Quqaave e niara rieqara qutu vinarave? Ne quqaa tianira riaane. Kokoraaravano sia nruqua tirara e taaramwo nani niara ne sia mwira taqaurave tinarave, tiro.

14

Kotiva hinani vua aarava Iesusivama

¹ Iesusiva nai nraaqiaranravu tiva niro tiqaro, Sia niara riaivaro ini mwutusakano uqa hiarive. Né Kotirara kepusaqamase riemwaqita vuanema seta niaravata kepusaqamase riemwaqita vuete. ² Ni qora mwaatani airi mwo nraavu mwo nraavu vaisana ne iniara rieqana uro tequama natarerana vuqo. Sia mwitaama vahitiri, ne siama ini tiva nutiri. ³ Ne uro ini tequamateni uro ntantena uto ini vitaqina uro nena varianirani saarita, né nivata varivarave. ⁴ Ne virera hu aarara né ntapihi saarave, tiro.

⁵ Tuvaro Tomaasiva qaqao tiro, Nrorao, te e virera hianara sia ntapihi sauro. Nataama setave te mwi aarara ntapihi saanarave? tiro.

⁶ Tomaasiva mwitaa tuvaro Iesusiva mwira tiva mwiro tiqaro, Ne Kotiva hinani vua aarava mwaa mwivama varuqo. Ne quqaa osara mwaa mwivama varuqo. Ne qaqi variqi vua osarava mwaa mwivama varuqo. Sia mwo aaraqaaqama tero ni qova hinani vuariva vaiso. So ne mwaa aara mwivama varuqo. ⁷ Né ni ntapihi seta taqaasara tita, né ni qoravata ntapihi seta tagevarave. Mate mwaa entaraqaaaita né ni qora ntapihi setama né mwiravata taqaasama variavo, tiro.

⁸ Mwita tuvaro Piripiva tiqaro, Nrora, so ena qora tiri tiri tiva timwiraqe te mwira taqeta sove tiare, tuvaro ⁹ Iesusiva mwira tiva mwiro tiqaro, Piripio, ne ini sapata muahaama varugara e siave ni ntapihi sera taqaaro? Ni taqaiva ni qoravatama taqaiso. E naraqamave niara tiqara ena qora tiri tiva timwiane tiaro?

¹⁰ Piripio, ne nena qoraqi varugaro ni qova niqima variso. E siave mwi quarara quqaave tiaro? Ne ini tiva nu quara sia ne nena riemwa seganavauma ini tiva nuqo. Ni qova niqi variva, mwiva variqaro nai saiga vare variso. ¹¹ Ne nena qoraqi varugaro ni qova niqima variso. Mwi quarara quqaave tiare. Né sia niara riaivera, né ne saiga varaurara rieqata niara quqaa mwivave tiare.

¹² Ne quqaa tianira riaate. Niara quqaa mwivave tiva sero riemwaqiro vuariva, mwiva variqaro ne saiga varauntema sero saiga varaanarove. Ne nena qova hinani vuanirara tiro, mwira saiqavano ni saiga nraatara saanarove. ¹³ Né ni saiqara rieqata soma né mwo inraisararave, mwo saiqarave, ni sapara hivaqe ne ini nianirave. Né ni qora kepusa osara taqaate tina, ne mwira mwaaquvano mwitaa hirerave. ¹⁴ Né ni saiqara rieqata so né mwo inraisa mwo inraisara ni sapara hivera, ne ini nianirave.

Kotira Mwaraqura vara saairi tuvuanirave tura

¹⁵ Ini mwutusakano niara vahirera, né ni quaqai riemwaqita vivarave. ¹⁶ Ne nena qora sapara hiariro mwiva ini saahaq hianira Kotira Mwaraqura quqaa quaqai ti varianira titairaro ini alriqa hireraro uto esaa enta inivata varianarove. ¹⁷ Qaqi nraase qora mwatani variasa sia Kotira Mwaraqura taqeta mwisa sia mwira ntapihi saarara tita, mwisa sia mwira so varevarave. Né mwira taqaavaro mwaa entara mwiva inivatama variso. Naatiara mwiva iniqima varianarove.

¹⁸ Sia ne ini mwaini sena vuarita né nrairara nraaqiara votima seta varivarave. Ne ini saarinani uro ntantena tuvuanirave. ¹⁹ Pata iharaq mwatani variasa sia ni taqaivata néqai ni tagevarave. Ne qaqi variqina vuariva varurara tita, névata qaqi variqita vivarave. ²⁰ Mwi entara ne nena qoraqi varurave, né niqi variarave, ne iniqi varurave, né ntapihi sevarave.

²¹ Ni qua varase tutero mwi quara vataqiro vuanira mwira mwutusakano niara vahianarove. Niara mwutusa vahiariva variraro ni qora mwutusakano mwirara vahianarove. Ni mwutusakano mwira vaitirara vahianarove. Ne variqana mwi vaitira nena osara qoqaa tiva mwianirave, tiro.

²² Tuvaro Iutaasiva sia Iutaasi Isikeriotiva mwo Iutaasiva tiqaro, Naraqamave e ena osara tiriqai tiva timwiqara sia mwatani variasa tiva ninarave? tiro.

²³ Iutaasiva mwitaa tuvaro Iesusiva tiqaro, (Mwatani variasa siama niara mwutusa ntisata variavo.) Vaitivano niara mwutusa vahiariva, mwiva ni qua riemwaqiro viraro ni qora mwutusakano mwirara vahianarove. Nevata ni qovavata mwi vaitiraqi uro varianarave. ²⁴ Vaiti mwovano sia niara mwutusa vahiariva, mwi vaitiva ni quavata sia vataqiro vuanarove. Ne ini tiva nu quara sia nena nraato tusena ini tiva nurave. Ne ni qoraqaatana mwi quara varena uto ini tiva nurave. ²⁵ Ne mate inivata varu entara mwaa quara ini tiva nuqo. ²⁶ Ne vuariro ni qova ini saahaq hianira nai mwaraqura titairaro mwiva ni saiqara rieqaro uto variqaro esaa inraisa ini tiva niqaro ini vu nraatovata saahaq hirata né ne tu quara ntapihi riemwa tevarave.

²⁷ Ne virera higanama iniara mwaateraqama varivaro ini mwutusavano qihaasa hirata variare, tuqo. Mwaa mwatanaasa niari nariara nariara qua mwanteta tiqata, Mwaateraqama sera variane, ti variarave. Niari mwitaa tiqata qumina quaqai ti variarave. Ne iniara mwaateraqama seta variare tu quava siama qumina quave. Né ni qua riemwaqita vivaro ini mwutusaqitairo qihaasama vahirata sia aatu hivaro ini mwutusavano siama uqaq hianarove.

²⁸ Ini sena vuariva uro ntantena tuvuanirave tu quara né vaasa riaarave. Ni qova ni naatara sero nroravano varirara tita, ini mwutusavano niara quqaqama vahirera, ne nena qova hinani vuanirara né qamwateqata varivarave. ²⁹ Mwi inraisava mwi inraisava naatiara mwitaa mwitaa hianirara ne mate ini tiva nuqo. So naatiara né taqaivaro mwi inraisava qo-varamaqiro virata né niara tiqata mwiva tu quava mate quqaa mwivauma vaiso tivarave.

³⁰ So mwaa entara mwatani variasaqaa ntaqaihi variva, Saataaniva, nrima varisanara tina, mwira saara ne sia ini sapata muahaa qua tianirave. Mwira kepusavano sia ni so nraatara saanarove. ³¹ Ni mwutusavano ni qorara vahira mwatani variasa taqaate tina, ne ni qora qua vataqina virerave. So varaivaqenravu mwaaqitaita vevante vuare, tiro. Iesusiva turama.

15

Iesusiva uaini saantaqa ntuva sero tiva nura

¹ Iesusiva mwo quaqaa ntuva sero nai nraaqiaranravu tiva niro tiqaro, Ne uaini apa suqeva varuqaro ni qova uainiqaa ntaqaihi varivama varisata né uaini mware saarama variavo. ² Ni qova taqaisaro saara mwovano sia tava riaisaro mwiva mwira teqa qaqira sero uro taqaisaro mwo saaravano sugema sero tava riemwa taisaro mwiva sugema vahiqaro mwoqavata riaarive tiro, mwira rapatu sero vatairave. ³ Ne tu quava ini vaasa rapatu sero vataisatara tita, né soma variavo.

⁴ Né niqi varivaqe ne iniqi variase. Saara mwovano nariaraqama vahiariva siama so tava riaanarove. Saara mwiva apaqaa ntaaqau vahiariva so tava riaanarove. Mwira votima seta né sia nivatama seta ntaaqauvi varivera, né siama so tava rievare.

⁵ Ne uaini apa varuqata né sauqu saarama variavo. Ni vatama sero variraqe ne mwira vatama sena variariva, mwivama tava airi riaanarove. Né sia nivata ntaaqauvi variraitita né nétaraa varivera, né siama so mwo saiqavata varevarave. ⁶ Sauqu saara qaqira sairaro aaharama vuarintema sero sia nivata ntaaqauvi variani vaitira ni qova qaqira saanarove. Qaqira saani saarara mwira naatiara ntupi sero varaqiro tiaqi tuto sairaro itamwa taiga saanarove.

⁷ Né ni vatama seta ntaaqau vita varivaro ni quavano iniqi vahirera, né Kotirara néta mwutusa vahiani inraisarara sapara hivaro ini nianarove.

⁸ Né ni qua riemwaqi viqata uaini saanta votima seta airi tava riaivaro ni qora nrutuvano nroraqaa hiarive. Né mwitaamaqi viqata né quqaqama seta ni nraaqiara varivarave.

⁹ Ni qora mwutusavano niara vahintema sero ni mwutusavanovata iniara vaiso. Ni mwutusavano iniara vahira mwiqi variare. ¹⁰ Ne ni qora qua riemwaqina vi varuqaro mwira mwutusavano niara vahirave. Mwitaa huntema seta névata ni qua riemwaqita vivera, né ni mwutusavano iniara vahiraqi varivarave. ¹¹ Ni mwutusaqi suqe hintema sero ini

mwutusaqivata suqe hirata nroraqamase gamwateqata variate tina, ne mwaa quara ini tiva nuqo.

¹² Ne mwo qua tianira né mwi quara riemwaqita vuata. Ni mwutusavano iniara vahintema seta névata nariara nariara mwutusa vahirata variate. ¹³ Vaitivano nai nravunaasara mwutusa vaisaro mwisara rieqaro qutu virave. Mwitaama sero nai hena sara mwutusa vahiariva mwosara mwutusa vahi osarara esaa nraatara sero nritarero vahianarove. ¹⁴ Né ni qua riemwaqita vivera, né ni nramwunaasama varivarave. ¹⁵ Saiqa vaitivano sia nai nrora vaitivano mwitaa mwitaa hiani osarara ntipihirara tina, ne siana iniara ni saiqa vaitive tivaqina vuanirave. Ne iniara ni nramwunaasave tivaqina virerave. Ne ni qora qua riaura esaa ini tiva nunrara tina, ne mwitaa tirerave.

¹⁶ Sia né ni nraaraarave. Ne ini nraaraarave. Ne ini nraaramase vita sena iniara uro satarivano tava riaintema seta suqe tava muahaama vahiani tavara riemwataate turave. Né mwitaa hivera, né ni nrutuarave, ni saiqarave rieqata nara inraisarave ni qora sapara hivaro mwiva ini nianarove. ¹⁷ Ne mwaa quara iniara mwitaa hiatema tuqo. Né nariara nariara mwutusa vahirata variqita vuata.

Mwatani variasa ini nravutaaqa hivarave tura

¹⁸ Mwatani variasa ini nravutaaqa hivera, né ntipihiate, mwisa ni nraante nravutaaqama taasara titama, inivata nravutaaqa hivarave. ¹⁹ Né mwata mwainiaasa varivatavauma mwisa iniara tiri nravunaasave tiqata iniara mwutusa vahirata varivarave. Ne mwatani variasaqitaina ini nraarama saugata né sia mwisanigama variavo. Né sia misanigama variarara titama, mwisa ini nravutaaqa hi variavo.

²⁰ Ne vaasa tiva nunrara riaate. Sia saiqa vaitivano nai nrora vaiti nraatara sairave. Mwatani variasa ni uaqama matesara tita, mwisa inivata uaqama natevarave. Mwisa ni qua riesavauma ini quavata rievare.

²¹ Né ni nraaqiara variavatara tita, mwisa mwira saara inivata qoraqama natevarave. Ni titaira sia ntipihiasara tita, mwisa mwitaa hivarave. ²² Ne sia uto mwisa tiva nutirio, mwisa qora saiqa utuarara siana qua vahitirio. Ne uto mwisa tiva nunrara tiro, mwiraqaatairo mwisa qaqao sia mwira riaunarave ti quava siana vahianarove.

²³ Vaitivano ni nravutaaqa hiqaro ni qoravata nravutaaqa hianarove.

²⁴ Mwo saiqa mwo saiqa sia mwisa so varaa saiqara ne mwi saiqara mwisa vuqaa variqana vare varuvave. Sia ne mwitaa hutirio, siana mwisaqaa qua vahitirio. Mwisa ni saiqa taqeta ni qaqira seta nivata ni qoravata nravutaaqa hiavo. ²⁵ Mwisa mwitaama variavaro qua mwo haaru gumina vasa qara ntuva tova mate ntipihi sero mwivauma viso. Mwi quava mwitaama tiro:

Sia mwo quavata vahirata guminaqama seta mwisa ni nravutaaqa hivarave, turave. (Sng 35:19)

²⁶ So ini saahaqa hiariva mwovano tuvuanarove. Mwiva Kotira Mwaraguravano quqaa quaqai ti variva, mwiva Kotiva hinatairo tuvuanarove. Ne mwira nena qoraqaataina titaariro mwiva uto variqaro niara ntipihi sero ini tiva nianarove. ²⁷ Névata vuni nivatama seta variqi vuasara tita, né soma ni saiqa osarara mwo mwatanaa mwo mwatanaasa tiva niivarave.

16

¹ Né naatiara pupohairata ni qua qaqira sevo tina, ne mwi quara mwi quara ini tiva nuqo. ² Naatiara mwisa ini irora hiqata mwaara nraavuqitaita ini

raaqu sevarave. Mwo enta nrintairata mwisa ini ru seta tiqata, Te Kotira saiqama vare varuro, tivarave. ³ Mwisa niaravata ni qoraravata sia ntapihi seta riaasara tita, mwisa mwitaa hivarave. ⁴ Ne mwaa entara naatiara ini uaqama naterara tiva nuqo. Naatiara mwisa mwitaa mwitaa hivata né mwi entara ne mate mwaa quara turara nraato tuate. Tauraa ne inivata variqanara tina, sia ne mwi quara mwi quara ini tiva nurave.

Kotira Mwaraqura saiqara Iesusiva tura

⁵ So ne pataqa vari sena ni titaiva hinani virerave. So ne mwini virerana uti varuqaro siama inigitauro mwovano tiqaro, E taini virerarave hiaro? tiso.

⁶ Ne vaasa turara né rie variavaro ini mwutusavano uaqa isata variavo. ⁷ So ne quqaama tuqo. Ne sia vuariro ini saahaqa hiariva sia so tuvuanarove. Ne vuariva soma uro mwira titaariro né hinani tuvuanarove.

⁸ Kotira Mwaraquravano uto variqaro mwiva mwatani variasa taaramwo inraisara tiva nianarove:

(1) mwisa uaqa hi saiqarave

(2) suqe saiqa osararave

(3) Kotiva ko tiani osararave

⁹ (1) Mwisa uaqa hi saiqara:

Mwatani variasa sia niara quqaa mwivave tisara tita, mwisa uaqa hi saiqara utira mwiva tiva nianarove.

¹⁰ (2) Suqe saiqa osara:

Ne nena qova hinani vuarita né sia qaiqaa ni taqerara tiro, mwiva variqaro suqe saiqa osara ini tiva nianarove.

¹¹ (3) Kotiva ko tiani osarara:

Mwaa mwataraqaa ntaqaihi variva Saataaniva ko sia nraatara sairara tiro, mwiva Kotiva ko tiani osarara mwatani variasa tiva nianarove.

(Kotira Mwaraquravano mwitaama tiva nianarove.)

¹² Ne mwo qua mwo qua ini tiva niariva vaisatavata, né sia mwi quara so rierara tina, mate ne sia mwi quara ini tiva ninerave. ¹³ Quqaa quaqai ti variari mwaraqurava uto ntero, mwiva variqaro ini vita varero ini suqe aara tiva niqaro quqaa qua osara esaa mwi osarara ini tiva nianarove. Mwiva sia nai vu nraato tuani quarara tiraitiro, mwiva riaani quaraqaima tiva nianarove. Naatiara mwi inraisava mwitaa mwitaama qovara hiani inraisarara mwiva ini tiva nianarove.

¹⁴ Mwiva ne qua tianira mwi quara ini tiva nianirara tiro, ni nrutuvano nroraqaa hianarove. ¹⁵ Esaa ni qova hi inraisava nini vahirara tina, ne vaasa tiqana, Kotira Mwaraqura mwiva ne hu inraisarara riero vara sero ini tiva nianarove, turave. ¹⁶ So pataqa né varita sia ni tagevarave. Mwiraqaataita pataqa né varita qaiqaa ni tagevarave, tiro.

Ini mwutusavano uaqa hirata variqita vivaro mwiraqaatairo ini mwutusavano sugema vahirata varivarave, tura

¹⁷ Iesusiva mwitaa tuvata mwira nraaqiara mwonravuvano nai tiva mwi nai tiva mwi hita tiqata, Mwiva nara quave tiso? Mwiva tiqaro, Pataqa né varita sia ni tagevarave, tiva sero qaiqaa tiqaro, Né vari seta ni qaiqaa tagevarave, tiso. Mwiva mwitaa tiva sero nai qova hinani vuaniraravata tiso. ¹⁸ Mwiva né pataqa vari setave ti quara, sia te mwi quara ntapihi riauro, tita.

¹⁹ Mwitaa ti varuvaro Iesusiva ntapihi sovata mwisa mwi quarara mwira sapara hirerata uti varuvaro Iesusiva tiqaro, Ne vaasa turara né pataqa varita sia ni tagevarave mwiraqaataita pataqa varita qaiqaa ni tagevarave turave. Né mwi quararave nai sapara hi nai sapara hi variavo? ²⁰ So ne

quqaa tianira riaate. Né nteqata atura ntiga variqi vivata mwatani varisa qamwateqata varivarave. Ini mwutusavano uqa hirata variqita vivaro mwiraqaatairo ini mwutusavano sugema vahirata varivarave.

²¹ Nraasevano nraaqiara mwataariva qaumato vaisarora tiro, mwiva atura ntirave. So mwi nraaseva nraaqiara mwata sero mwiraqaatairo tigaro, Ne nraaqiara mwata sauqo, tiva sero qamwateqaro nai atura ntirara tauru sairave. ²² Névata mwitaa hivarave. Mwaa entara ini mwutusavano uqa hirata varivarave. So naatiara ne ini uro taqaariro ini mwutusavano suqe hirata so varivarave. Varivaro mwovano sia so ini qoraqama natairaro ini mwutusavano uqa hianarove.

²³ Mwitaa hirata mwi entara né mwo inraisara ni sapara hiva siana vahianarove. Ne quqaa tuqo. Mwi entara né ni qorara mwo inraisara mwo inraisara mwira sapara hivaro mwiva ni saiqarave, ni nrutuarave, riegaroma ini nianarove. ²⁴ Tauraa né variqata sia ni saiqarave ni nrutuarave rieqata ni qora sapara hiarave. Mwaa entaraqaataita né ni qora sapara hivaro ini mwutusa suqe hiarive tiro, ini nianarove.

Iesusiva mwata mwaaqaanaa osara nraatara sairave tura

²⁵ Ne mwo quaqaa ntuva seqana mwo qua mwo qua ini tiva nurave. So mwo enta nri ntairage ne sia mwo quaqaa ntuva sena ini tiva niraatina, mwi entara ne nena qorara ini tiva nirera ne vutu senama ini tiva nianirave.

²⁶ Mwi entava nri ntairata soma né ni nrutu nteqata ni qorara sapara hivaro ini nianarove. Sia ne iniara rieqana nena qora sapara hianirave. (Nétavano so mwira sapara hivarave.) ²⁷ Ni gova iniara mwutusa ntisaro varirara tita, nétavano soma mwira sapara hivaro ini nianarove. Né niara tigata, E Kotiva hinataira tuvuaravave, tiavaro ini mwutusavano niara vaisata variarara tiro, ni qora mwutusavanovata iniara vaisaro variso. ²⁸ Ne nena gova hinataina mwatani tuvuvave. Ne qaumama mwaa mwatara mwaini sena nena gova hira qoqaraanani vuanirave, tiro.

²⁹ Mwitaa tuvata mwira nraaqiaranravuvano sove tita, Mate e sia mwo quaqaa ntuva sera tiraitira, e vutu serama tiri tiva timwi variaro. ³⁰ Mate te ntipihi saurara e esaa inraisara ntipihi saarava variarata te siana i qaiqaa sapara hianarave. Mate te tiqata, Quqaama e Kotiva hinataira tuvuaravave turo, tita.

³¹ Mwitaa tuvaro Iesusiva tigaro, So mateve né ni osarara ntipihiavo?

³² Mwo enta nriariva qaumatoma vaiso. Mwi entaraqaa ini vara aaraupima saivata né mwona mwonamate néta mwaatani vivu saavuma vivarave. Ni gova nivatama sero varirara tina, ne mwi entaraqaa siana nenaraa varianirave. ³³ Né nivata varivaro ini mwutusa qihaasama vahiarive tina, ne mwaa quara ini tiva nuqo. Né mwatani varivata mwisa ini uaqama natevarave. So kepusaqama seta variate. Ne mwataniaa osara nraatara saurave, tiro. Iesusiva turama.

17

Iesusiva Kotirara aasara nteqaro tura

¹ Iesusiva mwi quara tiva sero mwiva naavuni tageqaro Kotirara aasara ntero tigaro, Kaao, mate mwaa ni entama nri ntaiso. So e ni kepusa osara qovarama matairage ne i mwaaquvano variqana ne ina kepusa osara tiva niase. ² E nraase qora ni miarasa ne mwisa saahaqamaqina vuarita mwisa esaa enta qaqi variqita vuata tira, e ni nroraqama saarana ne esaa nraase qoraqaa ntaqaihi variqana ne mwisa nroravano varuqo. ³ Nraase qora esaa enta qaqi variqi vi osarava mwataamama vahiho: Nraase qora iara

ntapihise rieta tiqata, Kotivaqaima quqaa mwariqa kuaigavano variqaro Iesusi Karaisira titairave, tisa, mwisa mwi osarara varevara.

⁴ Ne mwatani variqi vina i kepusa osara nraase qora tiva niqana e saiga mianara vara taiga saugo. ⁵ So kaao, haaru sia mwaa mwatawavata vahu entara ne ivata variqi vuavaro ni kepusa osaravano vahurave. So mate e ni kepusa osara mwira tiva nirata mwisa taqaate. ⁶ Mwataniaa vaitinravu ni miarasa ne mwisa i osara tiva nurave. Mwi vaitisa ena hiarasa ena mwisa ni miarata mwisa variqata i qua riemwaqita vuavo. ⁷⁻⁸ E qua ni tiva mianara ne mwisa tiva nuqata mwisa mwi quara varaarave. Mwisa ntapihi saavana ne quqaa e hianarataina tuvugata mwisa niara quqaa Kotiva mwira titairave tiarave. Mwitaa tiqtara tita, mwisa ntapihi seta riaavaro e esaa inraisa ni miarava mwi inraisava e hianaratairo tuvirave.

⁹ So ne mwisara rieqanama iara aasara nte varuqo. Siam ne esaa nraase qora mwatani variasara aasara nte varuqo. E nraase qora ni miarata mwisa ini variarara tinama, ne mwisara rieqanama iara aasara nte varuqo. ¹⁰ Ne husa e hiarasama variavo. E hiarasa ne husama variavo. Mwisa variqata ni kepusa osara mwo hiasa tiva ni variavo.

¹¹ Ne sia mwaa mwataraqaa variarita mwisama mwaa mwataraqaa varivarave. Ne e hianarani virerave. So kaao, e sotataqama sera variaravave. E ena kepusa nrutu ni mianara mwi kepusaraqotaira mwisa antuaraqira virata mwisa tetana kuaaqi varurantema seta mwisavata variate. ¹² Ne mwisa sapata variqana e ena kepusa nrutu ni mianara mwi kepusaraqotaina mwisa antuaraqina vugata sia mwisaqitairo mwoqavanovata raupirima viso. Vaiti kuaigavanoqaima raupirima viso. Mwiva raupirima vuanirara haaru qaqi vasa mwovano mwirara qara ntuva tero mwitaa hianarove turaqara tiro, mate mwitaama viso.

¹³ So ne ivata varirerana virera uti varuqo. Ni mwutusavano qamwatero suqe hintema sero mwisa mwutusavanovata qamwatero suqe hiarive tina, ne mwata mwaini variqana mwaa quara mwitaa tuqo. ¹⁴ Ne i qua mwisa tiva nuqata mwisa mwatani variasa nruaa aarara qaqira seta mwisa ne sia mwata mwaaqaanaava varuntema seta mwisavata siama mwata mwaaqaanaasa variavo. Mwitaama variavatara tita, mwatani variasa mwisa nravutaqa hi variavo.

¹⁵ So ne sia mwata mwaaqaataira mwisa vitaanera i sapara huqo. Qaqao, ne iara tiqana, E mwisaqaa ntaqaihiqira viraro uqaq hi vaitiva sia mwisa uaqama nataarive, tuqo. ¹⁶ Ne sia mwata mwaaqaanaava varuntema seta mwisavata siama mwata mwaaqaanaasa variavo. ¹⁷ E quqaa quaqotaira mwisa saahaqa hirata mwisa i aaraqaaqai nruaate. I qua quqaa quama vaiso. ¹⁸ E ni mwata mwaini titaarana tuvuntema sena, nevata mwisa mwo mwata mwo mwatani titarerave.

¹⁹ So ne mwisara rieqana kuaa saiqaqai vararerana varuvave. (Ne mwisara rieqana qutu vuataa hirage qutu virerana varuqo.) Ne mwitaa hiarita mwisa quqaqama i nraaqiara variqata i aaraqaaqai vivarave.

²⁰ Sia ne mwisaraqai rieqana iara aasara ntaugo. Naatiara mwo hisa mwisa qua rieqatama niara quqaa mwivave tisa, ne mwisaravata rieqanama iara aasara ntaugo. ²¹ Mwisa kuaaqi variate tina, ne iara aasara ntaugo. E niqi variarana ne iqi varuqo. Kaao, mwisa tiritana votima seta variate tira, e mwisa saahaqa hirata mwisavata tiritanaqi variate. Mwatani varisa niara quqaa Kotiva mwira titavave tiate tira, e ni nraaqiaranravu saahaqa hirata mwisa kuaaqi variate.

²² E ni nrutu nroraqama saarana ne kuaaqarama sena mwisa nrutu nroraqama saugo. Mwisa tetana kuaaqi varurantemase mwisavata kuaaqi variate tina, ne mwisa nrutu nroraqama saugo. ²³ E niqi varirage ne

mwisaqi variarita mwisa kuaaqi variqatama mwoqavata kepusaqama hivarave. Mwisa mwitaama varivata qaqi nraase qora mwatani varisa e ni titaanarara ntapihita i mwutusavano niara vahintema sero i mwutusavano ni nraaqiaranravuaravata vahianiravata tagevarave.

²⁴ Kaao, haaru sia mwaa mwatava vahu entara e niara mwutusa vahuvarara tira, e ni nroraqama soraro ni osara kepusa osaravano vahuvana variavarave. E nraase qora ni miarasa mwisavata ni kepusa osara taqaate tina, ne tiqana, Ne varianirani mwisavata varivarave, tuqo. ²⁵ Kaao, e avuqavuma sera variaravave. Qaqi nraase qora mwatani variasa sia i ntapihi saavana neqai i ntapihi saurave. E ni titaanara mwaa nraaqiaranravusaqai mwira ntapihi saarave.

²⁶ Ne iara mwisa tiva nuqata mwisa i ntapihi saarave. I mwutusavano niara vahintema seta mwisavata mwosara mwutusa vahirata varivaqe ne mwisavata kuaaqi variqina vuase tina, ne mwisa iara mwoqavata tiva niqi vuarita mwisa ntapihi rievavarave, tiro. Iesusiva nai qorara aasara nteqaro mwitaa tura.

18

Iesusira ntavaaqavu sora

(Matiu 26:47-56; Maaki 14:43-50; Ruku 22:47-53)

¹ Iesusiva mwitaama sero Kotirara aasara tiva taiga sero mwiva nai nraaqiaranravu vatama sero vuva uro Kitaroni pata nramariqaru qarero oripi satari saqava tutoraqi vura.

² Iesusiva airi enta nai nraaqiaranravu sapata mwiqi uro varurara tiro, Iutaasiva Iesusira nravutaasa sauquqi saariva mwira ntapihi sora.

³ Iutaasiva ntapihi sero uro Kotira saiga vara mwate varu vaitisa mwisa nrora vaitinravuvata, Parisi vaitinravuvata, tiva nuvata mwisa kamanira porisinravu Iutaasira mwita saiga vaitinravuvata mwira mwuvaro Iutaasiva mwisa vita varero vura. Mwisa ovavata ramuvata qupise vareta ntaqi inraisaravata vareta vusa uro Iesusiva hunani uro ntoro.

⁴ Mwini uro ntovaro Iesusiva vaasa mwisa uti inraisara ntapihi sero mwiva vutu ntero mwisa sapara hiro tiqaro, Né tararave huaa hi variavo? tiro.

⁵ Mwitaa tuvata mwisa tiqata, Te Iesusira Nasaretiniaarara huaa hi varuro, tuvaro Iesusiva mwisa tiva niro tiqaro, Ne mwaa mwivama varuqo, tiro. Mwitaa tuvaro Iutaasiva Iesusira nravutaara sauquqi saari vaitiva, mwiva Iesusira rusesa sapata tiviro varura.

⁶ Iesusiva ne mwaa mwivave tuvata mwisa nriharama vita uro ntanteta aatuma seta mwatasata uto ntita varura.

⁷ Mwitaa huvaro Iesusiva qaiqaa mwisa sapara hiro tiqaro, Né tararave huaa hi variavo? tuvata mwisa qaiqaa tiqata, Iesusira Nasaretiniaararave, tuvaro ⁸ Iesusiva tiqaro, Ne vaasa ini tiva nurave. Ne mwaa mwivama varuqo. Né niara huaa hirerata nrivera, mwaa vaitinravusa qaqi saivata vuata, tiro. ⁹ Vuni Iesusiva nai qorara mwitaama tiro: Vaiti mwonravu ni miarasa sia ne mwoku raupirima sauqo, tura. Mwi quava quqaa mwivau vahiarive tiro, Iesusiva tiqaro, Mwi vaitinravusa qaqi saivata vuata, tiro.

¹⁰ Mwitaa tuvaro Pitaava nai paipanta varero nrura veva ntarau sero mwiraqotairo Kotira saiga vara mwate varu vaitisa mwisa vuniaa vaiti, mwira saiga vaiti nraato tanarani vahura teqa sora. Saiga vaiti mwira nrutu Marakusira. ¹¹ Pitaava mwira nraato teqa sovaro Iesusiva Pitaarara tiqaro, Ena paipa vara veva nai tuaqi ntuva taane. Ni qova nramari ni mianira sia nivano nraarive tirave mwitaa hiaro? tiro. (Iesusiva

namariqaa ntuva sero nai ntuqutivaro nriqa vuani inraisara varero uro qutu vuanirara tura.)

Iesusira vitaqita uro Anaasiva hunani sora

¹² Iesusiva mwitaa tuvata Romeniniaasa ntaqu vaitisa niari qiata vaiti vatama seta nruvata Iutaa porisinravuvanovata nri nteta Iesusira ntavaaqavu seta mwira rupa seta ¹³ mwira vitaqita Anaasiva hunani nraante sora. Anaasiva mwiva Kaiapaasira nriraaviva varuvaro Kaia-paasiva nroraqama vuva mwi ihiraqi Kotira nraavuqi Kotira saiqva vara mwate varu vaitisaqaa ntaqaihiqaro qiata vaitivano varura. ¹⁴ Tauraa Kaiapaasiva nai Iutaa kaanasori vaiti tiva niro tiqaro, Tiri saahaqa hireraro vaiti kuaikuvano qutu viraro suqe hianarove, tu vaitiva varurama.

Pitaava Iesusirara sia ne mwira taqaurave tura

(Matiu 26:69-70; Maaki 14:66-68; Ruku 22:55-57)

¹⁵ Iesusira Anaasiva hunani vitaqita uro sovata Saimoni Pitaavavata Iesusira nraaqiara mwovanovata Iesusira vitaqita vura. Anaasiva Pitaara vatama sero nru vaitira ntapihi sovara tiro, mwiva Iesusira vataqiro vqaro Anaasira mwaata mwatusa vutaqi viqetora. ¹⁶ Pitaava mwaagani varuvaro Iesusira nraaqiara Anaasiva ntapihi so vaitiva mwatusa vutaqi vuva uro ntantero nrima qetiana ntaqaihi varu nraasera tiva mwitero uro Pitaara vitaqiro nrima vutaqi vera sora.

¹⁷ Vutaqi sovaro Pitaava varuvaro nraase qetigaa ntaqaihi varuva mwiva tiqaro, Evata mwi vaitira nraaqiarave variaro? tuvaro Pitaava qaqaq, Ne siave, tiro. ¹⁸ Tiva sero varuvata porisinravuvanovata Anaasira saiqva vaitinravuvanovata varuvaro antovata mwisa tia quarateta tia taara hi varuvaro Pitaavavata mwini uro variqaro tia taara hi varura.

Anaasiva Iesusira saparama mwatora

(Matiu 26:59-66; Maaki 14:55-64; Ruku 22:66-71)

¹⁹ Mwiraqaatai Iesusira vitaqita mwogqi uro sovaro Kotira saiqva vara mwate varu vaitisa mwisa vuniaa vaitivano Iesusira nai nraaqiarara sapara hiro Iesusiva nraase qora tiva nu quararavata sapara huvaro ²⁰ Iesusiva nai tiva mwiro tiqaro, Ne qoqaa variqana nraase qora qua tiva nurave. Ne esaa enta nraase qora tiva nirerana lutaavano uairama vita variaraqive, mwaara nraavuqive, Kotira nraavu nronraqive, variqana ne mwisa qua tiva nurave. Sia ne uqeta sena variqana mwisa qua tiva nurave. ²¹ So naraqamave e ni sapara hi variaro? E ni qua riaasa sapara hiataarave. Ne qua tiva nusa sapara hiane. Mwisa ne tu quara riaasave, tiro.

²² Iesusiva mwitaa tuvaro porisi vaiti mwovano mwiqi varuva Iesusira nraatosai ntuteqa sero tiqaro, E sia mwitaama sera tiri nrora vaitiara qua tiane, tiro.

²³ Mwitaa tuvaro Iesusiva mwira tiva mwiro tiqaro, Ni quavano api qua vahiravauma e esaa nraase qora mwirara tiva nirata rievare. Ni quavano so vaisara e naraqamave ni qumina ntuqutira hiaro? tiro.

²⁴ Iesusiva mwitaa tiva sero mwira saantaqotaita rupatova varuvaro Anaasiva mwira titovaro Kotira nraavuqaa ntaqaihi varu vaitira Kaiapaasiva hunani viro.

Pitaava qaiqaa sia Iesusira taqaurave tura

(Matiu 26:71-75; Maaki 14:69-72; Ruku 22:58-62)

²⁵ Iesusiva mwini vuvaro Pitaava mwogqi variqaro tia taara hi varuvata mwini varusa mwira sapara hita tiqata, Evata mwira nraaqiarave variaro? tuvaro Pitaava qaqaq, Ne siave, tiro.

²⁶ Mwitaa tuvaro vaiti mwo qiata vaiti saiqā vaitivano Pitaava mwira nraato teqā sora mwira hena vaitivano Pitaarara tiqaro, Quqaa eve ne taqauqara mwisantiri satari saqavaqi variaro? tiro.

²⁷ Tuvaro Pitaava qaiqaa qaqaoqai tiro. Mwitaa tiva sero riovaro qamwanrama sero kokoraavano nruqua tura.

Iesusira Pairaativa hunani vitaqita uro sora

(Matiu 27:1-2, 11-14; Maaki 15:1-5; Ruku 23:1-5)

²⁸ Mwisā Kaiapaasira mwini seta Iesusira vita vare uro nrora vaiti kamanira nraavuqi sora. Mwisā vaasa toqāqi mwini uro nteta mwisā lutaavanora tita, sia mwira nraavuqi vera ntaraitita, mwaatani varura. Mwisā niari tiqata, Te mwira mwo mwatanaara nraavu sia sotataqi vera nteta uaqama vita mwira saara te siama vesahu nato entaraqaa omwata so nraanarave, tita. ²⁹ Mwitaa tiva seta mwisā mwaatani varuvaro Pairaativa kamanira qiata vaitivano mwisā taqareraro veva ntero mwisara tiqaro, Nara qua mwaa vaitiraqaa vaisatave tiavo? tiro.

³⁰ Pairaativa mwitaa tuvata mwisā tiqata, Mwi vaitiva sia uqa hi saiqara utitirio, te siama so e hianarani mwira vite nruratirio, tita. ³¹ Mwisā mwitaa tuvaro Pairaativa qaqao tiro, Neta mwaa mwi vaitira viteta neta luta ko quaqaa riegatama mwira ko tiate, tiro. Pairaativa mwitaa tuvata luta mwisā tiqata, Qaqao, te qumina vaiti variqata vaiti ru saanarara qua varaarorave. (Ena kamaniva variqara soma tirata mwira ru sevarave,) tita.

³² Mwisā mwitaa tuvaro Iesusiva mwisā mwitaama seta ni ru sevarave tu quava quqaa mwivau vahura.

³³ Iutaa vaiti nroranravuvano mwitaa tuvaro Pairaativa nai nraavu kamanira nraavuqi vera ntero Iesusira nraarama sovaro mwiqi vuvuro mwira sapara hiro tiqaro, Quqaa e lutaqaa ntaqaihi variaravave? tiro.

³⁴ Tuvaro Iesusiva tiqaro, Ena nraato tuserave mwi quara tiaro? Vaiti mwovano niara i tiva mwisarave e mwitaa tiaro? tiro.

³⁵ Iesusiva mwitaa tuvaro Pairaativa tiqaro, Ne Iutaa vaitive huqo? Ne sia Iutaa vaitive. Ina nravunaa lutaavanovata, Kotira saiqā vara mwate varia vaitisa mwisā nrora vaitinravuvata, mwisama i viteta mwaini nriavo. E nataama saaratave i viteta nriavo? tiro.

³⁶ Mwitaa tuvaro Iesusiva tiqaro, Ne ntaqaihiariva siama mwaa mwataraqaa vaiso. Mwiva mwaa mwataraqaa vahitirio, Iutaavano ni rupevo tita ni saara ni vataqi nrisa mwisavata ntaquatirio. So ne ntaqaihiariva siama mwatani vaiso, tiro.

³⁷ Iesusiva mwitaa tuvaro Pairaativa tiqaro, So quqaa e nraase qoraqaa ntaqaihi variaravave? tiro.

Tuvaro Iesusiva tiqaro, Quqaa ne nraase qoraqaa ntaqaihi varuvave. Mwirara riegaro ni mwatani mwatataisana nruvave. Quqaa qua osara nraase qora tiva nirerana ne mwatani tuvuvave. Quqaa quara riaariva ni quama riaanarove, tiro.

³⁸ Iesusiva mwitaa tuvaro Pairaativa tiqaro, Quqaa qua vahireraro mwira nara quave iso? tiro.

Pairaativa Iesusira satariqaa rutaate tura

(Matiu 27:15-31; Maaki 15:6-20; Ruku 23:13-25)

Pairaativa mwitaa tiva sero veva ntero Iutaa uairama vita varusa tiva niro tiqaro, Ne taqauqaro sia mwira rusaarava mwo osara mwiraqi vaiso, tiro.

³⁹ Mwitaa tiva sero mwiva tiqaro, So né mwo inraisa utuava mwitaamama vahiso. Né vesahu nato sarara omwata nraa entaraqaa ne karavu vaiti kuaiku iniara riegana mwira avantu nataurave. Sove ne mwirara riegana ini lutaqaa ntaqaihi vari vaitira avantu nataanirave? tiro.

⁴⁰ Mwita tuvata mwisa aasara ntavase nai tiva mwita tiqata, Qaqao, sia mwi vaitira avantu saane. Vaiti mwo mwira nrutu Varavaasira mwira avantu timwataane, tura. So Varavaasiva vaiti ru seqaro mwisa munima vare varu vaitiva varura.

19

¹ Mwisa mwitaa tuvaro qaiqaa Pairaativa tiqaro, Iesusira viteta uro saantaqo mwira ntuteqaate, tuvata mwira saantaqo ntuteqaateqamase vatora.

² Mwitaamase vateta Pairaatira ntaqu vaitisa uro kauvera vara seta qiata vaiti tave voti hura ququrama seta mwira qiataqaa qu mwateta nraare mpuruqa vara utu mwateta, ³ mwisa mwiva varunani uro nteta mwisa vireraqamase Iesusirara tiqata, Iutaa vuniaa vaiti mwaavao, variqarave? tiva seta sauquqo mwira viri ntuteqa sora.

⁴ Mwisa mwira mwitaama sovaro Pairaativa qaiqaa veva ntero Iutaa uairama vita varusara tiqaro, So taqaate. Ne taqauqaro sia mwiva uaqā hi saiqara utisana ne mwiraqaa qua vataariva siama vahirove. Névata mwira taqe ntapihi saate tina, ne mwira vara veva sarerave, tiro. ⁵ Mwita tuvaro Iesusiva qiataqaa kauvera qu mwateta nraare mpuruqa utu mwatora rirante veva ntovaro Pairaativa tiqaro, So taqaate, mwaa mwi vaitivave, tiro.

⁶ Mwita tuvata Kotira nraavuqi Kotira saiqā vara mwate varu vaitisa mwisa nrora vaitinravuvata, porisinravuvata, Iesusira taqeta mwisa aasara nteta tiqata, Satariqaa mwira hiritaate. Satariqaa mwira hiritaate, tita.

Mwita tuvaro Pairaativa tiqaro, Néta mwira vitaqiata uro satariqaa hiritaate. Ne taqauqaro sia mwiva uaqā hi saiqara utisana ne mwiraqaa qua vataariva siama vahirove, tiro.

⁷ Tuvata mwisa tiqata, Qaqao, mwiva te qao tiva tauna quara mwo nteqa sairave. Mwira saara mwiva qutu vuarivama variso. Mwiva tiqaro, Ne Kotira mwaquvanove tirave, tita. ⁸ Mwita tuvaro Pairaativa mwi quara riero mwoqavata aatu hiro ⁹ mwiva uto ntantero nai nraavuqi vera ntero Iesusira sapara hiro tiqaro, E tainiaavave? tiro. Tuvato Iesusiva sia qua tiraitiro, tirema varura. ¹⁰ Tirema varuvaro Pairaativa tiqaro, E nive sia qua tiva mirera utuaro? E riaane. Ne nroravano ne soma i avantu sena, ne soma tiarita i satariqaa hiritevarave, tiro.

¹¹ Mwita tuvaro Iesusiva Pairaatira tiva mwiro tiqaro, Kotiva naavuni variva sia i kepusa mweitirio, siama so e ni nraatara saaratirio. Vaiti mwovano ni vitaqiāo nrima i mwi vaitira saiqavano i uaqā hi saiqaravata nraatara saiso. Mwira saara mwi vaitiraqaa nrora quama vahianarove, tiro.

¹² Iesusiva mwitaa tuvaro Pairaativa mwiraqaatairo Iesusira avantu sarera uti varuvata Iutaa vaitinravu uairama vita varusa aasara nteta tiqata, E mwira avantu sairaro qaqi virera, e siama qiata vaiti Sisaara tofi varinarave. Mwovano nariara tiqaro ne qiata vaitima varuqo tiariva, mwiva Sisaara nravutaama varianarove, tita.

¹³ Tuvato Pairaativa mwi quara riero uro Iesusiva vitaqiāo veva ntero ko riaa vaitisa taintaqaa uro mwatasaa viro. Mwi taintava vahu mwatara nrutu nteqata, *Ori Ntavatairave*, tura. Iutaa mwatanaasa quaqitai mwirara *Kapatave*, tura. ¹⁴ Vesahu nato sarara nro entava mwira qararaa vahuvaro huari vu nriro virini qiataqaa vahuvaro Pairaativa uro mwi taintaraqaa mwatasaa viro Iutaa uairama vita varusa tiva niro tiqaro, So né néta qiata vaiti mwaa taqaate, tiro.

¹⁵ Tuvata mwisa aasara nteta tiqata, Mwira ru saane. Mwira ru saane. Mwira satariqaa hiritavaro qutu vuarive, tita.

Mwitaa tuvaro Pairaativa mwisa sapara hiro tiqaro, Ne tiarita ini qiata vaiti satariqaa niriqo ru terara ini mwutusa vahirove iso? Mwitaa tuvata Kotira saiga vara mwate varu vaitisa mwisa nrora vaitinravu tiqata, (Mwiva sia tiri qiata vaitive.) I nroravano Sisaava mwivaqai tiri qiata vaitive, tita.

¹⁶ Mwitaa tuvaro Pairaativa Iesusira satariqaa hiritate tiro, mwisa sauquqi sora.

Iesusira niriqotaita satariqaa rutora

(Matiu 27:32-44; Maaki 15:21-32; Ruku 23:26-43)

Pairaativa Iesusira mwisa nuvata mwisa mwira viteta vuvaro ¹⁷ Iesusiva nai hirite satarira vara qu varero vuvata mwisa Iesusira vita vareta mwaa quaraqitai *Qiata Mwusaari* satave tunani vita. Iutaa mwatanaasa quaqitai *Korokotaave* tunani uro ntora. ¹⁸ Uro nteta Iesusira sugu sauqu satariqaa niriqotaita ruseta vara mwaa vi mwataqi ratora. Mwira rateta vaiti mwotanavata satariqaa ru seta hini hini ratovaro Iesusiva mwitanasa vutaqaa varura.

¹⁹ Iesusira satariqaa hiritovaro Pairaativa qua gara ntuva tora uro Iesusira qiata ni satariqaa rutora. Mwataama sero gara ntuva tero:

IESUSIVA NASARETINIAAVA IUTAA VUNYAA VAITIVE, tura.

²⁰ Iesusira satariqaa hiritova Ierusalemi tataaqani vahuvatara tita, mwi mwatanaasa airivano nrima Iesusira taqeta mwi quara saara ntuva seta taqora. Mwi quara taara mwo quaqitairo gara ntuva tora. Iutaa quaqitavata, Romeni quaqitavata, Kiriki quaqitavata, gara ntuva tora.

²¹ Kotira nraavugaa ntaqaihu vaitisa mwi quara taqeta Pairaatirara qaqao tita, E sia mwirara lutaa qiata vaitive tiva sera gara ntuaatarave. E mwataama sera gara ntuaatarave. Mwi vaitiva nai tiqaro ne Iutaa qiata vaitive tirave. Mwitaa tiva sera gara ntuaane, tita.

²² Tuvaro Pairaativa qaqao tiro, Ne gara ntuva tauva so mwitaama vahiarive, tura.

Iesusira tuavaaqa ntuaqama seta varora

²³ Ntaqu vaitinravusa Iesusira satariqaa hiriteta mwiraqaataita mwira tuavaaqa vara seta erahiamuaantema ntuaqama seta ntaqu vaitisa niari erahiamuaantema variqara tita, mwovano mwoqaatairo varovaro mwovano mwoqaatairo varero mwitama seta vareta mwira siotivata vara seta taqovaro mwuaahaanta virisairo miani tuvitarova vahuvata ntaqu vaitinravusa tiqata, Sia mwaa nrahituare. ²⁴ Nrivaqe mwirara kaati voti hira santu ruararo tirigitairo mwovano mwira varaarive, tita. Mwitaa turara tiro, mwo quavano haaru qumina vasa gara ntuva tova quqaa mwivau vahura. Mwataama tiro:

Ni tuavaaqa ntuaqama seta varevarave.

Ni sioti mwuaahaanta vararerata kaati ruantema setama varevarave, tiro.

Mwitaa tura. (Sng 22:18)

Ntaqu vaitinravusa mwitaama seta Iesusira tuavaaqa ntuaqama seta varora.

Iesusiva nai nrorara tura

²⁵ Iesusira satariqaa hiritovata nraasenravuvano nrima mwi satarira tataaqa tivita varura. Iesusira nrovavata, mwira nrora nroravanovata, Kiropaasira nraata Mariaavavata, Mariaava Makataraniaavavata, mwinravusa Iesusira hirito satarira tataaqa tivita varuvaro ²⁶ Iesusiva taqovata mwira nrovavata mwira vataqi nruo vaitiva mwo Iesusiva mwirara

mwutusa ntu vaitivavata varura. Mwitanasa varuvaro Iesusiva nai nrórara tiqaro, ²⁷ Mwaa nraasevao, e mwi vaitirara ni maaquve tiane, tiro. Tiva sero nai vataqiro nruo vaitira Iesusiva mwirara mwoqama sero mwutusa ntu vaitirara tiqaro, Mwaa nraaserara ni ntorave tiane, tiro. Mwita tuvaro mwi entaraqaatairo mwira vataqiro nruo vaitiva Iesusira nrora vitaqiro nai nraavuqi sero sugema sero mwiraqaa ntaqaihiqiro vura.

Iesusiva qutu vura

(Matiu 27:45-56; Maaki 15:33-41; Ruku 23:44-49)

²⁸ Iesusiva mwi quara tiva sero mwiva ntapihi sovaro so mwira saigavano taiga vura. Mwiraqaatairo mwo qua haaru qumina vasa vukuqi gara ntuva tova quqaa mwivau vahiarive tiro, mwiva tiqaro, Ni nramari nraataa iso, tiro.

²⁹ Mwita tuvaro uaini ukavura tanaaqi vahuvaro mpuruqa viti vara sero nramariqi ntava sero saavu vitiqaa rupa sero viri Iesusira nroqi ntava tovaro ³⁰ Iesusiva ukavu nramarira mwira nrero mwiraqaatairo mwiva tiqaro, So taigama viso, tiva sero nru kinta sero nai mwaraqura titovaro vuvaro mwiva qutu viro.

Vaataaraqotairo Iesusira nraantera sata ra varora

³¹ Mwiva qutu vuvaro mwira qararaara mwaa enta vesahu nato sarara nro entava nrora enta vahianirara tita, lutaavano tiqata, Hura vaitinravu qutu vuasa mwisa mwavanta satariqaa vahiasorave tiva seta, uro Pairaati-rara tiqata, E tirata mwinravusa suqu ntuvuraa saivata mwinravusa qamwanrama qutu vivata varaqita uro quntaate, tita.

³² Tuvaro Pairaativa eo tuvata mwira ntaqu vaitinravusa nrima Iesusira tataaqa hirito vaitira suqu ntuvuraa seta uro vaiti mwo hini hiritora suqu ntuvuraa seta ³³ uro Iesusira suquvata ntuvuraa saare tita, taqovaro mwiva vaasa qutu vuvata mwisa qaqira seta sia mwira suqu ntuvuraaqura.

³⁴ Ntaqu vaitiva mwovano uro vaataaraqotairo Iesusira nraantera sata ra varero. Ra sovaro qamwanrama sero nraarevata qaqi nramarivata tuvura.

³⁵ So ne mwaa quara gara ntuva tauva mwi entara variqana ne mwi inraisara mwi inraisara tagaavarave. Quqaagama sena ne mwi inraisara mwi inraisara tagaavarave. Né mwi quarara quqaave tiate tina, ne mwi inraisara quqaagama sena taqaurara inivata tiva nuqo. ³⁶ Ntaqu vaitiva mwita hurara tiro, haaru qaqi vasa gara ntuva to quava quqaa mwivau vahura. Qara ntuva tova mwataama tiro:

Mwisa sia mwira mwusaari mwo ntuvuraa sevarave, tura. (Sng 34:20)

³⁷ Qaiqaa mwo quavata haaru gara ntuva tova tiqaro:

Mwisa niari vaataaraqotaita rute vaitira taqevare, tura. (Sek 12:10)

Iesusira quntama tora

(Matiu 27:57-61; Maaki 15:42-47; Ruku 23:50-56)

³⁸ Mwita huvaro vaiti mwovano mwira nrtu Sosepiva mwiva Arima-tianiaava mwiva tauraqama Iutaa vaitinravu nraatu aatu hiqaro quqeta seqaro Iesusira vataqiro nruo vaitiva, mwiva nrintero Pairaatirara tiqaro, Iesusira mwavanta miraqena varaqina quntaase, tiro. Tuvaro Pairaativa tiqaro, So uro vara sera quntaane, tuvaro Sosepiva uro Iesusira mwavanta itu sero varora. ³⁹ Varovaro Nikotimaasiva, mwiva haaru entaqi Iesusira uro taqova, mwivavata suqe ueri suqe hu satariva mwunta vura kuaqi tuqataase vatoravata varero. Mwira muaravano vahireraro ³⁰ kiro vahura varero Sosepisantiro viro. ⁴⁰ Mwitanasa Iesusira mwavanta vareta eqarori mpuruqa vara seta suqe mwunta vura vatama seta

mwira mwavanta gapuqama sora. Iutaa mwatanaasa vaiti qunto osarava mwitaama vahurara tita, mwitanasa mwitaa hura.

⁴¹ Iesusira hiritonani saqava tutova vahuvaro mwiqi qaraaha ori vauru tora vaiti qunte varuva mwo vahura. Mwira qaraaha vahuvaro tauraa sia vaiti mwo mwiqi quntora. ⁴² So mwira qararaara Iutaa mwatanaasa mwaara enta vahianarove tiva seta, mwi oriva qaumato vahuvata mwiqi mwitanasa Iesusira uro quntama tora.

20

Iesusiva qaqi tivura

(Matiu 28:1-8; Maaki 16:1-8; Ruku 24:1-12)

¹ So Saantega toga entaqi qaso qataa hirera huvaro Mariaava Makataraniaava Iesusira oriqi quntama toraqi nrintero taqovaro orivano qeti titatova qaqinani vara sovaro vahiho.

² Ori qaqinani vara sova vahuvaro mwi nraaseva uro ntante santero Iesusira nraaqiaratana Saimoni Pitaavavata, mwo vaiti Iesusiva mwirara mwoqama sero mwutusa ntu vaitivavata, varunani nri ntero mwitanasa tiva niro tiqaro, Mwis a origitaita Iesusira vara saavata tirennavu sia mwira varaqita vataara taqauro, tiro.

³ Mwitaa tuvata Pitaavavata, vaiti mwo mwivavata, Iesusira oriqi vatora mwiniara vita. ⁴ Mwitanasa santeta vuvaro mwovano Pitaara nraatara sero mwiva nraante oriqi Iesusira quntama tonani nrintero. ⁵ Mwiva nraane nrintero siama mwiqi viqetaraitiro, qaqinani variqaro kakataama viro vera taqovaro oriqi mpuruqagai vahura.

⁶ Mpuuqagai mwiqi vahuvaro taqero varuvaro naatiara Saimoni Pitaava nri ntero mwiva sia qaqinani variraitiro, mwiva qamwanrama oriqi vera ntero taqovaro mpuruqagai vahuvaro ⁷ mwo mpuruqavata, Iesusira qata nraavuma tova mwivavata, qumina vahiho. Iesusira ququtama to mpuruqava, mwi mpuruqava sia mwo mpuruqavata kuaaqaa vahiraitiro, nariara mwosata vahura. ⁸ Mwitaama vahuvaro vaiti mwo vaasa nruva, mwivavata mwiqi verantero mwi inraisara taqama sero mwiraqaatairo mwira vu nraato ntapihi vuvaro Iesusira osarara ntapihi sero so quqaa mwivave tiro. ⁹ Tauraa mwitanasa variqata vukuqi Iesusiva qutu viro qaiqaa qaqi tivuanirara qara ntuvato quara sia ntapihi riora. Sia ntapihiraitita, variqi vita so mwi entara mwitanasa mwi quara ntapihi sora.

¹⁰ Mwi inraisara taqeta mwitanasa nrima ntanteta mwaatani vura.

Mariaava Makataraniaava Iesusira taqora

(Maaki 16:9-11)

¹¹ Mwitanasa mwaatani vuvaro Mariaava Iesusira quntama tonani nri ntero qaqinani variqaro ntate variro. Mwiva ntate variqaro kakataama sero oriqi vera taqovata ¹² naavuniaasa taaratana mwiqi varura. Mwitanaa eqarori tuavaaqa ututotana mwovano tauraa Iesusira mwavanta-vano vahura qiatani mwatasaa viro varuvaro mwovano mwira suqutarani mwatasaa viro varura.

¹³ Mwitanasa Mariaara sapara hita tiqata, Mwaa nraasevao, nara inraisarave e ntate variaro? tuvaro mwiva tiqaro, Mwosa ni nrora vaiti mwaagaitaita vara saavana ne mwisa uro mwira saanani sia taqaraitinama, mwirara ntate varuqo, tiro.

¹⁴ Mariaava mwitaa tiva sero mwiva tuqataa viro taqovaro Iesusiva mwira mwoqani tiviro varuvaro mwiva sia mwira viri ntapihi taqaraitiro, mwo vaitivanove tiqaro varuvaro ¹⁵ Iesusiva mwira sapara hiro tiqaro,

Mwaa nraasevao, naraqamave e ntate variaro? E tararave huaa hi variaro? tiro. Iesusiva mwitaa tuvaro Mariaava nai riero tiqaro, Mwi vaitiva saqava mwaaqi ntaqaihi vari vaitivave, tiro. Tiva sero mwirara tiqaro, E mwira vitaiqira uro serava varirera, mwiqi vataugo tiraqe ne uro varaase, tiro.

¹⁶ Mwitaa tuvaro Iesusiva mwirara tiqaro, Mariaao, tiro. Tuvaro Mariaava tugataa viro Iesusira ntapihi tagero Iesusirara nai Iutaa quaqitairo tiqaro, *Raponaio*, tiro. Mwaa quaraqitai tirera, Mwaara ti variara vaitio, tiro.

¹⁷ Mariaava mwitaa tuvaro Iesusiva tiqaro, So sia niqaa tu varaane. Ne sia nena gova hinani uto ntantena vuqo, tiro. Mwitaa tiva sero mwiva mwira tiva mwiro tiqaro, E ni qatavara uro tiva niane. Niara mwitaa mwitaama sera tiva niane. Ne virini ni qovavata ini qovavata hinanive, ni mwarigavanovata ini mwarigavanovata hinani uto ntantena virerave, tiso tiane, tiro.

¹⁸ Mwitaa tuvaro Mariaava Makataraniaava nrima ntantero uro Iesusira nraaqiaranravu tiva niro tiqaro, Ne tiri nrora vaiti mwira taqauqo. Mwiva niara mwitaa mwitaama sera ini tiva niane tiso, tiro.

*Iesusiva nai nraaqiaranravu vuqaa qovarama vura
(Matiu 28:16-20; Maaki 16:14-18; Ruku 24:36-49)*

¹⁹ Mwi Saanteraqaa enta huvata Iesusira nraaqiaranravuvano Iutaa nrora vaitinravu nraatu aatu hiqata nraavu mwoqi qetinravu vahura ruteta varura. Mwisa mwiraqai varuvaro mate mwiqara Iesusiva mwisa vutaqaa qovarama viro tivi variro mwisa qua mwantero tiqaro, Ini mwutusa qihaasa hirata variate, tiro. ²⁰ Mwitaa tiva sero mwiva nai sauqu niriqotaita rutura mwisa tiva niro nai nraanterasataa rutoravata tiva nura. Tiva nuvata mwira nraaqiaranravu mwira taqovaro mwisa suqe huvata mwisa mwirara gamwateqata varura.

²¹ Varuvaro Iesusiva qaiqaa mwisa qua mwantero tiqaro, Ini mwutusa qihaasa hirata variate. Ni gova ni titaintema sena ne inivata titarerave, tiro. ²² Mwitaa tiva sero mwiva mwisaqaa nai nraaiho vuata sero tiqaro, So Kotira Mwaraqura varaate. ²³ Né vaiti mwovano Kotira qua ntega saani quara qaiqira saivera, mwi quava taiqama vuanarove. Né mwi quava qaiqi vahiarive tivera, mwi quava qaqima vahianarove, tiro. Mwitaa tura.

Tomaasiva Iesusira taqora

²⁴ Iesusiva nai nraaqiaranravu hunani nri ntero mwiqi varuvaro mwi entara mwira nraaqiara mwovano 12 nruvugitairo sia mwisavata varura. Mwira nrutu Tomaasira mwira mwo nrutu Kaapirave tura. ²⁵ Iesusiva vuvaro Tomaasiva mwitairo nri ntovata Iesusira nraaqiara mwo husa Tomaasira tiva mwita tiqata, Te nrora vaiti Iesusira taqauro, tita.

Tuvaro Tomaasiva tiqaro, Qaqao, ne sia mwira sauquqi niri rutaara nrumwaara taqena, ne sia nena sauqu mwiqi veta sena, mwira nraanterani rutaaraqivata sia nena sauqu veta saraitina, sia ini quara quqaave tianirave, tiro.

²⁶ Tomaasiva mwitaa tiva sero varuvaro kuaa uiki nritarovata Iesusira nraaqiaranravuvano varuvaro Tomaasivavata mwisa sapata variqata esaa geti ruteta mwiqi varuvaro Iesusiva qaiqaa qovarama viro mwisa vutaqaa tiviro variro mwisa qua mwantero tiqaro, Ini mwutusa qihaasa hirata variate, tiro. ²⁷ Tiva sero mwiva Tomaasirara tiqaro, So ena sauqu tutu sera ni sauquqi veta segara taqaane. Ena sauqu tutu sera ni nraanterani rutaaraqai vera segara taqaane. E niara taara nraato tinara qaiqira saane. E niara kepusaqama sera riemwaqira vuane, tiro.

²⁸ Mwitaa tuvaro Tomaasiva mwira tiva mwiro tiqaro, E ni nroravanove. E Kotiva ni mwarigavano variaro, tiro. ²⁹ Mwitaa tuvaro Iesusiva mwira tiva mwiro tiqaro, Tomaasio, e ni tagera mwiraqaatairama e niara quqaave tiaro. So tasave sia ni taqaraitita, niara quqa mwivave tisa, mwisa qamwateqata variate, tiro. Iesusiva mwitaa tura.

Mwaa vukura osarara tura

³⁰ Iesusiva nai nraaqiaranravu vuqaa variqaro nai osara tiva nireraro nrora saiga, mwo saiga mwo saiga vare varura. So ne Ioniva mwi saigara hiniqai mwaa vukuraqi qara ntuva tena. ³¹ Né Iesusirara quqaa mwiva tiri saahaqa hiariva variqaro quqaama mwiva mwariga Kotira mwaaquvano variso tiva seta mwirara kepusaqama seta riemwaqita vita esaa enta esaa enta qaqi variqi vuata tina, ne Ioniva mwaa quara qara ntuva taura.

21

Iesusira nraaqiara 7 nrauvano qaiqaa mwira taqora

¹ Mwo enta Iesusira nraaqiaranravuvano Taipiriaasi nrukaqa Kariri mwatani varuvaro Iesusiva qaiqaa mwisa vuqaa qovarama vuvata mwira nraaqiaranravuvano mwira taqora. Mwataamama mwi quava vahiro.

² Mwira nraaqiaranravu Saimoni Pitaavave, Tomaasiva mwira mwo nrutu Kaapivave, Kenaa mwatusa Kaririniaai vaiti Nataanierivave, Sepetira mwaaqutanave, Iesusira nraaqiara mwo taaratanave, mwinravusa mwini kuaaqi varura.

³ Saimoni Pitaava hini mwisara tiqaro, So ne tavusara vahe ntarera virerave, tuvata mwinravusa tiqata, Tirevata virerave, tita. Mwitaa tiva seta uto votuqi mwaari nteta mwiqi variqata entaqi tavusara vahe ntavaqi vita sia tavusa mwokuvata varora.

⁴ Mwitaamaqita vuvaro qataa hirera huvata mwisa taqovaro Iesusiva nruka tosaqaa tiviro varuvata mwisa sia mwira ntapihi taqaraitita, mwo vaitive tuvaro ⁵ mwiva mwisara tiqaro, Ni vaitituaavo, siave né tavusa vareta hiavo? tiro. Mwitaa tuvata mwisa tiqata, Sia varauro, tuvaro mwiva tiqaro, ⁶ So né vahe sauqu tanarani seta tavusa varaate, tiro.

Mwitaa tuvata mwisa vahe sauqu tanarani seqata taqovaro vahevano kuraama vuvaro tavusa airinti mwiqi vahuvaro anoma sero muaara ntovata mwisa sia so vahe pati mwaari votuqi vataaqara hura.

⁷ Mwisa sia vahe pati mwaari votuqi vataaqara huvaro Iesusiva mwoqama sero mwutusa ntu vaitiva Pitaara tiva mwiro tiqaro, Mwi vaitiva tiri nroravanove, tiro. Mwitaa tuvaro Saimoni Pitaava mwi quara riero nai sioti qaqini vatora vara utu varero votuqitairo mwaavi ntero nramariqi avuhu viro nako ru varero Iesusiva hunaniara vuvata hini mwisa votu mwiqi varura. ⁸ Nruka tosa mwiva sia niarani vahuvatara tita mwisa votuqi variqata tavusavano vahe kuraama sora ntarauqi vita tosanu uro ntoro.

⁹ Tosani votu uro vateta mwisa mwaavi nteta taqovaro tia quaratero mwiraqaa tavusa utatova vahuvaro mperetivata vahura.

¹⁰ Vahuvaro Iesusiva mwisara tiqaro, Tavusa mateqa varataara saatavata vareta nriate, tiro. ¹¹ Mwitaa tuvaro Saimoni Pitaava votuqi mwaari ntero vahe mwira ntarauqi tosanu uro sora. Tavusa airi 153 nrauvu vaheqi vahuvaro vahevano ntupema vuataara sia ntupema vura.

¹² Mwitaa huvaro Iesusiva tiqaro, So nrita sara nraate, tuvata mwisa Iesusira vaasa ntapihi seta te sauruaro tita mwisagaitairo sia mwovano Iesusirara e tavave tura. ¹³ Qaqi varuvaro Iesusiva mperetivata tavusavata mwisa nuvata nrora.

¹⁴ Iesusiva nai qutu vuraqitairo tiviro nai nraaqiaranravu vuqaa qovarama vuvata mwisa mwira taqora. Mwi entara taaramwo nani mwisa vuqaa qovara hura.

Iesusiva Pitaaravata qua tura

¹⁵ Mwisa sara nraava sovaro Iesusiva Saimoni Pitaara sapara hiro tiqaro, Saimonio, Ionira mwaaquu, quqaave mwaa vaitisa mwutusalavano niara vahiravata nraatara sero i mwutusalavano niara mwoqavata vaiso? tiro.

Mwita tuvaro Pitaava tiqaro, Nrora, quqaave. Ni mwutusalavano iara vahira mwira e ntapihi saanarave, tiro.

Tuvaro Iesusiva tiqaro, So ni sipisipi nraati sara niane, tiro.

¹⁶ Mwita tiva sero Iesusiva qaiqaa mwira sapara hiro tiqaro, Saimonio, Ionira mwaaquu, quqaave i mwutusalavano mwoqavata niara vaiso? tiro.

Tuvaro Pitaava tiqaro, Nrora, quqaave. Ni mwutusalavano iara vahira mwira e ntapihi saanarave, tiro.

Mwita tuvaro Iesusiva tiqaro, So ni sipisipiqaa ntaqaihi, tiro.

¹⁷ Mwita tiva sero Iesusiva qaiqaavata tiqaro, Saimonio, Ionira mwaaquu, quqaave i mwutusalavano mwoqavata niara vaiso? tiro.

Iesusiva taaramwo nani tiqaro, Quqaave i mwutusalavano mwoqavata niara vaiso, tuvarora tiro, Pitaara mwutusalavano uqa huvaro mwiva tiqaro, Nrora, e esaa inraisa ntapihi saanarave, Ni mwutusalavano iara vahira mwira e ntapihi saanarave, tiro.

Mwita tuvaro Iesusiva Pitaara tiqaro, So ni sipisipi sara niane, tiro.

¹⁸ Iesusiva mwita tiva sero Pitaara tiva mwiro tiqaro, Ne quqa qua tianira riaane. Tauraa e qaraaha vaiti variqara e tuavaaqa utu varera ena virera hianaraqaa vuanarave. Naatiara e naapaigama vira ena sauqu tututairaro mwovano i tuavaaqa utu mwero i vita varero sia e virera tinaraqaa vuanarove. ¹⁹ Iesusiva mwi quaraqaa ntuva sero Pitaava mwitaama sero Kotira nrutu tuaahereqaro uro qutu vuanarove, tura. Iesusiva mwi quara tiva sero mwiva Pitaara qaiqaa tiva mwiro tiqaro, E ni vataqira nriane, tiro.

Iesusiva nai nraaqiara mwora mwo qua tura

²⁰ Mwita tuvaro Pitaava tuqataa viro taqovaro Iesusiva mwoqama sero mwutusa ntu vaitiva mwitanasa naatiara nrira. Haaru mwisa entaqi sara nre varuvaro mwi vaitiva Iesusiraqaa urovi vuntuvi variqaro Iesusira sapara hiro tiqaro, Ta vaitivave i nrautaasa iara tiva nianarove, tu vaitiva nri ntovaro ²¹ Pitaava mwira taqero mwirara Iesusira sapara hiro tiqaro, Nrora, so mwaa vaitiva mo? Mwaa vaitiva nataave hianarove? tiro.

²² Pitaava mwita tuvaro Iesusiva mwira tiva mwiro tiqaro, Ne mwirara tiqana, E qaqi variqira viragena ne qaiqaa mwatani tuvuase, tiasera, mwira sia i saiqama vahianarove. E ni vataqira nriane, tiro.

²³ Iesusiva mwita tuvata mwira nraaqiaranravuvano mwi quara apiqama seta rieta mwisa mwitaama tita, Iesusiva tiqaro mwi vaitiva siama qutu vuanarove tiso, tura. Iesusiva sia mwita tiraitiro, mwiva tiqaro, Ne mwaa vaitirara tiqana e variqira viragena ne mwatani tuvuase tiasera, ne mwirara mwita tiariva siama i saiqava vahianarove, tiro. Iesusiva mwita tura.

Ioniva taiqaani quara qara ntuva tora

²⁴ So mwi entara Iesusiva qua tiva mu vaitiva ne mwaa mwivave. Ne variganama mwi inraisa mwi inraisa taqama sena mwiraqaatana mwaa quara qara ntuva taurave. Ne tu quava esaa mwi quava quqa quama iso. ²⁵ Iesusiva varo saiqara ne hini vitiqaqi qara ntuva taurave.

Esaa mwira saiqa kuaiga kuaiga gara ntuva taivera, airi vuku vahiho mwaa mwatara kuraama saanarove. So ne mwiqarama tugo.